



ИНЖИЛ

**Матфей, Марк, Лука,
Йихия щехадИ Инжил
Апостолму ганхади сычин**

Фан Китабуди Дашүө
Москва
2006

**Матфей, Марк, Лука, Йихия щехадн Инжил
Апостолму ганхадн сычин**

ISBN 5-93943-080-5

© Фан Китабуди Дашцэ, Москва, 2006

Мулў

Хуатур.....	7
Матфей шехади Инжил.....	9
Марк шехади Инжил.....	99
Лука шехади Инжил	157
Йихия шехади Инжил	249
Апостолму ганхади сычин	317
Китабушон сыхуанхади дин ёжинди хуа.....	403
Хуэйзў-вурис хуадян.....	415
Дилитў.....	423

Китабушон зандёди минзыди цыйзы:

- Мф – Матфей шехади Инжил
- Мк – Марк шехади Инжил
- Лк – Лука шехади Инжил
- Йих – Йихия шехади Инжил
- Ап – «Апостолму ганхади сычин» фубын

Хуатур

Гуйжунди нянжяму!

Зэ нимуди мянчянсы «Инжил». «Инжил» – жы йижү хуасы да грек йүяншон лэди, тади йисысы «хо щинвын». Эрса Мэсих ба гэжяди жёшүэ зу жымузя жёдини. Инжилсы Китабуди йигэ буфын. Гүранишон е тифэ Инжилдини. Ба Инжил кэ фынди сыбын фу: йибынсы Эрса Мэсихди манла Матфей щехади, йибынсы Марк щехади, йибынсы Лука щехади, зэ йибынсы Эрса Мэсихди манла Йихия щехади фу. Ба Инжилди сыбын фу зэ заму шыдэди ту йигэ быйняншон да 40 няншон до 90 няншон щели. Жыщезы фушон ду щедисы Эрса Мэсих гуэхади сынхуэ, Тади жёмын ганбан, Тади жёшүэ, Та щянхади кэрамэти, Та замузя вучонли, зэмусы Та йүанхуэй замузя хуэли.

Зэ Инжил фушон щехади йичеди сичин дусы зэ заму шыдэди ту йигэ быйняншон зэ Палестина дифоншон йүхади. Нэгэ сыхур ба Палестина дифон Римди хуоншон гуандилэ. Кэсы зэ нэтар жүди яхүти жынму ба гэжяди жёмын лян зочян йиён жуачүдини. Тамуди жёмынди гынсы Анлахү чечү Муса шынжын ги таму гигиди фалү (жы зусы Торати). Муса шынжынди йиху хошо шынжынму зозор зу фэхадисы вонху Анлахү жянхади Жын лэни. Жыгэ Жын зусы Мэсих. Та лэ ба яхүти жынмуди дуйтуму дабэни, зэмусы ба яхүти жынму жефончүлэни. Жысыма, жынмуди панвон доли. Зэ Палестина дифоншонди Вифлеем чынпуни ба жынму дынхади Мэсих сын-ёнхали. Тади минзы жёди Эрса. Та бусы ба яхүти жынму да Рим хуоншонди япыйшон жефончүлэди, Тасы ба йиче жынму да гүнахарди япыйшон жефончүлэди, жё таму йинавар ю минни. Йинви

жыгэ, Эрса Мэсих либянди Хо Шинвын до мый йигэ жыншон — бу гуан та зэ нагэ дифоншон жўди еба, бу гуан тасы са минзўди жын еба, — ду ю либулэди гуанщини.

«Апостолму ганхади сычин» фушон шеде замузя ба Хо щинвын фэ Эрса Мэсихди зэ мангэчўр чуанжэли. Лука зочян зэ Инжил фу литу дали тур, йиху зэ «Апостолму ганхади сычин» фу литу вон чян щели йиче йўхадили. Лисышон жыгэ фусы мэйир ёжинди фу, йинцысы фэ ту йищезы христианжынму замузя чунжэли Эрса Мэсихди жёшўэ, йўли заёнди нан дэ хочўли. Жыгэ фушон фэди замузя будади йибазы апостолму (зочян тамусы Эрса Мэсихди манламу) мэ кан йўан, жин зэмусы нэщезы кў-нан ба Хо щинвын фэ Эрса Мэсихди ги йигэ дун-яшонди жынму чуанжэли.

«Апостолму ганхади сычин» фусы Лука щехади. Лукасы апостол Павелди пын-ю, зэмусы кочўди тунлўжын, та гэжясы дэфу; зочян тасы йигэ ведожынлэ, йиху ба Хо щинвын фэ Эрса Мэсихди жешухали. Жыгэ фу зэ заму шыдэди ту йигэ быйняншон бонжер 60 нянди нэжинян щехади.

Инжил сыбын фу зэмусы «Апостолму ганхади сычин» фу да тур ду зусы на грек йўян щехади. Зу жыгэ еба, гуэли 20 быйнянли, ба жыщезы фу кэжя фандо йичяндүэ минзўмуди хуашонли. Жыщезы фу зэ шыжешон жынжыр лёнчян нян вон жыму зусы жынму ду шызэ щихуанди нэ нянди фу.

Ба Марк щехади Инжил на хуэйзў хуа зочян кэжя тачўлэли. Жиргэ нянжяму ба Инжил сыбын фу йиман зэмусы «Апостолму ганхади сычин» йидарни нын нян. Нянжяму дан ба замужяди хуади йисы бу жыдоли, таму нын зэ жыгэ фуди йиршонди хуадяншон канлэни.

Фанйи Китабуди Янжюйўан ги фанйижынму, бянжижынму, зэмусы ги шэлўди чўбан жыщезы фуди сыхур бонли монди жынму дуэдуэди дощедини.

Хуэйзў жынму ба жыщезы фу надо шуни нын нянли до вемушонсы йигэ да щихуан.

Фан Китабуди Дащўэ, Москва



МАТФЕЙ ЩЕХАДИ ИНЖИЛ

Эрса Мэсихди зүзү-бийбий

(Лк 3:23-38)

1 Эрса Мэсихсы Давуди хубый, Давусы Ибрашимэди хубый. Жысы Эрса Мэсихди зүзү-бийбий:

²Ибрашимэсы Исхарди дада, Исхарсы Ягүбэди дада, Ягүбэсы Яхүти дэ та дишүнмуди дада; ³Яхүтисы Фарес дэ Заради дада (тамуди мамасы Фамарь); Фарессы Есромди дада; Есромсы Арамди дада; ⁴Арамсы Аминадавди дада; Аминадавсы Наассонди дада; Наассонсы Салмонди дада; ⁵Салмонсы Воозди дада (тади мамасы Рахав); Воозсы Овидди дада (тади мамасы Руфь); Овидсы Иесейди дада; ⁶Иесейсы Даву хуоншонди дада.

Давусы Сульманэди дада (Сульманэди мама зочянсы Урияди пэе); ⁷Сульманэсы Ровоамди дада; Ровоамсы Авияди дада; Авиясы Асади дада; ⁸Асасы Иосафатди дада; Иосафатсы Иорамди дада; Иорамсы Озияди дада; ⁹Озиясы Иофамди дада; Иофамсы Ахазди дада; Ахазсы Езекияди дада; ¹⁰Езекиясы Манассияди дада; Манассиясы Амосди дада; Амоссы Иосияди дада; ¹¹Ба Израилди жынму бандо Вавилон чынпуниди сыхур, Иосиясы Иехония дэ тади дишүнмуди дада.

¹²Ба таму бандо Вавилон чынпуниди сыхур, ба Салафиил сын-ёнхали. Тади дадасы Иехония; Салафиилсы Зоровавелди дада; ¹³Зоровавелсы Авиудди дада; Авиудсы Елиакимди дада; Елиакимсы Азорди дада; ¹⁴Азорсы Садокди

дада; Садоксы Ахимди дада; Ахимсы Елиудди дада; ¹⁵Елиудсы Елезарди дада; Елезарсы Матфанди дада; Матфансы Ягүбэди дада; ¹⁶Ягүбэсы Юсуфди дада. Юсуф ба Мариам чүшонли. Мариамсы Эрсади мама (жынму ба Эрса жёди Мэсих).

¹⁷Зу жымузя суанхалэ, да Ибрашимэ шынжын датур до Даву шынжын – йиман шысы бый, да Даву до Израилди жынму бандо Вавилонди сыхур, йиман шысы бый, да жыгэ сыхур до сын-ён Эрса Мэсихди жызы йиман шысы бый.

Ба Эрса Мэсих сын-ёнхали.

(Лк 2:1-7)

¹⁸Ба Эрса Мэсих жымузя сын-ёнхали: Тади мама Мариам лян Юсуф кэжя динли хунли; кэсы жехунди зычян Мариам ба тади дўзыни да Анлахўди Рух хуэли йигэ Вавади жыдоли. ¹⁹Тади нүшү, Юсуфсы гундожын, та бу шён жё жынму гахар Мариам, щинни сылэнди ба та лёкэ, бу чү та. ²⁰Юсуф ба жыгэ вонщён сылэнди сыхур, Анлахў ба Тянщян дафалэ, фимындини ги та фэди:

– Юсуф, Даву хуоншонди хубый, ни бэ хэпа чү ниди щифур Мариамли, йинцысы та хуэди Вавасы да Анлахўди Рух лэди. ²¹Мариам сын-ён йигэ Эрзыни; ни ё ги Та нан йигэ минзыни, жыгэ минзы жёдисы Эрса; йинцысы Та ба Тади жынмуди гўнахар фоншэдэ, ба тамуди мин жүхани.

²²Жыщезы йүхади сычин дусы жё Анлахў чечү дафахади шынжынди хуа чынхани:

²³«Жыма, мэ чўмынди нүр хуэ йигэ Вавани.

Та сын-ён йигэ Эрзыни,
жынму ба Та жё Эммануилни».

Жыгэ минзыди йисысы: «Анлахў лян заму зэ йидарнини».

²⁴Юсуф жинщинлэли. Йиху та жочў Анлахў Тянщянди фынфу лян Мариам жели хунли. ²⁵Мариам ба Вава мэ сын-ёнхади сыхур, Юсуф мэ жингуэ пэеди фонзы. Мама сын-ёнли йигэ Эрвазы, Юсуф ги Та ба минзы нангили: жёчын Эрсали.

дада; Садоксы Ахимди дада; Ахимсы Елиудди дада; ¹⁵Елиудсы Елезарди дада; Елезарсы Матфанди дада; Матфансы Ягүбэди дада; ¹⁶Ягүбэсы Юсуфди дада. Юсуф ба Мариам чүшонли. Мариамсы Эрсади мама (жынму ба Эрса жёди Мэсих).

¹⁷Зу жымузя суанхалэ, да Ибрашимэ шынжын датур до Даву шынжын – йиман шысы бый, да Даву до Израилди жынму бандо Вавилонди сыхур, йиман шысы бый, да жыгэ сыхур до сын-ён Эрса Мэсихди жызы йиман шысы бый.

Ба Эрса Мэсих сын-ёнхали.

(Лк 2:1-7)

¹⁸Ба Эрса Мэсих жымузя сын-ёнхали: Тади мама Мариам лян Юсуф кэжя динли хунли; кэсы жехунди зычян Мариам ба тади дўзыни да Анлахўди Рух хуэли йигэ Вавади жыдоли. ¹⁹Тади нүшү, Юсуфсы гундожын, та бу шён жё жынму гахар Мариам, щинни сылэнди ба та лёкэ, бу чү та. ²⁰Юсуф ба жыгэ вонщён сылэнди сыхур, Анлахў ба Тянщян дафалэ, фимындини ги та фэди:

– Юсуф, Даву хуоншонди хубый, ни бэ хэпа чү ниди щифур Мариамли, йинцысы та хуэди Вавасы да Анлахўди Рух лэди. ²¹Мариам сын-ён йигэ Эрзыни; ни ё ги Та нан йигэ минзыни, жыгэ минзы жёдисы Эрса; йинцысы Та ба Тади жынмуди гўнахар фоншэдэ, ба тамуди мин жүхани.

²²Жыщезы йүхади сычин дусы жё Анлахў чечү дафахади шынжынди хуа чынхани:

²³«Жыма, мэ чўмынди нүр хуэ йигэ Вавани.

Та сын-ён йигэ Эрзыни,
жынму ба Та жё Эммануилни».

Жыгэ минзыди йисысы: «Анлахў лян заму зэ йидарнини».

²⁴Юсуф жинщинлэли. Йиху та жочў Анлахў Тянщянди фынфу лян Мариам жели хунли. ²⁵Мариам ба Вава мэ сын-ёнхади сыхур, Юсуф мэ жингуэ пæди фонзы. Мама сын-ёнли йигэ Эрвазы, Юсуф ги Та ба минзы нангили: жёчын Эрсали.

*Да дунфон лэди
суан щинщюди жынму*

2 Ба Эrsa зэ Яхүтиди Вифлеем чынпуни сын-ёнхади сы-хур, Ирод дон хуоншондини. Жигэ суан щинщюди жынму да дунфон до Иерусалим чынпуни лэ, ² вынди:

– Щинжин сын-ёнхади Яхүти жынмуди хуоншон зэ на-тарни? Вэму зэ дунфон ба Тади щинщю канжян, бэвон Та лэли.

³Ирод хуоншон ба жыгэ хуа тинжян, щинни йиха бу нанвынли; Иерусалим чынпуниди йиче жынму лян хуоншон йиён е бу нанвынли. ⁴Ирод ба йиче яхүти да ахунму лян минжынмуди йиче нянжинжынму жёдо тади мянчян, зу вынди:

– Зэ са дифоншон ба Мэсих ё сын-ёнхани?

⁵Таму хуэйдади, фэсы:

– Зэ Яхүтиди Вифлеем чынпуни, йинцысы шынжын зо-чян жымузя щели:

⁶«Яхүти дифонди Вифлеем чынпу!»

Нисы Яхүти чынпуни литуди йигэ ёжин чынпу,

йинцысы йигэ Линшу ё да ни нэтар чүлэни,

Та лин Анлахүди минжын Израилни».

⁷Ирод туту-мэмэди ба дунфон лэди суан щинщюди жынму жёдилэ, толүнди вынли, таму ба нэгэ щинщю дуэ-хур канжянли. ⁸Йиху Ирод ба таму вон Вифлеем дафачи-ли, гиди фынфу, фэди:

– Ниму чи, шыцин-шыйиди зо нэгэ суй Вавачи. Зо-жуэ, зу лэ ги вэ фэ, вэ е вонщён чи бэвон Тани.

⁹Суанжяму ба Ирод хуоншонди хуа тинба, зудёли. Зэ лү-шон зуди сыхур, таму ба дунфонни канжянди нэгэ щинщю йүанхуэй зэ гэжяди нянмянчян канжянли. Нэгэ щинщю ба таму йичыр линдо суй Вава сын-ёнхади вифыншон, цэ зан-хали. ¹⁰Суанжяму ба нэгэ щинщю канжян, гошинзали! ¹¹Та-му жинли фонзы, ба суй Вава лян Тади мама Мариам кан-жян, зу гуйха, бэвонли жыгэ Вавали. Йиху ба бобыйхэзы да-кэ, ба литуди лицин: жинзы, шоди ладан щён дэ смирна щён-ю ги Та дуангили. ¹²Анлахү ги суанжяму зэ фимындини

гиди фынфу, жё таму йүанхуэй зэ Ирод гынчян бу чи. Жо-чү Анлахүди жыгэ хуа таму да данлинди йигэ лү хуэйли гэ-жяди зүгуйли.

Вон Египет подёли

¹³Суанжяму зулиди йиху, Анлахүди Тянщян лэ, ги Юсуф зэ фимындини фэди:

– Ни челэ! Ба Вава лян Тади мама нашон вон Египет по. Ниму жүдо Египет, йичыр до Вэ ги фынфу ниму да нэтар бэ зу. Йинцысы Ирод зо Вавадини, щён ба Та дасыни.

¹⁴Юсуф хили челэ, ба Вава лян Тади мама нашон вон Египет подёли. ¹⁵Таму йичыр до Ирод вучонлиди сыхур зэ нэтар жүли. Жыгэ йүхади сычин дусы жё Анлахү чечү шынжын фэхади хуа чынхани:

«Вэ да Египет ба Вэди Эрзы жёдилэли».

Ирод ба вamu дасыли

¹⁶Ирод ба та шонли суанжямуди дон канжян, зущён залуй йиён, чишонлэли. Жо-чү суанжяму канжян нэгэ щинщюди сыхур, ба суй Вава жисы сын-ёнхади суанчүлэ, Ирод дафади жынму ба Вифлеем лян жуви дифонди эрвазыму да лён суй вон ха йиче ду дасыли. ¹⁷Нэхур Анлахү чечү Иеремия шынжын фэхади хуа чынхали:

¹⁸«Зэ Рама щёнжуонни ба дакү-луанхуди шынчи тинжанни,

Рахиль ви вamu пэфандини, юцудини.

Ба та чүанбуха, йинцысы вamu мэюли».

Да Египет хуэйлэли

¹⁹⁻²⁰Ирод вучонли. Анлахүди Тянщян зэ Египет ги Юсуф фимындини фэди:

– Ни челэ! Жыхур ни ба Вава лян Тади мама нашон вон Израил дифоншон хуэйчи, йинцысы вонщён ба жыгэ Вава дасыди нэщезы жынму кэжя вучонли.

²¹Юсуф зу ба Вава лян Тади мама нашон, хуэйли Израил дифонли. ²²Йинцысы Юсуф тинжян жыхур Архелай

дон Яхүтиди хуоншондини (Архелайди дада Ирод вучонли), та бу ган лян гэжяди жящя до нэтар чи. Йиху Анлахү йуанхуэй ги Юсуф зэ фимындини гиди фынфу жё та вон Галилея дифон чини. ²³Таму жўдо чынпунили, минзы жёди Назарет. Жыгэ йухади сычин дусы жё Анлахү чечү шынжынму фэхади хуа чынхани:

«Ба Та ё жё Назарет чынпуниди Жынни».

Йихия шынжынди чуанжё

(Мк 1:1-8; Лк 3:1-18; Йих 1:19-28)

3 Нэгэ сыхур шижынмуди Йихия доли Яхүтиди кунтан ги жынму чуанжёдини. ²Та фэди:

– Ниму жын нимуди гўнахар, ба щинни сылёнхади гэбян, йинцысы Тяншонди Гуйжя долэдыйли! ³Йихия зусы Исаяя шынжын зочян фэхади нэгэ жын. Исаяя фэли:

Йигэ жын зэ кунтанни хандини:

«Ги Жонгуйди ба лў шэлүха,

ги Та ба лўлўзы зў пинпирди!»

⁴Йихия гэжя чуанди луэтуэмоди йишон, ёни жиди пидэзы; тади чыдисы маза лян е фынми. ⁵⁻⁶Зэ Иерусалим чынпуни, Яхүти йиче дифоншон дэ Иордан хэ жуви жўди жынму йиман ду до Йихия гынчян лэ, ба таму гэжяди гўнахар жынли, ба щинни сылёнхади гэбянли, йиху зэ Иордан хэ литу жё Йихия ба таму щили. ⁷Йихия канжян хошо фарисейжынму лян саддукейжынму лэ е читоди жё Йихия ба таму щини, зу ги таму фэди:

– Нимусы дўйүө чончунму! Анлахү ги ниму дин зуйни, ниму сылёнди ба та нын дуэдёма? ⁸Ниму ё ган хо сычинни, жыгэ зущён йигэ жихо йиён, зыфэдисы ниму ба гўнахар кэжя жынли, ба нимуди гуонийн жызы е гэбянли.

⁹Ниму бэ сылён нимусы Ибращимэди хубый, зу ви жыгэ Анлахү ги ниму бу дин зуй. Вэ ги ниму фэ, Анлахү на жыщезы шыту ги Ибращимэ ба тади хубый нын зуэзохама!

¹⁰Футу кэжя зэ фу гынзы гынчян гэдини; ба мый йигэ бу же хо готянди фу ё кандё, эрдо хуэ литуни. ¹¹Вэ лян фи ба ниму щидини, жё ниму жын гэжяди гўнахарни, кэсы вэ хуту лэ йигэ Жынни. Тади лилён би вэди да, вэ бу жыгү ба

ё гуха ги Та гэ хэдэзычи. Та лян Анлахүди Рух дэ хуэ ши нимуни. ¹²Тади шуни нади луэсэзы, Та ба жунзы вон ганжин ённи, ба мыйзы шудо цонфон литу, йиху ба шынхади йизы на йүнзун бу меди хуэ шодёни.

Йихия ба Эрса зэ фи литу щили

(Йих 1:9-11; Лк 3:21-22)

¹³Нэгэ сыхур Эрса да Галилея дифоншон доли Йихия гынчян, жё Йихия ба Та зэ Иордан хэ литу щини. ¹⁴Кэсы Йихия ба Эрса дончү, зу фэди:

– Вэ ё чин Ни ши вэни, кэсы Ни лэ, зо вэдини!

¹⁵Эрса ги Йихия хуэйдади фэсы:

– Заму шүанжин зу жымужя ган! Йинцысы жымужя ганди заму ба Анлахүди кухуан зунхүни.

Йихия дайинли. ¹⁶Эрса жён да фи литу чүлэ, тян йиха кэкэли. Та йиканса: Анлахүди Рух да тяншон, зущён гэзы йиён фикалэ, луэдо Эрсашонли. ¹⁷Йиху да тяншон халэди йигэ шынчи фэди:

– Жысы Вэди щинэ Эрзы, Вэ до Ташон ю нэчинни!

Эрса шули иблисди зыянли

(Мк 1:12-13; Лк 4:1-13)

4 Йиху Анлахүди Рух ба Эрса надо кунтанни, жё Та шу иблисди зыянчини. ²Эрса зэ нэтар сышы тян, сышы вэщи фынли зэли, йиху Тади дүзы вэли. ³Иблис лэ, ги Эрса фэди:

– Ни дансы Анлахүди Эрзы, Ни ги жыщезы шыту ги йигэ фынфу, жё таму ду бянчын мэмэчи!

⁴Эрса ги та хуэйдади фэсы:

– Китабушон щедисы:

«Жын гуон бусы кочү чыди хуэни,

кэсы да Анлахүди куни чүлэди

мый йижү хуа ги жын ги сынхуэни».

⁵Иблис кэ ба Эрса линдо Иерусалимди гуйжун чынпуни, жё Та зандо Иерусалим сыди диндиршон, ⁶ги та фэди:

– Ни дансы Анлахүди Эрзы, Ни зу да жытар төхачи! Йинцысы Китабушон щедисы:

«Анлаху ви Ни ги Тади Тянщянму гиди фынфу,
жэ таму на шу ба Ни жуачуни,
бу жэ Ниди жуэ пындо шытушон».

⁷ Эrsa хуэйдади фэсы:

— Кэсы Китабушон хан щедисы:

«Ни бу жун зыян ниди Жонгуйди Анлаху».

⁸ Линйирни, иблис ба Эrsa линдо дин годи сан диршон,
жэ Та йиха ба дун-яшонди йиче гуйжа дэ тамуди миншын
канжяли. ⁹ Йиху иблис зу ги Эrsa фэди:

— Ни дан гуйха бэвон вэ, вэ зу ба жы йиче ду ги Ни ги-
гини.

¹⁰ Эrsa ги та хуэйдади фэсы:

— Иблис, ни да жытар гун! Китабушон щедисы:

«Ни гуон ё ги ниди Жонгуйди Анлаху гуйха, бэвон Тани,
гуон ё ба Та щинэни!»

¹¹ Иблис ба Эrsa лэха, зудэли; Тянщянму лэ, фусы Эрсали.

*Эrsa зэ Галилея дифоншон
зүкэ чуанжэли*

(Мк 1:14-15; Лк 4:14-15)

¹² Эrsa ба Йихия ядо банфонзыниди тинжян, зули Гали-
лея дифоншонли. ¹³ Та да Назарет чынпу зудэ, доли Капер-
наум щёнжуонни, зу жудо жытарли. Жыгэ щёнжуон зэ За-
вулон дэ Неффалим дифоншонни, зэ Галилея хэзыди бон-
гэрни. ¹⁴ Жыгэ йухади сычин дусы жэ Анлаху чечу Исаяя
шынжын фэхади хуа чынхани:

¹⁵ «Завулонди дифон лян Неффалимди дифон,
вон Галилея хэзы зуди лү,
Иордан хэди нэбонгэ,
ведожынму жуди Галилея дифон!»

¹⁶ Зэ хинан литу жуди жынму
ба да гуонлэн е канжяли;
гуонлэн ба зэ вучонди, хинанди дифоншон жуди
жынму е жо лёнли!»

¹⁷ Да нэхур дашон Эrsa зүкэ чуанжэли:

— Ниму шущин, жын гэжяди гүнахар, йинцысы Тян-
шонди Гуйжа долэдыйли!

Эрса жё сыгэ да йүди жынму гыншон Та зуни

(Мк 1:16-20; Лк 5:1-11)

¹⁸ Эрса зэ Галилея хэянзышон зуди сыхур, ба лёнгэ дишүнму, Шимэ (данлинди минзысы Пётр) лян тади шүнди Андрей вон хэзы шя вонди канжянли, тамусы да йүди жынму. ¹⁹ Эрса ги таму фэди:

– Ниму гыншон Вэ зу! Вэ ги ниму жёни, замужя ба жын, зушён да йүди йиён, жуани.

²⁰ Таму донвэр ба вон лёха, гыншон Эрса зули.

²¹ Эрса вончян зудини, кэ ба Зеведейди лёнгэ эрзы Ягүбэ лян Йихия канжянли. Таму лёнгэр лян дада йидарни зэ фичуаншон бу да йүди вондини. Эрса жё таму гыншон Та зуни. ²² Таму лёнгэр донвэр зу ба тамуди дада шындо чуаншон, гыншон Эрса зули.

Эрса зүли чуанжэли зэмусы канли бинли

(Лк 6:17-19)

²³ Эрса ба йиче Галилея дифон зужуангуэлэ, зэ мый йигэ дифонди синагога литу жётёли жынмули, ба Тяншон Гуйжяди Хо Шинвын чуанжэли, ба минжынмуди заёнди бин канхоли. ²⁴ Эрсади миншын садо Сирияди йиче дифоншонли. Йинви жыгэ, нэтар жўди жынму ба хэ заён бинди, шу заён тынкўди жынму (билүн, кэлон литу ю зонгуйди, хэ ёнгорфын бинди дэ хэ тантанзы бинди жынму) ду линдо Та гынчян лэли. Эрса ба таму йиче ду канхоли. ²⁵ Хошо да Галилея дифоншон, Шыгэ Чынпуди дифоншон, Иерусалим чынпуни, Яхўти дифоншон лян Йордан хэ нэбонгэ лэди жынму гыншон Эрса зули.

Сасы жынышды гошин?

(Лк 6:20-23)

5 Канжян хошо жынму, Эрса шонли сан, зуэхали. Тади манламу до Та гынчянли. ² Эрса жётёли тамули.

³ Эрса фэди:

– Сый ви Анлахўди Рух чүндини, таму дуэму гошин, йинцысы тамусы Тяншон Гуйжяди минжынму!

⁴ Пәфанди жынму дуэму гошин,
йинцысы Анлахұ гэжя чүан тамуни!
⁵ Мяншан пичиди жынму дуэму гошин,
йинцысы таму ба Анлахұ ги таму шұхади ди
дыйшонни!

⁶ Сый шыканди щён ган Анлахұди фынфу,
таму дуэму гошин,
йинцысы Анлахұ жё таму шинни разыни!

⁷ Шин ванди жынму дуэму гошин,
йинцысы Анлахұди шин до тамушон е вандихын!

⁸ Шин ганжинди жынму дуэму гошин,
йинцысы таму ба Анлахұ канжянни!

⁹ Зэ жынму жунжянни дин тэпинди жын
дуэму гошин,
йинцысы ба та жёчын Анлахұди эрнүни!

¹⁰ Ви ган Анлахұди фынфу шу япыйди жынму
дуэму гошин,

йинцысы тамусы Тяншон Гуйжяди минжынму!

¹¹ Ниму гыншон Вә зуди йимяр, данлинди жынму ба ниму, зущён ха жын йиён, жуни, жуй нимуни, ги ниму фә заёнди ха хуа еба, нэхур ниму дуэму гошин! ¹² Ниму шызэ ё гошинни, йинцысы зэ тяншон ги ниму шәлұхади шонхо дадихын. Зочян шынжынму лян ниму йиён е шули япыйли.

Ян зэмусы гуонлён

(Мк 9:50; Лк 14:34-35)

¹³ Ниму зэ дун-яшон ги жынму зущён ян йиён. Ян дан ба ханчи дюдёли, замужя йүанхуэй ба гэжяди ханчи дыйшонни. Ба жыгә ян зу бу сыйүнли, эрдё, жё жынму зэ жүә диха тачи.

¹⁴ Ниму зущён дун-яшонди гуонлён йиён. Нандый ба сан готуди чынпу нын гәчүма? ¹⁵ Сысый ба юдынзан дянжуәди йиху, вон гуә диха бу гә, та яндин гәдо дынзан тэзышонни, жё жяниди жынму ду канжян гуонлённи. ¹⁶ Зущён жыгә юдынзан йиён, жё нимуди гуонлён е зэ жынмуди мянчян жолён, жё таму канжян ниму

ганхади хо сычин, зу жымузя куажён ниму тяншонди Дада.

*Эрса Мэсих зэмусы
Муса шынжынди фалу*

¹⁷ Ниму бәсылён, Вә лә ба Муса шынжынди фалу лян данлин шынжынмуди жетё дадони. Вә лә бусы ба жыгә фалу дә жетё дадони, Вә лә зусы ба жыщезы фалу дә жетё ганванни. ¹⁸ Вә ги ниму фә шыхуа: тян дә ди лансандёли еба, йичыр до ахыр зэмани доләди нэйтян ба фалушонди йигә зыди гунгур хуэйжәсы йигә дяндр ду бу чүдә. ¹⁹ Йинви жыгә, сый гәжя да жыгә фалу литу ба йигә фынфу чүдә зэмусы жетё жә данлинди жынму е жымузя ган, зә Тяншон Гуйжяни нәгә жын чынха дин щёдини. Кәсы сый гәжя зунхү жыгә фалу зэмусы жетё жә данлинди жын е жымузя зунхү, зә Тяншон Гуйжяни та чынха дин видади жынни. ²⁰ Вә ги ниму фә: ниму яндин би нянжинжынму лян фарисейжынму йүөшин шыщинди ё ган Анлахүди фынфуни, нэхур ниму цә нын жин Тяншонди Гуйжяни.

Чишонләди вынти

²¹ Ниму тингуә, зочян ги жынму гили са фынфули: «Бә дасы жын. Сый дан ба жын дасыли, ги та яндин дин зуйни». ²² Кәсы Вә ги ниму фә, сый ви гәжяди дищүн чишонлә, ги нәгә жын яндин дин зуйни; сый ма гәжяди дищүн, ба дищүн жәди «Шозы», ба нәгә жын яндин ё линдо вын гуансыди дифоншонни; сый ма дищүнди: «Нисы мынту!» ги нәгә жын зә хуәкын литу дин зуйни. ²³ Зу жымузя, ни зә сыни зә шо гүрбаниди жуэзы гынчян ги Анлахү жү гүрбаниди сыхур дан ба ниди дищүн чифулиди жичеләли, ²⁴ ни зу ё ба гүрбани шындо шо гүрбаниди жуэзы гынчян, донвөр чи лян ниди дищүн ё хони, йиху кә лә, ба гүрбани ги Анлахү жүги.

²⁵ Сый дан лян ни щён да гуансыни, ниму зә лүшон зуди сыхур, ни куә лян та ё хони, бә жә та ба ни ги вынгуансыди жын жәгили, бә жә вынгуансыди жын ба ни ги яйи

жёгили, бә жё яйи ба ни ядо банфонзыли. ²⁶Вә ги ни фә шыхуа: ни йичыр ба линейрди тунчян хуанги, нэхур ни цә да банфонзыни нын чӱлэ.

Ган хӱлонди гӱнахарди вынти

²⁷Ниму тингуә зочян ю жымужяди фынфулэ: «Бә ган хӱлонди гӱнахар». ²⁸Кәсы Вә ги ниму фә: сый канжян нүжын, сылӅнди лян та фини, нэгә жын зә шинни кәжя ганли хӱлонди гӱнахар. ²⁹Ниди юбонгәди нянжин дан жё ни ган гӱнахар, ба та точӱлэ, эрдӅчи! Ниди шынзы шоли йилэзы еба, жыгә сычин би ба хуншын йиман педо хуәкын литуди хошер. ³⁰Ниди юшу дан жё ни ган гӱнахарни, ба та канхалэ, эрдӅчи! Ниди шынзы шоли йилэзы еба, жыгә сычин би хуншын йиман дедо хуәкын литуди хошер.

Лян пәе линганди вынти

(Мф. 19:9; Мк 10:11-12; Лк 16:18)

³¹Хан ю жымужяди фынфулэ: «Найигә нанжын дан лян тади пәе лингандӅ, та сянтуни ё ще йигә линганди зыдан-данзы ги пәе гигини». ³²Кәсы Вә ги ниму фә: найигә нанжын дан лян тади пәе лингандӅ (чӱгүә тади пәе ганли хӱлонди гӱнахарли), тади пәе дан йӱанхуэй чӱжя, жыгә гӱнахарди цуә зә та зочян нанжынди жязышонни. Найигә нанжын дан ба жынжя лингандӅди нүжын чүшон, та е ганли хӱлонди гӱнахарли.

Дӱ жуди вынти

³³Ниму тингуә зочян ги жынму хан гиха жымужяди фынфуму: «Ни дан дӱли жули, ни яндин ё зунхӱ ни дӱхади жуни. Ни зә Анлахӱди мянчян ба дӱхади жу яндин ё зунхӱни». ³⁴Кәсы Вә ги ниму фә: ниму йихуэй жу ду бә дӱ: на тян бә дӱ жу, йинцысы тянсы Анлахӱ зуәди вифын; ³⁵на димян бә дӱ жу, йинцысы димянсы Анлахӱ гә жүәди вифын; на Иерусалим чынпу е бә дӱ жу, йинцысы жыгәсы вида Хуоншонди чынпу; ³⁶на гәжяди ту е бә дӱ жу, йинцысы ни гәжя бу нын ба ниди туфа гәбянчын хиди хуэйжәсы быйди. ³⁷Ниму фә

хуа: «зусы зусы», «бусы бусы», ниму дан дуэйү фэ хуа, жыгэ хуасы да иблисди зуйни чўлэди.

Бо чуди вынти

(Лк 6:29-30)

³⁸Ниму тингуэ жымужяди фынфуму: «Сый ба ниди нянжин шонли, ни ба дўшманди нянжин е шондө. Сый ба ниди я дадөли, ни ба дўшманди я е дадө». ³⁹Кэсы Вэ ги ниму фэ: сый ба ни чифули, ни ги та бэ бо чу. Сый дан ба ниди ю ляншон шан йи бажон, ни нингуэчи ба зуэ бонгэ е ги та зыги! ⁴⁰Сый дан щён лян ни да гуансыни, щён ги ни дин зуй, ба ниди хансанзы нашонни, ни ги та ба готуди йишон е гиги! ⁴¹Сый дан нингүди жё ни лян та йидарни зу йичян буди лўни, ни лян та зу лёнчян буди лў! ⁴²Сый дан вын ни ё са дунщи, ни зу ги та гиги. Сый дан щён же са, ни зу ги та жеги!

«Ниму ё щинэ дўшманни»

(Лк 6:27-28; 32-36)

⁴³Ниму хан тингуэ жымужяди фынфуму: «Ни ё щинэ ниди ляншуни, ё хын ниди дўшманни». ⁴⁴Кэсы Вэ ги ниму фэ: ниму ё щинэ нимуди дўшманни; ви жуй нимуди жынму ниму ё чито Анлахўни. ⁴⁵Зу жымужя, ниму чынха тяншон Дадади эрнүмуни. Йинцысы тяншонди Дада жё жэту ги хо жын лян югўнахарди жын йимур-йиёнди ду жодини. Та ги ган ходи дэ ган хади жынму йимур-йиёнди ду щя йүдини. ⁴⁶Ниму дан гуон ба щинэ нимуди жынму щинэ, ги ниму ю са шонхони? Шуфиди жынму е жымужя гандини. ⁴⁷Ниму дан гуон ба гэжяди ляншуму вынху, ниму ганли ю са лёбудыйди сычинли? Вэдожынму е жымужя гандини! ⁴⁸Зу жымужя, жё ниму чынха дин ходи, зущён ниму тяншонди Дадади дин ходи йиён.

Сан нетиди вынти

6 Ниму ё щёщинни, бу нын зэ жынмуди мянчян фэ ниму гэжясы хэпа Анлахўди, жё данлинди жынму ба жыгэ тинжян. Ниму дан жымужя ган, нэхур ниму да тяншонди Дада гынчян ба шонхо жебушон.

²Йинви жыгә, ниму сан нетиди сыхур, бә жә жыну канжян, зушән нәшезы мунафикму зә синагога хуэйжәсы зә хонзыни зүди йиән, жә жыну ба таму канжян, куажән тамуни. Вә ги ниму фә шыхуа, жымужя ганди жыну кәжя ба гэжяди йиман шонхо жешонли. ³Ни сан нетиди сыхур бә жә ниди зуәшу жыдо ниди юшу ган сadini. ⁴Ни сан нетиди сыхур бә жә данлинди жыну жыдо; зу жымужя, тяншонди Дада ба ни мә зә жыномуди мянчян ганхади сычин канжян, яндин ги ни ги шонхони.

Замужя ё чито Анлахүни

(Лк 11:2-4)

⁵Ниму чито Анлахүди сыхур, бу нын, зушән мунафикму йиән, лә зә синагога литу хуэйжәсы зандо хонзыди лүкуршон чито Анлахүдини, жә данлинди жыну ба таму канжян. Вә ги ниму фә шыхуа, жымужя ганди жыну кәжя ба гэжяди шонхо жешонли. ⁶Кәсы ни чито Анлахүди сыхур, жиндо гэжяди фонзыни, ба мын гуанчү чито канбужянди, тяншонди Дада. Зу жымужя, тяншонди Дада ба ни мә зә жыномуди мянчян ганхади сычин канжян, яндин ги ни ги шонхони.

⁷Ниму чито Анлахүди сыхур, бу нын, зушән вәдожыну йиән, фә нәшезы мәю йисыди хуа. Йинцысы таму сыләнди: хуа дуәли, Анлахү цә ба таму нын тинжян. ⁸Ниму бә шән таму йиән. Ниму читоди зочян, тяншонди Дада кәжя жыдо ниму ё сани. ⁹Йинви жыгә, ниму жымужя чито Анлахү:

Вәму тяншонди Ада-я!

Вәму панвонди жә жыну ба Ниди гуйжун минзы ду тәнәни;

¹⁰Вәму панвонди жә Ниди Гуйжя куә до димяншон ләни.

Вәму панвонди, жә Ниди воншән зә дишон лян тяншон йиман ду юни.

¹¹Жә Ни ба вәму жиргә йитян чыди мәмә ги вәму гигини,

¹²Жә Ни фоншә вәмуди жон, зушән вәму е ба гә жонди жыну фоншәдини;

¹³ Ни бә жә вәму шу жынбучүди зыянли,
Ни ба вәму да иблисди шуни жefonчүлэ.

¹⁴ Ниму дан фоншә данлин жынмуди цуэ, ниму тяншонди Дада е фоншә нимуни. ¹⁵ Ниму дан бу фоншә данлин жынмуди цуэ, ниму тяншонди Дада е бу фоншә нимуди цуэ.

Фынзэди вынти

¹⁶ Ниму фынзэди сыхур бу нын, зушән мунафикму йиён, ба гэжяди лян зүди нежонди дэ пәфанди, жә данлинди жынму канжян ниму фын зедини. Вә ги ниму фә шыхуа, жымужя ганди жынму кәжя ба гэжяди шонхо жешонли. ¹⁷ Ни фынзэди сыхур ба ниди туфа фудә зэмусы ба лян щидә, ¹⁸ бә жә данлинди жынму канчүлэ ни фын зедини, кәсы жә гуон канбужянди тяншонди Дада жыдо. Зу жымужя, жә тяншонди Дада ба ни мә зә жынмуди мянчян ганхади сычин канжян, яндин ги ни ги шонхони.

Тяншонди фугуйсы са

(Лк 12:33-34)

¹⁹ Ниму бу нын зә дишон ги гэжя шу фугуй, йинцысы зә дишон чун кәни, дунщи недәни хуэйжәсы щюдәни, зыйкуму ба мын дакә, жинчи ту дунщини. ²⁰ Ниму зә тяншон ги гэжя шу фугуй, йинцысы нәтар мәю кә йишонди чун зэмусы дунщи е бу недә, е мәю зыйкуму да мын, жинчи ту дунщи. ²¹ Нимуди фугуй зә натар, нимуди щин е зә нәтарни.

Шынзыди дынзан

(Лк 11:34-36)

²² Ниди нянжин зушән шынзыди дынзан йиён. Ниди нянжин дан хо, хуншын зу лёнләрдини; ²³ ниди нянжин дан ха, хуншын зу хидини. Ниди нянжин литуди гуонлән дансы хинанли, нэгә хинан ю дуәму хәпа!

Ахлахү зэмусы фугуй

(Лк 16:13; 12:22-31)

²⁴ Йигә жын бу нын фусы лёнгә жүжын, йинцысы та ба йигә хынни, ба ди эргә щинәни, хуэйжәсы тәнә йигәни,

канбуче ди эргэни. Ниму бу нын йихани дон Анлахүди нү, йихани дон фугуйди нү.

²⁵Йинви жыгэ Вэ ги ниму фэ, ниму бэ цоцин гуон-йиншон ё чыди дэ хэди дунши зэмусы шынзышон чуанди йишон. Нандый чыди би сынхуэ гуйжунма? Нандый йишон е би шынзы гуйжунма? ²⁶Ниму ба тяншон фиди чёр канйихар: таму бу са жунзы, бу шу шучын, е вон цонфонзы литу бу шу, ниму тяншонди Дада ги таму ги чыдидини! Нандый ниму хан би чёр бу гуйжунма? ²⁷Ниму литу сый цоцин дун-яди дуэйү нын хуэ житянма?

²⁸Виса ниму цоцин йишондини? Ниму ба бый хэхуар канйихар, таму замузя зэ тандони жондини! Таму мэ зү хуэди, е бу фын йишон, ²⁹кэсы Вэ ги ниму фэ, зочян Сульманэ хуоншон чуанли дуэму хоканди йишон еба, ба тади йишон лян жымужяди йигэ хуар ду бу нын би-йихар! ³⁰Жиргэ тандони жончүлэди ехуар миргэ дан гандё, ба таму эрдо хуэлу литу шодёни еба, Анлахү ба таму дабанди дуэму хокан. Дан жымужяли, нандый Анлахү бу нын ба йишон ги ниму гигима? Нимуди шинфу шё-дихын!

³¹Йинви жыгэ, ниму бэ цоцин: «Жё вэму чы сани?», хуэйжэсы: «Жё вэму хэ сани?», хуэйжэсы: «Жё вэму чуан сани?» ³²Вэдожынму ду зо жыщезы дуншидини. Ниму тяншонди Дада жыдо ниму ё сани. ³³Ниму щянтунни ё зо Тяншонди Гуйжяни, ё ган Анлахүди фынфуни, йиху Анлахү зу ба жыщезы дунши ги ниму гигини. ³⁴Йинви жыгэ, ниму бэ цоцин миргэди гуонйинли; миргэ гэжя ю миргэди цоцинни. Мый йитянди цоцин ги нэйитян зу гули.

«Ги данлинди жынму бэ дин зуй»

(Лк 6:37-38, 41-42)

7 Ниму ги данлинди жынму бэ дин зуй, Анлахү ги ниму е бу дин зуй, ²йинцысы ниму замузя ги жынму дин зуйдини, Анлахү ги ниму е зу нэмузя дин зуйни. Ниму замузя лёндини, Анлахү ги ниму е зу нэмузя лённи. ³Ни виса гуон ба понжынди нянжин литуди суй

жыжызы канжянни, кэсы ба гэжяди нянжин литуди да жуонзы канбужян? ⁴Ни гэжяди нянжин литу ю да жуонзыди йимяр, ни замузя нын ги понжын фэ: «Жё вэ ба ниди нянжин литуди жыжызы точўлэ»? ⁵Нисы мунафик! Ни щянтуни ба гэжяди нянжин литуди да жуонзы точўлэ, нэхур цэ нын канжян, замузя ба жын-жяди нянжин литуди суй жыжызы точўлэни.

⁶Ба гуйжун дунци ги гу бэ ги, йинцысы таму ба ту жуангуэлэ нын ба ниму нёсыни. Ба нимуди жынжў-мано ги жў бэ пе, жё таму ба жынжў-мано зэ титизы диха бэ та.

«Ниму дан ёли, зу дыйшонни»

(Лк 11:9-13)

⁷Ниму дан ёли, зу дыйшонни; ниму дан золи, зу зо-жуэни; ниму дан коли мынли, ги ниму ба мын зу кэ-кэни, ⁸йинцысы мый йигэ ёди жын дыйшонни; мый йигэ зоди жын зожуэни; ги мый йигэ ко мынди жын ба мын кэкэни. ⁹Ниму донжунни сыйди эрзы дан ё мэмэ, нандый дада ба шыту ги гэжяди эрзы нын гигима? ¹⁰Тади эрзы дан ё йү, нандый дада ба чончун ги гэ-жяди эрзы нын гигима? ¹¹Нимусы дэжынму еба, кэсы нын ба хо дунци ги нимуди эрнүму гиги. Нандый ни-муди тяншонди Дада ба хо дунци ги чито Тади жынму бу гима?

¹²Йинви жыгэ, ниму щён жё данлин жынму ги ниму замузя ган, ниму гэжя е ё ги таму нэмузя ганни; жы зусы Муса шынжынди фалү лян йиче шынжынмуди жётё.

Зыйчя мын дэ зый лў

(Лк 13:24)

¹³Ни вон зыйчя мынни жин, йинцысы куанда мын дэ куан лў вон хуэжынни линдини зэмусы хошо жынму да жыгэ лўшон зудини. ¹⁴Зыйчя мын дэ зый лў вон йинавар-ди сынхуэни линдини зэмусы шойибанзы жынму ба жыгэ лў нын зожуэ.

Фу зэмусы тади готян

(Лк 6:43-44)

¹⁵ Ниму ё щёшин жя-шынжынмуни: таму шыншон пиди ёнди пизы, лян ён йиён, кэсы щинни жыншысы елон.
¹⁶ Ниму ба таму жочў тамуди готян нын канчўлэ. Ниму бу нын да цыязы фушон шу путо хуэйжэсы инжир. ¹⁷ Зу жы-мужя, хо фу же хо готянни; бу ходи фу бу же хо готян.
¹⁸ Хо фу бу нын же ха готян; ха фу е бу нын же хо готян.
¹⁹ Нагэ фу бу же хо готян, ба та кандё, эрдо хуэ литуни.
²⁰ Зу жымужя, ниму ба жя шынжынму жочў тамуди ганбан нын канчўлэ.

«Вэ жынбудый ниму»

(Лк 13:25-27)

²¹ Бусы мый йигэ хан Вэди: «Жонгуйди! Жонгуйди!» жын нын жин Тяншонди Гуйжя, кэсы сый ганли Вэди тяншон Дадади вонщён, нэгэ жын цэ нын жинчи. ²² Ахыр зэмани долэди нэйитян хошо жынму ги Вэ фэни: «Жонгуйди! Жонгуйди! Вэму зочян ви Ниди минзы чуанжэ Анлахўди щинвынли, е ви Ниди минзы ба хошо зонгуй ганчўчили, е щянли хошо кэрамэтили». ²³ Кэсы нэхур Вэ ги таму фэни: «Вэ ба ниму жынбудый. Ниму бусы ган Анлахўди фынфуди жынму, да жытар гун!»

Гэ фонзыди лёнгэ жын

(Лк 6:47-49)

²⁴ Йинви жыгэ, мый йигэ тин Вэди жыщезы хуади жын зэмусы ба Вэ фэхади гандини, та, зущён йигэ цунмин жын йиён, ба фонзы гэдо шытушонли. ²⁵ Щяли да йү, фи фали, фын гуали, жочў жыгэ фонзы лэли, кэсы жыгэ фонзы мё дедо, йинцысы фонгынзы зэ шытушон задини. ²⁶ Мый йигэ тинли Вэди жыщезы хуади жын зэмусы ба Вэ фэхади бу ган, та, зущён йигэ мынту йиён, ба фонзы гэдо тўдишонли; ²⁷ Щяли да йү, фи фали, фын гуади жочў жыгэ фонзы лэли, жыгэ фонзы донвэр дедо, йиман тадёли.

²⁸ Эrsa ба жыщезы хуа жёнванли. Дажя ба Тади жёщүө тинли, ду чёчихали, ²⁹ йинви Та, зушён ю чүанлиди Жын йиён, жётёдини, бу щён тамуди нянжинжынму.

Эrsa ба хэ мафынбинди жын канхоли

(Мк 1:40-45; Лк 5:12-16)

8 Эrsa да саншон вон ха хади сыхур, хошо жынму ба Та гыншонли. ² Йигэ хэ мафынбинди жын до Эrsaди мянчян лэ, гуйха, зу ги Та фэди:

– Жонгуйди! Ни дан йүанйили, ба вэди бин канхо.

³ Эrsa ба шу чынкэ, ба нэгэ жын дулийхар фэди:

– Вэ йүанйи, ни хони!

Нэгэ жынди мафынбин донвэр зу холи. ⁴ Йиху Эrsa ги та фэди:

– Ни кан, ба жыгэ сычин ги сый ду бэ фэ. Ни чи, жё яхү-тиди ахун ба ни канйихар, йиху ни ё жочү Муса шынжынди фынфу ба гүрбани ги Анлахү жүгини, жё дажя ду жыдо, ни ди шынзы кэжя ганжинли.

Эrsa ба Рим жүнгуанди хуэжиди бин канхоли

(Лк 7:1-10)

⁵⁻⁶ Эrsa доли Капернаум щёнжуонли. Йигэ Римди жүнгуан до Эrsa гынчян, зу читоди ги Та фэли:

– Жонгуйди, вэди хуэжи хэ тантанзы биндини, зэ жяни фидини. Тади бин тэ жундихын.

⁷ Эrsa зу ги та фэди:

– Вэ чи ба та канхони.

⁸ Жүнгуан хуэйдади фэсы:

– Жонгуйди! Вэ бу жыгү жё Ни жин вэди жяни. Ни гуон фэ йижү хуа, вэди хуэжи зу хони. ⁹ Йинцысы вэ е ю гуан вэди тузыни, вэ гэжя е гуан вэди донбинди жынму-дини. Вэ ги жыгэ жын дан фэ: «Ни чи!», та зу зули; вэ ги нэгэ жын дан фэ: «Ни лэ!», та зу лэли; вэ ги вэди хуэжи дан фэ: «Ни ган жыгэчи!», та зу ганни.

¹⁰ Эrsa ба жы йижү хуа тинжян, чёчихали, жуангуэлэ жо-чү гыншон Та зуди жынму фэди:

– Вә ги ниму фә шыхуа, зә Исраилди жынму литу Вә ду мә тингуә жыму дади щинфу! ¹¹Вә ги ниму фә, зыху хошо жынму да дун-яди дунбонгә дэ щибонгә ду ләни, лян Ибрашимә, Исхар, Ягүбә шынжынму йидарни цанжя Тяншон Гуйжяди янщини. ¹²Ба зочян нын чынха Тяншон Гуйжяди минжынму вон вәгуди хинанни ганчүчини; зә нэтар таму зу ба я нәди дакү-луанхүни! ¹³Йиху Эрса ги нэгә жүнгуан фәдини:

– Ни хуэйчи, жочү ниди щинфу жә ги ни чынха!

Тади хуәжи донвөр зу холи.

Эрса ба хошо бинжынму канхоли

(Мк 1:29-34; Лк 4:38-41)

¹⁴Эрса до Пётрди ज्याни лә, ба Пётрди вәмунён фашоди зә чуоншон фиди канжяли. ¹⁵Эрса ба Пётр вәмунёнди шу дулийихар, бинжын зу бу фашоли, донвөр челә, зу фусыли Эрсали.

¹⁶Хушон жынму ба йиче кәлон литу ю зонгуйди жынму ду линдо Эрсади мянчянли. Эрса ба зонгуйму на хуа ганчүчили, ба йиче бинжынму е канхоли. ¹⁷Жыщезы йүхади сычин дусы жә Анлахү чечү Исаяя шынжын фәхади хуа яндин чынхани:

«Та ба вәмуди бин быйдо гэжяди
жязышонли,
ба вәмуди тынкү даншонли».

Щён гыншон Эрса зуди жынму

(Лк 9:57-62)

¹⁸Эрса канжян хошо жынму шудо Та гынчянли, зу ги манламу гиди фынфу фәди:

– Заму вон хэзы нәбонгә фушон зу. ¹⁹Йигә нянжинжын лә до Эрса мянчян, зу фәди:

– Вуста, Ни зу нани еба, вә е гыншон Ни чини.

²⁰Эрса ги та фәди:

– Ехүзы ю дунни, чөр е ю вәвэзыни, кәсы Вә, Аданди Хубый, лян фижәди дифон ду мәю.

²¹Данлинди йигә манла ги Эрса фәди:

– Жонгуйди! Ни ги вә ги кухуан жә вә щян хуэйчи, ба вә дадади мәти сундә.

²² Эrsa ги та хуэйдади:

– Ни гыншон Вә зу, жё вонжынму гэжя сун таму вонжынмуди мэтичи.

Эrsa жё филон жўхали

(Мк 4:35-41; Лк 8:22-25)

²³ Эrsa шонли фичуанли, тади манламу гыншон Та е зу-ли. ²⁴ Мынмынди хэзыни да фын гуачелэли, филон челэ ба чуан ду гэчўли; кэсы Эrsa фижуэли. ²⁵ Манламу до Эrsa гынчан, ба Та ханцинлэли:

– Жонгуйди! Вәму нянвар вучондыйли, Ни куэ ба вәму-ди мин жюха!

²⁶ Эrsa хуэйдади фэсы:

– Виса ниму жымужя хэпадини? Нимуди щинфу щёдихын! Йиху Та челэ, ги фын лян филон гиди ниннинди фын-фу жё таму жўхани, хэзы донвөр нанвынхали.

²⁷ Дажа ду чёчиха, фэди:

– Жыгә жынсы са Жын? Фын зэмусы хэзы ду тин Тади хуадини!

Эrsa ба лёнгә кәлон литу ю зонгуйди жын канхоли

(Мк 5:1-20; Лк 8:26-39)

²⁸ Эrsa до хэзы нэбонгәди Гадарин дифоншон, ба лёнгә да фынйүанни чўлэди жын пынжянли. Зонгуй ба таму на-чўдини; таму сынзадихын, йинви жыгә сый ду да нэгә лў-шон бу ган зу. ²⁹ Таму ба Эrsa канжян, донвөр зу ханди:

– Анлахўди Эрзы, Ни лян вәму ю са щёнганни? Сыхур хан мә дони, Ни лә кәжя жәмә вәму ләлима?

³⁰ Ли таму занди нэтар бу йүанди йигә вәршон йи да чүн жў фондилэ. ³¹ Зонгуйму читоди ги Эrsa фэди:

– Ни дан ба вәму вон чў ган, Ни ба вәму дафадо жўчүн литу!

³² Эrsa ги таму фэди:

– Чи!

Зонгуйму зу да жы лёнгә жынмуди кәлон литу чўлэ, жинли нәшезы жў литули. Жы йичүн жў да саншон вон хэзыни тәхачи, зу зә фи литу ду янсыли.

³³Фонжүди жынму подёли. Таму жинли чынпуни, ба кәлон литу зочян ю зонгуйди жынму йүхади йиче сычин дуги дажя фәли. ³⁴Чынпуниди жынму ду чүлэ, кан Эрса ләли. Таму до Эрса гынчян, зу читоди жё Эрса да тамуди дифоншон зудёни.

Эрса ба хэ тантанзы бинди жын канхоли

(Мк 2:1-12; Лк 5:17-26)

9 Эрса шонли фичуан, йүанхуэй доли хэзы нэбонгә, хуэйли гэжяди чынпунили. ²Жигә жын ба йигә хэ тантанзы бинди, зэ вузышон фиди жын тәдо Эрсади мянчянли. Эрса канжян тамуди шинфу дади йимяр, зу ги хэ тантанзы бинди жын фәди:

– Вәди ва, ни фоншин! Ба ниди гүнахар фоншәли!

³Жигә нянжинжын зэ шинни сыләнди:

– Жыгә жын фә дэцэ Анлахүди хуадини!

⁴Эрса ба таму сылән жыдоха, зу вынди:

– Виса ниму шинни сылән ха сычиндини? ⁵Ниму кан, ги бинжын фә: «Ба ниди гүнахар фоншәли», хуэйжәсы фә: «Челэ зу зу». Жы лёнжү хуа литу найигә хофә? ⁶Жё ниму жыдоха: Вә, Аданди Хубый, зэ димяншон ю фоншә гүнахарди чүанлини. – Эрса зу ги хэ тантанзы бинди жын фәли:

– Ни занчелэ, ба ниди вузы нашон, зу хуэй ниди жячи!

⁷Нэгә жын зу челэ, хуэйли гэжяди жяли. ⁸Жынму ду ба жыгә сычин канжян, хәли пали. Таму зу куажён Анлахүли, йинцысы Анлахү ба жымужяди чүанли ги жынму гигили.

Эрса жё Матфей гыншон Та зунни

(Мк 2:13-17; Лк 5:27-32)

⁹Эрса да нэтар вон гуә йүанхуэй зуди сыхур ба йигә шуфиди жын, минзы жёди Матфей канжянли; та зэ шуфиди дифоншон зуәдини. Эрса ги нэгә жын фәли:

– Ни гыншон Вә зу!

Матфей зу занчелэ, гыншон Та зули.

¹⁰Эрса зэ Матфейди жяни зуәди чыфанди сыхур, хошо шуфиди жынму дэ югүнахарди жынму е ләли, лян Эрса дә

Тади манламу зуэдо йидарнили. ¹¹Ющезы фарисейжынму канжян, зу ги Эрсади манламу фэди:

– Виса нимуди Вуста лян шуфиди дэ югўнахарди жынму йидарни чыфандини?

¹²Эрса тинжян, зу фэди:

– Мэю бинди жын бу йүн дэфу, гуон хэбинди жын йүн дэфуни. ¹³Китабу литу щеди:

«Вэ щён ё нимуди шинванни,

бу ё ниму жүхади гўрбани».

Ниму ба жы йижү хуади йисы сылёнйихар, йинцысы Вэ лэ бусы ба гундожынму жёйихар, кэсы ба югўнахарди жынму ханйихар.

Виса Эрсади манламу бу фынзэ

(Мк 2:18-22; Лк 5:33-39)

¹⁴Шижынмуди Йихияди манламу йихуэй лэ до Эрса гынчян вындини:

– Вэму лян фарисейжынму чинчир фынзэдини, кэсы виса Ниди манламу бу фынзэ?

¹⁵Эрса ги таму хуэйдади фэсы:

– Шиннүшү жехунди сыхур, тади кижынму нын пэфан-ма? Яндин бу нын. Кэсы сыхур дони, ба шиннүшү да тамуди донжунни нашон зуни, зу нэхур таму ё фынзэни.

¹⁶Мэю йигэ жын ба шин будин будо жү йишоншон, йинцысы шин будин ба жү йишон челанни, жү йишонди кўлун йүэшин дани. ¹⁷Ба шинщүан путожю е вон жү пидэни бу гуан. Жымужя дан зў, шинщүан путожю ба жү пидэ нын жонланни, йинви жыгэ ба шинщүан путожю яндин ё гуандо шин пидэ литуни. Зу жымужя, ба лёнгэ дунши ду нын бохўчў.

Синагогади да йимамуди нур кэ хуэли зэмусы йигэ хэ лющебинди нүжын холи

(Мк 5:21-43; Лк 8:40-56)

¹⁸Эрса ги Йихияди манламу фэ жыщезы хуади сыхур, Яхўти синагогади йигэ да йимаму лэ, гуйдо Эрсади мянчян зу фэди:

– Вэди нүр жён вучонли. Вэ читоди жё Ни лэ, ба шу гәдо тади тушон, та йуанхуэй кә хуэни.

¹⁹ Эрса донвэр челэ, гыншон та зули; Эрсади манламу лян Эрса йидарни е зули.

²⁰ Йигә нүжын хэли шыэр нян лющеди бинли, та до Эрсади жибый хуту, ба Тади йишонди бяньбянзы дулийихар, ²¹ йинцысы та щинни сылёнли: «Вэ дан гуон ба Тади йишон дуйихар, вэди бин яндин хони!» ²² Эрса жуангуэлэ, ба жыгә нүжын канжян, зу ги та фэди:

– Вэди ва, ни фонцин! Ниди щинфу ба ниди мин жоухали! – Зу нэхур нэгә нүжынди бин холи.

²³ Эрса лэ до нэгә да йимамуди жяни, ба жынму чуй суэназыди лян дакў-луанхўди канжян, ²⁴ зу ги таму фэди:

– Ниму ду чўчи, жыгә нүр вава мә вучон, та фижуэдини!

Дажя ду цыщёли Эрсали. ²⁵ Ба жыщезы жынму ду ганчўчиди йиху, Эрса жинли нүр вавади фонзы, ба тади шу жуачў, нүр вава зу челэли. ²⁶ Ба жыгә щинвын нэтар жўди жынму ду жыдоли.

*Эрса ба лёнгә хазы
канхоли*

²⁷ Эрса да нэтар зуди сыхур, лёнгә хазы гыншон Та хандини:

– Давуди Хубый! Жё Ниди щин до вәмушон ванйихар!

²⁸ Эрса жинли фонзы, лёнгә хазы лэ до Тади мянчян, Эрса зу вынли тамули:

– Ба Вэ нын ган жыгә сычинди ниму щинфунима?

Таму хуэйдади фэсы:

– Жонгуйди! Вәму щинфуни!

²⁹ Зу жымужя, Эрса ба тамуди нянжин дулийихар, фэди:

– Жочў нимуди щинфу жё ги ниму чынха!

³⁰ Тамуди нянжин донвэр холи, нын канжян гуонлёнли. Эрса ги таму гиди ниннинди фынфу фэди:

– Ниму кан, жё сысый ду ба жыгә сычин бә жыдоли!

³¹ Кәсы таму чўчи, ба Эрса ги таму ганхади сычин ги нэгә дифонди жынму ду фэли.

Эрса ба йигэ ябжын канхоли

³²Таму чўчиди сыхур, жынму ба кәлон литу ю зонгуйди йигэ яба линдо Эрсади мянчянли. ³³Эрса ба зонгуй жән ганчўчи, нэгэ жын донвәр зу фәкә хуали. Дажя ду чөчихали, таму фәди:
– Вәму зә Израилди жынмуди донжунни мә жангуә жы-
мужяди сычин.

³⁴Кәсы фарисейжынму фәди:

– Та на гуйвонди чүанли ба зонгуй вон чў гандини!

Эрса щинни тынли минжынмули

³⁵Эрса жин мый йигэ чынпуни дә шәнжуонни, зә мый йигэ синагога литу жетөли жынмули, чуанжөли Тяншон Гуйжяди Хо Щинвынли, зәмусы ба минжынмуди заәнди бин канхоли. ³⁶Эрса ба хошо жынму канжян, щинни тын-
ли тамули, йинцысы таму зушән мәю фон-әнжынди өнчүн йиөн. ³⁷Та ги манламу фәди:

– Шучын дуөдихын, кәсы зўхуәди жынму шодихын.

³⁸Йинви жыгә, ниму ө чито шучынди Жўжынни, жө Та ба зўхуәди жынму дафачи, шу Тади шучынчини.

Шызәргә Апостолму

(Мк 3:13-19; Лк 6:12-16)

10 Эрса ба шызәргә манламу жөдо гынчян, ги таму ба зон-
гуй вон чў ганди зәмусы ба жынмуди заәнди бин вон
хони канди чүанли гигили. ²⁻⁴Жысы шызәргә Апостолди мин-
зы: ту йигәсы Щимә (Эрса ги та нанхади минзысы Пётр)
лян тади шүнди Андрей; Ягүбә лян тади шүнди Йихия, таму-
сы Зеведейди эрзы. Филипп лян Варфоломей, Фома лян шу-
фиди жын Матфей, Алфейди эрзы Ягүбә лян Фаддей, Щимә
Кананит лян Жўхүти Искарриот (та йиху ба Эрса мөчүчили).

Эрса ба шызәргә Апостолму дафазули

(Мк 6:7-13; Лк 9:1-6)

⁵Эрса ги дафачүчиди жы шызәргә жын гиди фынфу фәди:

– Зә вәдожынди дифонни бә чи, е бә жин Самария ди-
фонди чынпуни, ⁶кәсы ниму ө до Израилди жынмуди дон-

жунни чини, йинцысы таму зущён милилүди ён-чүн йиён. ⁷Ниму зудо йиче дифоншон ё чуанжэни: «Гяншонди Гуйжя куэ долэдыйли!» ⁸Ба жынмуди бин канхо, ги вучонлиди жынму ба мин йуанхуэй гиги, ба хэ мафынбинди жынму зү ганжин, ба зонгуй ганчүчи. Ниму быйкәрди жешонли, ги данлин жынму быйкәрди е гиги. ⁹Вон жябозы литу са чян ду бэ жуон; ¹⁰ниму чүкэ мынли ги лүшон са дунци ду бэ на: бэ на кудэ хуэйжэсы лён жян хансанзы, е бэ на хэ лян жүгунзы, йинцысы ги зүхуэди жын ба тади чыди яндин гигини.

¹¹Ниму до нагэ чынпуни хуэйжэсы щёнжуонни, шянту-ни ба вонщён жешу нимуди жын зожуэ, жүдо тади жяни. Йичыр до ниму да жыгэ дифоншон зу, ниму зу шындо жыгэ жяни. ¹²Ниму жин найигэ жынди жяни, зу ги та фэ: «Ги ниму панвон пиннан». ¹³Найигэ жяниди жынму дан жешу нимули, ниму чито жё Анлахүди пиннан зу шындо жыгэ жяни. Таму дан бу жешу нимули, нэхур жё ниму панвонхади пиннан йуанхуэй шындо ниму гэжяшон. ¹⁴Нэ-тарди жынму дан бу жешу нимули зэмусы ба ниму фэхади хуа бу тинли, ниму да нэгэ жяни хуэйжэсы чынпуни зукэ-ли ба ниму жүэшон зэ нэтар дэхади тў тудё. ¹⁵Вэ ги ниму фэ шыхуа, ахыр зэманиди нэйтян Содом лян Гоморра шухади зуй би нэгэ дифон нэйтян шуди ё чинщерни!

Апостолму вонху шу япыйни

(Мк 13:9-13; Лк 21:12-17)

¹⁶Ниму тинйихар! Вэ ба ниму зущён ба ён вон лон чүн литу дафадини: йинви жыгэ ниму ё, зущён чончун йиён цунминни, е ё, зущён гэзы йиён, мяншанни. ¹⁷Ниму ё щё-щин жынмуни, йинцысы таму ба ниму жуачү дин зуйни, зэ тамуди синагога литу на бянзы да нимуни, ¹⁸ви Вэди минзы ба ниму ладо линшужынмуди зэмусы хуоншонмуди мянчяни. Ниму ги таму лян вэдожынму дон Анлахүди Хо Шинвынди гүважынни. ¹⁹Жынму ба ниму шынвынди сы-хур, ниму бэ данцин фэ сани хуэйжэсы замужя ги хуэйда-ни, нэхур Анлахү гэжя ги ниму ги сыйүнди хуани, ²⁰йин-цысы ниму йиче фэди бусы гэжяди хуа, кэсы ниму тян-шонди Дадади Рух ти ниму фэдини.

²¹Жынму ба гэжяди дишүн мэчўчи жё дасыни; дада до гэжяди эрнүшон е жымужя ганни; эрнү лян гэжяди нён-лозы е жынжанни зэмусы хэ тамуди минни. ²²Ви Вэди минзы дажя хын нимуни; кэсы сый жыннэдо йиршонли, Анлахў ба тади мин жюхани. ²³Таму да жыгэ чынпуни дан жуй ниму, ниму зу подо данлинди чынпуни. Вэ ги ниму фэ шыхуа, ниму ба йиче Израилди чынпу хан мэ жуангуэ-лэди сыхур, Аданди Хубый кэжя долэни.

²⁴Манла бу нын би гэжяди вуста го, хуэжи бу нын би гэжяди жўжын да. ²⁵Йинви жыгэ, манла дан чынха зушён вуста йиёнли, та ё разыни, хуэжи дан чынха зушён жўжын йиёнли, та ё разыни. Жынму дан ба жяниди жўжын жё Веельзевул, нандый тади жяниди жынму би жўжын хошерма?

Ё хэпа сыйни?

(Лк 12:2-7)

²⁶Йинви жыгэ, ниму бэ хэпа жынмули, йинцысы мый йигэ бимиди сычин яндин щянчўлэни; жынму ба мый йигэ цонхади сычин ду жыдохани. ²⁷Ба Вэ ги ниму зэ хинанни фэхади хуа ниму ё зэ гуонлённи фэни; ба Вэ ги нимуди эрдуэни фэхади хуа ниму ё зэ фондизышон чуанжёни. ²⁸Ниму бэ хэпа нэщезы гуон ба нимуди шынзы нын дасыди жынмули, йинцысы таму ба нимуди жиншын бу нын щёмедё, кэсы ниму ё хэпа Анлахўни, гуон Та нын ба жынди шынзы лян жиншын зэ дуэзэхэ литу хэдэни. ²⁹Ба лёнгэ мачёр лян йигэ тунчян нын мэшон, кэсы дан мэю ниму тяншонди Дадади кухуан, йигэ мачёр ду дебудо дишон. ³⁰Та ба нимуди йиче туфади фур ду жыдони! ³¹Йинви жыгэ, ниму бэ хэпали, йинцысы ниму би хошо мачёр жычянди дуэ!

Зэ жынмуди мянчян фэ Эрсасы Мэсих

(Лк 12:8-9)

³²Зу жымужя, сый дан зэ жынмуди мянчян жын Вэ, нэхур Вэ зэ Тяншонди Дадади мянчян е жын нэгэ жынни; ³³сый дан зэ жынмуди мянчян ба Вэ бу жынли, нэхур Вэ зэ Тяншонди Дадади мянчян е бу жын нэгэ жын.

Тэпин зэмусы жыңжан

(Лк 12:51-53; 14:26-27)

³⁴ Ниму бә сылён Вә лә ги жыгә дун-я ба тэпин налэли. Вә мә налэ тэпин, кәсы ба жыңжан налэли. ³⁵⁻³⁶ Вә лә жә жың лян тади дада фынкәни, жә нүр лян мама фынкәни, цифур лян пәпә фынкәни; жынди дүшманму зусы та гә-жяди жяниди жынму.

³⁷ Сый дан ба гәжяди нён-лозы би Вә нәди дуә, нәгә жың бу жыгү ги Вә дон манла; сый дан ба гәжяди эрнү би Вә нәди дуә, та е бу жыгү ги Вә дон манла. ³⁸ Сый дан щён гыншон Вә зу, та ё ба гәжя вондәни зэмусы лян Вә йиён, ба гәжяди мин жүшонни*, нэхур жә та гыншон Вә зу. ³⁹ Йинцысы сый дан ба гәжяди мин бохүчү, дозэзы та ба гәжяди мин хәдәни. Кәсы сый дан ба гәжяди мин ви Вә жүги, дозэзы та ба гәжяди мин ның бохүчү.

Анлахү ги сый ги шонхони

(Мк 9:41)

⁴⁰ Сый дан жешу ниму, та зу жешу Вәдини зэмусы сый дан жешу Вә, та зу ба Вә дафаләди жешухани. ⁴¹ Сый дан ба Анлахү дафачиди шынжын, зущён шынжын йиён, жешуха, ги та яндин ги, зущён шынжын йиёнди, шонхони; сый дан ба гундожын, зущён гундожын йиён, жешуха, ги та яндин ги, зущён гундожын йиёнди, шонхони. ⁴² Булүн сый дан ги Вәди дин щё манла ба йиван ләнфи гиги жә та хә, йинцысы нәгәсы Вәди манла, Вә ги ниму фә шыхуа: нәгә жың яндин ба ги та гиди шонхо дыйшонни.

Щижынмуди Йихияди манламу кан Эrsa ләли

(Лк 7:18-35)

11 Эrsa ги шыэргә манламу ба жыщезы фынфу гиги, да нәгә дифоншон зудәли. Та доли жуvidи щёнжуонни жәтәли жыңмули зэмусы чуанжәли Анлахүди Хо Щинвынли.

* 10:38 Йижү лян йижү фангуәләди: «Та ё ба гәжяди муту шызы быйшонни».

²Шижынмуди Йихия зэ банфонзыни зуэди сыхур, ба Мэсих ганхади йиче сычин тинжян, ба гэжяди жигэ манламу дафачи, жё вын Эрсани:

– ³Ни зусы ё лэди нэгэ Жынма* хуэйжэсы вэму хан ё дын данлинди йигэни?

⁴Эрса ги таму хуэйдади фэсы:

– Ниму йуанхуэй чи, ба йиче тинжянди дэ канжянди сычин ду ги Йихия фэги. ⁵Жыма: хазыму нын канжянли, чүэзыму нын зули, хэ мафынбинди жынму ганжинли, эрдуэлунзыму тинжяндени, вучонлиди жынму кэ хуэли, чүнжынму ба Анлахүди Хо Шинвын тинжянли. ⁶Сый дан мэю шанки шинфу Вэни, та дуэму гошин!

⁷Йихияди манламу зудёди сыхур, Эрса ги хошо жынму фэли Йихия либянли:

– Ниму зочян до кунтанни зо Йихияди сыхур, вонщёнли канжян сани? Нандый ниму вонщёнли канжян дунтанни визинима? ⁸Кэсы ниму чүчи кан сачили? Нандый ниму вонщёнли канжян чуан гуйжун йишонди йигэ жынчилима? Кэсы чуан жымузя йишонди жынму зэ хуоншонди жяни жўдини. ⁹Зу жымузя, ниму чүчи кан сачили? Кан шынжынчилима? Дуйдини. Вэ ги ниму фэ, Йихия хан би шынжын вида. ¹⁰Йихия зусы зэ Китабушон тифэхэди нэгэ жын: «Анлахү фэди: „Ни кан! Вэ жё Вэ дафачиди жын ги Ни зэ туни ба лў шэлүхани“». ¹¹Вэ ги ниму фэ шыхуа, зэ жынму донжунни мэю зуцён щижынмуди Йихия йиён видади жын; кэсы зэ Тяншонди Гуйжяни дин щёди жын хан би Йихия вида! ¹²Да щижынмуди Йихияди сыхур дашон до жиргэ жызы, жынму ё сы да личини, нэхур таму цэ ба жыгэ Тяншонди Гуйжя нын чёншон. ¹³Йиче шынжынму зэ тамуди фушон лян Муса шынжын зэ тади фалү литу йичыр до Йихияди сыхур ду жёнли Тяншон Гуйжяди сычинли. ¹⁴Зу жымузя, ниму дан вонщён жешу таму зозор фэхэди йиче хуали, Йихия зусы йиху ё лэди нэгэ Илияс. ¹⁵Ю эрдуэди жынму, ду хор тин!

* ^{11:3} Жыгэ зыфэсы Мэсих.

¹⁶ Жё Вэ ба жы йибыйзы жынму на са бини? Таму зущён зэ гэшон зуэди суй вamu йиён. Таму донжунниди йибазы ги данлин йибазы фэди: ¹⁷ «Вэму ги ниму лян суэназы чуйли гошин йиндэли, кэсы ниму мэ тэ! Вэму чонли пэфан чүзыли, кэсы ниму е мэ кү!» ¹⁸ Йихия лэ, бу чы бу хэ, таму фэди: «Тади кэлон литу ю гуйни!» ¹⁹ Аданди Хубый лэ, е чыдини, е хэдини, кэсы таму фэди: «Та нэ хэ жү зэмусы нэ чы жу, Тасы шуфиди жынмуди дэ югўнахар жынмуди ляншу!» — ба Анлахўди эргили зэ Тади сычиншон шянчўлэли.

Бу щинфуди щёнжуон

(Лк 10:13-15)

²⁰ Эrsa мали нэщезы щёнжуонли (зочян Та зэ нэтар шянгуэ хошо кэрамэти), йинцысы нэщезы дифонди жынму мэ жын гэжяди гўнахар. ²¹ Эrsa фэди:

— Хоразин щёнжуон, ни дуэму кэлян! Вифсаида щёнжуон, ни дуэму кэлян! Вэ зэ ниму донжунни шянхади кэрамэти дан зэ Тир лян Сидон чынпуни шян, нэтарди жынму зозор ба цўмабу йишон чуаншон, ба хуэй садо тушон, зыфэ таму шущин, кэжя ба гэжяди гўнахар жынли! ²² Вэ ги ниму фэ шыхуа, Анлахў ги жынму дин зуйди нэйитян, Тир лян Сидон чынпуниди жынму шуди зуй би ниму шуди зуй яндин ё чинщерни! ²³ Капернаум щёнжуон! Нандый ни ныншондо тяншонма? Ни яндин дедо дуэзэхэ кын литуни! Йинцысы зэ ни жытар шянхади кэрамэти йиче дан зэ Содом щянли, Содом чынпу йичыр до жиргэ яндин хан зэни! ²⁴ Вэ зэ ги ниму фэ, Анлахў ги жынму дин зуйди нэйитян, Содом димярди жынму шуди зуй би ниму шуди зуй чинщерни!

«Сый дан фали, до Вэ гынчян лэ»

(Лк 10:21-22)

²⁵ Зу нэгэ сыхур Эrsa фэди:

— Вэди тяншонди Ада! Нисы чун дун-яди Жонгуйди! Вэ ба Ни куажёндени, йинцысы Ни бусы жё ю эргилиди, щисўэхади жынму, кэсы жё мэ щисўэхади жынму ба жыщезы сычин жыдоли. ²⁶ Дуйдини, Вэди Ада, жысы Ниди щинэди вонщён!

²⁷ Вәди Дада ба йиче ду ги Вә гигили. Чүгүә Дада, сый ду бу жыдо Эрзысы сый; чүгүә Эрзы зэмусы Эрзы вонщәнди жә сый жыдони, сый ду бу жыдо, Дадасы сый.

²⁸ Сый дан фали, данди данзы тә жунли, чин ниму ду лә до Вә гынчян: Вә жә ниму хуанхани! ²⁹ Ба Вә тоди жябанзы ниму гэжя фонщин тошон. Ниму щипцүә, замужя ги Вә дон манлани, йинцысы Вә мяншан зэмусы щинван. Зу жымужя, ниму ба нанвын зожуәни. ³⁰ Ба Вәди жябанзы ниму тошон бу нан; Вәди данзы е бу жун!

Шанбәди вынти

(Мк 2:23-28; Лк 6:1-5)

12 Зу жыгә сыхур, Эrsa шанбә нәйитян зә мыйзы дини зудини. Тади манламуди дүзы вәди йимяр, зу ба мыйсуйзы жүшон чыли. ² Жигә фарисейжынму ба жыгә канжян, зу ги Эrsa фәди:

— Ни кан! Ниди манламу шанбә нәйитян ба бу ганди сычин гандини!

³ Эrsa ги таму хуәйдади фәсы:

— Ниму мә нянгүә Даву лян тади ляншуму йидарни нә вәдүзыди сыхур, ганли са сычинлима? ⁴ Даву жинли Анлахүди сы литу, ба жүги Анлахүди мәмә гэжя чыли зэмусы ги тади ляншуму е гиди жә таму чыли, мәгуәсы ба жыщезы мәмә чүгүә яхүтиди ахун, сый ду чыбудый. ⁵ Нандый ниму мә нянгүә Мусади фалү литу шеха жыгә хуа: мый йигә шанбә яхүтиди ахун зә сыни ба шанбәди фалү пәхуәли, кәсы жымужя ганди ги таму мәю зуй? ⁶ Вә ги ниму фә, жытар ю би сы хан видади сычинни. ⁷ Китабушон Анлахү щеди: «Вә щән ё нимуди щинванни, бу ё ниму жүхади гүрбани». Ниму дан жыншыди дун жыгә хуади йисы, ниму зу бу нын ги мәю зуйди жын динзуй. ⁸ Зу жымужя Аданди Хубый зусы шанбәди Жонгуйди.

Эrsa ба шу гандәди жынди бин канхоли

(Мк 3:1-6; Лк 6:6-11)

⁹ Эrsa да жыгә дифон зудә, доли Яхүти жынмуди синагогали. ¹⁰ Нэтар ю йигә жынлэ, тади йигә шу гандәдини.

Ющезы жынму вонщёнди ги Эрса зо цуэ дин зуйни, зу вынли Эрсали:

– Жочү замуди фалү шанбэ жыйитян кан бин нынчынма?

¹¹ Эрса хуэйдади фэсы:

– Ниму донжунни сый дан луэмур ю йигэ ён, жыгэ ён дан шанбэ нэйитян дедо шын кын литу, нэгэ жын замужя банни? Нандый та ба ён бу дешонлэма? ¹² Жын би ён дуэму гуйжун! Йинви жыгэ, жочү замуди фалү шанбэ нэйитян ё ги жын ган хони.

¹³ Эрса ги нэгэ жын фэдини:

– Ни ба шу чынкэ!

Бинжын ба гэжяди шу чынкэли: тади шу зу холи, лян ди эргэ шу йиёнли. ¹⁴ Нэщезы фарисейжынму да синагога чүчиди йиху, йидарни шонлёнли, замужя ба Эрса щёмедёни.

Эрсасы Анлахү төжянхади Хуэжи

¹⁵ Эрса ба фарисейжынмуди жыгэ хуа тинжян, зу да нэтар зудёли. Хошо жынму гыншон Та е зудёли. Эрса ба таму йичеди бин ду канхоли, ¹⁶ ги таму гиди фынфу жё ги данлинди жынму бу фэ Та либян. ¹⁷ Жыгэ йүхади сычин дусы жё Анлахү чечү Исаяя шынжын фэхади хуа чынхани:

¹⁸ Ниму кан: Жысы Вэ төжянхади Хуэжи;

Вэ шинэ Тани, Вэ щихуан Тани.

Вэ ба Вэди Рух ги Та гигини.

Та ё ги йиче жынму чуанжёни: Вэ ги таму дин зуйни.

¹⁹ Та бу зынжон, е бу хухан,

зэ да хонзыни сый ду ба Тади шын тинбужян.

²⁰ Та ба ю шонди визы бу жэхуэ,

ба щүэви жүэди дыннянзы е бу чүйсы.

Та зу жымужя ганни, йичыр жё гундо дый шынлини.

²¹ Чүан дун-яшонди минжынму

ду зывон Тани!

Эрса зэмусы Веельзевул

(Мк 3:20-30; Лк 11:14-23)

²² Зу нэгэ сыхур ба кэлон литу ю зонгуйди йигэ жын (тасы хазы, хансы яба) линдо Эрсади мянчанли. Эрса ба та

канхоли, та нын фәхуали, е нын канжянли. ²³Жынму ду чөчихали, фәди:

– Нандый Та зусы Давуди Хубыйма?

²⁴Фарисейжынму ба жыгә хуа тинжян, зу фәди:

– Веельзевул гуйвонзы ги Та гиди чүанли, жә Та нын ба зонгуй вон чү ганни.

²⁵Эрса ба тамуди сылән жыдоха, зу фәди:

– Булүн нагә гуйжя дан гәжя фынкә, дан гәжя лян гәжя жынжан, нәгә гуйжя яндин лансандәни. Булүн нагә чынпу хуэйжәсы найижязы дан гәжя фынкә, дан гәжя лян гәжя дажон, таму е яндин лансандәни. ²⁶Жымужя канчи, иблис лян иблис дан дажон, та гәжя лян гәжя жынжыр фынкәни. Тади гуйжя замужя нын занчүни? ²⁷Вә дан на Веельзевулди чүанли ба зонгуйму ганчүчидини, нимуди эрзыму лян сый ба зонгуйму ганчүчидини? Йинви жыгә, нимуди эрзыму ги ниму дин зуйни! ²⁸Вә дан лян Анлахүди Рух ба зонгуй ганчүчидини, жыгә зыфәдисы Анлахүди Гуйжя кәжя доли ниму донжуннили.

²⁹Хуэйжәсы сый замужя нын жин личидади жынди жяни, ба нәгә жынди дунци чәншонни? Та яндин сянтуни җә ба нәгә личидади жын бончү, йиху ба та жяниди дунци цә нын чәнди нашонни.

³⁰Сый дан бу лян Вә зә йидарни, та зусы фандуй Вәди; сый дан бу лян Вә йидарни шужю, та зу лонфидини.

³¹Йинви жыгә, Вә ги ниму фә, мый йигә гүнахар лян фәхади дэцә хуа ду ги жынму фоншәни, кәсы сый дэцә Анлахүди Рухли, ба тади жыгә гүнахар йүнзун бу фоншә.

³²Сый дан фә дэцә Аданди Хубыйди хуали, ба тади жыгә гүнахар фоншәни; кәсы сый дан фә дэцә Анлахүди Рухди хуали, ба тади жыгә гүнахар йүнзун бу фоншә.

Фу лян тади готян

(Лк 6:43-45)

³³Фу дан хо, тади готян е хо; фу дан бу хо, тади готян е бу хо. Нагә фу хо, нагә фу бу хо, ба жыгә да готяншон нын канчүлә. ³⁴Ниму дусы дүйүә чончунму! Замужя ниму нын фә хо хуани, йинцысы нимуди щин дәдихын? Са дан

ба жынди щин жуонманли, тади зуй зу фэ сани. ³⁵Хожын да тади хо щинчонни щянчүлэ ходини; ха жын да тади ха щинчонни щянчүлэ хадини.

– ³⁶Вэ ги ниму фэ, Анлахү ги жынму дин зуйди нэйтян ви мый йи жү щянхуа жынму ду хуан жонни, ³⁷йинцысы Анлахү жочү ни гэжяди хуа ги ни дин зуйни, хуэйжэсы жочү ни гэжяди хуа ги ни бу дин зуй.

Жынму ёли чёчи жихоли

(Мк 8:11-12; Лк 11:29-32)

³⁸Жыщезы сычинди йиху жигэ нянжинжын лян фари-сейжын ги Эрса фэди:

– Вуста, вэму щён жё Ни ги вэму щян йигэ чёчиди жи-хони.

³⁹Эрса ги таму хуэйдади:

– Жы йибыйзы жынму дуэму ха, дуэму бу щинфу! Ниму ё чёчи жиходини! Чүгүэ Юнус шынжынди жихо ги ниму бу ги данлин чёчи жихо. ⁴⁰Юнус зочян замузя зэ йигэ да йүди дўзы литу занли сан тян сан вэщи, Аданди Хубый е зэ ди литу ё зан сан тян сан вэщини. ⁴¹Анлахү ги жынму дин зуйди нэйтян, Ниневия чынпуниди жынму занчелэ ги жы йибыйзы жынму ё дин зуйни, йинцысы таму ба Юнусди чуанжё тинжян, ба гэжяди гўнахар ду жынли. Ни-му кан, жытар ю би Юнус хан видади сычинни! ⁴²Анлахү ги жынму дин зуйди нэйтян, нанфонди нүхуоншон зан-челэ, ги жы йибыйзы жынму ё дин зуйни, йинцысы та да нэму йүанди дифоншон лэ, тинли Сульманэ хуоншонди ю эргилиди хуали. Ниму кан, жытар ю би Сульманэ хан ви-дади сычинни!

Зонгуй хуэйлэли

(Лк 11:24-26)

⁴³Зонгуй да жынди кэлон литу чўчи, зугүэ гантан ги гэ-жя зо хуанди вэрчили, кэсы мэ зожуэ. ⁴⁴Зу фэди: «Вэ йүанхуэй зэ зочян жўхади фонзыни чини!» Та хуэйлэ йи-канса: фонзы кундини, дажэхади, ганжиндини. ⁴⁵Нэхур та чи, ба чигэ би та хан дэди гуйму дэхуэйлэли; таму ду лэ

йидарни жўхали. Жымужя фэчи, нэгэ жынди йихуди гуон-йин би зочянди гуонйин йүэщин хани. Ги жы йибыйзы хашинчонди жынму е жымужя йүни.

Эрсади мама лян Тади дишүнму

(Мк 3:31-35; Лк 8:19-21)

⁴⁶Шүанжин Эрса лян жынму хан фэ хуадини, Тади мама лян дишүнму лэли. Таму зандо вэту, шён лян Эрса фэ хуани. ⁴⁷Нэтар йигэ жын ги Эрса фэдини:

– Ни кан, Ниди мама лян Ниди дишүнму зэ вэту зандини, шён лян Ни фэ хуани!

⁴⁸Эрса хуэйдади фэсы:

– Сыйсы Вэди мама? Сыйсы Вэди дишүнму?

⁴⁹Йиху Та ба шу жочў манламу чынкэ, зу фэди:

– Ниму кан! Жыщезы жынму зусы Вэди мама лян Вэди дишүнму! ⁵⁰Сый ба Вэ тяншонди Дада гихади фынфу ганли, та зусы Вэди дишүнму, зусы Вэди зымыйму лян Вэди мама.

Са мыйзы жунзыди бифон

(Мк 4:1-9; Лк 8:4-8)

13 Зу нэйитян Эрса да жяни чўчи, доли Галилея хэзы гынчян, зуэдо хэянзышонли. ²Хошо жынму шудо Эрса гынчянли, йинви жыгэ Та шонли фичуан, зуэхали. Жынму ду зэ хэянзышон зандини. ³Эрса на бифон ба хошо сычин ги таму фэли:

– Йигэ са мыйзы жунзыди жын чўчи са жунзычили. ⁴Та са жунзыди сыхур, ющезы жунзы дедо лў бянбяршонли; чёр фидилэ ба таму чыдэли. ⁵Ющезы жунзы дедо шытушонли, нэтар шын мёю дуэди тў; йинви жыгэ мыйзыди мёмёзы донвэр жончўлэли. ⁶Кэсы жэту чўлэ ба мёмёзы сэшонли. Хан мэ заха гынгынзыди мёмёзы донвэр гандэли. ⁷Ющезы жунзы дедо цыязы литули, цыязы жончелэ, ба мёмёзы жячўли. ⁸Хан ющезы жунзы дедо хо тўшонли, таму жонди да, е жешы, гиди лёншы е дуэ: юди жунзы гили йибый лэзы, юди гили люшы лэзы, юди гили саншы лэзыди шучын. ⁹Ю эрдуэди жынму, ду хохор тин!

Эрса ги манламу пэщэли са жунзы бифонди йисыли

(Мк 4:10-20; Лк 8:9-15)

¹⁰ Манламу до Эрса гынчян, вынли:

– Виса Ни ги таму на бифон фэдини?

¹¹ Эрса хуэйдади фэсы:

– Ниму ба Тяншон Гуйжяди бимиди сычин йиче ду жы-
доха, кэсы таму бу жыдо. ¹² Йинцысы сый юли, ги та хан
тянни, жё та дуэйү хан юни; сый мэюли, ба та юди нэйи-
дяндяр е дуэдэни. ¹³ Йинви жыгэ, Вэ на бифон ги таму фэ-
дини, йинцысы таму канли, кэсы канбужян; тинли, кэсы
тинбудун, е бу минбый. ¹⁴ Зу жымузя, жё Анлахү чечү
Исайя шынжын зозор фэхади хуа ги тамушон чынхани:

«Жыйищезы минжын тинни,
кэсы бу минбый,

лян нянжин канни,
кэсы канбужян,

¹⁵ йинцысы жыгэ минжынмуди щин ниндэли;
таму ба эрдуэ сыйчүли,
ба нянжин бичүли.

Дан бусы жымузя,
нэхур тамуди нянжин яндин канжянни,
эрдуэ яндин тинжянни,
щин яндин дунни,
таму жуангуэлэни,
Анлахү зу ба таму канхони».

¹⁶ Эрса ги манламу кэ фэди:

– Ниму дуэму гошин, йинцысы нимуди нянжин кан-
жянни, эрдуэ е тинжянни! ¹⁷ Вэ ги ниму фэ шыхуа, хошо
шынжынму дэ гундожынму вонщэни ба ниму йиче кан-
жянди канжянни, кэсы таму мэ канжян; ба ниму йиче
тинжянди тинни, кэсы таму мэ тинжян.

¹⁸ Ниму ба жыгэ са жунзы бифонди йисы тинйихар: ¹⁹ сый
ба Тяншонди Гуйжяди щинвын тинжян, кэсы бу минбый,
иблис донвэр лэ, ба Анлахү ги тади щинни сахади щинвын
дуэдэни. Жыгэ жын зущэ дедо лү бянбяршонди жунзы
йиён. ²⁰ Сый ба щинвын тинжян, донвэр гошинди жешуха,

та зущён дедо шытушонди жунзы йиён, ²¹кэсы тади шинни мәю гындынзы, та бусы чонйүнди; йинви Анлахүди шинвын шу кўнан хуэйжэсы жынму ба та жуйди сыхур, та донвэр зу фанлян бу жын жыгэ шинвын. ²²Хан юди жын зущён дедо цыязы литуди жунзы йиён, та ба Анлахүди шинвын тинли, кэсы дун-яди цошин, шинэ фугуйди ба Анлахүди шинвын жычүли, та зу бу ги шучын. ²³Тинли зэмусы дунли, минбый Анлахүди шинвынлиди жын зущён дедо хо тўшонди жунзы йиён. Зусы та жончелэ йиху, ги шучынни: юди жын гиди йибый лэзы, юди жын гиди люшы лэзы, юди жын гиди саншы лэзы.

Зонцо либянди бифон

²⁴Эрса хан ги таму жёнли данлинди йигэ бифон:

– Тяншонди Гуйжя зущён йигэ жын ба хо жунзы садо гэжяди тандо литу йиён. ²⁵Дажя фижуэди сыхур дўшман лэ, ба зонцоди зыр садо мыйзыди донжунни, зудёли. ²⁶Мыйзыди лю мёмёр жончелэли, юли мыйсуйзыли, зонцо е чўлэли. ²⁷Хуэжиму до тандоди жўжын гынчян фэди: «Жонгуйди, ни зочян сали хо жунзыли, хазыр тандони жонди хошо зонцо. Жыщезы зонцо да нани лэди?» ²⁸Жўжын хуэйдади фэсы: «Жысы дўшман ганхади». Хуэжиму зу вынди: «Ни щён жё вэму ба зонцо бадёнима?» ²⁹Та хуэйдади: «Бу, бэ ба! Йинцысы ниму дан ба цо бадё, хэпа ба мыйзы лян гындынзы е бадёни. ³⁰Жё зонцо лян мыйзы йидарни жончи! Гэ мыйзыди сыхур вэ ги зўхуэди жынму ги фынфуни: сянтуни ба зонцо бадё, шудо йидарни бончў, йиху ба та шодё. Ба мыйзы шудо вэди цонфон литу».

Жемэзы жунзы либянди бифон

(Мк 4:30-32; Лк 13:18-19)

³¹Эрса хан ги таму жёнли данлинди йигэ бифон:

– Тяншонди Гуйжя зущён йигэ жемэзы жунзы йиён: йигэ жын ба жемэзыди жунзы садо тандонили. ³²Жыгэ жунзы би данлинди йичеди жунзы ду щё еба, жызы гуэли, жыгэ жунзы жончелэ, би йиче цэфу ду да, та е чынха йигэ фули, тяншонди чёчёрму зэ тади жыжызышон дянти вэвэзыли.

Фә жәмян либянди бифон

(Лк 13:20-21)

³³ Эrsa хан жәнли данлинди йигә бифон:

– Тяншонди Гуйжя зушән жәмян йиән: йигә нүжын ба жыгә жәмян налэ лян сышыгә килоди быймян хуәдо йидарнили, жә жыгә быймян ду чичелэни.

Виса Эrsa ги жынму на бифон фәли

(Мк 4:33-34)

³⁴ Эrsa ба жы йиче сычин на бифон ги жынму фәли, чү-гуә на бифон Эrsa ги таму са ду мә фә, ³⁵ зу жымужя, жә Анлахү чечү шынжын фәхади хуа яндин чынхани:

«Вә на бифон ги таму фәни,
да Анлахү зуэзо дун-яди нәйитян дашон,
ба йиче цонхади сычин Вә ги таму фәни».

Эrsa пәщәли зонцоди бифонли

³⁶ Эrsa ба жынму ләкә, жинли фонзынили. Тади манламу доли Тади мянчян вынди:

– Чин Ни ги вәму ба зонцо зә тандони жонди жыгә бифон пәщәйихар.

³⁷ Эrsa хуәйдади:

– Са хо жунзыди жынсы Аданди Хубый; ³⁸ тандосы жыгә дун-я; хо жунзысы Тяншон Гуйжяди минжынму; зонцосы иблисди минжын. ³⁹ Саха зонцо зырди нәгә дүшман зусы иблис; гә мыйзыди сыхур жыгәсы ахыр зэманиди сыхур; гә мыйзыди жынмусы Тянщянму. ⁴⁰ Замужя ба зонцо бадини зәмусы на хуә шодини, ахыр зәмани нәйитян е йү жымужяди сычинни. ⁴¹⁻⁴² Аданди Хубый дон Хуоншонди сыхур, Та ба гәжяди Тянщянму дафачи, ба сый зочян жөли данлинди жынму жә таму ганли гүнахарли зәмусы сый ганли бу гундо сычинли, ба нәщезы жынму ду жуачү, эрдо хуәлу литуни. Зә нәтар таму зу ба я нәди дакү-луанхүни!

⁴³ Нәхур гундожынму зә тяншон Дадади Гуйжяни, зушән жәту щянчүләди гуонлән йиән, жони. Ю эрдуәди жынму, ду хохор тин!

Тяншонди Гуйжя щён са?

⁴⁴Тяншонди Гуйжя зущён цондо тандониди бобый йиён. Йигэ жын ба жыгэ бобый зожуэ, йуанхуэй ба та мэхали, гошинди, ба гэжя ю дуэшоди дунци йиче ду мэдэ, чи ба нэ йикуэ тандо мэшонли.

⁴⁵Тяншонди Гуйжя хан зущён йигэ мэмэжын зо дин гуйжун жынжў-мано йиён. ⁴⁶Йихуэй та ба йигэ нэму жүнди жынжў-мано зожуэ, та ба гэжя ю дуэшо дунци йиче ду мэдэ, чи ба нэгэ жынжў-мано мэшонли.

⁴⁷Тяншонди Гуйжя хан зущён дайүди вон йиён, щядо хэзы литу зэмусы ба заёнди йү жуачўли. ⁴⁸Вон манли йиху, дайүди жынму ба та лашонлэ, зуэдо хэянзышон, ба хо йү шудо тунтунзы литу, ба буходи эрдэли. ⁴⁹Ахыр зэмани нэ-йитян е йү жымужяди сычинни: Анлахў ба Тянщянму дафалэ, нэхур да хо жынмуди донжунни ба югўнахарди жынму фынчўлэ, ⁵⁰эрдо хуэлу литуни. Зэ нэтар, таму зу ба я нэди дакў-луанхўни!

Щинди зэмусы жюди

⁵¹Эрса вынли манламули:

– Жыщезы хуа ниму ду дуннима?

Таму хуэйдади фэсы:

– Дунни!

⁵²Эрса зу ги таму фэди:

– Зу жымужя, мый йигэ нянжинжын дан чынха Тяншон Гуйжяди манла, та зущён йигэ жўжын йиён, да гэжяди цонфон литу ба щин лян жю дунци ду начўлэдини.

Ба Эрса зэ Назарет чынпуни мэ жын

(Мк 6:1-6; Лк 4:16-30)

⁵³Эрса ба жыщезы бифон фэван, да нэтар зудэли. ⁵⁴Та хуэйлэ, доли гэжяди чынпуни, зэ синагога литу жётёли жынмули. Тинжян Эрсади чуанжэ, жынму ду жонхали, таму фэсы:

– Жыгэ Жын ба жымужяди эргили дэ щян кэрамэтиди чуанли да нани дыйшонли? ⁵⁵Нандый Та бусы нэгэ мужёнди

эрзыма? Нандый Та мамади минзы бусы Мариамма? Нандый Ягүбэ, Юсуф, Шимэ дэ Яхүти ду бусы Тади шүндима? ⁵⁶Мэли Тади зымыйму мэ зэ заму жытар жұма? Жыгэ Жын ба жы йиче бынсы да нани дыйшонли?

⁵⁷Зу жымужя жынму мэ жын Эрса. Эрса ги таму фэди:

– Шынжын чүгүэ зэ гэжяди чынпуни, зэ тади жяни, зэ са дифон ду ю жынмуди тэнэни.

⁵⁸Таму мэю шинфуди йимяр, Эрса зэ нэтар щянчүлэди кэрамэти шын бу дүэ.

Йихия шынжынди вучон

(Мк 6:14-29; Лк 9:7-9)

14 Зу нэгэ сыхур Галилея дифоншонди Ирод хуоншон* ба Эрсади миншын доли мангэчүрди тинжян, ²зу ги гэжяди бонбанму фэди:

– Жыгэ Жын зусы щижынмуди Йихия; Та вучонли йиху, кэ хуэли, йинви жыгэ Та ю лилён щян жыщезы кэрамэти.

³Зочян Ирод ви тади шүнди Филиппди пэе, минзы жёди Иродиада, гиди фынфу, жё ба Йихия жуачү, бонха, ядо банфонзы литуни, ⁴йинцысы Йихия ги Ирод фэгуэ:

– Ни бу нын ба Иродиада чүшон, йинцысы жысы харам.

⁵Ирод щён ба Йихия дасыни, кэсы хэпали минжынли, йинцысы таму ду шинфу Йихиясы шынжын. ⁶Ирод гуэ тади сынжыди нэйитян, Иродиадади нүзы зэ янщишон төли төвули. Ирод ба жыгэ каншонли. ⁷Ирод зу ги жыгэ нүр вава дўжуди фэли:

– Ни ё сани, вэ зу ги ни ги сани.

⁸Нүзы жочү тади мама Иродиадади чўэсуэ фэди:

– Чин ни хазыр зу ба щижынмуди Йихияди ту гэдо панзышон налэ, ги вэ гиги!

⁹Ирод хуоншон ба нүр вавади хуа тинжян пэфанхали, кэсы та зэ кижынмуди мянчян кэжя дўли жули, йинви жыгэ та гиди фынфу, жё ба нүр вава ёди нэгэ дунци налэни. ¹⁰Ирод ба гэжяди жынму дафачи, жё таму зэ банфонзыни ба Йихияди ту кандё, ¹¹йиху гэдо панзышон, ги нүр вава гигили; нүзы ба

* ^{14:1} Жыгэ Ирод хуоншонсы Вида Ирод хуоншонди эрзы (кан Мф 2:1).

Йихияди ту гиги мамали. ¹²Йихияди манламу лэ, ба тади мэти нашон, сундэли, йиху ба йүхади жыгэ сычин ги Эрса фэли.

Эрса жё вучян жын чыболи

(Мк 6:30-44; Лк 9:10-17; Йих 6:1-13)

¹³Эрса ба жыгэ шинвын тинжян, зу шонли фичуан, да нэтар йигэр туту-мәмэди жочү йигэ мәжын-янди дифоншон фушон зудэли. Жынму ба жыгэ тинжян, да гэжяди чынпуни чүчи, буцин гыншон Эрса зули. ¹⁴Эрса да чуаншон халэ ба хошо жынму канжян, Тади щин до тамушон йиха ванли, зу ба тамуди бинжынму канхоли. ¹⁵Хушон манламу до Эрса гынчян, ги Та фэди:

– Кэжя хили, жытарсы йигэ кунтан. Ни ба жынму фонкэ, жё таму зэ щёнжуонни ги гэжя мэ чыдичи.

¹⁶Эрса хуэйдади фэсы:

– Бу зади, жё дажя шындо жытар; ниму ги таму ба чыди гиги!

¹⁷Манламу ги Та фэди:

– Вөму жытар цэ ю вугэ мэмэ лян лёнгэ йүни.

¹⁸Эрса фэди:

– Ба чыди ги Вэ налэ.

¹⁹Йиху Эрса гиди фынфу жё жынму зуэдо цошонни, Та ба вугэ мэмэ зэмусы лёнгэ йү начелэ, жочү тяншон канлийихар, ги Анлахү долигэ ще, ба мэмэ быйкэ ги манламу гигили. Манламу зу ги дажя фынгили. ²⁰Дажя чыли, ду чыболи. Манламу ба шынхади мэмэ дэ йү хан манманди жуонли шыэргэ куонзы. ²¹Чыли мэмэди жынму, чүгуэ нүжынму лян вamu, бонжер ю вучян нанжынмуни.

Эрса зэ хэзы готу зудини

(Мк 6:45-52; Йих 6:15-21)

²²Йиху Эрса жё манламу шонли чуан, туни вон хэзы нэбонгэ фушон чини, жё зэ нэтар дынйихар Та ба жынму фонкэни. ²³Ба жынму фонкэ, Эрса гэжя шонли сан, читоли Анлахүли. Йичыр до хушон Та йигэр шындо нэтарли. ²⁴Зу жыгэ сыхур чуан ли хэянзы кэжя фуди тэ йүанли. Филон ба чуан дадини, йинцысы манламу жочү йинмянди

фын фудини. ²⁵Тян куэ лёндыйли, Эrsa зэ хэзы готу жочү манламу бушин зуди лэли. ²⁶Манламу канжян Эrsa зэ хэзы готу зуди, таму хажинли, зу фэди:

– Жысы йигэ чигуэ йинйинзы!

Ба таму хади, ду дашын хантуэли.

²⁷Эrsa донвэр ги таму фэди:

– Ниму ба данзы фонда! Бэ хэпали, жысы Вэ!

²⁸Пётр ги Та хуэйдади фэсы:

– Жонгуйди! Жы дансы Нили, жё вэ зэ хэзы готу зудо Ни гынчян!

²⁹Эrsa фэди:

– Лэ!

Пётр зу да фичуаншон хачи, зэ хэзы готу жочү Эrsa зушон чили. ³⁰Кэсы Пётр ба да фын гуади канжян, хэли пали, дедо фи литу янсыдыйли. Та хантуэли:

– Жонгуйди! Ни ба вэди мин жюха!

³¹Эrsa донвэр ба шу чынкэ, ба Пётр жуачү, ги та фэди:

– Ниди щинфу тэ щёли. Виса ни юли шанкили?

³²Таму лёнгэр шонли фичуан, фын донвэр зу жўхали.

³³Чуаншонди манламу ду гуйдо Эrsaди мянчян, фэди:

– Ни жыншысы Анлахүди Эрзы!

Эrsa ба Геннисарет дифоншонди бинжынму канхоли

(Мк 6:53-56)

³⁴Таму фудо хэзы нэбонгэ, доли Геннисарет дифоншонли. ³⁵Нэтар жўди жынму жён ба Эrsa жындый, зу ба жынму дафачи, ба жуви дифоншонди йиче бинжынму ду линдо Эrsaди мянчян лэли. ³⁶Таму читоли Эрсали, жё бинжынму напа ба Тади йишонди бянбянзы гуон дуйхарни. Дули Тади йишонди бинжынму ду холи.

Зўзү-быйбыйди куйчын

(Мк 7:1-13)

15 Жигэ фарисейжынму лян нянжинжынму да Иерусалим чынпуни лэ, кан Эrsa лэли, зу вын Тадини:

– ²Виса Ниди манламу бу зунхү замуди зўзү-быйбыйди куйчын? Таму чыкэ фанли бу щи шу!

³Эрса хуэйдади фэсы:

– Виса ниму ви зунхў нимуди куйчын ба Анлахўди фынфу пеландини? ⁴Анлахў фэди: «Ни ё тэнэ ниди нён-лозыни», хан гиди фынфу фэди: «Сый дуэщян нён-лозыли, ги та яндин ё дин сызуйни». ⁵⁻⁶Дозэзы ниму фэди: «Сый дан ба ёнхуэ нён-лозыди цэбый ги Анлахў дуанчын лищинли, та зу бу ёнхуэ нён-лозыли». Ниму на гэжяди куйчын ба Анлахўди хуа шёмедёдини. ⁷Нимусы мунафикму! Исайя шынжын дуйчў ниму зозор фэхэди Анлахўди хуа дуйдини:

⁸«Жыгэ минжын гуон на зуй тэнэ Вэдини,
кэсы тамуди щин ли Вэ йүандихын.

⁹Таму ба жынмуди жёщүэ суанчын Вэди фынфули.
Жымужя таму быйкэр бэвон Вэдини!»

Замужяди дунци ба жын зўди буганжиндини

(Мк 7:14-23)

¹⁰Эрса ба жынму жёдо Тади мянчян, зу фэди:

– Ниму ё тин Вэди хуани, е ё ба хуади йисы дунни!
¹¹Бусы вон жынди зуйни жинчиди дунци ба жын зў буганжиндини. Дозэзы да жынди зуйни чўлэди дунци цэ ба жын зўди буганжин.

¹²Йиху манламу до Эрсади мянчян, фэди:

– Фарисейжынму ба Ниди жыгэ хуа тинжян хэли чили,
Ни жыдонима?

¹³Эрса хуэйдади фэсы:

– Ба йиче бусы Вэди тяншонди Дада зэхэди путо лян гынгынзы вадёни. ¹⁴Ба нэщезы фарисейжынму ниму бэ гуанщян! Тамусы хазы, есы хазымуди линшужынму. Хазы дан ги хазы лин лў, лёнгэ жын ду дедо шын кын литуни.

¹⁵Пётр ги Эрса фэди:

– Чин Ни ги вэму ба жыгэ бифонди йисы пэщёйихар.

¹⁶Эрса фэди:

– Нандый ниму йичыр до жыхур хан лян данлинди жынму йиёнди, бу минбыйма? ¹⁷Хан бу дунма, йиче вон жынди зуй литу жинчиди дунци доли дўзы литу, йиху вон можүанни эрдини, ¹⁸кэсы да зуй литу чўлэди дунщисы да

жынди щинни чўлэди. Зу нэщезы дунши цэ ба жын зўди буганжин. ¹⁹Йинцысы жыщезы да жынди щинни чўлэди заёнди ха вонщён жё та дасы жынни, жё пэе-ханзы хўлонни, хўнэ нўжынни, зў зыйни, дон жя гўвани, хэщүө жынни. ²⁰Жыщезы ха вонщён ба жын зўди буганжинди. Бу ши шу чы чыди – жыгэ ба жын бу нын зў буганжинди.

Хананея минзўди йигэ нўжынди щинфу

(Мк 7:24-30)

²¹Эрса лян манламу да нэтар чўлэ, зули Тир лян Сидон чынпуниди жуви дифоншонли. ²²Ханаан дифоншонди йигэ нўжын кан Эрса лэли. Та ханди:

– Жонгуйди! Давуди Хубый! Жё Ниди щин до вэшон ванйихар! Зонгуй ба вэди нўр начўдини, жё та шу вакўдини.

²³Эрса йи жү хуа ду мэ фэ. Манламу до Эрса гынчян, читоди фэди:

– Ни ба та лёкэ! Та зэ заму хуту зуди, бу жўди хандини!

²⁴Эрса хуэйдади фэсы:

– Ба Вэ гуон ги Израилди жынму дафалэли. Таму зущён миллилўди ёнму йиён.

²⁵Кэсы нэгэ нўжын тинжян жыгэ хуа, зу гуйдо Тади жүө гынчян, фэди:

– Жонгуйди! Чин Ни ги вэ бонмон!

²⁶Эрса хуэйдади фэсы:

– Ба вамуди чыди ги гувазы эрги жё чы – жыгэ сычин бу дуй.

²⁷Нэгэ нўжын фэди:

– Дуйдини, вэди Жонгуйди, кэсы гувазы е чы жўжынди жуэзышон дехалэди зазардини!

²⁸Эрса зу хуэйдади фэсы:

– Нўжын, ниди щинфу дадихын! Жё Анлахў жочў ни ёди ги ни гиги!

Тади нўр донвэр зу холи.

Эрса ба хошо бинжын канхоли

²⁹Эрса да нэтар зудё, доли Галилея хэянзыди бонгэрнили. Шонли сан, Та зүэхали. ³⁰Хошо жынму линди чүэзыму,

казыму, баннянханму, ябаму дэ хошо хэ данлин бинди жынму до Та гынчян лэли. Таму ба йиче бинжынму нандундо Эрседи жүэ гынчянли; Эрса ба таму ду канхоли. ³¹Йиче жынму канжян ябаму фэкэ хуали, зочян баннянханди жынму кэ холи, чүэзыму зудини, хазыму канжянди ни — дажя ду чөчизали. Ба жыгэ сычин канжян, жынму ду куажөнли Исраилди Анлахўли.

Эрса жё сычян жын чыболи

(Мк 8:1-10)

³²Эрса ба манламу жёлэ, ги таму фэди:

— Вэ ви жыщезы жынму данциндыхын, йинцысы таму лян Вэ зэ йидарни кэжя сан тянли, хазыр таму мэю чыди. Вэ бу щён ба таму вэдўзыди лёкэ, Вэ хэпа таму зэ лўшон йүндони.

³³Манламу ги Эрса фэди:

— Зэ жыгэ мэжын-янди дифонни вэму зэ нани чи ги жыщезы жынму ба чыди зоха, жё таму чыбони?

³⁴Эрса вынли тамули:

— Ниму ю дуэшо мэмэни?

Таму хуэйдади фэсы:

— Чигэ мэмэ лян жигэ йүр.

³⁵⁻³⁶Эрса гиди фынфу, жё жынму зуэдо тў дишон, гэжя ба чигэ мэмэ дэ йүр начелэ, ги Анлахў доли йигэ ше, йиху ба мэмэ быйкэ зу ги манламу гигили; манламу ги дажя фынгили. ³⁷Дажя чыли, ду чыболи. Манламу ба шынхади мэмэ дэ йүди зазар манман жуонли чигэ куонзы. ³⁸Чыбоди жынму, чўгуэ нүжынму лян вэму, йиче ю сычян нанжынму. ³⁹Эрса ба жынму фонкэ, шонли фичуан, доли Магдала дифоннили.

Фарисейжынму ёди жё Эрса щян кэрамэтини

(Мк 8:11-13; Лк 12:54-56)

16 Жигэ фарисейжынму лян саддукейжынму лэ, щён ба Эрса зыянйихарни, зу ёди жё Эрса ги таму да тяншон щян йигэ кэрамэтини. ²Эрса ги таму хуэйдади фэсы:

— Жэту луэди сыхур ниму фэди: «Миргэ тянчи яндин чинни, йинцысы тьян бонгэ ю хунчини». ³Ганзо йизор

ниму фэди: «Жиргэ гуа фын шя йүни, йинцысы тян е шынхундини». Нимусы мунафикму! Ниму жочү тяншонди янсий нын ба тянчи канчүлэ, кэсы ба жыхур йүхади жышезы сычин канбучүлэ! ⁴Жы йибыйзы жынму дуэму ха, дуэму бу шинфу! Ниму ё чёчи жиходини! Чүгүэ Юнус шынжынди жихо, ги ниму бу ги данлинди чёчи жихо.

Эрса ба жыгэ хуа фэван, зу да таму мянчан зудёли.

***Фарисейжынди лян
саддукейжынди «жёмьян»***

(Мк 8:14-21)

⁵Манламу вон хэзы нэбонгэ фушон зуди сыхур, ба мэмэ вондёли. ⁶Эрса ги таму фэди:

– Ниму кан, ниму ё щёщин фарисейжынди лян саддукейжынди «жёмьянни».

⁷Манламу йигэ ги йигэ фэди:

– Та фэ жыгэ хуа, йинцысы заму ба мэмэ мэ на!

⁸Эрса ба жыгэ жыдоли, зу вынли тамули:

– Нимуди шинфу жыму щё! Ниму виса йигэ лян йигэ толунди ба мэмэ мэ на? ⁹Нандый ниму хан бу минбыйма? Ниму вондёлима, Вэ зочян ба вугэ мэмэ ги вучян жын фынгили? Ба шынхади зазар хан шули жигэ куонзы, ниму вондёлима? ¹⁰Вэ ба чигэ мэмэ ги сычян жын фынгили зэмусы ба шынхади зазар ниму хан шули жигэ куонзы, ниму е вондёлима? ¹¹Виса ниму хан бу минбый Вэ ги ниму фэди сычин бусы мэмэ либян? Ниму ё щёщин фарисейжын лян саддукейжынди «жёмьянни»!

¹²Жыхур манламу цэ минбыйли, Эрса бусы жё таму щёщин мэмэ литуди жёмьянни, кэсы жё таму щёщин фарисейжын лян саддукейжынди жётёни.

Пётр фэди Эрсасы Мэсих

(Мк 8:27-30; Лк 9:18-21)

¹³Эрса доли Филипп-Кесария дифоншонли. Зэ нэтар Та вынли манламули:

– Данлинди жынму ба Вэ, Аданди Хубый, суандисы сый?

¹⁴ Манламу хуэйдади фэсы:

– Юшезы жынму фэди, Нисы щижынмуди Йихия; юшезы фэди, Нисы Илияс; хан юшезы жынму фэди, Нисы Иеремия хуэйжэсы вучонлиди шынжынму литуди йигэ.

¹⁵ Эрса вын тамудини:

– Наму ниму фэ: Вэсы сый?

¹⁶ Щимэ-Пётр хуэйдади фэсы:

– Нисы Мэсих, йинавар хуэди Анлахұди Эрзы.

¹⁷ Эрса ги та фэди:

– Юнусди эрзы Щимэ, ни жыншы дуэму гошин, йинцысы ба жыгэ жынли бусы жын ги ни гигили, кэсы тяншонди Вэди Дада жё ни жыдоли. ¹⁸ Жысыма, Вэ ги ни фэдини: нисы Пётр*, зу зэ жыгэ шытушон Вэ ба Вэди Сы гечелэни, вучонди чүанли ба жыгэ Сы ду дабубэ. ¹⁹ Вэ ги ни ба Тяншон Гуйжяди йүэсы гигини. Ни ба са зэ дишон бончү, Анлахұ зэ тяншон е бончүни; ни ба са зэ дишон гэкэ, Анлахұ зэ тяншон е гэкэни.

²⁰ Эрса ги манламу гиди ниннинди фынфу, жё ги сысый ду бу фэ Та зусы Мэсих.

Эрса ба Та гэжя вонху шу кўнанди

зэмусы вучонди зозор фэли

(Мк 8:31-9:1; Лк 9:22-27)

²¹ Да нэгэ сыхур дашон, Эрса миндамин ги Тади манламу пәшәди, фэсы Та яндин ё зэ Иерусалим чынпуни чини. Яхүтиди ложынму, да ахунму лян нянжинжынму жё Та шу хошо кўнанни. Таму ба Эрса дасыни, ди сан тян Та кэ хуэни. ²² Пётр ба Эрса лингуэчи, фэли фандуйди хуали:

– Жонгуйди, жё Ниди шин до Ни гэжяшон ванйихар! Жё жыгэ сычин бә йүдо Нишонли!

²³ Кэсы Эрса жуангуэлэ, ги Пётр фэди:

– Иблис, ни да Вэ гынчян гун! Нисы пын Вэди жүэди шыту. Ниди йиче вонщён бусы Анлахұди вонщён, жысы жынди вонщён!

* ^{16:18} Пётр (грек йуан) – зыфәдисы: Шыту.

²⁴ Эrsa ги манламу фэди:

– Сый дан щён гыншон Вэ зу, та ё ба гэжя вондэни зэ-мусы лян Вэ йиён, ба гэжяди мин жүшонни*, нэхур жё та гыншон Вэ зу. ²⁵ Йинцысы сый щён ба гэжяди мин жүоха, дозэзы ба тади мин хэни. Кэсы сый ви Вэ ба гэжяди мин жүги, та ба гэжяди мин дыйшонни. ²⁶ Жын дан ба чүан дун-я дыйшон, кэсы ба гэжяди мин пыйшонли, ги та ю са хони? Хуэйжэсы та на са йүанхуэй ба гэжяди мин мэхуэй-лэни? ²⁷ Аданди Хубый вонху зэ Та Дадади гуонлён литу лян Тади Тянцянму йидарни лэ, нэхур Та жочү мый йигэ жынди ганбан ги таму ги шонхони хуэйжэсы дин зуйни. ²⁸ Вэ ги ниму фэ шыхуа, жытар занди жынмуди донжунни юшэзы жынни, таму вучонди зычян ба Аданди Хубый, зу-щён Хуоншон йиён, долэди канжянни.

Эрсади ёнзы гэбянли

(Мк 9:2-13; Лк 9:28-36)

17 Гуэли лю тьян, Эrsa линди Пётр, Ягүбэ дэ тади шүнди Йихия йидарни туту-мэмэди шонли йигэ го саншонли. ² Эрсади ёнзы зэ таму мянчян гэбянли: Тади ляншы, зу-щён жэту йиён, лёнли, йишон чынха быйбырдили, зу-щён гуонлён йиён. ³ Мынмынди сангэ манла ба Муса дэ Илияс лян Эrsa фэхуади канжянли. ⁴ Пётр зу ги Эrsa фэди:

– Жонгуйди! Вэму шындэ жытар тэ холи! Ни дан щён, вэ зэ жытар да сангэ вэпынзыни: ги Ни йигэ, ги Муса шынжын йигэ зэмусы ги Илияс шынжын йигэ.

⁵ Пётр фэ жыгэ хуади сыхур, лёнлёрди йикуэр йүнцэ ба таму зонянли. Мынмынди да йүнцэ литу чүлэди шынчи фэди:

– Жысы Вэди щинэ Эрзы, Вэ до Ташон ю нэчинни. Ниму ё тин Тади хуани!

⁶ Манламу ба жыгэ хуа тинжян зу дедэ дишонли. Ба таму хажинли. ⁷ Эrsa до гынчян ба таму дулийихар, зу фэди:

– Ниму челэ, бэ хэпали!

* 16:24 Йижү лян йижү фангуэлэди: «Та ё ба гэжяди муту шызы быйшонни».

⁸Манламу ба ту тэчелэ йиканса: чўгуэ Эrsa жытар зэ сысый ду мөю. ⁹Таму да саншон халэди сыхур, Эrsa ги таму гиди фынфу фэди:

– Вэ, Аданди Хубый, вучонли йиху, кэ хуэни. Жыгэди зочян, ниму ба жыщезы жангуэди сычин ги сысый ду бэ фэли.

¹⁰Манламу вынли Эрсали:

– Виса нянжинжынму фэди, Илияс шынжын яндин ё щянтуни лэни?

¹¹Эrsa хуэйдади фэсы:

– Илияс лэ, ба йиче сычин ду шэлүхани. ¹²Вэ ги ниму фэ, Илияс кэжя лэли, кэсы жынму ба та мө жындый, е ги та ганли таму вонщёнхади сычинли. Зу жымужя, Аданди Хубый е вонху зэ тамуди шуни шу кўнанни.

¹³Жыхур манламу цэ дунли, Эrsa ги таму фэ щижынмуди Йихия либяндени.

Эrsa ба кэлон литу ю зонгуйди вава канхоли

(Мк 9:14-29; Лк 9:37-43)

¹⁴Таму доли хошо жынму гынчянди сыхур, йигэ жын до Эrsaди мянчян гуйха, ¹⁵фэди:

– Жонгуйди! Вэ читоди, жё Ниди щин до вэди эрзышон ванйихар! Та хэ ёнгорфын биндини, шу тынкўдини, та чинчир дедо хуэ литу хуэйжэсы дедо фи литудини. ¹⁶Вэ ба та ги Ниди манламу линлэли, кэсы таму ба вэди ва мэдый канхо.

¹⁷Эrsa фэди:

– Ниму жы йибыйзы мөю щинфуди, ган ха сычинди жынму! Вэ лян ниму йидарни хан ё шын дуэшо гунфуни? Вэ ба ниму хан ё жыннэ дуэшо сыхурни? Ба вава линдо Вэ жытар лэ!

¹⁸Эrsa ги зонгуй гиди фынфу жё да вавади кэлон литу чўчини; зонгуй чўлэли, вавади бин донвөр зу холи. ¹⁹Йиху манламу туту-мөмэди вынли Эрсали:

– Виса вөму ба нэгэ зонгуй мэдый ганчўчи?

²⁰Эrsa хуэйдади фэсы:

– Йинцысы нимуди щинфу щёдихын. Вэ ги ниму фэ шыхуа, ниму дан ю зущён йигэ суй жемэзы жунзы жымугэди щинфу, ги жыгэ сан дан фэ: «Ни да жытар нуэдо нэтарчи!», та зу нуэгуэчини. Зу жымужя, ниму са ду нын ган.

*Эрса ба Та гэжя вонху вучонди
зор ди эрбян фэли*

(Мк 9:30-32; Лк 9:43-45)

²¹⁻²² Манламу зэ Галилея дифоншон шудо йидарниди сы-
хур, Эрса ги таму фэди:

– Ба Аданди Хубый ги жынму гигини. ²³ Таму ба Та да-
сыни, ди сан тянди нэйитян Та кэ хуэни.

Манламу ду тэ пэфанхали.

Ги Иерусалимди сы чү фиди вынти

²⁴ Эрса лян манламу доли Капернаум щёнжуоннили. Та-
му зэ Капернаумди сыхур, жигэ ги Иерусалим сы шуфиди
жынму до Пётрди мянчян, вынли тали:

– Нимуди Вуста ги Иерусалимди сы чү финима?

²⁵ Пётр хуэйдади фэсы:

– Чүни.

Пётр жинли фонзы, Эрса ту йигэ зу вынли тали:

– Шимэ, сый ги жыгэ дун-яшонди хуоншонму чү заён-
ди фидини: хуоншонди гэжяди эрзыму хансы понжын-
ди эрзыму?

²⁶ Пётр хуэйдади фэсы:

– Понжынди эрзыму.

Эрса фэди:

– Дан жымужяли, хуоншон гэжяди эрзыму бу чү фи;

²⁷ кэсы заму жё жы йибазы шуфиди жынму бэ чишонлэли,
ни зэ хэзыни дё йигэ йүчи. Ба ту йигэ дёшонди йүди зуй
быйкэ, ни ба йигэ йинчян* зожуэни. Ни ба жыгэ йинчян
нашон, ви Вэ лян ни ба фи чүги.

*Зэ Тяншонди Гуйжяни
сыйсы дин видади*

(Мк 9:33-37; Лк 9:46-48)

18 Зу нэгэ сыхур манламу до Эрса гынчян вын Тали:
– Зэ Тяншонди Гуйжяни сыйсы дин видади?

* ^{17:27} Жыгэ йинчян жёди «статир».

²Эрса ба йигэ суй вава жёдилэ, жё та зандо тамуди дон-
жунни, ³зу фёди:

– Вө ги ниму фө шыхуа, ниму дан шушин, чынха зушён
суй ваму йиён, нэхур ниму цэ нын чынха Тяншон Гуйжя-
ди минжынмуни. ⁴Сый ба гэжя зушён жыгэ суй вава йиён
суанди бу дади, зэ Тяншонди Гуйжяни та зусы дин видади.
⁵Сый дан ви Вөди минзы ба жымужяди йигэ вава жешуха,
та зу ба Вө жешухали.

*Михунди жё жынму ган
гўнахарди жын*

(Мк 9:42-48; Лк 17:1-2)

⁶Булүн сый дан ба шинфу Вөди йигэ щёжын линдо цуэ
лўшон, нэхур ги нэгэ жын ба мөпаншы бондо бэзыни педо
шын хэзыни жё янсычи хошер. ⁷Ба жынму линдо цуэ лў-
шон – жыгэ сычинсы яндин йүди, кэсы ган жымужяди
сычинди жын дуэму кэлян! Жыгэ дун-яди жынму дан ба
сый линдо цуэ лўшон – таму дуэму кэлян! ⁸Ниди йигэ шу
хуэйжэсы жүэ ба ни дан линдо цуэ лўшонли, ба таму кан-
халэ, эрдёчи! Ни шоли йигэ шу хуэйжэсы жүэ еба, кэсы
ни йинавар хуэни. Жыгэ би ю лёнгэ шуди дэ жүэди педо
йүнзун бу меди хуэкын литуди хошер! ⁹Ниди йигэ нянжин
дан ба ни линдо цуэ лўшонли, ба ниди нэгэ нянжин точў-
лэ, эрдёчи! Ни лян йигэ нянжин йинавар хуэни, жыгэ би
лян лёнгэ нянжин педо хуэкын литуди хошер.

Фө милилўди ён либянди бифон

(Лк 15:3-7)

¹⁰⁻¹¹Ниму ё щёщинни, ба йигэ щёжын ду бө канбуче. Вө
ги ниму фө, тади Тянщян зэ тяншон, Вө Дадади мянчян
йинавар зандини. ¹²Ниму замужя сылөндини: йигэ жын
дан ю йибый ён, таму литу йигэ ён дан мили лўли, нандый
та ба жүшы жүгө ён бу лёха, чи ба нэйигэ милилўди ён бу
зочима? ¹³Вө ги ниму фө шыхуа, та дан зожуэли, зу ви нэ-
йигэ ён гошинни, би нэ йиче жүшы жүгө мэ зу милилўди
ён хан гошин дуэни! ¹⁴Зу лян жыгэ йиён, ниму тяншонди
Дада е бу щён жё мый йигэ щёжын ми лўни.

Ниди дишүнму дан ганли гўнахарли

¹⁵ Ниди дишүнму литу йигэ дан ги ни ганли гўнахарли, ни чи, гуон лян та лёнгэр зэ йидарниди сыхур, ба тади цуэ ги та зыги. Та дан тинли ниди хуали, ни ба ниди дишүн да цуэ лўшон линхуэйлэли. ¹⁶ Та дан бу тинли, ни ба данлинди йи-лёнгэ жын жёшон йидарни чи; йинцысы «ги мый йигэ сычин лён-сангэ жын нын дон гўважын». ¹⁷ Та хан дан бу тинли, ба жыгэ сычин ги жёмын хуэйи фэги. Та дан бу тин жёхуэй жынмуди хуали, жё та ги ни зуцён вэдожын хуэйжэсы шуфиди жын йиёнчи. ¹⁸ Вэ ги ниму фэ шыхуа, ниму ба са зэ дишон бончўли, Анлахў зэ тяншон е бончўни; ниму ба са зэ дишон гэкэли, Анлахў зэ тяншон е гэкэни. ¹⁹ Вэ хан ги ниму фэ, ниму литу дан лёнгэ жын зэ дишон йищин-йижиди читоди булүн ё са, Вэди тяншонди Дада яндин ги ниму ганни. ²⁰ Йинцысы натар лён-сангэ жын ви Вэди минзы шудо йидарни, нэтар Вэ зу зэ тамуди донжунни.

Хацинчонди хуэжиди бифон

²¹ Нэгэ сыхур Пётр лэ, вын Эрсадини:

– Жонгуйди! Вэди дишүнму литу йигэ дан ги вэ ганли гўнахарли, вэ ё ба та фоншэ жи бянни? Чи бян зу гулима?

²² Эrsa ги Пётр фэди:

– Вэ ги ни бу фэ чи бян, кэсы ни ё ба та фоншэ чишы чи бянни, ²³ йинцысы Тяншонди Гуйжя, зуцён йигэ хуоншон йиён, щён лян гэжяди хуэжиму суан жонни. ²⁴ Хуоншон суан жонди сыхур, ба йигэ жын линдо тади мянчянли. Нэгэ жын ги хуоншон гэли йибыйчян жинчян. ²⁵ Йинцысы жыгэ жын мэю хуан жонди чян, хуоншон жё ба жыгэ жын лян тади пэе, эрнүму лян йиче дунши йиман ду мэдэни, жё та ба жон хуангини. ²⁶ Нэгэ хуэжи гуйдо хуоншон мянчян, читоди фэсы:

– Жонгуйди, жё ниди щин до вэшон ванйихар! Дынди, вэ яндин ба йиче жон ду ги ни хуангини.

²⁷ Жонгуйди до гэжяди хуэжишон щин ванли, ба та лёкэли зэмусы ба жон е фоншэли. ²⁸ Нэгэ хуэжи чўчи, ба данлинди зуцён та йиёнди йигэ хуэжи пынжянли, зочян

зэ та гынчян жели йибый йинчян*. Ту йигэ хуэжи ба данлинди нэгэ хуэжи зу жуачў, ба бэзы жүчў, фэди:

– Ни ба жон ги вэ хуанги!

²⁹ Тади ляншу гуйха, чито та фэди:

– Ляншу, жё ниди щин до вэшон ванйихар! Дынди, вэ яндин ги ни ба жон хуангини!

³⁰ Кэсы та мэ щён фоншэ, ба ляншу хан ядо банфонзы литу, дынди жё ги та ба жон хуангини. ³¹ Данлинди хуэжиму ба жыгэ сычин канжян, ду пэфанхали; таму доли хуоншон гынчян, ба йүхади йиче сычин ги та фэгили. ³² Хуоншон ба нэгэ хуэжи жёлэ, зу ги та фэди:

– Нисы йигэ хашинчонди хуэжи, йинви ни читоли вэли, вэ ба ниди йиче жон фоншэли. ³³ Нандый ни ба ни ляншуди жон е бу ё фоншэма, зущён вэ ба ни фоншэлиди йиён?

³⁴ Хуоншон чишонлэ, ба нэгэ хуэжи ги гуан банфонзы жынмуди шуни гиги, жё та шу зуйни, дынди жё та ба йиче жон хуангини.

³⁵ Эrsa фэди:

– Зу жымузя, ниму дан шыщин-шыйиди бу фоншэ нимуди дищүнли, Вэди тьяншонди Дада е ги ниму жымузя ганни.

Лян пэе нын лингандёма?

(Мк 10:1-12)

19 Эrsa ба жыщезы хуа фэван, да Галилея дифоншон зудё, доли Иордан хэ нэбонгэди Яхүти дифоннили.

² Хошо жынму гыншон Эrsa зудини, Та зу зэ нэтар ба бинжынму канхоли. ³ Жигэ фарисейжынму кан Эrsa лэли, щён ба Та зыянйихарни, зу вынди:

– Ни ги вэму фэйихар: жочў замуди фалу нанжын ги пэе йинви напа са йинйир ду нын ги линганма?

⁴ Эrsa хуэйдади фэсы:

– Нандый ниму зэ Китабу литу мэ нянгуэма? Датур зуэзо жынмуди сыхур, Анлахў ба нанжын дэ нүжын зуэзохали. ⁵ Анлахў фэли:

* 18:28 Жыгэ йинчян минзы жёди «динарий».

«Йинви жыгә, нанжын ё да нён-лозы гынчян зудёни,
йиху та лян тади пәе чынфон пыйдуйни.

Таму лёнгә жын зу чынха йигә шынзыни».

⁶Зу жымужя, нанжын лян пәе бусы лёнгә жын, жыхур тамусы йигә шынзы. Йинви жыгә, ба Анлахұ пыйхәхади йиче пәе-ханзы, йүнзун жё жын бу нын фынкә.

⁷Фарисейжынму ги Та фәди:

– Дансы жымужя, виса Муса шынжын ги вәму гиди фынфу, жё нанжын ги пәе ще йигә линганди зыданданзы, йиху лян пәе цә нын лингандё?

⁸Эрса хуэйдади фәсы:

– Муса шынжын ба жыгә фынфу ги ниму щели, йинцысы нимуди щин жёндихын. Кәсы датур Анлахұ зуэзо дун-яди сыхур, сычин бусы жымужядилә. ⁹Вә ги ниму фә, найигә нанжын дан лян тади пәе лингандё (чўгуә тади пәе ганли хўлонди гўнахарли), йиху ба данлинди нўжын чўшон, та зу ган хўлонди гўнахардини.

¹⁰Манламу ги Эрса фәди:

– Нанжын лян пәеди гуанщи дансы жымужяди, бә чү щифурли яндин хошер.

¹¹Эрса хуэйдади фәсы:

– Ба жымужяди жётё йиче жынму бу нын жешуха, Анлахұ гуон ги сый гини – нэгә жын цә нын жешуха, ¹²йинцысы жын бу чү щифурди йинйир дуә: ющезы жын йүнзун бу нын чү щифур, йинцысы таму да сын-ёнха зусы жымужяди. Хан ющезы жынсы жымужяди, йинцысы данлинди жынму жё таму бу нын чү щифур; хан данлинди ющезы жын ви Тяншонди Гуйжя бу чү щифур. Сый ба жыгә фынфу нын жешу – панвонди жё нэгә жын зу жешуха.

Эрса ги вamu панвонли холи

(Мк 10:13-16; Лк 18:15-17)

¹³Йиху ба суй вamu ги Эрса линлэли, чинди жё Та ба шу гәдо вamuди тушон, чито Анлахұ панвон хони; кәсы манламу донгуали нәщезы жынмули. ¹⁴Эрса фәди:

– Ниму жё жыщезы вamu до Вә гынчян лә, бә донгуа тамули, йинцысы Тяншонди Гуйжясы тамуди.

¹⁵ Эrsa ба шу гэдо вaмушон, панвонли холи; йиху Та да нэгэ дифон зудёли.

***Йигэ ючянхан
щёхуэрди вынти***

(Мк 10:17-31; Лк 18:18-30)

¹⁶ Йихуэй йигэ жын кан Эrsa лэли, фэди:

– Вуста, йинви жё вэ ю йинаварди мин вэ ё ган са хо сычинни?

¹⁷ Эrsa хуэйдади фэсы:

– Ни виса жочў Вэ вын хо сычиндини? Чўгуэ Анлахў зэ мэю данлин дин ходи. Ни дан щён дый йинаварди мин, яндин ё зунхў фынфуни.

¹⁸ Та зу вын Эrsaди:

– Замугэ фынфу?

Эrsa фэди:

– Бэ дасы жын, пэе-ханзы бэ хўлон, бэ ту дунши, бэ дон жя гўва, ¹⁹ тэнэ нён-лозыму зэмусы ба ни гынчянди жынму, зущён гэжя йиёнди, ё щинэни.

²⁰ Нэгэ щёхуэр хуэйдади фэсы:

– Вэ ба жыщезы фынфу йиче ду зунхўдини. Ни фэ: вэ хан дуан садини?

²¹ Эrsa ги та фэди:

– Ни дан щён дон йүэщин ходи жынни, ба гэжяди йиче фугуй мэдэчи, ба чян ги чүнжынму санги, нэхур ни зэ тяншон дый фугуйни; йиху лэ гыншон Вэ зу.

²² Щёхуэр тинжан жыгэ хуа, пэфанди зудёли, йинцысы тасы йигэ ючянхан. ²³ Эrsa ги манламу фэди:

– Вэ ги ниму фэ шыхуа, жё ючянханму жин Тяншонди Гуйжячи – жысы тэ нанди сычин! ²⁴ Вэ зэ ги ниму фэ, жё ючянди жынму дон Тяншон Гуйжяди жынчи – жыгэ би луэтуэ зуангуэ жын нянзыди хан нан!

²⁵ Манламу тинжан жыгэ хуа, тэ чёчихали, зу фэди:

– Жымужя фэчи, ба сыйди мин нын жюхани?

²⁶ Эrsa динди ба таму вонлийихар зу фэди:

– Жынму бу нын ганди сычин Анлахў нын ганни, йинцысы Анлахў ба са сычин ду нын ган.

²⁷Зу жыгә жекурни Пётр ги Эрса хуэйдади фәди:

– Ни кан! Вәму ба йиче ду ләха, гыншон Ни зудини.

Вонху вәму дый сани?

²⁸Эрса ги таму фәди:

– Вә ги ниму фә шыхуа, ниму ба йиче ду ләха, гыншон Вә зуди жынму, зә вонху ләди шин шыдәни Аданди Хубый зуәдо Та гуонлән хуоншонди вифыншонди сыхур, ниму е зуәдо шыэргә хуоншонди вифыншон, гуан Исраилди шыэргә зўди жынмуни. ²⁹Сый дан ви Вәди минзы ба фонзы, дишүнму, зымыйму, нён-лозыму, вәму, тандо ләха, та зә жыгә дун-яшон яндин хан дый йибый лэзы дуәни зәмусы е йинавар хуәни. ³⁰Хошо зә чянтү занди жынму зандо хутуни, зә хуту занди жынму зандо тунини.

Путо йүанзыни зўхуә жынмуди бифон

20Тяншонди Гуйжя зушән йигә путо йүанзыди жонгуйди йиён, ганзо-йизор чўчи ги гэжяди путо йүанзы гў зўхуәди жынму чили. ²Лян зўхуәди жынму фә хо ги таму ви йитянди хуә чў йигә йинчяни, жонгуйди ба таму дафадо путо йүанзынили. ³Бонжер жүгә сышыншон, жонгуйди кә до гэшон, ба жигә жын зә нэтар занди мә ган сәди канжян, ⁴зу ги таму фәди: «Ниму е зә путо йүанзыни чи! Вә ги ниму ги гундо зынхади чяни». ⁵Таму зу чили. Шонвуни зәмусы сангә сышыншон та йүанхуэй чўчи, зушән зочян йиён, гўли жигә зўхуәди жын. ⁶Шонвугуә, бонжер вугә сышыншон, жонгуйди кә до чынпуни хан ба жигә жын зә нэтар занди канжян, зу вын тамудини: «Виса ниму жынжыр йитян сяншярди зә жытар зандини, са ду мә ганди?» Таму хуэйдади фәсы: ⁷«Йинцысы сысый ду ба вәму мә гў». Жонгуйди зу ги таму фәди: «Зәсы жымужя, ниму е зә путо йүанзыни чи!» ⁸Доли хушонли, путо йүанзыди жонгуйди ги гуан тади йүанзыди жын фәдини: «Ба зўхуәди жынму ду жёлә, ба зынхади чян ги таму да линийр ләди до ту йигә жинләди жын ду фынги». ⁹Сый вугә сышыншон ләли, таму мый йигә жын зынли йигә йинчян. ¹⁰Ту йигә ләди жынму сыләнди таму яндин дуә зын жигә чяни, кәсы таму е линли йигә йинчян. ¹¹Таму ба чян

линшон, йиху зу гүнун жонгуйдили: ¹² «Жыщезы линйирни лэди жын цэ зүли йигэ сышынди хуэ, кэсы вэму зэ жэту-пэрни сэли жынжыр йитян, хуэ жун еба, ни ги таму лян вэму гиди йиёнди гунчян!» ¹³ Путо йүанзыди жонгуйди ги таму донжунниди йигэ хуэйдади фэсы: «Ляншу, вэ мэ чифу ни. Нандый ни бусы ви йигэ йинчян дайинха ги вэ зү йитян хуэнима?» ¹⁴ Ба ниди чян нашон хуэйчи! Вэ щён ги нэгэ линйирни лэди жын ги лян ни йиёнди гунчяни. ¹⁵ Нандый вэ бу нын сыхуан вэди чянма? Хуэйжэсы ни нянжэ вэдинима, йинцысы вэсы шу сунди жын?»

¹⁶ Эrsa фэди:

— Зу жымуужа, зэ хуту занди жынму зандо тунини, зэ чянтуну занди жынму зандо хутуни.

Эrsa ба Та гэжя вучонди фэли ди санбянли

(Мк 10:32-34; Лк 18:31-34)

¹⁷ Эrsa вон Иерусалим чыпуну чиди сыхур, ба Тади шыэргэ манла лингуэчи, зэ лүшон ги таму фэди:

— ¹⁸ Ниму кан! Заму жыхур вон Иерусалим чыпуну зудини. Нэтар ба Аданди Хубый ги яхүтиди да ахунму лян нянжинжынму гигини. Таму ги Аданди Хубый дин сызуйни, ¹⁹ йиху ба Та ги вэдожынму гиги зотани, на бянзы да Тани, йиху ба Та диндо муту шызышонни; кэсы Та вучонлиди сан тян, йиху кэ хуэни.

Ягүбэ лян Йихия мамади чито

(Мк 10:35-45)

²⁰ Заведейди пэе лян гэжяди лёнгэ эрзы до Эrsaди мянчян, гуйха, читоди вын Эrsa ё сани. ²¹ Эrsa вын тади:

— Ни ё сани?

Нүжын ги Та фэди:

— Чито Ни дайин, Ни дон хуоншонди сыхур, жё вэди жы лёнгэ эрзы йигэ зуэдо Ниди юбонгэ, йигэ зуэдо Ниди зуэбонгэ.

²² Эrsa хуэйдади ги лёнгэ дишүн фэсы:

— Ниму гэжя бу жыдо ниму ё садини. Ниму ба Вэ хэди йиван кў фи нын хэдэма?

Таму хуэйдади фэсы:

– Вәму нын хә!

²³ Эрса ги таму фәди:

– Ба йиван кў фи ниму нын хәшон, кәсы жё ниму йигә зуәдо Вәди юбонгә, йигә зуәдо Вәди зуәбонгә – жыгә чүанли Вә мәю. Жыщезы вифын Вә Дада ги сый шәлүхали, нэгә жын зу зуәни.

²⁴ Данлинди шыгә манла тинжян лёнгә дишүнди жыму-жяди чито, тә чишонләли. ²⁵ Йинви жыгә Эрса жё манламу йиче ду до Та гынчан лә, ги таму фәди:

– Ниму жыдони, дун-яшон нәщезы жыгуан гуйжяди жынму ю гуан минжынди чүанлини; линшуму е ю чүанли гуан тамуни. ²⁶ Кәсы ниму жымузя ганбудый. Нимуди донжунни сый шён дон дажын, та ё дон нимуди нўни, ²⁷ сый шён жан ту йигә вифын, та ё ги ниму дон нўни. ²⁸ Зущён Аданди Хубый йиён до димяншон лә бусы жё данлинди жынму фусы Тани, кәсы Та гәжя фусы жынмуни, зәмусы Та ба гәжяди мин ви жынму гигини, зу жыму-жя ба хошо жынму мэхуэйләни.

Эрса ба лёнгә хазы канхоли

(Мк 10:46-52; Лк 18:35-43)

²⁹ Таму да Иерихон чынпу чүчиди сыхур, хошо жынму гыншон Эрса зудини. ³⁰ Лёнгә хазы зә лў бянни зуәди, тинжян жысы Эрса гуәдини, зу дашын хантуәли:

– Жонгуйди! Давуди Хубый, жё Ниди щин до вәмушон ванйихар!

³¹ Дажя ги таму гиди ниннинди фынфу, бу жё таму чў шынчи. Кәсы таму йүэщин дашын хантуәли:

– Жонгуйди! Давуди Хубый, жё Ниди щин до вәмушон ванйихар!

³² Эрса занха, ба таму лёнгәр жёдилә, вынди:

– Ниму жё Вә ги ниму зў сани?

³³ Таму хуэйдади фэсы:

– Жонгуйди! Жё вәмуди нянжин лён, ба са ду нын канжян!

³⁴ Эрсади щин до тамушон ванли; ба тамуди нянжин ду-лийихар, таму донвәр нын канжянли, зу гыншон Эрса зули.

Эрса жинли Иерусалим чыңпунули

(Мк 11:1-11; Лк 19:28-40; Йих 12:12-19)

21 Эрса лян Тади манламу до Иерусалим чыңпу гынчян, сянтуни зудо Елеон саншонди Виффагия щёнжуоннили. Эрса ба Тади лёнгэ манла вон чян дафачи, ²ги таму фэди:

– Ниму вон чянтуниди щёнжуонни чи. Жинли щёнжуонни, ниму зу ба нэтар бонди йигэ мулү дэ лүвазы канжяни. Ниму ба таму гэкэ, ги Вэ ладилэ. ³Сый дан донгуа ниму фэ са, ниму зу ги та хуэйда: «Вэмуди Жонгуйди ё тамуни». Нэгэ жын зу донвэр жё ниму ба нэгэ мулү дэ лүвазы лалэни. ⁴Жыгэ сычин йүхали, жё Анлахү чечү Тади шынжын фэхади хуа чынхани:

⁵«Ги Иерусалимди нүр фэги:

Ни кан, ниди хуоншон лэдини!

Тади пичи мяншан;

Та чиди мулү

зэмусы лүвазы лэдини».

⁶Эрса замужя фэли, лёнгэ манла жочү Эрсади хуа зүйли.

⁷Таму ба мулү дэ лүвазы лашонлэ, ба гэжяди готу йишон дадо лү дэ лүвазышонди йиху, Эрса чидо тамушонли. ⁸Хошо жынму ба гэжя готуди йишон пудо лүйшонли, ющезы жынму да фушон ба фужыжызы канхалэ, е пудо лүйшонли. ⁹Зэ Эрсади чянмяр дэ хумяр зуди хошо жынму ду дашын хандини:

– Осанна!*

Вэму куажён Нидини, Давуди Хубый!

Ни ви Анлахүди минзы лэдини!

Осанна зэ тяншонни!

¹⁰Эрса жин Иерусалим чыңпуди сыхур, чүан чыңпуниди жынму ду бунавынди, юди жынму йигэ вын йигэдини:

– Жыгэ жын додисы Сыйса?

¹¹Жынму хуэйдади фэсы:

– Тасы Галилея дифоншон Назарет чыңпуниди Эрса шынжын.

* 21:9 Жыгэ хуади йисысы: «Ба мин жюха!», жысы яхүти жынму йигэ вынху йигэди хуа.

Эрса ба зў мэмэди жынму да Иерусалимди сыни ганчўчили

(Мк 11:15-19; Лк 19:45-48; Йих 2:13-22)

¹² Эрса жинли Анлахўди сыни, зу ба нэтар зў мэмэди йиче жынму ду ганчўчили, Та ба хуан чян жынди жуэзы лян мэ гэзы жынди йидынзы ду сондоли, ¹³ ги таму фэди:

– Китабушон шеде, Анлахў фэди:

«Вэди сы ё чынха чито Вэди фонзыни!»

Кэсы ниму ба Анлахўди сы зўчын зыйкуди вэзыли!

¹⁴ Хазыму лян чўэзыму зэ Иерусалимди сыни лэ, доли Эрсади мянчянли; Та зу ба жыщезы бинжынму канхоли.

¹⁵ Яхўтиди да ахунму лян нянжинжынму канжян Эрса щянчўчиди йиче кэрамэти, зэмусы тинжян ваму зэ сы ли-ту куажён Тади:

– Осанна, Давуди Хубый!

Таму тэ чишонлэли. ¹⁶ Таму дуйчў Эрса фэди:

– Ни тинжянлима, таму фэ садини?

Эрса хуэйдади фэсы:

– Зусы, тинжянли. Нандый ниму зэ Китабушон мэ нян-гуэма:

«Ни жё йўэвазы лян ваму куажён Нини?»

¹⁷ Эрса ба таму лёха, да чынпу чўчи, жочў Вифания зудё-ли, хили Та зандо нэтарли.

Эрса ба инжирфу жули

(Мк 11:12-14, 20-24)

¹⁸ Ди эр тян ганзо йизор, йўанхуэй вон чынпуни чиди сы-хур, зэ лўшон Эрсади дўзы вэли. ¹⁹ Та ба лўшон жонди йигэ инжирфу канжян, зудо гынчян йиканса: чўгуэ еер зэ фушон са ду мэ зожуэ. Эрса зу дуйчў жыгэ инжирфу фэди:

– Да жиргэ дашон зэ бэ жё ни ю готянли!

Нэгэ инжирфу донвэр зу гандёли. ²⁰ Манламу канжян жыгэ, тэ чёчиха, зу вынди:

– Жы йикуэ фу замузя донвэр гандёли?

²¹ Эрса хуэйдади фэсы:

– Вэ ги ниму фэ шыхуа, ниму дан мэю шанки щинфу Анлахўли, хан би ги жыгэ инжирфу ганхади дуэни. Ниму

дан ги жыгэ сан фэ: «Ни челэ, нуэдо хэзы литучи!» — яндин зу чынхани. ²² Ниму чито Анлахүди сыхур дан ёли са дуншили, яндин дыйшонни; гуонсы ё шинфуни.

Яхүтиди линшуму вынли Эрсади чүанлили

(Мк 11:27-33; Лк 20:1-8)

²³ Эrsa жинли Иерусалимди сынили, зэ нэтар жетё жынмуди сыхур, яхүтиди да ахунму лян ложынму до Та мянчан, вынли Тали:

— Ни на са чүанли ган жыщезы сычиндини? Сый ги Ни гили жымужяди чүанлили?

²⁴ Эrsa ги таму хуэйдади фэсы:

— Вэ ю йигэ вынтини, ниму дан ги Вэ гишон хуэйдали, нэхур Вэ е ги ниму фэни, Вэ на са чүанли ба жыщезы сычин гандини. ²⁵ Йихия на фи ши жынмуди чүанлисы да нани лэди? Жысы да Тяншон лэди ма хансы да жынму литу лэди?

Таму шонлэнди фэсы:

— Заму ги Эrsa ги са хуэйдани? Заму дан фэ: «Да тяншон лэди», нэхур Эrsa ги заму фэни: «Дан жымужя, ниму виса мэ шинфу Йихия?» ²⁶ Заму дан фэ: «Да жынму литу лэди», кэсы хэпа минжынму да замуни, йинцысы таму ду сылэнди, Йихиясы шынжын.

²⁷ Таму зу ги Эrsa хуэйдади фэсы:

— Вэму бу жыдо.

Эrsa ги таму е фэди:

— Дан жымужя, Вэ ги ниму е бу фэ, Вэ на са чүанли ган жыщезы сычиндини.

Лёнгэ эрзыди бифон

²⁸ Эrsa кэ фэди:

— Ниму замужя сылэндини: йигэ жын ю лёнгэ эрзыни. Дада ги да эрзы фэди: «Вэди ва, ни жиргэ зэ путо йүанзыни зү хуэчи!» ²⁹ Да эрзы хуэйдади фэсы: «Вэ бу щён чи!», кэсы йиху та шинни хули хуэй, тинхуа зу зули. ³⁰ Дада е ги щё эрзы жымужя фэли. Щё эрзы хуэйдали: «Дуй, ада, вэ хазыр зу чини!», кэсы та мэ чи. ³¹ Жы лёнгэ эрзы литу додисы найигэ ба дадади вонщён ганли?

Таму фәди:

– Да эрзы.

Эрса ги таму фәди:

– Вә ги ниму фә шыхуа, шуфиди жынму лян хўлонди нұжынму зә нимуди туни жин Тяншонди Гуйжяни, ³² йинцысы щижынмуди Йихия лә, ги ниму ба гундоди лў зыгили, кәсы ниму мә щинфу та; шуфиди жынму лян хўлонди нұжынму щинфули Йихияли. Ниму ба жыгә сычин канжянли еба, щинни хан мә хухуэй, е мә щинфу Йихия.

Юхацин хўржяму либянди бифон

(Мк 12:1-12; Лк 20:9-19)

³³ Эрса кә фәди:

– Ниму зә тин йигә бифон: йигә жўжын зэли йигә путо йүанзы, ги йүанзыди жуви зали йигә чән; зә йүанзыни вали йигә ня жүди кын; гәли йигә го лу. Йиху ба путо йүанзы ги хўржяму гиги, та гэжя зули данлинди дифоншонли. ³⁴ Доли шу путоди сыхур, жўжын ба гэжяди хуәжиму дафачи, жә хўржяму ги та ба шучын гигини. ³⁵ Хўржяму ба жўжынди хуәжиму жуачў, ба йигә дади чиншон-хуншонди; ба ди эргә дасыли; хан ба йигә лян шыту дали. ³⁶ Путо йүанзыди жўжын ба данлинди хуәжиму кә дафачили, жын фур би ту йихуэй дуә еба, хўржяму ги нәщезы жынму е жымужя ганли. ³⁷ Линйирни та ба гэжяди эрзы дафачи, жә эрзы ба хўржяму канйихарчини, щинни жымужя сыләнди: «Таму яндин хәщю вәди эрзыни». ³⁸ Нәщезы хўржяму ба жўжынди эрзы канжян, йигә ги йигә фәди: «Тасы путо йүанзыди жўжынди хубый. Зу, заму ба та дасы, та дада ги та шынхади йиче дунщи зу чынха замудини!» ³⁹ Таму ба жўжынди эрзы жуачў, да путо йүанзы литу ганчўчи, дасыли.

⁴⁰ Эрса вынли жынмули:

– Жымужя фәчи, жә путо йүанзыди жўжын хуэйлә лян нәщезы хўржяму замужя банни?

⁴¹ Таму ги Эрса фәди:

– Та яндин ба нәщезы югўнахарди хўржямуди мин дәдўди хәни, ба путо йүанзы ги данлинди хўржяму гигини, жә таму ги та сыхуршон ги шучынни.

⁴² Эrsa ги жынму кә фәди:

– Нандый ниму Китабушон мә нянгуәма:

«Гә фонзыди жәнжынму ба нагә шыту мә каншонди
эрдәли,

нәйикуэзы шыту чынли фон гынзыди шытули.

Жыгә сычинсы Анлахұ ганхади,

зә замуди лянмянчян

жысы тә чәчи сычин!»

⁴³ Эrsa кә фәди:

– Йинви жыгә, Вә ги ниму фә, Анлахұ ба Тади Гуйжя да ниму гынчян дуәдә, ги нәщезы ги шучынди минжынму гигини. ⁴⁴ Сый дедо нәгә шытушон, ба та пынсыни; нәгә шыту дедо сыйшон, ба та е нясыни.

⁴⁵ Яхұтиди да ахунму лян фарисейжынму ба Эrsaди жыщезы бифон тинжян, таму минбыйли Эrsa фә тамудини.

⁴⁶ Йинви жыгә таму щән ба Эrsa жуачұни, кәсы хәпали жынмули, йинцысы жынму фә Эрсасы шынжын.

Фә да янци либянди бифон

(Лк 14:15-24)

22 Эrsa хан ги таму фәли йигә бифон:

– ²Тяншонди Гуйжя е зущән йигә хуоншон ги гәжяди эрзы гуә жехунди янци йиән. ³Та дафади хуәжиму ба кижынму чиндо щисышонли, кәсы таму мә щән лә.

⁴Хуоншон кә дафа данлинди йибазы хуәжиму чи, гиди фынфу, жә таму ги кижынму фәни: «Вә ги янщишон ба чыди зұ бянийили, ба юбәди ню зэхали, ба са ду кәжя шәлү бянийили, чинди жә ниму яндин ләни». ⁵Кәсы нәщезы чинхади кижынму ба хуоншонди хуа мә донсы, гә мон гәдини: йигә жочұ тандо зули, йигә зұ мэмәчили, ⁶данлинди кижынму ба хуәжиму жуачұ, лян чуйту дади, лян жүә тиди, ба таму дасыли. ⁷Хуоншон чишонлә, дафади жүндуй жә ба нәщезы шүнфан шәмедәли, ба тамуди чынпу шодәли. ⁸Йиху та ги хуәжиму фәди: «Вәди жехун янци кәжя бянийили, кәсы щянтуни чинхади йиче кижынму мә жыгұ лә. ⁹Хазыр ниму зә да хонзыни чи, ба сый пынжянли, чинди жә таму ду до янщишон лә». ¹⁰Хуәжиму до

хонзыни ба йиче пынжянди жынму бу фэ хади ходи, ду чинлэли, жё кижынму ба жехун янши зуэ манли.

¹¹Хуоншон чўлэ, кан кижынмуди сыхур, ба йигэ мэ чуан хунщисыди щин йишонди жын канжян, ¹²зу вынди: «Лян-шу, ни до жытар лэ, виса мэ чуан хунщисыди щин йишон?» Нэгэ жын йижү ду мэ хуэйда. ¹³Хуоншон зу ги хуэ-жиму гиди фынфу, фэди: «Ба тади шу лян жүэ бончў, педо вэтуди хинанни; зэ нэтар та зу ба я нёди дакў-луанхўни!»

¹⁴Линийрни Эрса фэди:

– Чинхади жынму дуэ, кэсы жанчўлэди жынму шо!

*Ги Римди хуоншон чў чян,
хансы бу чў чянди вынти*

(Мк 12:13-17; Лк 20:19-26)

¹⁵Фарисейжынму чўчи йидарни шонлёнли, замужя зэ Эрсади хуа литу зо йигэ йинйир, ба Та жуачўни. ¹⁶Таму ба гэжяди манламу лян Иродди жынму йидарни дафадо Эрса гынчян, фэди:

– Вуста! Вэму жыдони, Нисы шыщинди жын зэмусы ба Анлахўди лўдо жыншыди ги жынму жёндици. Ни бу гуанщян жынму замужя сыщённи, е бу кан са жын зэ Ниди мянчянни. ¹⁷Чин Ни ги вэму фэйихар, Ни замужя сылёндини: замуди фалү жё ги Римди хуоншон чў чянима, хансы бу чў?

¹⁸Эрса зэ щинни ба тамуди жанчё жыдохади йимяр, зу фэди:

– Нимусы мунафикму! Виса ниму зыян Вёдини? ¹⁹Ба чў фиди йигэ йинчян ги Вё налэ, жё Вё канйихар!

Таму ба йигэ йинчян ги Эрса налэли. ²⁰Эрса вын тамули:

– Жыгэ йинчяншон хуади сыйди лянмян, щеди сыйди минзы?

²¹Таму хуэйдади фэсы:

– Рим хуоншонди лянмян дэ тади минзы.

Эрса йиху ги таму фэди:

– Зу жымужя, ба Рим хуоншонди дунши ги та гиги, ба Анлахўди дунши ги Анлахў гиги.

²²Таму ба жыгэ хуа тинжян тэ чёчили, зу ба Эрса лёха, зудёли.

**Вучонлиди жынму кә
хуәди вынти**

(Мк 12:18-27; Лк 20:27-40)

²³Зу нәйитян ющезы саддукейжынму доли Эrsa гынчян (таму бу шинфу вучонлиди жынму йүанхуэй хуәди), зу вын Эrsaди:

– ²⁴Вуста, Муса шынжын жетёли вәмули: «Сый дан мә шынха эрнү вучонли, тади шүнди яндин ё ба гуафу чүшон, ги та гәгә ё сын-ён вamuни». ²⁵Вәму донжунни ю чигә дишүнлэ: лода чүли шифур, йиху вучонли, ба пәе ги тади шүнди лөхали, мә шын вamu. ²⁶Зу жымужя лоэр, лосан – йичыр до лочи, ду ба лодади гуафу чүшон, йиху вучонли. ²⁷Линйирни нәгә нүжын е вучонли. ²⁸Жымужя дан фәчи, зә кә хуәди нәйитян, чигә дишүнму литу ба жыгә нүжын суан найигә дишүнди пәени? Йинцысы таму ду ба та чүгә.

²⁹Эrsa ги таму хуэйдади фәсы:

– Ниму цуәли! Виса? Йинцысы ниму бу минбый Китабушонди хуа, е бу жыдо Анлахүди лилён. ³⁰Жынму вучонли, кә хуәди йиху, е бу чү шифур, е бу жя нанжын, кәсы таму чынха зушён тяншонди Тянщянму йиённи. ³¹Нандый ниму мә нянгүә Анлахү фә вучонлиди жынму кә хуәди сычинди хуама? ³²Анлахү фәди: «Вәсы Ибрацимәди Анлахү, Исхарди Анлахү, Ягүбәди Анлахү». Жыгә хуади йисысы: Анлахүсы хуә жынмуди Анлахү, бусы вучон жынмуди Анлахү.

³³Жынму тинжян жымужяди жетё, ду тә чөчили.

Дин ёжинди фынфу

(Мк 12:28-34; Лк 10:25-28)

³⁴Фарисейжынму тинжян Эrsa ба саддукейжынмуди зуй сыйчүди йимяр, зу шудо йидарнили. ³⁵Таму донжунни ю йигә жыдо жёмын фалүди вустани, шён на йигә вынти ба Эrsa зыянийхарни. ³⁶Та вын Эрсали:

– Вуста, Анлахү ги жын гихади фынфу литу нагәсы дин ёжинди?

³⁷ Эrsa фэди:

– «Ни лян ниди йичеди шин, йичеди жиншын, йиче-ди эргили ба ниди Жонгуйди Анлахү ё шинэни». ³⁸ Жы зусы ту йигэ зэмусы дин ёжинди фынфу. ³⁹ Ди эргэ лян нэгэ йиён есы ёжинди: «Ни ба ни гынчянди жын, зущён гэжя йиён, ё шинэни». ⁴⁰ Анлахү гихади йиче фалу лян шынжынмуди жётё ду зэ жы лёнгэ фынфушон за-гындени.

Мэсих либянди вынти

(Мк 12:35-37; Лк 20:41-44)

⁴¹ Жыхур фарисейжынму шудо йидарнили, Эrsa вын та-мули:

– ⁴² Мэсих либян ниму сылэнди са? Тасы Сыйди Хубый?

Таму хуэйдади фэсы:

– Тасы Давуди Хубый.

⁴³ Эrsa фэди:

– Зэсы жымужя, виса Даву ба Анлахүди Рух жешуха, ба гэжяди Хубый жёди «Вэди Жонгуйди»? Даву фэли:

⁴⁴ «Анлахү ги вэди Жонгуйди фэли:

„Ни зуэдо Вэди юбонгэ,
дынди, Вэ ба Ниди дүшманму
эрдо Ниди жүэ дихани“».

⁴⁵ Даву гэжя дан ба Мэсих жёди «Жонгуйди», замужя Мэсих нын дон Давуди Хубый?

⁴⁶ Сысый ду ги Эrsa мэдый гишон хуэйда. Зу да нэйтян дашон сысый зэ бу ган ги Эrsa ги вынтили.

*Виса ё щёцин нянжсинжынму
лян фарисейжынмуни?*

(Мк 12:38-39; Лк 11:43, 46; 20:45-46)

23 Йиху Эrsa ги жынму лян тади манламу фэди:

– ² Нянжсинжынму лян фарисейжынму зэ Муса шынжынди вэршон зуэдини. ³ Ниму зунхү тамуди жётё еба, жоцү тамуди ганбан бэ ган, йинцысы таму гуон нын фэ, кэсы бу ган. ⁴ Таму ба жунди, нан быйди данзы гэдо

данлин жынмуди жягуэзышон, кэсы гэжя ба жыгэ данзы лян йигэ зыту ду бу шён нуэйихар. ⁵Таму ган са сычин еба, дусы жё жынму канжяни. Таму ба гэжяди тушон дэди пизы хэхэр* вон дани мидини, ба йишонди суйсуйзы вон куанни йиндини. ⁶Таму зэ янщишон нэ жан шонконзы, зэ синагога зуэ ту йигэ вифын. ⁷Таму е нэ жё жынму зэ гэшон ги таму фэ селяму, жё жынму ба таму хан: «Рабби! Рабби!»** ⁸Ниму бэ жё жынму ба ниму хан «рабби», йинцысы ниму ю луэмур йигэ Вустани. Ниму дусы дишүнму. ⁹Зэ дишон ба сысый е бэ хан «дада», йинцысы ниму гуон ю йигэ тяншонди Дадани. ¹⁰Бэ жё жынму ба ниму хан «линшужын», йинцысы ниму ю луэмур йигэ Линшужынни – жы зусы Мэсих. ¹¹Нимуди донжунни сыйсы дин видади, жё та ги данлинди жынму дон хуэжичи. ¹²Сый ба гэжя тэди го, Анлахү жё нэгэ жын дижанхани, кэсы ба дижанжын Анлахү вон гони тэни.

*Эрса пипинли фарисейжынму
лян жёмын фалүди вустамули*

(Мк 12:40; Лк 11:39-42, 44, 52; 20:47)

¹³⁻¹⁴ Эрса хан фэди:

– Нянжинжынму лян фарисейжынму! Нимуди жы йибазы мунафикму дуэму кэлян! Ниму ги данлинди жынму ба Тяншон Гуйжяди мын суэчүдини, гэжя е бу жинчи, сый шён жинчини, ба таму е бу фон!

¹⁵ Нянжинжынму лян фарисейжынму, ниму жы йибазы мунафикму дуэму кэлян! Ниму бу тынди ба йиче хэзы дэ дифон зужуангуэлэ, зывонди напа ба йигэ жын чүангуэлэ, жё та жин жёни. Ниму дынди жисы та жинли жёли, ба та жётёди би ниму йүэцин ха лён лэзыни, та зэ дуэзэхэ литу би ниму ё шуди зуй йүэцин жунни.

¹⁶ Ниму жы йибазы нянжин хади линшужынму дуэму кэлян! Ниму фэди: «Сый дан дуйчү Йерусалимди сы дү

* ^{23:5} Жыгэ пизы шёнщёр литу жуонди да Китабушон тынди шехади хуа.

** ^{23:7} Рабби (яхүти йүян) – Вуста.

жу, ба жыгә бу суан, кәсы сый дан дуйчү Иерусалимди сы литуди жинзы дў жу, ба жыгә жу яндин ё зунхўни». ¹⁷Ниму жыщезы хазыму дә шозыму! Сасы дин ёжинди: жинзыма хансы Иерусалимди сы жё жинзы чынха гуй-жундини? ¹⁸Ниму хан фәди: «Сый дан дуйчү шо гўрбаниди жуэзы дў жу, ба жыгә бу суан, кәсы дан дуйчү шо гўрбаниди жуэзышон гәди гўрбани дў жу, ба жыгә жу яндин ё зунхўни». ¹⁹Ниму жы йибазы хазыму! Сасы дин ёжинди: лишинма хансы шо гўрбаниди жуэзы жё лишин чынха гуйжундини? ²⁰Ниму жыдоха, сый дан дуйчү шо гўрбаниди жуэзы дў жу, та зу дуйчү шо гўрбаниди жуэзы лян зә нәгә жуэзышон гәди йиче лишин е дў жудини. ²¹Сый дан дуйчү Иерусалимди сы дў жу, та зу дуйчү Иерусалимди сы лян сы литу жўди Анлахў е дў жудини. ²²Сый дуйчү тян дў жу, та зу дуйчү Анлахў хуоншонди вифын лян шонмян зуәди Анлахў е дў жудини.

²³Нянжинжынму лян фарисейжынму, ниму жы йибазы мунафикму дуәму кәлян! Ниму на бәхә, шёхунщён лян данлинди щён видоди цо ги Анлахў чў зэкатидини, кәсы бу зунхў Анлахў фалуди жыншы ёжинди фынфу: гундо, щинван зэмусы щинфу. Ба жыщезы дин ёжинди фынфу ниму яндин ё ганни, кәсы ба чў зэкатиди фынфу е бә вондөли. ²⁴Нимусы нянжин хади линшужынму, ниму хәкә фили ба йигә суй цонйин ду гидёдини еба, кәсы ба луәтуә хунлунлурди янхачидини!

²⁵Нянжинжынму лян фарисейжынму, ниму жы йибазы мунафикму дуәму кәлян! Ниму ба ванванзы лян дезыди вәту щиди ганган-жинжинди еба, кәсы ба литу гәди дунщи на жишы дә чёнди лўдо дыйшонли. ²⁶Ханянжинди фарисейжынму-я! Ниму щянтуни ба «ванванзы» дә «дезы» литу щиди ганжин, жё вэмян е ганжин.

²⁷Нянжинжынму лян фарисейжынму, ниму жы йибазы мунафикму дуәму кәлян! Ниму зущён нәщезы фынйүаниди гуанцә йиён, вэмян хокан, кәсы литусы сыжынди гўдў лян зон дунщи. ²⁸Ниму вэяр канчи зущён гундожынму йиён, кәсы жыншы нимусы мунафикму зэмусы жи чуди жынму.

*Эрса ба нянжинжынму лян фарисейжынму
вонху шу зуйди зозор фэли*

(Лк 11:47-51)

²⁹Нянжинжынму лян фарисейжынму, ниму жы йибазы мунафикму дуэму кэлян! Йинцысы ниму ги зочянди шынжынму гэ гунбэзыдини, ба гундожынмуди жинянщён дабаңдини, ³⁰хан фэди: «Вэму дан зэ зүү-быйбыйди сыхур жўма, вэму бу щён таму йиён хэ шынжынмуди мин». ³¹Зу жымужя, жочў нимуди хуа нын канлэ, ниму гэжя зусы нэщезы дасы шынжынму жынмуди хубый! ³²Нимуди зүү-быйбый датур ганли сали, ниму зу ба нэгэ ганван! ³³Нимусы дўйүө чончунму зэмусы дўйүө чончунмуди эрзыму! Ниму замужя ба дуэзэхэди зуй нын дуэдэни? ³⁴Ниму тинйихар! Йинви жыгэ Вэ ги ниму дафачи шынжынмуни, ю эргилиди жынмуни лян вустамуни. Зу ба Вэ дафалэди жыщезы жынму литу ниму ба ющезы дасыни, ба ющезы ниму диндо муту шызышонни, ба ющезы ниму зэ синагога литу на бянзы дани, ниму ба таму да йигэ дифоншон вон данлинди йигэ дифонни жуйни. ³⁵Зу жымужя, жё ниму зэ дун-яшон дасылиди йиче гундожынмуди ще йүан ду до нимушон, жы зусы да дасыди Хабил шынжынди ще йичыр до дасыди Варакияди эрзы Закария шынжынди ще (ба Закария шынжын зэ Иерусалимди сыни шо гўрбаниди жуэзы лян зэ гуйжунди вэр донжунни дасыли). ³⁶Вэ ги ниму фэ шыхуа, жыщезы дасыди гундожынмуди ще зэ жы йибыйзыди жынмушон яндин ё лэни.

Эрса ви Иерусалим чынпу нэфанли

(Лк 13:34-35)

³⁷Иерусалим чынпу! Иерусалим чынпу! Ни ба шынжынму ду дасыли, ба Анлахў вон ни гынчян дафачиди жынму лян шыту ду дасыли! Вэ хын жихуэй вонщён ба ниди эрнүму бохўни, зущён мужи ба живазы шудо тади бонзы дихади йиён, кэсы ниму мэ вонщён! ³⁸Ниму кан! Нимуди фонзы вонху бянчын кунтанни. ³⁹Вэ ги ниму фэ: йичыр до ниму фэ жыгэ хуади сыхур: «Вэму ба Ни куажёнди! Ни ви Анлахў Жонгуйди минзы лэдини!», ниму ба Вэ канбужян.

Эрса ба Иерусалимди сы вонху цыйдѣди зозор фѣли

(Мк 13:1-2; Лк 21:5-6)

24 Эрса да Иерусалимди сыни чѣлѣди сыхур, манламу до Та мянчян, дуйчѣ Иерусалим сыди луфон зыди, жѣ Та канни. ² Эрса ги таму фѣди:

– Ниму ба жыщезы луфон ду каншонлима? Вѣ ги ниму фѣ шыхуа, жыгѣ дифоншон ба йиче шыту ду цыйдѣни, шытушон йигѣ шыту ду бу шын.

Эрса ба жынму шу нанди зэмусы шу япыйди зозор фѣли

(Мк 13:3-13; Лк 21:7-19)

³ Эрса зѣ Елеон саншон зуѣди сыхур, Тади манламу ту-ту-мѣмѣди, вын Тали:

– Чин Ни ги вѣму фѣйихар, жыгѣ сычин ду са сыхур йүни? Ни долѣди сыхур лян ахыр зѣмани долѣди ю са жихони?

⁴ Эрса хуѣйдади фѣсы:

– Ниму ѣ щѣщинни, бѣ жѣ жынму ба ниму линдо цуѣ лүшонли. ⁵ Хошо жынму ти Вѣди минзы лѣ фѣни: «Вѣ зусы Мѣсих!» Зу жымузя, таму ба хошо жынму линдо цуѣ лүшонни. ⁶ Ниму ба дажонди зэмусы жынму лян жынму жынжанди щинвын тинжян бѣ хѣпали. Жыщезы сычин дусы яндин йүди, кѣсы ба жыгѣ бу нын суанчын ахыр зѣмани.

⁷ Йигѣ минзѣ лян йигѣ минзѣ дажонни, йигѣ гуйжя лян йигѣ гуйжя дажонни. Хошо дифоншон ди дунни, жынму ду нѣ вѣдѣзыни. ⁸ Жыщезы сычин зуцѣн нүжын сын-ѣн вавади сыхур, шу тынди йиѣн.

⁹ Нѣхур ба ниму жуачѣ, жѣ ниму шу зуйни зэмусы хѣ нимуди минни. Ви Вѣди минзы дун-яшонди минжынму ду хын нимуни. ¹⁰ Хошо жынму ба гѣжяди щинфу дюдѣни, йигѣ ба йигѣ мѣчѣчини, йигѣ хын йигѣни. ¹¹ Хошо жя шынжынму лѣ, ба жынму михунди, линдо цуѣ лүшонни. ¹² Ган ха сычинди жынму дуѣди йимяр, хошо жынмуди щинниди щинѣ жанжян шохани, ¹³ кѣсы сый жыннѣдо йиршон, ба тади мин яндин жѣохани. ¹⁴ Ба Анлахѣди Хо Щинвын ги чѣан дун-яшонди йиче минзѣди жынму ду чуанжѣни, жыгѣ йиху ахыр зѣмани цѣ долѣни.

Видади кўнан

(Мк 13:14-23; Лк 21:20-24)

¹⁵Зу жымузя, ниму ба Даниил шынжын зэ Анлахў жан-чўлэди гуйжун дифоншон фəхади йигə кəву-сынза дунши (нянди жын яндин ё дун жы йижү хуади йисыни) канжяни; ¹⁶Нəхур зэ Яхўтиди дифоншон жўди жынму ё подо саншонни. ¹⁷Зэ фондинзышон занди жынму бə халэ до фонзыгəжя чү ниди дуншичи. ¹⁸Зэ тандони зў хуэди жынму бə хуэй жя чү тамуди йишончи. ¹⁹Нəжитян хуэвавади нүжынму лян нэ вавади мамаму дуəму нежон! ²⁰Ниму ё чито Анлахўни, бə жё жыщезы сычин дунтян хуэйжэсы шанбə йүхали. ²¹Йинцысы зущён нəжитянди кўнан да Анлахў зуэзоли дун-яди сыхур ду мə йүгуə, вонху е бу йү. ²²Нəщезы кўнанди жызы дан бу дуанщер-я, йигə жын ду бу нын хуə, кəсы Анлахў ги Та тəжянхади жынму ба нəщезы жызы зў дуанщерни.

²³Жынму дан ги ниму фə: «Ниму кан, Мəсих зэ жытарни!» хуэйжэсы «Мəсих зэ нəтарни!», ниму бə щинфу тамуди хуали. ²⁴Йинцысы жя-мəсихму лян жя-шынжынму чўлэни, щян кəрамəтини зэмусы ган да чёчи сычинни, зу жымузя, таму дан ю нынгу, михунди, ба Анлахў тəжянхади жынму линдо цуə лўшонни. ²⁵Ниму жиха! Вə ги ниму зозор фəли.

²⁶Жынму дан ги ниму фə: «Ниму кан, Мəсих зэ кунтаннини!», ниму бə чўчи; хуэйжэсы дан фə: «Мəсих зэ фонзыни!», ниму е бə щинфу. ²⁷Йинцысы Аданди Хубый долэди сыхур зущён да дунбонгə йичыр до щибонгə шандянди йиён. ²⁸Мəти зэ натарни, нəлойин е шудо нəтарни.

Аданди Хубый зэ димяншон кə лəни

(Мк 13:24-27; Лк 21:25-28)

²⁹Нəщезы кўнанди жызы гуəлиди йиху, жəту жəшынни, йүөлён е бу щянчўлэ гуонлён зэмусы щинщю да тяншон дехалэни, тяншонди лилён е дунтанни. ³⁰Нəхур Аданди Хубый долэди жихо зэ тяншон щянчўлэни. Чүан димяншонди йиче минзў ду пəфан-юцуди кўни; таму ба Аданди

Хубый зэ тьяншонди йүнцэшон лян Тади лилён дэ гуонлён до димяншон лэди канжянни. ³¹Аданди Хубый ба Тади Тянщянму дафалэ, жё таму дашын чуй лабани. Тянщянму да дун-яди жьбонгэ до дун-яди нэбонгэ ба Эрса тэжянхадиди жынму шудо Та гынчян лэни.

«Ниму ё да инжирфушон дый жётёни»

(Мк 13:28-31; Лк 21:29-33)

³²Ниму ё да инжирфушон дый жётёни: тади жыжыр да боборди зэмусы щин еер жончүлэди сыхур, ниму зу жыдоха: щятян бу йуанли. ³³Лян жыгэ йиён, ниму дан канчүлэ жыщезы сычин, ниму зу жыдоха, нэгэ сыхур зу куэ долэни, зущён зэ мын чянту занди йиён. ³⁴Ниму ё жихани: жы йибыйзы жынму хан бу вучонди зычян, жыщезы сычин зу йүни. ³⁵Тян дэ ди ду лансандёни, кэсы Вэди хуа йинавар ю жинни.

«Сый ду бу жыдо нэгэ сыхур дуэхур долэни»

(Мк 13:32-37; Лк 17:26-30, 34-36)

³⁶Сый ду бу жыдо нэгэ жызы дэ нэгэ сыхур дуэхур долэни: тьяншонди Тянщянму ба жыгэ е бу жыдо, Эрзы е бу жыдо, гуон Дада йигэр жыдони. ³⁷Аданди Хубый долэди сыхур йүди сычин зущён Нух шынжынди сыхур йүхади йиённи. ³⁸Зущён хунфи фачелэди зычян йиён, йичыр до Нух шынжын жинли дафичуанди нэйтян жынму чыли, хэли, жели хунли. ³⁹Таму ду мэ жыдо, замужя хунфи фали, ба таму ду щёмедёли. Адан Хубый ди эрбян лэди сыхур есы жымужяни. ⁴⁰Аданди Хубый лэди сыхур лёнгэ жын зэ тандони зү хуэни, ба йигэ нашон зуни, ба данлинди йигэ шынхани; ⁴¹лёнгэ нүжын йидарни зэ мэзышон мэ мянни, ба йигэ жуачү, нашон зуни, ба данлинди йигэ шынхани. ⁴²Йинви жыгэ ниму бэ дюдунли, йинцысы ниму бу жыдо нимуди Жонгуйди найитян долэни. ⁴³Ниму ба жыгэ ё жихани: зэсы йижязыди жўжын дан жыдо зыйвазы са сыхур лэ ту дунцини, та яндин бу дюдун, бу жё нэгэ зыйвазы туту-мэмэ жинчи. ⁴⁴Йинви жыгэ ниму е са сыхур ду ё шөлүхони, йинцысы ниму бу жыдо Аданди Хубый са сыхур лэни.

Кочүди зэмусы кобучүди хуэжиму

(Лк 12:41-48)

⁴⁵Сыйсы нэгэ кочүди, ю эргилиди хуэжи? Та жочү жү-жынди йитүэ ба жяниди сычин гуандини, та ба лёншы ги данлинди хуэжиму фындини. ⁴⁶Жўжын хуэйлэ, дан канжян жыгэ хуэжи зу жымузя гандини, до жыгэ хуэжишон ю дуэмудади гошин! ⁴⁷Вэ ги ниму фэ шыхуа, жүжын зу жё нэгэ хуэжи гуан тади йиче фугуйни. ⁴⁸Кэсы кобучүди хуэжи зэ щинни дан жымузя сылён: «Вэди жүжын бу нын жыму зо хуэйлэ», ⁴⁹нэхур та ба данлинди нан хуэжиму дэ нүхуэжиму дани, гэжя лян хэжюди жынму лян чы дэ хэни. ⁵⁰Мэгуэсы тади жүжын зэ та бу дынди нэйитян, бу жыдо-ди сыхур хуэйлэни. ⁵¹Жўжын жё тади жүэ дозэзы вонху жонхани, жё та лян мунафикму йидарни шу зуйни, зэ нэ-тар та ба я нёди дакү-луанхуни.

Шыгэ гүнёнмуди бифон

25 Эрса хан фэди:
– Нэгэ сыхур Тяншонди Гуйжя лян шыгэ гүнёнму ба юдынзан нашон чўчи жейин щиннүшиди йиён. ²Тамуди донжунни вугэсы гуатар гүнёнму, вугэсы ю эргилиди. ³Вугэ гуатар гүнёнму ба юдынзан нашонли еба, кэсы таму ба чин-ю ги гэжя мэ на; ⁴вугэ ю эргилиди ба юдынзан нашон, хан ги пинзыни ба чин-ю гуанманли. ⁵Щиннүшү цы-дёди йимяр, шыгэ гүнёнму ду дюли дун, фижуэли. ⁶Доли бан-ени, юди жын хантуэли: «Щиннүшү долэли, ниму ду чўлэ, жейин талэ!» ⁷Шыгэ гүнёнму ду щинлэ, ба гэжяди юдынзан жянжуэли. ⁸Нэхур гуатар гүнёнму ги ю эргилиди фэди: «Зымыйму, ниму ба нимуди чин-ю ги вөму фынги йидяр, йинцысы вөмуди дынзан куэ зу сыдыйли». ⁹Нэщезы ю эргилиди гүнёнму хуэйдади фэсы: «Бу, будыйчын, ба вөмуди чин-ю ги ниму фынгичи бу гу. Ниму гэжя зэ гэшон ги ниму мэчи!» ¹⁰Вугэ гуатар гүнёнму чўчи мэ чин-ючиди сыхур, щиннүшү долэли. Нэ вугэ шөлүходи гүнёнму лян щиннүшү йидарни жинчи, гуэли щисыли. Таму ду жинчи, дамын донвөр зу гуанчўли. ¹¹Шынхади вугэ

гүнёнму йиху е лэли. Таму ханди: «Жонгуйди! Жонгуйди! Чин ни ги вэму ба мын кэкэ!»¹² Шиннүшү хуэйдади фэсы: «Вэ ги ниму фэ шыхуа, вэ жынбудый ниму!»

¹³ Эрса йиху фэди:

– Йинви жыгэ ниму е бэ дюдунли, йинцысы ниму бу жыдо найитян, найигэ сышыншон нэгэ сыхур долэни.

Сангэ хуэжиди бифон

(Лк 19:11-27)

¹⁴Тяншонди Гуйжя е зушён йигэ жын да жяни чўчи шон йуан лўшонди йиён, ба гэжяди хуэжиму жёлэ, ги таму ба цэбый жёгили. ¹⁵Ги мый йигэ жын жочў тади нынгу гили: ги йигэ гили вучян жинчян, ги данлинди йигэ гили лёнчян жинчян, ги ди сангэ гили йичян жинчян, гэжя йиху шонли лў, зудёли. ¹⁶Ба вучян жинчян линшонди нэйигэ хуэжи донвэр чўчи зўли мэмэли, дуэйү хан зынли вучян жинчян. ¹⁷Ба лёнчян жинчян линшонди нэйигэ хуэжи е жымужя банли, та на лёнчян жинчян дуэйү хан зынли лёнчян жинчян. ¹⁸Кэсы ба йигэ жинчян линшонди нэйигэ хуэжи чўчи, зэ дини вали йигэ кынкынзы, ба жўжын ги та гихади жинчян мэчўли. ¹⁹Гуэли хошо жызы, нэ жигэ хуэжиди жўжын хуэйлэ, лян таму суанли жонли. ²⁰Ба вучян жинчян линшонди нэйигэ хуэжи жинлэ, дуэйү хан налэли вучян жинчян фэди: «Жўжын, ни ги вэ гили вучян жинчян. Жысыма, ни кан, вэ дуэйү хан зынли вучян жинчян». ²¹Жўжын фэди: «Ходихын, нисы кочўди хо хуэжи! Ни зэ щё фуршонсы кочўди, вэ йитуэ ни гуан да фурди сычинни. Ни лэ, лян жўжын йидарни гошинлэ!» ²²Ба лёнчян жинчян линшонди нэйигэ хуэжи жинлэ, фэди: «Жўжын, ни ги вэ гили лёнчян жинчян. Жысыма, ни кан, вэ дуэйү хан зынли лёнчян жинчян». ²³Жўжын ги та е фэди: «Ходихын! Нисы кочўди хо хуэжи! Ни зэ щё фуршонсы кочўди, вэ йитуэ ни гуан да фурди сычинни. Ни лэ, лян жўжын йидарни гошинлэ!» ²⁴Нэйихур ба йичян жинчян линшонди хуэжи е жинлэ, фэди: «Жўжын, вэ жыдо нисы йигэ дэдў жын. Ни шу бусы ни гэжя жунхади шучындини, ни на бусы ни гэжя гэхади дуншидини.

²⁵ Вә хәли пали, зу ба ниди жинчян цондо динили. Ни кан, ниди жинчян ду зә жытарни». ²⁶ Тади жўжын фәди: «Нисы йигә хашинчонди зэмусы лан хуәжи! Ни жыдони, вә шу бусы вә гэжя жунхади шучын зэмусы на бусы вә гэжя гәхади дуншидини. ²⁷ Жыдо жыгәди йимяр, ни ё ба вәди чян гәдо йинхони, дындо вә хуэйләди сыхур жё вә лян бынчян йидарни ба зынхади чян йиче ду нашон. ²⁸ Ниму ба тади жинчян налэ, ги нэгә ю шыгә жинчянди хуәжи гиги: ²⁹ йинцысы сый юли, ги та хан тянни, жё та дуэйү хан юни; сый мәюли, ба та юди нәйидяндяр е дуәдәни. ³⁰ Ба мәю хочўди жыгә хуәжи вон вәтуди хинанни ганчўчи, жё та зә нэтар ба я нәди дакў-луанхўчи!»

Ахыр зэмани нәйтян ги сый дин зуйни

³¹ Жисы Аданди Хубый ба гэжяди миншын дыйшон, Та зуцән хуоншон лян Тянщянму йидарни ләни, нэхур Та зуәдо хуоншонди вифыншонни. ³² Ба димяншонди гәён минзўди жынму ду шудо Аданди Хубыйди мянчянни. Та ба жынму фынчын лён базыни, зуцән фон-ёнжын ба жүлү лян ён фынкәди йиён: ³³ ба ён гәдо Тади юбонгә, ба жүлү гәдо Тади зуәбонгәни. ³⁴ Йиху Хуоншон ги зә Та юбонгә занди жынму фәни: «Ю Вә Дадади берекетиди жынму, ниму лә! Ниму лә, ба Тяншонди Гуйжя жешуха. Ба жыгә Гуйжя да зуэзо дун-яди сыхур дашон ги ниму кәжя шәлүхали. ³⁵ Йинцысы Вә нә вәдўзыди сыхур, ниму ги Вә гили чыдили. Вә конди сыхур, ниму ги Вә гили хәдили. Вә золи жўди вәрли, ниму ба Вә жешухали. ³⁶ Вә жинжирди, мәю йишонлэ, ниму ги Вә гили йишонли. Вә хәли бинли, ниму ба Вә жоканли. Вә зуәли банфонзыли, ниму лә, ба Вә далоли». ³⁷ Нэхур нәщезы гундожынму хуэйдади фәни: «Жонгуйди! Вәму са сыхур канжян Ни нәли вәдўзы, ги Ни гили чыдили? Ни конли, вәму ги Ни гили хәдили? ³⁸ Са сыхур канжян Ни золи жўди вәр, ба Ни жешухали? Канжян Ни жинжирди, мәю йишон, ги Ни гили йишонли? ³⁹ Са сыхур вәму канжян Ни хәли бин хуэйжәсы зуәли банфонзы, ба Ни далоли?» ⁴⁰ Хуоншон хуэйдади фәсы: «Вә ги ниму фә шыхуа, йинви ниму ви

Вэди минзы ги Вэди дишүнму литу йигэ жымузя ганли, ниму зушён ги Вэ ганлиди йиён!»

⁴¹Жыгэ йиху Хуоншон ги Та зуэбонгэ занди жынму фэни: «Анлахұ жулиди жыщезы жынму! Ниму да Вэ гынчян гун! Ниму жин ги иблис лян тади бонцуму шөлүхади йүнзун бу сыдэди хуэкын литучи! ⁴²Йинцысы Вэ нэли вэдүзыли, ниму ги Вэ мэ ги чыди; Вэ конли, ниму ги Вэ мэ ги хэди; ⁴³Вэ золи жўди вэрли, ниму ба Вэ мэ жешуха. Вэ жинжирди, мэю йишонлэ, ниму ги Вэ мэ ги йишон. Вэ хэли бинли зэмусы зуэли банфонзынили, ниму ба Вэ мэ жокан». ⁴⁴Нэхур таму фэни: «Жонгуйди! Вэму са сыхур канжян Ни нэли вэдүзыли хуэйжэсы шули конли; золи жўди вэрли хуэйжэсы жинжирди, мэю йишонлэ; хэли бинли хуэйжэсы зуэли банфонзыли, кэсы вэму ги Ни мэ бонмон?» ⁴⁵Хуоншон хуэйдади фэни: «Вэ ги ниму фэ шыхуа, йинви ниму ги Вэди дишүнму литуди йигэ жымузя ду мэ ган, ниму зушён ги Вэ е мэ ганди йиён!» ⁴⁶Жымужяди жынму шу йинаварди зуйни. Нэщезы гундожынму йинавар хуэни.

*Яхўтиди да ахунму
вонщёнди ба Эrsa дасыни*

(Мк 14:1-2; Лк 22:1-2; Йих 11:45-53)

26 Эrsa ба жыщезы хуа фэван, ги Тади манламу фэди: – ²Ниму жыдоха, зэ гуэли лён тян зусы Яхўтиди Пасха жечи. Ба Аданди Хубый вонху мэчўчи, диндо муту шызышонни.

³Нэхур яхўтиди да ахунму лян минжынди ложынму ду шудо яхўтиди да ахунмуди йўанзынили. Жыгэ да ахунди минзы жёди Каиафа. ⁴Таму йидарни мусуанли, замузя сы ज्याнчэди ба Эrsa жуачў, йиху дасыни. ⁵Кэсы таму фэди:

– Заму жечиди жызыни бу нын зў жыгэ сychин, бэ жё йиче минжын фанчелэли.

Йигэ нўжын ба Эrsa на щён-ю мэли

(Мк 14:3-9; Йих 12:1-8)

⁶Эrsa зэ Вифания щёнжуонниди Щимэди жяни дон киди сыхур (нэгэ Щимэ зочян хэгуэ мафынбин), ⁷йигэ

нүжын нади жычянди пинзы лэли, литу гуанди жыншыди гуйжун шён-ю. Эrsa зэ коншон тонди сыхур, нэгэ нүжын ба шён-ю мэдo Эrsaди тушонли. ⁸Манламу ба жыгэ сычин канжян, тэ чишонлэли, зу фэди:

– Виса жымужя лонфи шён-юни? ⁹Ба жыгэ шён-ю мэдө, ба чян дан ги чүнжынму санги дуэму хо.

¹⁰Эrsa ба жыгэ жыдоха, зу ги таму фэди:

– Ниму виса винан жыгэ нүжындини? Жыгэ нүжын ги Вэ ганли йигэ хо сычин. ¹¹Йинцысы чүнжын йинавар лян ниму зэ йидарнини, кэсы Вэ фанчон лян ниму бу нын зэ йидарни. ¹²Та ба жыгэ шён-ю мэдo Вэди шыншон, йинцысы та цошинди, ба Вэди шынзы шэлүди зозор сундэни. ¹³Вэ ги ниму фэ шыхуа: зэ чүан дун-яшон, ба Анлахүди Хо Шинвын булүн садо нагэ дифоншон еба, жынму ду фэ жыгэ нүжын ганхади сычинни, жысы йинви жинян тади.

Жүхүти шён ба Эrsa ги да ахунму мэгини

(Мк 14:10-11; Лк 22:3-6)

¹⁴Эrsaди шыэргэ манламу литуди йигэ, минзы жэди Жүхүти Искариот до яхүтиди да ахунмуди мянчян, фэди:

– ¹⁵Вэ дан ба Эrsa ги ниму жэги, ниму ги вэ ги сани?

Таму ба саншыгэ йинчян ги Жүхүти гигили. ¹⁶Да нэгэ сыхур дашон, Жүхүти дынли фонбян сыхурли, шён ба Эrsa ги таму мэгини.

Эrsa лян Тади манламу чыли Пасха жечи хушонди фанли

(Мк 14:12-21; Лк 22:7-13, 21-23; Йих 13:21-30)

¹⁷Чы мэю жёмян мэмө жечиди туйитян, манламу до Эrsaди мянчян вынди:

– Вэму зэ натар чи, ги Ни ба Пасха жечи хушонди фан шэлүхани?

¹⁸Эrsa хуэйдади фэсы:

– Ниму вон чынпуни чи. Зэ нэтар ниму пынжян йигэ жынни зу ги та фэ: «Вуста фэди: „Вэди сыхур доли. Вэ лян Вэди манламу зэ ниди жяни чы Пасха жечи хушонди фанни“».

¹⁹Манламу зу жочү Эрса гихади фынфу зүли, ба Пасха жечи хушонди фан шэлүхали. ²⁰Хушон Эрса лян шыэргэ манламу зуэдо жуэзыди туанйүарнили. ²¹Чы чыдиди сы-хур, Эрса фэди:

– Вэ ги ниму фэ, ниму донжунни йигэ жын ба Вэ мэчү-чини.

²²Таму ду тэ пэфанхали, йигэ гыншон йигэ вын Эрсали:

– Жонгуйди! Нэгэ жын бусы вэма?! Нэгэ жын бусы вэма?!

²³Эрса хуэйдади фэсы:

– Ба Вэ мэчүчиди нэгэ жын лян Вэ йидарни зэ дезыни занди чы мэмэдини. ²⁴Вэ, Аданди Хубый, зушён Китабу-шон шехади йиён, ё шу кўнанни; кэсы ба Аданди Хубый мэчүчиди нэгэ жын тэ кэляндихын! Нэгэ жын би мө сын-ёнхади хошер!

²⁵Ба Эрса мэчүчиди Жүхүти е вынли:

– Вуста, бусы вэма?

Эрса хуэйдали:

– Ни гэжя фэли.

Эрса лян манламу чыли хушонди фанли

(Мк 14:22-26; Лк 22:14-20)

²⁶Таму чыфанди сыхур, Эрса ба йигэ мэмэ начелэ, ги Анлахү долигэ ще, ба мэмэ быйкэ, ги манламу фынги, фэди:

– Ниму нашон, чы. Жыгэсы Вэди Шынзы.

²⁷Йиху Эрса ба йи ванванзы путожю начелэ, ги Анлахү долигэ ще, е ги манламу гиги, фэди:

– Ниму ду хэ. ²⁸Жысы Вэди Ще: на жыгэ Ще Анлахү лян жынму динли хэтунли. Жыгэ Щесы ви хошо жынму тонхади Ще, жё Анлахү ба йиче жынмуди гўнахар ду фоншэни. ²⁹Вэ ги ниму фэ, Вэ Дадади Гуйжя лэди нэйитянди зычян, Вэ бу хэ жыгэ путожю. Нэхур Вэ лян ниму хэ шин путожюни.

³⁰Таму ба куажён Анлахүди чүзы чонба, чүлэ вон Елеон саншон зудёли.

*Эрса ба Пётр
фанлянди зозор фэли*

(Мк 14:27-31; Лк 22:31-34; Йих 13:36-38)

³¹ Йиху Эрса ги манламу фэди:

– Жиргэ хили ниму ду фанлян бу жын Вэ, зущён Китабушон шехади йиён: «Вэ ба фон-ёнди жын дасыни, ёнчүн сандёни». ³² Мэгуэсы кэ хуэлиди йиху, Вэ зэ нимуди тунидо Галилея дифоншонни.

³³ Пётр ги Эрса фэди:

– Напа данлинди жынму ду фанлян бу жын Ни еба, вэ йүнзун бу фанлян!

³⁴ Эрса ги Пётр фэди:

– Вэ ги ни фэ шыхуа, жиргэ йивэши гунжи жёминди зочян, ни сан бян фэ жынбудый Вэни.

³⁵ Пётр хуэйдади фэсы:

– Жё вэ лян Ни йидарни вучонни еба, вэ ду бу фэ жынбудый Ни!

Данлинди манламу е жымузя фэли.

*Эрса зэ Гефсимания фуй уанни
читоли Анлаху́ли*

(Мк 14:32-42; Лк 22:39-46)

³⁶ Эрса лян манламу доли йигэ дифоншонли, минзы жёди Гефсимания. Эрса ги таму фэди:

– Ниму зэ жытар зуэди, дынийхар, Вэ чито Анлаху́чини.

³⁷ Та лян Пётр зэмусы Заведейди лёнгэ эрзы йидарни зудёли. Эрсади щинни фали юцу зэмусы пэфанли, ³⁸ ги таму фэди:

– Вэди щинни пэфандихын, зущёнсы Вэ вучондыйли. Ниму лян Вэ шындод жытар, кэсы бэ дюдунли!

³⁹ Эрса вончян зули жи бу, лян ту дедод дишон, чито Анлаху́ фэди:

– Вэди тяншонди Ада-я! Ни дан ю нынгу, Вэ чито Ни ба жыгэ кунан, зущён йиван кўфи йиён, да Вэди мянчян нагуэчи! Кэсы Ни бэ жочу́ Вэди вонщён ган; Ни жочу́ Ниди вонщён ган.

⁴⁰Та зугуэлэ до манламу гынчян, ба таму сангэ фижуэди канжян, зу ги Пётр фэди:

– Ниму фижэдинима? Ниму йигэ сышынди донжунни лян Вэ бэ фижэ будыйчынма? ⁴¹Ниму бэ дюдунли зэ-мусы хан ё чито Анлахүни, щёшинди, ниму бэ шон иблисди донли. Нимуди жиншын жёшы, кэсы шынзы мёю личи.

⁴²Эрса зугуэчи, ди эрбян чито Анлахүди кэ фэди:

– Вэди тяншонди Ада-я, Вэ дан ба жы йиван кўфи дуэ-будё, жё Вэ яндин дан ё хэни, Вэ читоди жё Ниди вонщён чынха!

⁴³Йиху Эрса йүанхуэй доли манламу гынчян, ба таму хан фижэди канжянли. Манламу кэфиди йимяр, тамуди нян-жин ду зынбукэ. ⁴⁴Эрса ба таму лёха, гэжя зугуэчи, йүанхуэй ба чито Анлахүди хуа ди санбян кэ тифэли йихуэй.

⁴⁵Йиху Эрса кэ зугуэлэ, ги Тади манламу фэди:

– Ниму хан фижэдинима, хан хуандинима? Гули, сыхур доли, ба Аданди Хубый ги югўнахар жынмуди шуни жёгидини. ⁴⁶Челэ, заму зу. Ниму кан, ба Вэ мэчўчиди нэгэ жын лэли!

Ба Эрса жуачўли

(Мк 14:43-50; Лк 22: 47-53; Йих 18:3-12)

⁴⁷Эрса хан фэ хуадини, нэйихур шыэргэ манламу дон-жунниди йигэ, минзы жёди Жўхўти лян хошо жынму лэли. Йибазы жын лян та йидарни нади до дэ бонзы лэли. Тамусы яхўтиди да ахунму лян ложынму дафалэди жын.

⁴⁸Ба Эрса мэчўчиди нэгэ жын шянтуни ё ги таму ги йигэ жихони; та фэди:

– Вэ ба сый шинтынли, нэгэ зусы ниму ёди Жын. Ниму ба Та ниннинди жуачў.

⁴⁹Жўхўти хуонхуон-монмонди до Эрса гынчян, ги Та фэди:

– Хома, Вуста!

Зу ба Та шинтынлихар. ⁵⁰Эрса фэди:

– Ляншу, виса ни до жытар лэли?

Йиху нэщезы жынму до Эрса гынчян, ба Та жуачўли.

⁵¹Лян Эрса йидарни занди йигэ жын ба шу чынкэ, ба до

начүлэ, ба яхүти да ахунмуди хуэжи канлихар, зу ба тади йигэ эрдүэ кандёли. ⁵² Эрса ги та фэди:

– Ба ниди до нагуэчи, гэдо дошүзы литу! Йинцысы сый ба до нашон, ба та е на до садёни. ⁵³ Нандый ни сылёнди, Вэ мёю нынгу чито Вэди тяншонди Дада ги Вэ бонмонма? Та донвэр зу ги Вэ бу дафалэ шыэргэ жүндуй Тянщянма? ⁵⁴ Вэ дан жымузя ган, Китабушон фэхади йиче сычин замузя нын чынхани?

⁵⁵ Йиху Эрса ги нэйибазы жын фэди:

– Ниму нади до дэ бонзы лэ, шён ба Вэ, зушён зыйку йиён, жуачүнима? Вэ мый йитян зэ Иерусалимди сыни жётё жынмудини, ниму ба Вэ мэ жуа. ⁵⁶ Жыгэ йүхади сычин жё Анлахү чечү шынжынму шехади хуа яндин ду чынхани.

Нэхур манламу ду ба Эрса лёха, подёли.

***Яхүтиди да ахунму ги Эрса
динли сызуйли***

(Мк 14:53-65; Лк 22:54-55, 63-71; Йих 18:13-14, 19-24)

⁵⁷ Нэшезы жынму ба Эрса жуачү, нингүди ба Та линдо яхүтиди да ахун Каиафади фонзынили, нянжинжынму лян ложынму йидарни ду шудо нэтарли. ⁵⁸ Пётр лойүанни гыншон Эрса зудини. Доли яхүти да ахунди йүанзыни, Пётр жинчи, зуэдо хуэжимуди донжунни, люшынди канли, жыгэ сычин линйир замузя йүни. ⁵⁹ Яхүтиди да ахунму зэ годын шонлён хуэйшон вонщёнди зо йигэ йинйир, жочү жыгэ ги Эрса дин сызуйни. ⁶⁰ Лэли хошо жягүважынму еба, кэсы да ахунму ба жымужяди йинйир мэ зожуэ. Линйирни лёнгэ жын до чянту, фэди:

– ⁶¹ Жыгэ Жын фэгуэ: «Вэ нын ба Анлахүди Иерусалимди сы цыйдэ, сан тянди жызыни йүанхуэй кэ ба та гечелэни».

⁶² Яхүтиди да ахун занчелэ, вынли Эрсали:

– Жышезы жын ги Ни дин зуйдини, нандый Ни мёю са хуэйдама?

⁶³ Эрса йишын ду мэ чү. Яхүтиди да ахун кэ ги Та фэди:

– Ви йинавар хуэди Анлахү Ни хазыр зу дү жуди ги вэму фэ: Ни зусы Мэсих, Анлахүди Эрзыма?

⁶⁴ Эrsa хуэйдади фэсы:

– Жысы ни гэжя фэхади; кэсы Вэ ги ниму фэ: жыгэ йи-ху ниму ду канжяни, Аданди Хубый зуэдо Анлахүди юбонгэни. Та зэ тяншонди йүңцэшон занди долэни!

⁶⁵ Яхүтиди да ахун ба жыгэ хуа тинжян, ба гэжяди йи-шон чэлан, зу фэди:

– Та дэцэ Анлахүдини! Заму зэ бу ё данлинди гүвали. Ниму гэжя ду тинжянли, Та фэли дэцэ Анлахүди хуали!

⁶⁶ Ниму замужя сылэндини?

Таму хуэйдади фэсы:

– Ги Та ё дин сы зуйни!

⁶⁷ Жыгэ йиху таму ги Эrsaди ляншон тўли тўмэли, лян чуйту ба Эrsa дали, юшезы жынму жочў Эrsaди ляншон шанли бажонли:

– ⁶⁸ Мэсих! Ни цэйихар, сый да Нидини?

Пётр фанлян бу жын Эрсали

(Мк 14:66-72; Лк 22:56-62; Йих 18:15-18, 25-27)

⁶⁹ Зу нэгэ сыхур, Пётр хан зэ нэгэ фонзыди йүанзыни зуэди-ни; яхүтиди да ахунди йигэ нүхуэжи доли та гынчян, фэди:

– Ни есы Галилея дифонди нэгэ Эrsa йибазы литуди йигэ!

⁷⁰ Пётр ба жыгэ зэ дажяди мянчянни бужынди фэди:

– Вэ бу жыдо, ни фэ садини.

⁷¹ Йиху Пётр чўчи, доли йүанзыди пын диха, данлинди йигэ нүхуэжи ба та канжян, ги нэтар занди жынму фэди:

– Жыгэ жынсы Назарет чынпуниди Эrsa йибазы литуди йигэ.

⁷² Кэсы Пётр дў жуди, кэ ба жыгэ бужынди фэди:

– Вэ жынбудый жыгэ Жын!

⁷³ Гуэли йихур, зэ та гынчян занди жынму йүанхуэй ги Пётр фэди:

– Ни шызэ зусы таму йибазы литуди йигэ, йинцысы ниди хуа ба ни зыфэдини!

⁷⁴ Пётр йүанхуэй дў жуди фэди:

– Вэ жынбудый нэгэ Жын; жыгэ дан бусы жыншыди, жё Анлахү ба вэ зуйдэчи!

Пётр ба жыгә хуа жён фөван, гунжи донвәр жёли минли.
⁷⁵ Пётр жыхур цә ба Эрасади хуа жичэлэли: «Гунжи жё минди зочян, ни фө сан бян жынбудый Вәни». Пётр чўчи, щинни наншуди, кўтуэли.

Эрса ээ Пилатди мянчяни

(Мк 15:1; Лк 23:1-2; Йих 18:28-32)

27 Ганзо йизор йиче яхўтиди да ахунму лян ложынму йидарни шонләнли, замужя ба Эрса дасыни. ² Таму ба Эрса бончў, линшон зули, ги Римди жыгуанжын Пилат жёдо шунили.

Жўхўти Искариотди вучон

(Ан 1:18-19)

³ Ба Эрса мачўчиди Жўхўти канжян ги Эрса динли зуйли, та йиху хули хуэй, зу ба саншыгә йинчян начи, йүанхуэй ги яхўтиди да ахунму лян яхўтиди ложынму гиги, ⁴ фәди:

– Вә ганли гўнахарли: ба мәю цуәди жын мачўчи, ба тади мин хәли!

Таму хуэйдади фәсы:

– Нәсы ни гәжяди сычин, лян вәму мәю сыса щәнган.

⁵ Жўхўти ба чян педо Иерусалимди сы литу, чўчи, зу шонли дё, ба гәжя дёсыли. ⁶ Яхўтиди да ахунму ба Жўхўти педәлиди чян шушон, фәди:

– Ба жыгә чян гәдо шу нетиди щәнщәнзы литу ги сы жёгичи будыйчын, йинцысы жыгә чянсы хәли минди чян.

⁷ Таму шонләнди, на жыгә чян ба важәнжынди йикуәди мәшон, сун лищәнжынмуди мәтини. ⁸ Йинви жыгә, жынму ба нэгә ди йичыр до жиргә жёди «Ще тан-до». ⁹ Нәхур Анлахў чечў Иеремия шынжын фәхади хуа чынли:

«Таму ба саншыгә йинчян нашон

(жы зусы Израилди жынму ви Та чўхади жячян)

ба важәнжынди йикуә ди мәшонли,

¹⁰ Жонгуйди зу жымужя ги Вә гили фынфули».

Пилат ба Эрса шынвынли

(Мк 15:2-5; Лк 23:3-5;

Йих 18:33-38)

¹¹Эрса зандо жыгуанжын Пилатди мянчянли, жыгуанжын вын Тали:

– Нисы Яхўти жынмуди Хуоншонма?

Эрса хуэйдади фэсы:

– Жыгэсы ни фэхади.

¹²Яхўтиди да ахунму лян ложынму ги Та гуэ зуйдини еба, Эрса са ду мэ фэ. ¹³Пилат ги Эрса фэди:

– Ни тинжянлимэ, таму жочў Ни фэли дуэшо фандуйди хуа?

¹⁴Эрса йуанхуэй йишын ду мэ янчуан, йинви жыгэ Пилат тэ чёчихали.

Ги Эрса динли сызуйли

(Мк 15:6-15; Лк 23:13-25;

Йих 18:39-19:16)

¹⁵Мый йихуэй яхўтиди Пасха жечишон Пилат ю йигэ куйчынни: жынму щён ё сый, та зу ба нэгэ ю зуйди жын ги таму да банфонзыни фонкэни. ¹⁶Нэхур таму ю чўли минди йигэ ю зуйди жынни, минзы жёди Варавва. ¹⁷Жынму шудо йидарниди сыхур, Пилат вын тамули:

– Ниму щён жё вэ ги ниму ба сый фонкэни: ба Вараввама хансы ба Эрса, минзы жёди Мэсих?

¹⁸Пилат миндамин жыдо тамуди щинни буфучи Эрсадини, йинви жыгэ таму ба Эрса ги та жёгили. ¹⁹Пилат зэ вынгуансыди вифыншон зуэди сыхур, тади пэе дафалэли йигэ жын, жё ги Пилат фэни:

– Ни ги нэгэ гундо Жын са ха сычин ду бэ сы, йинцысы зуэргэ хили вэ зэ фимындини ви Та шули кўли.

²⁰Яхўтиди да ахунму лян ложынму ба жынму ханчелэ, жё таму чито Пилат ги таму ба Варавва фонкэни, дозэзы ги Эрса дин сызуйни. ²¹Пилат кэ вынли жынмули:

– Жы лёнгэ жын литу ба найигэ ниму щён жё вэ ги ниму фонкэни?

Таму хуэйдади фэсы:

– Ба Варавва фонкэ! ²²Пилат вын тамули:

– Жымужя, жё вё ги Эrsa, ба Та хан жёди Мэсих, зў сани?

Йиче жынму ду ханди:

– Ба Та диндо муту шызышон!*

²³Пилат кэ вын тамуди фэди:

– Та ганли са ха сычинли?

Жынму йүэщин дашын ханди:

– Ба Та диндо муту шызышон!

²⁴Пилат канди жыгэ сычин зэ фэ мэю йисы, жынму дозэзы йүэщин фанчелэли, зу зэ жынмуди мянчяни ба шу на фи щили, ги таму фэди:

– Ба жыгэ Жынди мин хэди зуй бу зэ вёшон. Ниму гёжя кан ниму зў санини!

²⁵Йиче жынму дашын ханди:

– Хэ Тади минди зуй зэ вёму лян вёмуди хубыйшонни!

²⁶Тинжян жыгэ хуа, Пилат ба Варавва ги таму фонкэли, гиди фынфу жё ба Эrsa дозэзы на бянзы дани, йиху жё ба Та диндо муту шызышонни.

Донбинди жынму зотали Эрсали

(Мк 15:16-20; Йих 19:2-3)

²⁷Пилатди донбинди жынму ба Эrsa линдо жынфуди йүанзы литу, жё дуйву йиман ду шудо жытарли. ²⁸Таму ба Эrsaди йишон чуадё, ги Та чуанли йижян хунлонлор янсьйди позы; ²⁹лян цыязыди тёзы бябли йигэ чуанчуанзы ги Эrsa дэдо тушон; ба жүгунзы гэдо Тади юшуни, йиху таму ду гуйдо Тади мянчян зотали Эрсали, чуащёди фэли:

– Яхүти жынмуди Хуоншон, Ни ходинима!

³⁰Таму на йигэ щи бонбонзы ба Эrsaди ту дади, ги Тади ляншон тўли тўмэли. ³¹Таму ба Эrsa зоталиди йиху, ба хун янсьйди позы да Тади шыншон туэхалэ, ба Тади йишон

* ^{27:22} Муту шызысы ю шызы (†) ёнзыди муту жуонзы.

ги Та кә чуаншонли, йиху ба Эрса линшон чи, шён ба Та диндо муту шызышонни.

Ба Эрса диндо муту шызышонли

(Мк 15:21-32; Лк 23:26-43;

Йих 19:17-27)

³² Таму чўлэди сыхур ба Киринае дифоншонди йигә жын, минзы жёди Шимэ пынжянли, зу нингўди жё та ба дин Эрсади муту шызы быйшонни. ³³ Таму ду до йигә дифоншонли, жыгә дифон жёдисы Голгофа (йисысы «Тукәлон дифон»), ³⁴ нэтар донбинди жынму ги Эрса гилищер лян кў фи похади путожо, жё Та хәни, кәсы Эрса чонлийихар, мә хә. ³⁵ Таму ба Эрса диндо муту шызышон, гэжя жуали чирли, ба Тади йишон ги гэжя фынкә нашонли, ³⁶ йиху зуэдо нэтар, жоканли Эрсали. ³⁷ Ги Тади ту шонтуди муту готу динли йигә банбанзы, ба Тади зуй зэ жыгә банбанзышон жымужя шедини:

«Тасы яхўти жынмуди хуоншон».

³⁸ Таму хан ба лёнгә зыйку лян Эрса йиён е диндо данлинди лёнгә муту шызышонли, ба йигә диндо Эрсади юбонгәли, ба ди эргә диндо Тади зуэбонгәли. ³⁹ Гуә нэгә дифонди жынму чуащёли Эрсали. Таму ба ту ёди фәди:

– ⁴⁰ Ни фәгуә, Ни ба Иерусалимди сы цыйдө, сан тян йиху ба та йүанхуэй гечеләни. Ни дансы Анлахўди Эрзы, Ни хазыр зу да муту шызышон халә, ба гэжяди мин жүоха!

⁴¹ Яхўтиди да ахунму, нянжинжынму лян лажынму е жымужя зотали Эрсали, йигә ги йигә фәди:

– ⁴² Та ба данлинди жынму ду жүохали, кәсы ба гэжяди мин жүобуха! Та дансы Израилди хуоншон, жё Та хазыр зу да муту шызышон халә, вәму щинфу Тани! ⁴³ Та чүанщин-чүанйиди щинфу Анлахўдини, ба гэжя жёди Анлахўди Эрзы. Хо, жё Анлахў хазыр зу ба Та жүоха, жё вәму канйихар!

⁴⁴ Лян таму йиён зэ шызышон динди зыйкуму е жымужя мали Эрсали.

Эрсади вучон

(Мк 15:33-41; Лк 23:44-49; Йих 19:28-30)

⁴⁵Шонвуди сыхур йи да гунфу, йичыр до сангэ сышыншон хинан ба димян зонянли. ⁴⁶Шонвугуэ, сангэ сышыншон, Эрса дашын ханли:

– Или! Или! Лема савахтани?

Жыгэди йисысы: «Вэди Анлахү! Вэди Анлахү! Ни виса ба Вэ лөхали?»

⁴⁷Зэ Эрса гынчян занди жынму ба жыгэ тинжян, фэди:

– Жыгэ Жын хан Илиясдини!

⁴⁸Ба жыгэ хуа тинжян, йигэ жын донвэр погуэчи, ба йигэ бубузы на цў сынли, бондо ганзышон, надо Эрсади зуй гынчян, жё та хэни. ⁴⁹Данлинди жынму фэди:

– Дыньихар, заму канйихар, Илияс дан лэ ба Тади мин жюханима, бу жюха?

⁵⁰Эрса кэ дашын ханли йишын, зу дуанли чили. ⁵¹Жыгэ сыхурни Иерусалимди сы литу гуади булянзы мынмынди да готу до диха чэлан, фынчын лён бангэзыли. Ди дунли, шыту сан жянзы заланли, ⁵²фынкын е кэкэли, хошо вучонлиди гундо жынмуди шынзы кэ хуэли, ⁵³таму да фынкынни чўлэли. Эрса кэ хуэлиди йиху, таму йидарни жинли Иерусалим гуйжун чынпунили; зэ нэтар хошо жынму ба таму канжянли.

⁵⁴Кан Эрсади жүнгуан лян донбинди жынму канжян дидун лян йиче йүхади сычин, ду тэ хэли пали, йигэ ги йигэ фэди:

– Жыншы жыгэсы Анлахүди Эрзы!

⁵⁵Нэтар хан ю хошо нүжынмуни, таму да Галилея дифоншон ба Эрса гыншон зули, фусыли Тали. Таму зэ йуанйуарни занди, канли. ⁵⁶Жыщезы нүжынмуди литу ю Магдала дифоншонди Мариамни, Ягүбэ лян Юсуфди мама Мариамни зэмусы Заведей лёнгэ эрзыди мамани.

Ба Эрсади мэти сундэли

(Мк 15:42-47; Лк 23:50-56; Йих 19:38-42)

⁵⁷Хушон Аримафея щёнжуонни йигэ ючянхан лэли. Тади минзы жёди Юсуф; зочян та есы Эрсади йигэ манла.

⁵⁸ Юсуф до Пилат гынчян, читоди ёли Эрседи мэтили. Пилат гиди фынфу, жё ба Эрседи мэти ги Юсуф гигини. ⁵⁹ Юсуф ба Эрседи мэти нашон, на йикуэзы ганжинди ма сабу гуэчү, ⁶⁰ йиху сундо та гэжяди шин ёдуннили. Ба жыгэ ёдун та зэ шыту санни точүлэли. Йиху та ба йигэ шыту гундилэ, диндо ёдун мын чянту, да жытар зудёли. ⁶¹ Магдала дифонди Мариам лян данлинди йигэ Мариам зэ ёдунди мянчян зуэдини.

*Бохү ёдунди
донбинжынму*

⁶² Ди эр тян зусы жұма гуэлиди йитян, яхүтиди да ахунму лян фарисейжынму йидарни до Пилат гынчян, фэди:

– ⁶³ Жонгуйди, вөму жичелэли: нэгэ хуонлюр хан хуэди сыхур зочян фэгүэ: «Сан тян йиху Вэ кэ хуэни». ⁶⁴ Йинви жыгэ чинди, жё ни ги ниннинди фынфу ба ёдун бохүчү, йичыр бу гуэ сан тян. Зу жымузя жё Тади манламу ба Тади мэти бэ тудёли, йиху ги жынму бэ фэ: «Та вучонли, йиху кэ хуэли». Зу хэпа лийирди нэгэ хуон би ту йигэ хуон йүэшин хани!

⁶⁵ Пилат зу ги таму фэди:

– Жысыма, ниму ю донбинжынни, жё таму чи ба ёдун хохор бохүчү!

⁶⁶ Таму чи, жё донбинжынму зандо ёдунди мын чянту, ба ёдун бохүчүли; ги шытушон тали йигэ мар.

*Эрса кэ хуэли.
Донбинжынмуди хуа*

(Мк 16:1-10; Лк 24:1-12; Йих 20:1-10)

28 Шанбэ гуэли. Екшанбэ ганзо-йизор тянчи лёнди сыхур, Магдала дифоншонди Мариам лян данлинди йигэ Мариам йидарни кан ёдун чили. ² Мынмынди ди дунли; Анлахүди Тянщян да тяншон халэ, ба шыту да ёдунди мын чянту гунгуэчи, зуэдо шытушонли. ³ Тянщян-ди ёншы зущён шан дян йиён, Тади йишон быйбырди, зущён щүэ йиён. ⁴ Ба жокан Эрса ёдунди донбинжынму

хади, таму җантуэли, зушён вучонлиди жынму йиён. ⁵Нэгэ Тянщян ги нүжынму фэди:

– Ниму бә хәпали, Вә жыдони ниму зо диндо муту шызышонди Эрсadini. ⁶Эрса мә зә жытар: жочў Та фәхади, Та кәжя хуэли. Ниму лә, ба гәли Эрсaди вифын канйихар. ⁷Ниму куэкуэди чи, ги Тади манламу фәги: «Эрса вучонли, йиху кә хуэли. Та зә нимуди тунн до Галилея дифон чини; зә нэтар ниму җян Тани!» – жысыма, Вә ги ниму фәли.

⁸Нүжынму зу хуонхуон-монмонди да ёдун гынчян зудёли. Ба таму хади, е гошинди, подичи ги Эрсaди манламу фәчили. ⁹Мынмынди Эрса зә лўшон ба таму пынҗянли, зу фәди:

– Ги ниму панвон пиннан!

Таму до гынчян ба Эрсaди жүә бочў, бэвон Тали. ¹⁰Эрса ги таму фәди:

– Ниму бә хәпа, чи ги Вәди дищүнму фәги, жё таму до Галилея дифонни; зә нэтар таму ба Вә канҗяни.

¹¹Нүжынму зудёди сыхур жигә жокан ёдунди донбинжын доли чынпуни, ги яхўтиди да ахунму ба йиче йўхади сычин ду фәли. ¹²Яхўтиди да ахунму лян ложынму йидарни шонлёнхо, йиху ги донбинжынму гили хошо йинчян, ¹³ги таму жёди, замуҗя ё фәни:

– Ниму фә: «Хили, вәму фижёди сыхур, Эрсaди манламу лә, ба Тади мәти тушон зудёли». ¹⁴Жыгуанжын Пилат дан ба жыгә сычин тинҗян, вәму нын зә та мянчян фәхуа, жё ба ниму бә мафан.

¹⁵Донбинжынму ба йинчян нашон, жочў ги таму гихади йиче фынфу ганли. Ба жыгә сычин йичыр до жиргәди жызы санчуандо Яхўти жынмуди донжуннили.

*«Ниму чи, ба йиче минзўди жынму
зўчын Вәди манламу»*

(Мк 16:14-18; Лк 4:36-49; Йих 20:19-23; Ап 1:6-8)

¹⁶Шыйигә манла жочў Эрса ги таму гихади фынфу доли Галилея дифонди йигә саншонли. ¹⁷Таму ба Эрса канҗян, зу гуйха бэвон Тали; кәсы жигә жынди щинни юли шанкили. ¹⁸Эрса до таму гынчян, фәди:

– Анлахұ ги Вә ба тяншонди лян димяншонди йиче чүанли ду гигили. ¹⁹Йинви жыгә ниму чи, ба йиче минзұди жынму зұчын Вәди манламу, ба жынму ви Тяншонди Дада, Эрзы зэмусы Анлахұди Рухди минзы зә фи литуши, ²⁰е ба таму жетё, жё таму ба Вә ги ниму гихади йиче фынфу зунхұчұ. Жысыма, йичыр до ахыр зэмани доләди нәйитян, Вә йинавар лян ниму зә йидарнини!





МАРК ШЕХАДИ ИНЖИЛ

Йихия шынжынди чуанжэ

(Мф 3:1-12; Лк 3:1-20;

Йих 1:19-28)

1 Фэ Эрса Мэсихди Хо Шинвын жымужа датурдини. ²Зу-
щён Исаяя шынжынди фушон шехади йиён:

Анлахұ фэди: «Ни кан!

Вэ жё Вэ дафачиди жын ги Ни зэ тунн ба лұ шэлұхани».

³Хан шедисы:

Йигэ жын зэ кунтанни хандини:

«Ги Жонгуйди ба лұ шэлұха, ги Та ба лұлұзы зұ
пинпирди».

⁴Йихия зудо кунтанни лэ, ба жынму зэ фи литу щили,
ба дажя чуанжэди, жё таму ба гэжяди гұнахар жынни, ба
таму щинни сылёнхади гэбянни, жё Йихия ба таму зэ фи
литу щини, жыгэди йиху Анлахұ цэ ба тамуди гұнахар
фоншэни. ⁵Яхұти дифоншонди жынму лян Иерусалим
чынпуниди жынму бонжер йиче ду до Йихия гынчян лэ,
шушинли, ба таму гэжяди гұнахар жынли, йиху зэ Иордан
хэ литу жё Йихия ба таму щили.

⁶Йихия чуанди на луэтуэмо фынхади йишон, ёни жиди
пидэзы, чыди маза лян ефынми. ⁷Та чуанжэди фэсы:

– Вэди хуту лэ йигэ Жынни, Тади лилён би вэди да, вэ
бу жыгұ ба ё гуха ги Та гэ хэдэзычи. ⁸Вэ ба ниму на фи
вон ганжинни щидини, Та лян Анлахұди Рух ба ниму вон
ганжинни щини.

Йихия ба Эрса зэ фи литу щили

(Мф 3:13–4:11; Лк 3:21, 22; 4:1–13)

⁹Нэжиян Эрса да Галилея дифоншонди Назарет чыппуни до нэтар лэли. Йихия ба Та зэ Иордан хэ литу щили. ¹⁰Эрса жён да фи литу чўлэ, йиканса: тьян кэкэли; Анлахўди Рух, зущён гэзы, йиён да тьяншон фихалэ, луэдо Тади шыншонли. ¹¹Жыгэ сыхур йигэ шынчи да тьяншон халэ фэди:

– Нисы Вэди щинэ Эрзы, Вэ до Нишон ю нэчинни!

¹²Зу жыгэ сыхур Анлахўди Рух ба Эрса линдо савэнили.

¹³Сышы тьян Та зэ савэни шули иблисди зыянли. Нэтар Та лян есын зэ йидарни гуэли жызыли. Тьянщянму фусули Эрсали.

Эрса жё сыгэ да йүди жын гыншон Та зун

(Мф 4:12–22; Лк 4:14, 15; 5:1–11)

¹⁴Ба Йихия ядо банфонзыни йиху, Эрса доли Галилеяли, чуанжэли Анлахўди Хо Шинвынли. ¹⁵Та фэди:

– Сыхур доли, Анлахў тьяншонди Гуйжя куэ долэни! Ниму ё ба гэжяди гўнахар жынни, ба ниму щинни сылэнхади гэбянни, ё щинфу жыгэ Хо Шинвынни!

¹⁶Эрса зэ Галилея хэянзышон зуди сыхур канжянли, замужя Шимэ лян тади щүнди Андрей вон хэзы литу щя вондини. Тамусы дэ йүди жын. ¹⁷Эрса ги таму фэди:

– Ниму гыншон Вэ зу! Вэ ги ниму жёни, замужя ба жын, зущён дэ йүди йиён, жуани.

¹⁸Таму лёнгэр донвэр ба вон лёха, гыншон Эрса зули.

¹⁹Зуди бу йүан, Эрса ба Зеведейди эрзы Ягўбэ лян тади щүнди Йихия зэ фичуаншон ба дэ йү вонди канжянли.

²⁰Эрса жё таму е гыншон Та зун. Таму лёнгэр зу ба тамуди дада лян гўха зўхуэди жынму шындоду чуаншон, гыншон Эрса зули.

Кэлон литу ю зонгуйди жын

(Лк 4:31–37)

²¹Таму доли Капернаум щёнжуоннили. Шанбэди нэйиян Эрса жинли синагога литу жётёли жынмули. ²²Дажа ба

Тади жёщүэ тинли, ду чёчихали, йинцысы Та зущён ю чүанлиди жын йиён жётёдини, бу щён данлин нянжин-жынму.

²³ Нэгэ сыхур тамуди синагога литу ю йигэ жынлэ, зон-гуй ба та начўдини. Та дашын ханди:

– ²⁴ Эрса, Назарет чынпуниди жын, вәму лян Ни ю са щёнганни? Ни щёме вәму лэлима? Вә жыдо Нисы сый, Нисы Анлахў жянчўлэди Жын.

²⁵ Эрса ги та гиди ниннинди фынфу фэди:

– Бә янчуан, ни да жыгэ жынди кәлон литу чўлэ!

²⁶ Зонгуй ба нэгэ жынди жин жүчў, дашын ханди зу да тади кәлон литу чўлэли. ²⁷ Ба жынму ду хажинли, таму йи-гә ги йигэ фэди:

– Жысы са сычин? Жысы йигэ ю чүанлиди щин жё-щүэ! Та ю бынсы ги зонгуй ги фынфу, таму ду тин Тади хуани.

²⁸ Эрсади миншын садо йиче Галилеяди дифоншонли.

Эрса ба хошо бинжынму канхоли

(Мф 8:14-17; Лк 4:38-41)

²⁹ Таму да синагога литу чўлэ, доли Шимэ дэ Андрейди жянили; Ягўбэ лян Йихия е лян таму зэ йидарни. ³⁰ Шимэ-ди вэмунён бушинхали, та фашоди зэ чуоншон фидини. Жынму ба жыгэ сычин ги Эрса фэли. ³¹ Эрса до тади чуон гынчян, ба тади шу жуачў, бонди жё челэли; та донвөр бу фашоли, зу фусы тамули.

³² Хушон жәту луэди сыхур, жынму ба йиче бинжынму, кәлон литу ю зонгуйди жынму ду надо Эрсади мянчянли.

³³ Чынни жўди чянчян-ванван жынму ду шудо Эрсади фонмын чянтули. ³⁴ Эрса ба хошо хэ заён бинди жынму канхоли, ба хошо гуй е ганчўчили, бу жё гуй фәхуа, йин-цысы гуй жыншы Тани.

Эрса зэ Галилея дифоншон чуанжәли

(Лк 4:42-44)

³⁵ Ди эр тян ганзо йизор, тян хан мә лённи, Эрса челэ зу до мәю жынди дифоншон чи, зэ нэтар читоли Анлахўли.

³⁶ Шимэ лян тади ляншуму ду чўчи, зэ сыжу-бахани золи Эрсали, ³⁷ ба Та зожуэ, зу ги Та фэди:

– Жынму ду зо Нидини.

³⁸ Эрса ги таму фэди:

– Зу, заму зу данлинди дифоншон, до линжү щёнжуонни, Вэ зэ нэтар е ё чуанжёни, йинцысы Вэ ви жыгэ сычин лэли.

³⁹ Та ба чүан Галилея дифон жуангуэлэ, зэ синагога литу чуанжёли, зу лян нэгэ йитун ба зонгуй ганчўчили.

Эрса ба хэ мафынбинди жын канхоли

(Мф 8:1-4; Лк 5:12-16)

⁴⁰ Йигэ хэ мафынбинди жын до Эрсади мянчян лэ, гуйха зу читоди ги Та фэди:

– Ни дан йүанйили, Ни ба вэди бин канхо.

⁴¹ Эрса щинванди ба шу чынкэ, ба та дулийихар фэди:

– Вэ йүанйи, ни хони!

⁴² Ба нэгэ жынди мафынбин донвэр зу канхоли, тади шыншон е ганжинли. ⁴³⁻⁴⁴ Эрса ба та донвэр дафа зули зэ-мусы ги та гиди ниннинди фынфу фэди:

– Ни кан, ба жыгэ сычин ги сый ду бу фэли, ни чи жё яхўтиди ахун ба ни канйихар, йиху ни ё жочў Муса шынжынди фынфу ба гўрбани ги Анлахў жүги, жё дая ду жы-доха, ниди шынзы кэжя ганжинли.

⁴⁵ Кэсы нэгэ жын зучўчи, ба жыгэ сычин санчуандо сыжу-бахали. Йинви жыгэ, Эрса бу нын миндамин вон чынпуни жинчи. Суйжан Та зэ чын вэту, мэжын-янди дифоншон жўдини еба, кэсы жынму зу лян зочян йиён да сыжу-баха до Та гынчян лэдини.

Эрса ба хэ тантанзы бинди жын канхоли

(Мф 9:1-8; Лк 5:17-26)

2 ¹⁻² Гуэли житян, Эрса хуэйлэ доли Капернаум щёнжуоннили. Хошо жынму тинжян Та зэ жянини, ду кан Та лэли. Фонзыни жынму жиманли; мын чянту е мёю шян вэрли. Эрса ги таму жёнли хуали. ³ Сыгэ жын тэди йигэ хэ тантанзы бинди жын кан Та лэли. ⁴ Фонзыниди жынму

дуэди йимяр, таму ба хэ тантанзы бинди жын мэдый на-
до Эрсади мянчян. Йинви жыгэ таму зу зэ Та шонмянди
фондинзышон кэли йигэ кўлун, ба вузышон фиди хэ
тантанзы бинди жын да кўлунни фонхачили. ⁵Эрса кан-
жян тамуди щинфу дадихын, зу ги хэ тантанзы бинди
жын фэли:

– Вэди ва, ба ниди гўнахар фоншэли!

⁶Жигэ нянжинжын зэ нэтар зуэдини, таму зэ щинни
сылёнди:

– ⁷Виса жыгэ Жын жымужя фэдини? Та фэди жысы
дэцэ Анлахўди хуа. Чўгуэ Анлахў, сый нын ба гўнахар
фоншэ?

⁸Эрса зэ щинни жыдо таму жымужя сылёндени, зу фэди:

– Виса ниму зэ щинни жымужя сылённи? ⁹Ниму кан,
ги хэ тантанзы бинди жын фэ: «Ба ниди гўнахар фоншэ-
ли», хуэйжэсы фэ: «Челэ, ба ниди вузы нашон, зу зу». Жы
лёнжү хуа литу найигэ хофэ? ¹⁰Йинви жё ниму жыдо Вэ,
Аданди Хубый, зэ дишон ю фоншэ гўнахарди чўанлини, –
Эрса зу ги хэ тантанзы бинди жын фэди:

– ¹¹Вэ ги ни ги фынфу: ни занчелэ, ба ниди вузы на-
шон, зу хуэй ниди жячи!

¹²Нэгэ жын занчелэли, донвэр ба гэжяди вузы начелэ,
зу да дажяди мянчян зушон чўчили. Жынму ду чёчиди куа-
жён Анлахў фэсы:

– Вэму зочян мэ жянгуэ жымугэ сычин!

Эрса жё Левий гыншон Та зун

(Мф 9:9-13; Лк 5:27-32)

¹³Эрса да чынпуни зучўчи, кэ доли хэянзышонли. Жын-
му е ду шудо Та гынчянли; Та жётёли тамули. ¹⁴Эрса вон
чян зуди сыхур, канжян йигэ шуфиди жын зэ шуфиди
вэршон зуэдини. Тасы Алфейди эрзы Левий. Эрса зу ги
нэгэ жын фэди:

– Ни гыншон Вэ зу!

Левий занчелэ, гыншон Та зули.

¹⁵Эрса зэ Левийди жяни зуэди чыфанди сыхур, хошо шу-
фиди дэ югўнахарди жынму е гыншон Та жинли фонзыли.

Таму литу хошо жынму лян Эrsa дэ Тади манламу зэ йидарни зуэди чыфандини. ¹⁶ Ющезы фарисейжын лян нян-жинжын канжян Та лян шуфиди дэ югўнахарди жынму йидарни чыфандини, зу ги Тади манламу фэди:

– Виса Та лян шуфиди дэ югўнахарди жынму йидарни чыфандини?

¹⁷ Эrsa тинжян, зу фэди:

– Мэю бинди жын бу ё дэфу, гуон хэбинди жын ё дэфуни. Вэ лэ бусы ба гундожынму жёйихар, кэсы ба югўнахарди жынму ханйихар.

Фынзэди вынти

(Мф 9:14-17; Лк 5:33-39)

¹⁸ Нэгэ сыхур Йихияди манламу лян фарисейжынму ду фынзэдини. Жигэ жын лэ зу вынли Эрсали:

– Йихияди манламу лян фарисейжынмуди манламу ду фынзэдини, кэсы Ниди манламу виса бу фынзэ?

¹⁹ Эrsa ги таму фэди:

– Шиннүшү жехунди сыхур, тади кижынму нын фынзэма? Шиннүшү лян таму зэ йидарниди сыхур, таму бу нын фынзэ. ²⁰ Кэсы сыхур дони, шиннүшү да таму гынчян зудёни, зу нэгэ сыхур таму ё фынзэни.

²¹ Сый ду бу нын ба шин будин будо жү йишоншон, йинцысы бухади нэгэ будин ба жү йишон чэланни, жү йишонди кўлун йүэшин дани. ²² Сый е бу нын ба шинщүан путожю гуандо жү пидэни, йинцысы шинщүанди путожю ба жү пидэ жонланни, путожю лян пидэ ду ладо-ни; йинви жыгэ ба шинщүан путожю яндин ё гуандо шин пидэ литуни.

Шанбэди вынти

(Мф 12:1-8; Лк 6:1-5)

²³ Шанбэди нэйитян, Эrsa зэ мыйзы дини зудини; Тади манламу щүан зу, щүан ба мыйсуйзы жүшон чыли. ²⁴ Фарисейжынму ги Та фэди:

– Ни кан! Ниди манламу шанбэди нэйитян ба бу ганди сычин гандини!

²⁵ Эrsa ги таму фэди:

– Ниму мэ нянгуэ Даву ё чыдиди сыхур ганли са сычин-ли? Йихуэй, та лян тади ляншуму йидарни нэ вэдүзиди сыхур, ²⁶ жинли Анлахүди сы литули (нэгэ сыхур Авиафарсы яхүтиди да ахун). Даву ба жүги Анлахүди мэмэ гэжя чыли, ги тади ляншуму е гили жё таму чыли, мэгүэсы ба жымужяди мэмэ чүгүэ яхүтиди ахун, сый ду чыбудый.

²⁷ Йиху Эrsa ги таму фэди:

– Шанбэсы йинви жынму динхади, бусы ба жынму йинви шанбэ зуэзохади. ²⁸ Йинцысы Вэ, Аданди Хубыйсы шанбэди Жонгуйди.

Эrsa ба шу гандёди жынди бин канхоли

(Мф 12:9-14; Лк 6:6-11)

3 Эrsa кэ жинли синагога литули. Нэтар ю йигэ жынлэ; тади йигэ шу гандёдини. ² Ющезы жынму люшынди канлэли, шанбэди нэйитян Эrsa ба нэгэ бинжын канхо канбухо; таму шён ги Эrsa динзуйни. ³ Эrsa ги шу гандёди жын фэди:

– Ни челэ, зандо донжунни.

⁴ Йиху Та ба дажя вынли:

– Жочү замуди фалү, шанбэди жыйитян жынму ду ё ган хонима хуэйжэсы ган хани? Ё жү миннима хуэйжэсы хэ минни?

Дажя ду мэ янчуан. ⁵ Эrsa ба таму вонлийихар, чи шонлэли, щинни тэ пэфанхали, йинцысы тамуди щин нинди-хын. Та зу ги нэгэ жын фэди:

– Ни ба шу чынкэ!

Нэгэ жын ба шу чынкэ, тади шу зу холи. ⁶ Нэщезы фарисейжынму да синагога чүчи, донвэр лян Иродди жынму зэ йидарни шонлэнди, замужя ба Та щёмедёни.

Зэ хэянзышонди жынму

⁷⁻⁸ Эrsa дэ Тади манламу да нэтар зули хэянзышонли. Хошо жынму гыншон Та зули; тамусы да Галилея лян Яхүти дифоншон, Иерусалим чынпу, Идумея дифоншон, Иордан хэ нэбонгэди дифоншон, Тир лян Сидон чынпу

жувиди дифоншон до Та гынчян лэди. Хошо жынму зо Эрса лэли, йинцысы таму ба Эрса ганхади йиче сычин тинжянгуэ. ⁹Жынму дуэхали, Эрса жё Тади манламу ги Та ба йигэ суй фичуан шөлүха, бу жё жынму ба Та жичү. ¹⁰Йинцысы Та ба хошо бинжынму канхоли, бинжынму йиче ду вон чян жиди, щён ба Та дуйихарни. ¹¹Кэлон литу ю зонгуйди жынму ба Та канжян, донвэр гуйдо Тади мянчян ханди фэсы:

– Нисы Анлахүди Эрзы!

¹²Эрса ги таму гиди ниннинди фынфу, бу жё зонгуй фөчүчи Тасы сый.

Эрса ба шыэргэ Апостолму жянчүлэли

(Мф 10:1-4; Лк 6:12-16)

¹³Эрса шонли йигэ саншон, Та щён жё сый до Тади гынчян лэ, зу ба таму жёлэли. Таму доли Эрса гынчанли. ¹⁴⁻¹⁵Эрса ба шыэргэ жын жянчүлэ, ги таму ба «Апостолму» минзы наншонли. Та щён жё жыщезы жынму йинавар лян Та зэ йидарнини, ба таму дафачи ги жынму чуанжэ Анлахүди Хо Шинвынни, е ги таму ба ган зонгуйди бынсы ги-гили.

¹⁶⁻¹⁹Эрса жянчүлэди шыэргэ жынсы: Шимэ (Эрса ги та нанхади минзысы Пётр), Зеведейди эрзы Ягүбэ лян Ягүбэди шүнди Йихия (Эрса ги таму нанхади минзысы «Воанергес», жыгэ минзыди йисысы «Бинцин зушён залуй йиёнди жын»), Андрей, Филипп, Варфоломей, Матфей, Фома, Алфейди эрзы Ягүбэ, Фаддей, Шимэ Кананит, зэмусы йигэ жын, минзы жёди Жүхүти Искариот, та йиху ба Эрса мэчүчили.

Эрса зэмусы Веельзевул

(Мф 12:22-32; Лк 11:14-23; 12:10)

²⁰Эрса хуэйли жяли. Хошо жынму йүанхуэй шудо Та гынчанли. Йинви жыгэ, Та лян Тади манламу лян чыфанди гунфу ду мёю. ²¹Эрсади чинчинму ба жыгэ сычин тинжян, чүлэ щён ба Та жуачүни; таму фэди:

– Та шодёли.

²² Жигэ да Иерусалим лэди нянжинжынму фэди:

– Веельзевул ба Та начўдини! Та на гуйвонзыди чўанли ба зонгуй ганчўчидини!

²³ Эрса ба жыщезы жынму жёдо Та гынчян, на бифон ги таму фэди:

– Иблис замужя ба иблис нын ганчўчи? ²⁴ Булўн нагэ гуйжя дан гэжя фынкэ, дан гэжя лян гэжя дажон, нэгэ гуйжя яндин лансандёни. ²⁵ Булўн найижязы дан гэжя фынкэ, дан гэжя лян гэжя дажон, нэ йижязы е яндин лансандёни. ²⁶ Жымужя канчи, иблисди гуйжя дан гэжя фынкэ, дан гэжя лян гэжя дажон, та е лансандёни, яндин вандёни.

²⁷ Сый ду бу нын жин лилёндади жынди жяничи, ба нэгэ жынди дунци чёншон, йинцысы та шянтуни ё ба нэгэ лилёндади жын бончўни, йиху ба та жяниди дунци цэ нын чёншон.

²⁸ Вэ ги ниму фэ шыхуа: ба жынму ганхади гўнахар лян фэхади дэцэ хуа йиче ду фоншадёни, ²⁹ кэсы сый дан дэцэли Анлахўди Рухли, ба жыгэ суандисы йинаварди гўнахар, Анлахў ба тади гўнахар йўнзун бу фоншэ.

³⁰ Эрса фэ жы йигэ хуади йинцысы нянжинжынму фэди: «Зонгуй ба Та начўдини».

Эрсади мама, дищўнму зэмусы зымыйму

(Мф 12:46-50; Лк 8:19-21)

³¹ Нэгэ сыхур Эрсади мама лян Тади дищўнму ду лэли. Таму зандо вэту, дафади жын хан Эрсачили. ³² Эрса гынчян зуэди хошо жынму. Таму ги Эрса фэди:

– Ни кан! Ни мама лян Ниди дищўнму дэ зымыйму ду зэ вэту занди зо Нидини.

³³ Эрса ги таму фэди:

– Сый шыдашысы Вэди мама? Сый шыдашысы Вэди дищўнму?

³⁴ Йиху Та ба бонгэрни зуэди жынму канлийихар, зу фэди:

– Ниму кан! Жыщезы жынму зусы Вэди мама лян Вэди дищўнму! ³⁵ Сый ба Анлахў фынфухади ганли, та зусы Вэди дищўнму, зусы Вэди зымыйму лян Вэди мама.

Са мыйзы жунзыди бифон

(Мф 13:1-9; Лк 8:4-8)

4 Эрса зэ хэянзышон йүанхуэй жётёли жынмули. Хошо жынму шудо Та гынчянли. Та шонли йигэ чуаншон зуэхали. Чуан зэ хэзы литуни, жынму ду зэ хэянзышон зандини. ²Эрса на бифон ба хошо сычин ги таму жётёли. Та зэ гэжяди жёщүэ литу ги жынму фэди:

– ³Ниму тин! Йигэ са мыйзы жунзыди жын чўчи са жунзычили; ⁴Та са жунзыди сыхур, ющезы жунзы дедо лў бянбярнили; чёр фидилэ ба жы жигэ жунзы чыдёли. ⁵Ющезы жунзы дедо шытушонли, нэтар шын мёю дуэди тў; йинви жыгэ, мыйзыди мёмёзы донвэр жончўлэли. ⁶Жэту чўлэ ба мёмёзы сэшонли; гын мё захида мёмёзы донвэр гандёли. ⁷Ющезы жунзы дедо цыязы литули, цыязы жончелэ, ба мёмёзы жячўли, та зу мё ги лёншы. ⁸Зэ-мусы ющезы жунзы дедо хо тўшонли, жонди хо, гиди лёншы е дуэ, юди жунзы гили саншы лэзы, юди гили люшы лэзы, юди гили йибый лэзыди шучын.

⁹Эрса ги таму фэди:

– Ю эрдуэди жынму, ду хохор тин!

Са жунзы бифонди йисы

(Мф 13:10-23; Лк 8:9-15)

¹⁰Дуэди жынму зудёли, Эрса лян Та жувиди жынму дэ шыэргэ Апостолму йидарни шынхали. Таму вынли Эрсади жыгэ бифонди йисыли. ¹¹Эрса ги таму фэди:

– Ниму ба Анлахў Гуйжяди бимиди сычин йиче ду жы-доха, кэсы ги понжынму ба жымужяди йиче сычин ду ё на бифон фэни. ¹²Зушён Китабушон шехади йиён:

«Таму канли кан, кэсы канбужян;

тинли тин, кэсы тинбудун;

йинви жыгэ таму бу нын жочў Анлахў жуангуэлэ,

Анлахў ба таму зу бу нын фоншэ».

¹³Эрса е ги таму фэди:

– Ниму ба жыгэ бифон бу дунма? Наму ниму замужя ба данлинди бифон дунни? ¹⁴Са жунзыди жын зушён са

Анлахұди хуади жын йиён. ¹⁵ Ющезы жынму зущён дедо лў бянбярниди жунзы йиён; таму ба Анлахұди хуа тинди сыхур, иблис донвэр лэ, зу ба тамуди щинни сахади Анлахұди хуа дуэдэни. ¹⁶ Ющезы жынму зущён дедо шытушонди жунзы йиён, таму ба Анлахұди хуа тинжан, гощинди зу ба жыгэ хуа жешуни, ¹⁷ кэсы тамуди щинни мөю гындынзы, таму бусы чонйүанди; таму йинви Анлахұди хуа шу кўнан хуэйжэсы жынму ба таму жуйди сыхур, донвэр зу фанлян бу жын жыгэ хуа. ¹⁸ Хан ющезы жынму зущён дедо цыязы литуди жунзы йиён, таму ба Анлахұди хуа тинли, ¹⁹ кэсы дун-яди цошин, щинэ фугуйди дэ данлинди вонщён ду лэди сыхур, таму ба Анлахұди хуа жячўли, бу жё та ги шучын. ²⁰ Зэмусы ющезы жынму зущён дедо хо тўшонди жунзы йиён, таму ба Анлахұди хуа тинли, жешуха, гили хошо шучын: юди жунзы гили саншы лэзы, юди гили люшы лэзы, юди гили йибый лэзыди шучын.

Гуэ дихади юдынзанди бифон

(Лк 8:16-18)

²¹ Эrsa ги таму фэди:

— Сый ба юдынзан налэ гэдо гуэ диха хуэйжэсы гэдо жын фиди чуон дихани? Та нандый ба юдынзан бу гэдо дынзанди тэзышонма? ²² Мый йигэ бимиди сычин яндин щянчўлэни; мый йигэ цонхади сычин е яндин щянчўлэни.

²³ Ю эрдуэди жынму, ду хохор тин!

²⁴ Эrsa хан ги таму фэди:

— Ниму ё люшынди кан ниму тин са хуадини! Ниму замуя лёндини, Анлахұ ги ниму е зу нэмузя лённи, були хан дуэйү ги ниму гини. ²⁵ Сый юли, ги та хан тянни; сый мөюли, ба та юди нэйдияндяр е дуэдэни.

Жунзы жонфади бифон

²⁶ Эrsa хан фэди:

— Анлахұ тяншонди Гуйжя зущён йигэ са жунзыди жын ба жунзы садо дишонди йиён, ²⁷ та хили фидини, быйтян челэдини, кэсы бу жыдо нэгэ жунзы замужя жончелэ ги

мёмёзыни. ²⁸ Дитү гэжя жё мыйзы жончүлэни, шянтунни мёмёзы жончүлэни, йиху мыйсуйзы жончүлэни, линейрни мыйсуйзышон цэ же мыйзыни. ²⁹ Жунзы ги шучынди сыхур, нэгэ жын цэ на ляндо гә мыйзыни, йинцысы гә мыйзыди сыхур доли.

Жемэзыди жунзыди бифон

(Мф 13:31,32,34; Лк 13:18,19)

³⁰ Эрса фәди:

– Заму ё фәни, Анлахүди Гуйжя шён са? Хуэйжәсы ба та на са бифон пәщәни? ³¹ Анлахүди Гуйжя зушён йигә жемэзыди жунзы йиён, тасы дишонди йигә дин шәди жунзы. Йигә жын ба жыгә жунзы садо дишонли. ³² Жызы гуәли, жыгә жунзы жончелә, би йиче цәфу ду да; тади да жызы дан жончелә, тяншонди чөр нын зә тади йинлән диха дян вөвэзы.

³³ Эрса на хошо жымужяди бифон ги жынму гили чуанжә, жочү тамуди минбый жәтгә, жәтгәли тамули. ³⁴ Эрса йинавар на бифон ги жынму фәгуә, кәсы мый йихуэй Та лян гэжяди манламу шындә йидарниди сыхур, ба йиче бифон ги таму вон минбыйни пәщәгуә.

Эрса жә фын

зэмусы филон жүхали

(Мф 8:23-27; Лк 8:22-25)

³⁵ Нәйитянди хушон, Эрса ги Тади манламу фәди:

– Заму зу хэзы нәбонгә.

³⁶ Таму жә жынму санкә зудәли. Эрса кәжя зә чуаншон дын тамудини, манламу шонли чуан лян Та фушон зудәли. Чүгуә жыгә чуан нэтар хан ю данлинди чуанни.

³⁷ Мынмынди хэзыни да фын гуачеләли; филон ба чуан дади, фи ба чуан гуанманли. ³⁸ Нэгә сыхур Эрса зә чуанди йиршон жынди жынту фижәдини. Манламу ба Та ханшин, фәди:

– Вуста! Вәму нянвәр сыдыйли, Ни бу гуанма?

³⁹ Эрса челә, ги да фын гиди ниннинди фынфу фәди:

– Жүха!

Зэмусы ги хэзы фэди:

– Нанвынха!

Да фын донвөр жүхали, хэзы е нанвынхали. ⁴⁰Эрса зу ги Тади манламу фэди:

– Ниму виса хэпани? Ниму хан мәю щинфума?

⁴¹Ба Тади манламу ду хажинли, таму йигэ ги йигэ фэди:

– Жыгэ жынсы са Жын? Фын дэ хэзы ду тин Тади хуадини!

*Эрса зэ Герасин дифоншон
ба зонгуй ганчүчили*

(Мф 8:28-34; Лк 8:26-39)

5 Таму доли Галилеяди хэзы нэбонгэ, доли Герасин жын-муди дифоншонли. ²Эрса да чуаншон халэ, зу ба йигэ да фынйүанни чүлэди жын пынжянли; зонгуй ба та начүдини. ³Жыгэ жын йинавар зэ фынйүанни жүдини, сый ду ба та на тешын бонбучү. ⁴Жынму хын жихуэй лян мабан зэмусы тешын ба та бончүли, кэсы та ба мабан дасуйли, ба тешын жүдуанли, сый ду ба та гүбучү. ⁵Та йитян йивэщи зэ фынйүанни зэмусы зэ саншон дашын хандини, на шыту ба гэжя дадини.

⁶⁻⁷Та лойүанни ба Эрса канжян, монмонди погуэлэ, гуйдо Эрсади мянчянли, дашын хантуэли:

– Эрса, вида Анлахүди Эрзы! Вэ лян Ни ю са щёнганни? Вэ зэ Анлахүди мянчянни читоди: Ни ба вэ бэ жәмэли!

⁸Та фэ жыгэ хуади, йинцысы Эрса кэжя ги та гиди фынфу: «Зонгуй, да жыгэ жинди кэлон литу чүлэ!»

⁹Эрса ба та вынли:

– Ниди минзы жёди са?

Та фэди:

– Вэди минзы жёди «йи да чүн», йинцысы вэмуди фур дуэдихын.

¹⁰Та шызэ читоди ги Эрса фэди, бу жё ба таму да нэгэ дифоншон ганчүчи.

¹¹Нэтарди санпэзышон йичүн жү фондини. ¹²Зонгуйму читоди ги Эрса фэди:

– Ни ба вэму дафадо нэщезы жү литу чи.

¹³ Эrsa донвэр ги таму гили кухуанли. Зонгуйму зу да нэгэ жынди кэлон литу чүлэ, жинли нэшезы жў литули. Жўчүн да нэгэ саншон вон хэзыни тэхаачи, зу зэ хэзыни янсылли. Тамуди фур бонжер ю лэнчян.

¹⁴ Фонжўди жынму ду подёли. Таму подо чынпуни, жу-види шёнжуонни чи ба жыгэ сычин ги дажя фэли. Дажя ду лэ шён канйихарни, йүли са сычинли. ¹⁵ Таму доли Эrsa гынчян зу канжянли, зочян кэлон литу ю йидачүн зонгуйди нэгэ жын зуэдини, чуанди йишон, е минбыйдини. Жыгэ сычин ба таму ду хажинли. ¹⁶ Жянха жыгэ сычинди жынму ба кэлон литу зочян ю зонгуйди жын дэ жў йүхади сычин ги таму ду фэли. ¹⁷ Таму зу читоди жё Эrsa да тамуди дифоншон зудёни.

¹⁸ Эrsa шонли чуанди сыхур, кэлон литу зочян ю зонгуйди нэгэ жын лэ, читоди ги Та фэди:

– Жё вэ шындо Ни гынчян.

¹⁹ Кэсы Эrsa мё дайн, ги та фэди:

– Ни хуэй ниди жя чи, ба Анлахў ги ни ганхади хо сычин зэмусы Та замужя ба ни фоншэлиди сычин ги ни жяниди жынму ду фэги.

²⁰ Нэгэ жын зудё, зэ Шыгэ Чынпуди дифоншон ба Эrsa ги та ганхади хо сычин ги дажя чуанжёли. Дажя ду чёчихали.

***Иаирди нүр кэ хуэли зэмусы
йигэ хэ лющевинди нүжын холи***

(Мф 9:18-26; Лк 8:40-56)

²¹ Эrsa зуэдо чуаншон кэ доли хэзы нэбонгэли. Хэянзышон хошо жынму шудо Та гынчянли. ²² Жытар синагогади да йимаму, минзы жёди Иаир, е лэли. Та ба Эrsa канжян, зу гуйдо Тади жүэ гынчянли, ²³ шызэ читоди ги Эrsa фэди:

– Вэди нүр хэди бин жундихын, вучондыйли. Ни лэ ба шу чынкэ, гэдо тади шыншон, ба тади бин канхо, ба мин жүха!

²⁴ Эrsa гыншон та зули. Хошо жынму е гыншон Та зу-туэли, ба Та жичўли.

²⁵Нэтар ю йигэ нүжынлэ, та хэли шыэр нян лющеди бинли. ²⁶Хошо дэфу ба та кангуэ, та шули бу шоди тынкў, йинви кан гэжяди бин ба жяниди йиче цэбый ду сыхуандёли, кэсы ба бин мө канхо зэмусы тади бин йитян би йитян жунли. ²⁷Та ба Эрса кан бинди сычин тинжян, лян жынму йидарни лэ, зу зэ Эрсади жибый хуту ба Тади йишон дулийхар, ²⁸йинцысы та щинни сылэнди:

– Вэ дан ба Тади йишон дуйхар, вэди бин зу хони.

²⁹Тади ше донвэр бу тонли, та жүэмуди тади шыншонди бин кэжя холи. ³⁰Зу нэгэ сыхур Эрса щинни жүэмуди, йидяр лилён да Тади шынзы литу чўчили. Та зу зэ жынму донжунни ба ту жуангуэлэ вынли:

– Сый ба Вэди йишон дулийхар?

³¹Эрсади манламу ги Та фэди:

– Ни кан! Хошо жынму ба Ни жичўдини, Ни виса вындини: «Сый ба Вэ дулийхар?»

³²Эрса ба жувиди жынму канлийхар, щён ба ганха жыгэ сычинди жын зожуэни. ³³Нэгэ нүжын жүэмуди тади шынзы литу йўли са сычинли, хэпади дэ жанди лэ гуйдо Эрсади мянчян, ба шыхуа ги Та фэли. ³⁴Эрса ги та фэди:

– Вэди нүр! Ниди щинфу ба ниди мин жюхали! Ниди бин кэжя холи. Ни пиннан-вусы хуэйчи!

³⁵Эрса фэ жыгэ хуади сыхур, жигэ жын да нэгэ да йимамуди жяни лэ, фэсы:

– Ниди нүр кэжя вучонли. Ни виса мафан Вустани?

³⁶Эрса ба жыгэ хуа тинжян, ги нэгэ да йимаму фэди:

– Ни бэ хэпали, ни гуон щинфу!

³⁷Та чўгуэ Пётр, Ягўбэ зэмусы Ягўбэди щўнди Йихия, бу жё данлинди жынму лян Та йидарни чи. ³⁸Таму доли да йимамуди жянили. Эрса ба нэтарди жынмуди хуонлуан, ба дажя дакў-луанхуди канжянли. ³⁹Эрса жинли фонзы, ги таму фэди:

– Ниму виса дакў-луанхудини? Жыгэ вава мө вучон, та фижёдини.

⁴⁰Таму ду цыщёли Эрсали. Кэсы Эрса ба таму ганчўчили, гуон жё нэгэ нүр вавади нён-лозы зэмусы Тади сангэ

манла лян Та йидарни жинли вава фиди фонзы литули.

⁴¹Та ба нэгэ вавади шу жуачў, зу ги та фэди:

– Талита кум!

Жыгэ хуади йисысы: «Вэди ва, Вэ ги ни фэ, ни занчелэ!»

⁴²Нэгэ вава донвэр зу занчелэ зукэли. Нэхур та шыэр суйли. Канжян жыгэ сычин дажя ду чёчихали. ⁴³Эрса ги таму гиди ниннинди фынфу, ба жыгэ сычин ги сый ду бу жун фэ. Та хан жё ги вава ба чыди гигини.

*Назарет чыпуниди жынму
ба Эрса мэ жын*

(Мф 13:53-58; Лк 4:16-30)

6 Эрса да нэгэ дифоншон хуэйлэ, доли Тади чыпунили. Тади манламу е гыншон Та лэли. ²Доли шанбэди нэ-йитяли, Эрса зэ синагога литу жётёли жынмули. Хошо жынму ба Тади хуа тинжян, ду чёчихали; таму фэсы:

– Жыгэ Жын ба жыгэ бынсы да нани дыйшонли? Сый ги Та гили жыгэ эргилили? Та замужя нын шян жыму-жяди кэрамэтини? ³Та бусы мужёнма? Нандый Та бусы Мариамди Эрзы, Ягўбэди, Иосияди, Яхўтиди лян Шимэди шүндима? Тади зымыйму ду бусы зэ вэму жытар жў-динима?

Таму фэли жыгэ хуали, йинцысы мэ щинфу Эрса.

⁴Эрса ги таму фэди:

– Шынжын чўгуэ зэ тади чыпунуи, зэ тади чинчин-му гынчян, зэ тади жяни, зэ са дифон ду ю жынмуди тэнэни.

⁵Йинви жыгэ Та зэ нэтар ба йигэ кэрамэти ду бу нын шянчўлэ, гуон ба шу гэдо жигэ бинжынмушон, зу ба тамуди бин канхоли. ⁶Эрса чёчихали, виса жыщезы жынму мэю щинфу.

*Эрса ба шыэргэ Апостолму
дафачили*

(Мф 10:5-15; Лк 9:1-6)

Йиху Эрса зэ жувиди щёнжуонни жуанди жётёли жынмули. ⁷Та ба шыэргэ Апостолму жёдо гынчян лэ, ба таму

лѣнгэ-лѣнгэжя дафа зудѣ, ги таму гиди бынсы, жѣ таму ба зонгуй ганчүчини. ⁸ Эrsa ги таму гиди фынфу:

– Ниму зу лүди сыхур, чүгүэ йигэ жүгунзы, ба са дунщи ду бэ нали: бэ на мэмэ, бэ на тибо; ги жябозы литу ба чян е бэ жуонли, ⁹ гуон чуан йифон хэ, бэ чуан лѣнгэ хансанзы.

¹⁰ Эrsa ги таму хан фѣди:

– Ниму дан доли булүн нагэ фонзынили, зу шындо нэтар, йичыр до ниму зуди сыхур. ¹¹ Ниму дан доли булүн нагэ дифоншонли, нэтарди жынму дан ба ниму бу жешули зэмусы ба ниму фѣхади хуа бу тинли, ниму зу да нэгэ дифоншон зудѣ, ба ниму жүэшонди тў түдѣ, зушѣн ги таму ю зуйди йигэ жихо йиѣн.

¹² Апостолму чүчи ба дажя чуанжѣди, жѣ таму ба гэжяди гўнахар жынли, ба таму шинни сылѣнхади гэбянли. ¹³ Таму е ба хошо зонгуй ганчүчили, ба хошо бинжынму на чин-ю мѣли, зу на жымужяди фонфа ба тамуди бин канхоли.

Йихия шынжынди вучон

(Мф 14:1-12; Лк 9:7-9)

¹⁴ Ирод хуоншон ба Эrsaди сычин е тинжянли, йинцысы Эrsaди миншын садо мангэчүрли. Ющезы жынму фѣди:

– Жысы щижынмуди Йихия. Та вучонли йиху, кэ хуэли, йинви жыгэ Та ю щян кэрамэтиди бынсыни.

¹⁵ Ющезы жынму фѣди:

– Жысы Илияс шынжын.

Хан ющезы жынму фѣди:

– Жысы йигэ шынжын, зушѣн йигэ зочянди шынжын йиѣн.

¹⁶ Ирод ба жыщезы хуа тинжян фѣди:

– Тасы жѣ вѣ ба ту кандѣди нэгэ Йихия. Та кэ хуэли!

¹⁷ Жыгэди зочян Ирод гэжя дафади жынму ба Йихия жуачў, бонха ядо банфонзынили. Ирод жымужя ганли жѣ Иродиада разыни. Иродиадасы Ирод шүнди Филиппди пѣе. Ирод ба та чүшонли. ¹⁸ Кэсы Йихия ги Ирод фѣгүэ:

– Ни бу нын ба ниди шүндиди пѣе чүшон, йинцысы жысы харам.

¹⁹Йинви жыгэ Иродиадади щинни ги Йихия жили чули, щён ба та садёни, кэсы та бу нын ган жыгэ сычин. ²⁰Ирод хэпа Йихияни, йинцысы та жыдо Йихиясы Анлаху́ жанчүлэди гундожын, зу ба та бохүдини. Йихия фэ хуади сыхур, Ирод мый йихуэй тин тадини, щинни шызэ бу нанвын еба, кэсы та нэ тин Йихияди хуа.

²¹Линйирни фонбян сыхур доли. Ирод гуэ тади сынжыди нэйитян, ги тади жынфуди гуанжынму, жүнву тузыму лян Галилеяди линшужынму гуэли янцили. ²²Нэгэ сыхур Иродиадади нүзы жинлэ төли төвули. Ирод лян тади кижынму ба жыгэ каншонли. Хуоншон ги нэгэ нүр вава фэди:

– Ни ё сани, вэ зу ги ни ги сани.

²³Ирод хан дү жуди фэли:

– Ни ё сани, напа ё вэди бангэзы гуйжяни еба, вэ е ги ни гини!

²⁴Нэгэ нүр вава чүчи вынли тади мамали:

– Жё вэ ё сани?

Тади мама ги та хуэйдади фэсы:

– Ни жё та ги ни ба щижынмуди Йихияди ту гиги.

²⁵Нэгэ нүр вава хуонхуон-монмонди йүанхуэй до хуоншон гынчян лэ, читоди ги та фэди:

– Вэ щён жё ни ба щижынмуди Йихияди ту гэдо панзышон ги вэ дуанди лэни.

²⁶Хуоншон юцухали. Та зэ кижынмуди мянчян дүли жули, йинви жыгэ та бу щён ги нэгэ нүр вава ги дуанжүэхуа.

²⁷Та гиди фынфу жё йигэ донбинди жын чи, ба Йихияди ту налэни. Нэгэ донбинди жын чүчи, доли банфонзыни, ба Йихияди ту кандёли. ²⁸Зыху ба Йихияди ту гэдо панзышон, дуандилэ ги нэгэ нүр вава гигили; нэгэ нүр вава ба ту ги та мама гигили.

²⁹Йихияди манламу ба жыгэ тинжян, лэ зу ба Йихияди мэти нашон, мэдо фынкыннили.

Эрса жё вучян жын чыболи

(Мф 14:13-21; Лк 9:10-17; Йих 6:1-14)

³⁰Апостолму шудо Эрсади мянчян, зу ба таму ганхади дэ жётёхади сычин йиче ду ги Та фэли. ³¹Лэ-чиди жынму

дуэди йимяр, Эрса дэ Тади манламу лян чыфанди гунфу ду мәю. Эрса ги таму фэди:

– Заму туту-мәмэди до йигэ мәжын-янди дифоншон чи хуанйихар.

³² Таму шонли чуан, туту-мәмэди жочү йигэ мәжын-янди дифоншон фушон зудёли.

³³ Хошо жынму ба таму зудёди канжянли, ба таму ду жындыли. Жынму да мый йигэ чынпуни чүлэ е доли нэ-тарли. Таму би Эрса лян Тади манламу лэди зо. ³⁴ Эрса да чуаншон халэ, ба хошо жынму канжянли. Тади щин йиха ванли, йинцысы таму зущён мәю фон-ёнжынди ёнчүн йи-ён. Та зу ба хошо сычин ги жынму жётёли. ³⁵ Хушон манламу до Эрса гынчян лэ, ги Та фэди:

– Кэжя хушонли, жытарсы йигэ кунтан. ³⁶ Ни ба дажя фонкэ, жё таму зэ жувиди щёнжуонни ги гэжя мэ йидяр чыди чи.

³⁷ Эрса фэди:

– Ниму ба чыди ги таму гиги!

Манламу зу вынли Эрсали:

– Нандый Ни жё вөму чи на эрбый йинчян* ба мөмө мэшон, ги таму гиги жё чынима?

³⁸ Эрса ги таму фэди:

– Ниму чи канйихар, йиман ю дуэшо мөмэни?

Таму канжян, зу фэди:

– Нэтар ю вугэ мөмэни зэмусы лёнгэ йүни.

³⁹ Эрса ги манламу гиди фынфу жё жынму йибазы-йибазыди зуэдо люцошонни. ⁴⁰ Дажя зуэхали, йибазы ю йибый жын, йибазы ю вушыгэ жын. ⁴¹ Эрса ба вугэ мөмө зэмусы лёнгэ йү начелэ, жочү тяншон канлийихар, ги Анлахү долигэ ще, ба мөмө быйкэ ги манламу гигили. Манламу зу ги дажя фынгили. Эрса ба лёнгэ йү е ги жынму фынгили. ⁴² Дажя ду чыли, е ду чыболи. ⁴³ Манламу ба шынхади мөмө дэ йү манман жуонли шыэргэ куонзыли. ⁴⁴ Чыли мөмэди жынму литу ю вучян нанжынму.

* 6:37 Жыгэ йинчян жёди «динарий».

Эрса зэ хэзы готу зудини

(Мф 14:22-36; Йих 6:16-21)

⁴⁵Йиху Эрса жё манламу шонли чуан, туни вон хэзы нэбонгэди Вифсаида щёнжуонни фушон чини, зэ нэтар дынйихар, Та ба жынму фонкэни. ⁴⁶Эрса ба таму суншон зудё, гэжя шонли сан, читоли Анлахули. ⁴⁷Хушон чуаншон зуэди манламу кэжя доли хэзыди донжуннили, Эрса йигэр хан зэ хэянзышонни. ⁴⁸Та канди ё чуанди манламу фадёли, йинцысы чуан жочу йинмянди фын фудини. Тян лёндыйли, Эрса зэ хэзы готу бушин зуди лэ, щён да таму гынчян зугуэчини. ⁴⁹Манламу канжян Эрса зэ хэзы готу зудини. Таму сылёнди жысы йигэ чигуэ йинйинзы, ду дашын ханли; ⁵⁰йинцысы канжян Эрса таму ду хэли пали.

Эрса ги таму фэди:

– Ниму ба данзы фонда! Бэ хэпали, жысы Вё!

⁵¹Та шонли чуан, лян манламу доли йидарнили. Фын е бу гуали. Манламу ду йуэшин чёчихали. ⁵²Йинцысы тамуди щин ниндихын, таму хан мэ минбыйни ба мэмэ фынкэ гигиди йисы.

⁵³Таму ба хэзы фугуэчи, доли Геннисарет дифоншонли, ба чуан бондо хэянзышонли. ⁵⁴Таму да чуаншон жён халэ, жынму кэжя ба Эрса жындыйли. ⁵⁵Жынму ба нэгэ дифон зужуангуэлэ, тинжян Эрса доли нагэ дифоншонди, таму зу ба бинжынму гэдо вузышон надо нэтарли. ⁵⁶Эрса дансы до нагэ щёнжуонни, чынпуни хуэйжэсы цунжуонни, жынму ду ба бинжынму гэдо чонзыни, ба Эрса читоди жё бинжынму гуон ба Тади йишонди бянбянзы дуйихарни. Дули Тади йишонди бинжынму ду холи.

Зузу-быйбыйди куйчын

(Мф 15:1-10)

7 Фарисейжынму лян жигэ нянжинжын йидарни кан Эрса лэли (жы жигэ нянжинжынсы да Иерусалим чынпуни лэди). ²Таму канжян Эрсади манламу литу ю жигэ жын лян буганжын мэ щихади шу чы мэмэдини.

³Фарисейжынму лян йиче яхүти жынму ду зунхү зүй-зүй-быйбыйди куйчындини, ба шу дан бу ши, бу чы чыди.

⁴Таму да гэшон хуэйлэ дан бу ши абдэзы, бу чы чыди. Таму хан зунхү хошо данлинди куйчын зэмусы лүфудини. Билүн, замужя ба ванванзы, гуанзы, тун гүэ ё ши ганжинни зэмусы данлинди куйчын.

⁵Йинви жыгэ фарисейжынму лян нянжинжынму вынли Эрсали:

– Виса Ниди манламу бу зунхү зүй-зүй-быйбыйди куйчын? Виса таму лян зон шу чыфандини?

⁶Эрса ги таму фэди:

– Исаяя шынжын дуйчү ниму жы йибазы мунафикму йиче зозор фэхади Анлахүди хуа дуйдини:

«Жыгэ минжын гуон на зуй тэнэ Вэдини, кэсы тамуди щин ли Вэ йүандихын.

⁷Таму ба жынмуди жёщүэ суанчын Вэди фынфули.

Жымужя таму быйкэр бэвон Вэдини!»

⁸⁻⁹Эрса ги таму хан фэди:

– Ниму зунхү жынмуди куйчындини, кэсы ба Анлахүди фынфу мэ зунхүди. Ниму чёмёди ги Анлахүди фынфу гили дуанжүэхуали, йинцысы ниму щён зунхү ниму гэжяди куйчынни. ¹⁰Муса шынжын ги ниму гихади фынфу: «Ни ё ба нён-лозы тэнэни», хан гиди фынфу: «Сый дуэщянли нён-лозыли, ги та яндин ё дин сызуйни». ¹¹⁻¹²Кэсы ниму фэди: «Сый дан ба ёнхуэ нён-лозыди цэбый жүчын „гүрбани“ (йисысы ги Анлахү дуангиди лицин), та зу бу ёнхуэ нён-лозымули. ¹³Ниму на нимуди куйчын ба данлинди жынму жётёдини, жё ба Анлахүди хуа щёмедёни. Ниму хан ба хошо ганбан жымужя гандини».

*Замужяди дуници жё жын
бу ганжинни*

(Мф 15:10-20)

¹⁴Эрса йүанхуэй ба жынму жёдо Та гынчян лэ, ги таму фэсы:

– Ниму дажя ду ё тин Вэди хуани, е ё ба хуади йисы дунни. ¹⁵Нэщезы да вэту вон жынмуди кэлон литу жинди

дунщи бу нын жё жын бу ганжин. Кэсы нэщезы да жынди кэлон литу чўлэди дунщи цэ нын жё жын бу ганжин.

¹⁶⁻¹⁷ Эrsa да жынму гынчян зудё, жинли йигэ фонзыниди сыхур, манламу вынли Тали, жыгэ бифон ю са йисыни.

¹⁸ Эrsa ги таму фэди:

– Ниму е лян данлинди жынму йиён бу минбыйма? Нандый ниму бу дунма? Нэщезы, да вэту вон жынди кэлон литу жинди дунщи бу нын жё жын бу ганжин. ¹⁹ Йинцысы да вэту жинчиди дунщи ду бусы вон тамуди шинни чиди, тамусы вон дўзы литу чиди, йиху вон можўанни эрди; зу жымужя йиче чыхади дунщи чынха ганжиндини.

²⁰ Эrsa хан фэди:

– Нэщезы жё жын буганжинди дунщи да жынди кэлон литу чўлэдини, ²¹⁻²² йинцысы да жынди кэлон литу чўлэди зусы да жынди шинни чўлэди заёнди ха вонщён: хўнэ нўжын, зў зый, хэ мин, пэе-ханзы хўлон, жишы, жи чу, сы жянчё, хўган-хўшин, нянхун, хэщўэ жын, гоно, ганкэ сычин бу сылён зэмусы данлинди гўнахар. ²³ Жыщезы ха вонщён дусы да жынди кэлон литу чўлэди, таму жё жынму шызэ бу ганжин.

Йигэ вэдо нўжынди щинфу

(Мф 15: 21-28)

²⁴ Эrsa да нэгэ дифоншон зудё, доли Тир чынпу жуви-ди дифоншонли. Та жинли йигэ фонзыни зу шындо нэтарли, бу щён жё жынму жыдо. Кэсы Та мё дый чёнха. ²⁵ Нэтар ю йигэ нўжынлэ, зонгуй ба тади нўр начўдини. Жыгэ нўжын ба Эrsaди сычин тинжян, лэ зу гуйдо Тади жўэ гынчянли. ²⁶ Жыгэ нўжынсы йигэ вэдожын, тасы зэ Сирияди Финикия дифоншон сын-ёнхади. Та читоди жё Эrsa ба та нўр кэлон литуди гуй ганчўчини. ²⁷ Эrsa ги та фэди:

– Щянтуни жё ваму чыбо! Ба вамуди чыди ги гувазы эрги жё чычи – жыгэ сычин бу дуй.

²⁸ Нэгэ нўжын хуэйдади фэсы:

– Дуйдини, вэди Жонгуйди, кэсы жуэзы дихади гувазы е ба вава шынхади зазар чыдини!

²⁹ Эrsa ги та фэди:

– Йинви жы йигэ хуа, ни хуэй жячи. Гуй да ни нүрди кэлон литу кэжя чүчили!

³⁰ Нэгэ нүжын хуэйли жя, ба нүр зэ чуоншон фиди кан-жанли; гуй да тади кэлон литу кэжя чүчили.

Эrsa ба йигэ яба-лунзы канхоли

³¹ Эrsa да Тир чынпу жуvidи дифоншон чүлэ, гуэли Сидон чынпу, гуэли Шыгэ Чынпуди дифон, йиху йүанхуэй доли Галилея хэянзышонли. ³² Жынму ба йигэ яба-лунзы линдо Эrsa гынчян, жё Эrsa ба шу гэдо тади шыншонни. ³³ Эrsa ба та да жынму литу лингуэчи, ба гэжяди зыту гэдо яба-лунзыди эрдүэ литули, тўли йидяр тўмө, на гэжяди зыту ба тўмө мөдо яба-лунзыди шэтушонли. ³⁴ Йиху Эrsa дуйчү тьяшон канлийихар, шыншынди щили йику чи, зу ги нэгэ жын фэди:

– Еффата!

(Жыгэ хуади йисысы «Жонкэ!»)

³⁵ Нэгэ жынди эрдүэ донвөр жонкэли, шэту е ванли, та зу кэ ку фэтуэ хуали, йидяр ду бу нанли. ³⁶ Эrsa ги дажя гиди фынфу, ба жыгэ сычин ги сый ду бу жун фэ. Суйжан Та ги жынму гиди фынфу бу жё таму фэ, жынму йүэшин жэшинди ба жыгэ сычин санчуандо сыжу-бахали. ³⁷ Ба жыгэ сычин тинжянди йиче жынму ду шызэ чёчихали. Таму фэди:

– Та зўди йиче сычин ду ходихын! Та жё лунзы тинжяни, хан жё яба фэхуани!

Эrsa жё сычян жын чыболи

(Мф 15:32-39)

8 Нэжитян хошо жынму йүанхуэй шудо йидарнили. Таму мөю чыди. Эrsa жё манламу лэ, ги таму фэди:

– ² Вэ ви жыщезы жынму даншиндихын, йинцысы таму лян Вэ зэ йидарни кэжя сан тьяли; таму мөю чыди. ³ Вэ дан жё таму нэ вэдўзыди хуэй жячи, таму зэ лўшон фадёни, йинцысы таму литу ющезы жынсы да йүан дифоншон лэди.

⁴Эрсади манламу зу вынли Тали:
– Зэ жыгэ мәжын-янди дифоншон вәму замужя нын ги жыщезы жынму ба чыди гиги, жё таму чыбони?

⁵Эрса вынли тамули:

– Ниму ю дуэшо мәмәни?

Таму хуэйдади фәсы:

– Чигә.

⁶Эрса ги жынму гиди фынфу, жё таму зуэдо дишонни. Та гэжя ба чигә мәмә начелә, ги Анлахұ долигә ще, йиху ба мәмә быйкә зу ги манламу гигили; манламу ги дажя фынгили. ⁷Таму хан ю жигә йүни. Эрса кә ги Анлахұ долигә ще, зыху ги манламу гиди фынфу жё таму ги дажя ба йү е фынгини. ⁸Дажя ду чыли, е ду чыболи. Таму ба шынхади мәмә дә йүди зазар манман жуонли чигә куонзыли. ⁹Чыбоди жынму бонжер ю сычян жынму. Эрса ба жыщезы жынму фонкэли. ¹⁰Та лян манламу шонли чуан, жочұ Далманута дифон фушон зудели.

***Фарисейжынму ёди
жё Эрса щян кэрамэтини***

(Мф 16:1-4)

¹¹Жигә фарисейжын лә кан Эрсади сыхур, лян Та зынжонли. Таму щён ба Эрса зыянйихар, жё Та да тяншон ги таму щян йигә кэрамэтини. ¹²Эрса шыншынди щили йикучи, зу фәди:

– Виса жы йибыйзы жынму щён жян кэрамэтини? Вә ги ниму фә шыхуа, таму бу жыгұ жян кэрамэти!

¹³Та да таму мянчян зугуәчи, шонли чуан жочұ хэзы нәбонгә фушон зудели.

***Фарисейжынди «жёмян»
лял Иродди «жёмян»***

(Мф 16:5-12; Лк 12:1-3)

¹⁴Чуаншон зуэди манламу чўгуә йигә мәмә мәю данлинди чыди. ¹⁵Эрса ги таму гиди ниннинди фынфу фәсы:

– Ниму кан, ниму ё щёщин фарисейжынди «жёмян» лян Иродди «жёмяни».

¹⁶ Таму йигэ ги йигэ фэди:

– Та фэ жыгэ хуа, йинцысы заму мэю мэмэ!

¹⁷ Эрса ба жыгэ жыдо зу вынли тамули:

– Ниму виса толүн ниму мэю мэмэди вынтини? Нандый ниму хан бу дунма зэмусы хан бу минбыйма? Нандый нимуди щин жыму нинма? ¹⁸⁻¹⁹ Ниму ю нянжинни, канбужянма? Ниму ю эрдуэни, тинбужянма? Вэ ба вугэ мэмэ быйкэ, ги вучян жын фынгили еба, ба жыгэ ниму вондөлима? Ниму ба шынхади зазар манман жуонли жигэ куонзы?

Манламу хуэйдади фэсы:

– Шыэргэ куонзы.

²⁰ Эрса кэ вынли:

– Вэ ба чигэ мэмэ быйкэ, ги сычян жын фынгили, ниму ба шынхади мэмэ зазар манман жуонли жигэ куонзы?

Таму хуэйдади фэсы:

– Чигэ куонзы.

²¹ Эрса кэ вынли тамули:

– Ниму нандый хан мэ минбыйма?

*Эрса ба Вифсаида щёнжуонниди хазы
канхоли*

²² Таму доли Вифсаида щёнжуоннили. Нэтар жигэ жын ба йигэ хазы линдо Эрса гынчян, читоди жё Эрса ба та дуйихарни. ²³ Эрса ба нэгэ хазыди шу жуачү, ба та да щёнжуонни линчүчили. Эрса щянтунни ба тўмэ тўдо тади нянжиншон, ба гэжяди шу е гэдо тади нянжиншон, зу вынли тали:

– Ни ба са дунщи канжянни?

²⁴ Та ба ту тэчелэ канлийихар, зу фэди:

– Вэ ба жынму канжяндини. Таму, зущён фу йиён, йигэ йигэжя лэ-чи зудини.

²⁵ Эрса ба гэжяди шу йүанхуэй гэдо тади нянжиншонли. Жыхур нэгэ хазы динди вонлийихар, ба заёнди дунщи ду канди щяншярли, зу жымужя ба тади нянжин канхоли.

²⁶ Эрса жё та хуэйжя чини, хан ги та гиди фынфу:

– Ни вон жыгэ щёнжуон зэ бэ жинчили.

Пётр фэди Эрсасы Мэсих

(Мф 16:13-20; Лк 9:18-21)

²⁷ Эrsa лян Тади манламу жочү Филипп-Кесария дифоншонди щёнжуонни зудёли. Зэ лүшон Эrsa вынли тамули:

– Данлинди жынму фэди Вэсы сый?

²⁸ Таму хуэйдади фэсы:

– Ющезы жынму фэди Нисы на фи щижынмуди Йихия; ющезы жынму фэди Нисы Илияс шынжын; хан ющезы жынму фэди Нисы шынжынму литуди йигэ.

²⁹ Эrsa вынли тамули:

– Ниму фэ, Вэсы сый?

Пётр хуэйдади фэсы:

– Нисы Мэсих.

³⁰ Эrsa ги таму гиди ниннинди фынфу, ги сый ду бу жун фэ Тасы сый.

Эrsa ба Та гэжя вонху шу кўнанди

зэмусы вучонди зозор фэли

(Мф 16:21-28; Лк 9:22-27)

³¹ Эrsa ги манламу жётёди фэсы:

– Аданди Хубый яндин ё шу хошо кўнанни. Яхүтиди ложынму, да ахунму лян нянжинжынму ду ба Та бу жынни. Таму ба Аданди Хубый дасыни, гуэли сан тьян Та кэ хуэни.

³² Та миндаминди ба жыщезы хуа фэли. Пётр тинжян, ба Эrsa лингуэчи, ги Та фэли фандуйди хуали. ³³ Эrsa жуангуэлэ, жочү манламу канлийихар, ги Пётр жинчү фэди:

– Иблис, ни да Вэ гынчян гун! Ниди йиче вонщён ду бусы Анлахүди вонщён, жысы жынди вонщён!

³⁴ Эrsa жё жынму лян манламу йидарни ду шудо Та гынчян, ги таму фэди:

– Сый дан щён гыншон Вэ зу, та ё ба гэжя вондёни зэмусы лян Вэ йиён ба гэжяди мин жүги, цэ нын гыншон Вэ зу. ³⁵ Йинцысы сый щён ба гэжяди мин жюхани, та ба тади мин хэни. Кэсы ви Вэ лян Анлахүди Хо Щинвын ба

гэжяди мин жүгиди жын ба тади мин жүюхани. ³⁶Жынму дан ба жыгэ дун-я дыйшонли, кэсы ба гэжяди мин хэли, ги тамушон ю са хони? ³⁷Та на са йуанхуэй ба гэжяди мин мэхуэйлэни? ³⁸Зэ жыгэ мэю шинфуди, ган гўнахарди йи-быйзы сый дан хэщю Вэ дэ Вэди хуа, Аданди Хубый зэ Та Дадади гуонлён литу лян Тади Тянщянму йидарни лэди сыхур е хэщю нэгэ жынни.

9 Эрсэ ги таму фэди:
– Вэ ги ниму фэ шыхуа, жытар жынму донжунни зан-ди жигэ жын, таму вучонди зычян ба Анлахў тяншонди Гуйжя лян Тади лилён долэди канжянни.

Эрсади ёнзы гэбянли

(Мф 17:1-13; Лк 9:28-36)

²Гуэли лю тян, Эрсэ лян Пётр, Ягўбэ дэ Йихия йидарни туту-мэмэди шонли йигэ го саншонли. Эрсади ёнзы зэ таму мянчян гэбянли: ³Тади йишон бячын быйбырдили, зэмусы сакэ гуонлёнли, дишон сый ду бу нын ба бупи жанчын жыму быйди янсый. ⁴Сангэ манла мынмынди канжян Илияс шынжын дэ Муса шынжын лян Эрсэ фэхуадини. ⁵Пётр ги Эрсэ фэди:

– Вуста, вэму шындэ жытар ходихын! Жё вэму да сангэ вэпынзы: ги Ни йигэ, ги Муса шынжын йигэ зэмусы ги Илияс шынжын йигэ.

⁶Пётр лян данлинди лёнгэ манла бу жыдо фэ сани, йинцысы ба таму ду хажинли.

⁷Жыхур йикуэр йүнцэ ба таму зонянли. Мынмынди да йүнцэ литу чўлэли йигэ шынчи фэди:

– Жысы Вэди щинэ Эрзы. Ниму ё тин Тади хуани!

⁸Манламу донвэр ба сыжу-баха канлийихар, мэ канжян данлинди жынму, гуон Эрсэ лян таму зэ йидарни.

⁹Таму да саншон халэди сыхур, Эрсэ ги таму гиди фынфу фэди:

– Вэ, Аданди Хубый, вучонли йиху, кэ хуэни. Жыгэди зочян, ниму ба жыщезы жангуэди сычин ги сый ду бэ фэли.

¹⁰Таму ба Эрса фэхади хуа жихали, йигэ ги йигэ фэди:

– «Вучонли йиху, кэ хуэни», – жы йигэ хуа ю са йисыни?

¹¹Таму вынли Эрсали:

– Виса нянжинжынму фэди, Илияс шынжын яндин ё щянтуни лэни?

¹²Эрса ги таму хуэйдади фэсы:

– Илияс шызэ ё щянтуни лэ, ба йиче сычин ду шөлүхани. Виса Китабушон щедисы Аданди Хубый яндин ё шу кунан зэмусы жынму ба Та бу жын? ¹³Вэ ги ниму фэ, И лияс кэжя лэли, кэсы ющезы жынму ги та ганли таму вонщёнхади сычинли, зущён Китабушон ще тади йиён.

Эрса ба кэлон литу ю зонгуйди вава канхоли

(Мф 17:14-21; Лк 9:37-43)

¹⁴Таму доли данлинди манламу гынчянди сыхур, ба таму жувиди хошо жынму канжянли. Жигэ нянжинжын лян таму зынжондини. ¹⁵Жынму ба Эрса канжян, ду чёчихали. Таму вон чян поди, ба Эрса жейинли. ¹⁶Эрса вынли манламули:

– Ниму лян таму зынжон садини?

¹⁷Жыщезы жынму донжунни чүлэли йигэ жын фэди:

– Вуста! Вэ ба вэди эрзы линдо Ни гынчянли, зонгуй ба та начүдини, йинви жыгэ та бу нын фэхуа. ¹⁸Мый йихуэй зонгуй ба та жуачү, зу ба та эрдо диха, жё тади зуйни тонди бый мэзы, та ба я нёди щёндини, хуншын ду ниндёли. Вэ читоди жё Ниди манламу ба жыгэ зонгуй ганчүчини, кэсы таму ба жыгэ сычин мэ дый ган.

¹⁹Эрса ги таму фэди:

– Ниму жы йибыйзы мэю щинфуди жынму! Вэ лян ниму йидарни хан ё шын дуэшо гунфуни? Вэ ба ниму хан ё жыннэ дуэшо сыхурни? Ба вава линдо Вэ гынчян лэ!

²⁰Таму зу ба вава линшон лэли.

Нэгэ зонгуй канжян Эрса, донвэр ба вавади жин жүчүли, жё та дедо дишон гунтуэли, зуйни тўди бый мэзы.

²¹Эрса вынли вавади дадали:

– Та ба жымужяди бин дыйшон ю дуэшо гунфули?

Дада хуэйдади фэсы:

– Да сын-ёнха зу юли бинли. ²² Гуй хын жи хуэй шён ба веди ва хэсыни: ба та эрдо хуэ литули, сондо фи литули. Кэсы Ни дан нын зў са, вэ читоди жё Ни щинванди ги вэ-му бонйихарни!

²³ Эрса ги та фэди:

– Ни виса фэди: «Ни дан нын зў са?» Ю щинфуди жын са сычин ду нын ган!

²⁴ Вавади дада донвэр дашын ханди:

– Вэ щинфуни, кэсы веди щинфу бу гу. Вэ читоди жё Ни ги веди мэю лилёнди щинфу ги бонцу!

²⁵ Эрса канди жынму лэдини, зу ги нэгэ зонгуй гиди ниннинди фынфу:

– Яба-лунзы гуй! Вэ ги ни гиди фынфу, ни да жыгэ вавади кэлон литу чўлэ! Ни зэ бэ жин тади кэлон литу чили!

²⁶ Нэгэ зонгуй дашын ханди, ба вавади жин жүчў, чўлэ-ли. Вава чынха зушён вучонлиди жын йиён. Дажа ду фэди:

– Та вучонли!

²⁷ Кэсы Эрса ба вавади шу жуачў, бонди жё та челэли. Вава занчелэли.

²⁸ Эрса жинли йигэ фонзы литули. Тади манламу туту-мэмэди вынли Тали:

– Виса вэму ба нэгэ зонгуй мэ ганчўчи?

²⁹ Эрса фэди:

– Ниму дан бу чито Анлахў, ниму бу нын ба жымужэди зонгуй ганчўчи.

Эрса ба Та гэжя вонху вучонди зозор ди эрбян фэли

(Мф 17:22-23; Лк 9:43-45)

³⁰ Таму да нэгэ вэршон зудё, гуэли Галилея дифоншон-ли. Эрса бу шён жё жынму ба жыгэ сычин жыдо. ³¹ Йинви жыгэ Та жётё манламуди фэсы:

– Ба Аданди Хубый вонху ги жынмуди шуни гигини. Таму ба Та дасыни, Та вучонлиди ди сан тьян кэ хуэни.

³² Манламу ба жы йигэ хуади йисы мэ дун. Кэсы таму мэ ган вын Эрса.

Сыйсы дин видади?

(Мф 18:1-5; Лк 9:46-48)

³³Таму доли Капернаум щёнжуонни, жинли йигэ фонзынили. Эrsa вынли Тади манламули:

– Ниму зэ лўшон толунли са вынтели?

³⁴Таму йишын ду мэ чў, йинцысы таму зэ лўшон толундисы: «Сыйсы дин видади?» ³⁵Эrsa зуэха жё шыэргэ манламу до Та гынчян, зу ги таму фэли:

– Сый щён жан ту йигэ вифын, жё та ба йиче жынму хутуди вифын жаншон зэмусы ги йиче жынму дон хуэжичи.

³⁶Та ба йигэ вава зожуэли, жё та зандо тамуди донжуннили. Йиху Та ба нэгэ вава бочў, зу ги таму фэди:

– ³⁷Сый дан ви Вэди минзы ба жымужяди йигэ вава жешуха, та зу ба Вэ жешухали. Сый ба Вэ жешухали, та гуон бусы ба Вэ жешухали, та хан ба Вэ дафалэди Дада жешухали.

**«Сый дан бу фандуй заму,
та зусы занчын замуди»**

(Лк 9:49-50)

³⁸Йихия ги Эrsa фэди:

– Вуста! Вэму жянли йигэ жын, та чечў Ниди минзы ба зонгуй ганчўчили. Вэму донли тали, йинцысы та мэ суйшон вэму зуди.

³⁹Эrsa хуэйдади фэсы:

– Ниму бэ донгуа тали, йинцысы сый дан чечў Вэди минзы щян кэрамэти, та йиха бу нын жуангуэлэ ги Вэ фэ хэщүэди хуа. ⁴⁰Йинцысы сый дан бу фандуй заму, та зусы занчын замуди. ⁴¹Вэ ги ниму фэ шыхуа: булүн сый ви Мэсихди минзы ги ниму ба йиван лёнфи гиги жё ниму хэли, та яндин ба гэжяди шонхо дыйшонни.

Жё жынму ган гўнахарди жын

(Мф 18:6-9; Лк 17:1-2)

⁴²Эrsa фэди:

– Булүн сый дан михунди жё щинфу Вэди йигэ щёжын ган гўнахар, нэхур ги нэгэ жын ба мэпаншы бондо бэзыни

педо хэзыни хошер. ⁴³⁻⁴⁴Ниди йигэ шу дан михунди жё ни ган гўнахар, ба ниди нэгэ шу кандёчи! Ни шоли йигэ шу еба, кэсы ни йинавар хуэни. Жыгэ би ю лёнгэ шуди, дедо дуэзэхэ литуди зэмусы луэдо йүнзун бу меди хуэкын литуди хошер! ⁴⁵⁻⁴⁶Ниди йигэ жүэ дан михунди жё ни ган гўнахарни, ба ниди нэгэ жүэ кандёчи! Ни шоли йигэ жүэ еба, кэсы ни йинавар хуэни. Жыгэ би ю лёнгэ жүэди дедо дуэзэхэ литу хошер! ⁴⁷Ниди йигэ нянжин дан михунди жё ни ган гўнахар, ба ниди нэгэ нянжин вандёчи! Ни шоли йигэ нянжин еба, кэсы жинли Анлахў тяншонди Гуйжянили. Жыгэ би ю лёнгэ нянжинди, дедо дуэзэхэ кын литу хошер! ⁴⁸Нэтар чы тамуди чунчунзы бу сьдё, шо тамуди хуэ йүнзун бу медё.

⁴⁹Ба мый йигэ жын на хуэ ё зьянни, зушён ба чыди на ян янди йиён.

⁵⁰Янсы хо дунши, кэсы ян дан ба тади хан видо дюдё, замужя йүанхуэй ба тади ханчи дыйшонни?

Ниму ё дый лян ян йиёнди бинщинни зэмусы жё ниму йигэ лян йигэ ю тэпинни.

Жехун дэ линганди вынти

(Мф 19:1-12; Лк 16:18)

Ю Эрса да нэтар зудё, доли Яхўтиди дифоншонли, Иордан хэди нэбонгэли. Жынму шудо Та гынчян, Эрса зу лян сўчонди йиён жётёли тамули. ²Ющезы фарисейжынму кан Эрса лэли. Таму шён ба Эрса зьянйихар, зу вынли Тали:

– Ни ги вэму фэ: жочў вэмуди фалу нанжын лян пэнын лингандёма хансы бу нын?

³Эрса ги таму хуэйдади фэсы:

– Муса шынжын ги ниму гили замужяди фынфули?

⁴Таму хуэйдади фэсы:

– Муса шынжын гиди фынфу, жё нанжын щянтуни ги пэ ще йигэ линганди зыданданзыни, нэхур лян пэ цэнын лингандёни.

⁵Эрса ги таму фэди:

– Муса шынжын ба жыгэ фынфу ги ниму щелиди, йинцысы нимуди щин ниндихын. ⁶Кэсы датуршон, Анлахў

зуэзоха дун-яди сыхур, Та ба нанжын дэ нүжын е зуэ-зохали. ⁷Йинви жыгэ нанжын ё да нён-лозы гынчян зудё, йиху лян тади пәе чынфон пыйдуйни. ⁸Таму лёнгэ жын зу чынха йигэ шынзыни. Зу жымужя, нанжын лян пәе бусы лёнгэ жын, жыхур тамусы йигэ шынзы. ⁹Йинви жыгэ, Анлахұ пыйхэхади йиче пәе-ханзы йүнзун бунын ликэ.

¹⁰Таму хуэйлэ, доли фонзынили. Манламу кә вынли Эрса жыгэ сычинли. ¹¹Эрса ги таму фәди:

– Мый йигэ нанжын дан лян тади пәе лингандё, йиху ба данлинди нүжын чүшон, та зу ганли хўлонди гўнахарли. ¹²Мый йигэ пәе дан да тади нанжын гынчян зудё, йиху жяли данлинди нанжын, та е ганли хўлонди гўнахарли.

Эрса ги вamu панвонли холи

(Мф 19:13-15; Лк 18:15-17)

¹³Ющезы жынму ба вamu налэ, жё Эрса ба таму дуйихарни. Кәсы манламу донгуали тамули. ¹⁴Эрса ба жыгэ канжян, чишонлэли, зу ги манламу фәди:

– Ниму жё жыщезы суй вamu до Вә гынчян лэ, бә донгуа тамули, йинцысы Анлахұ тьяшонди Гуйжясы тамуди. ¹⁵Вә ги ниму фә шыхуа: сый дан бу лян вава йиён ба Анлахұ тьяшонди Гуйжя жешуха, та бу нын дон жыгэ Гуйжяди жын.

¹⁶Эрса ба жыщезы суй вamu бочелэ, ба шу гәдо тамуди тушон, ги таму панвонли холи.

Йигэ ючянханди вынти

(Мф 19:16-30; Лк 18:18-30)

¹⁷Эрса зэ лўшон зуди сыхур, йигэ жын погуэлэ гуйдо Тади мянчян вынли Тали:

– Дин ходи Вуста! Йинви жё вә йинавар хуэ, вә ё зў сани?

¹⁸Эрса ба та вынли:

– Ни виси ба Вә жё дин ходини? Чўгуэ Анлахұ зэ мёю данлинди дин ходи. ¹⁹Ни жыдо жыщезы фынфуни: бә дасы

жын, пәе-ханзы бә хўлон, бә ту дунши, бә дон жя гўва, бә чён жынжяди дунши, ё тэнэ нён-лозыни.

²⁰ Нэгэ жын хуэйдади фэсы:

– Вуста! Вә да суйди сыхур зу ба жыщезы фынфу йиче ду зунхўдини.

²¹ Эrsa динди ба та вонлийихар, щинни щинэ жыгә жынди, зу фәди:

– Ни хан ю йигә дуанбянни: ни ё ба йиче дунши мэдё, ба чян ги чүнжынму санги, нэхур ни зэ Тяншон дый фугуйни; зу жымужя ни цэ нын гыншон Вә зу.

²² Нэгэ жын ба жы йигә хуа тинжян, тади ляншы гэбянли, юцуди зудёли, йинцысы тади цэбый дуэдихын.

²³ Эrsa ба манламу вонлийихар, зу ги таму фәди:

– Жё ючянханму дон Анлахў Гуйжяди жынмучи – жысы тә нанди сычин!

²⁴ Манламу ба Эrsaди хуа тижян, ду чёчихали. Эrsa ги таму кә фәди:

– Вәди ваму! Жё жынму дон Анлахў Гуйжяди жын – жысы тә нанди сычин! ²⁵ Жё ючянди жынму дон Анлахў Гуйжяди жын – жыгә би луәтуә зуангуә жын нянзыди хан нан!

²⁶ Жыгәди йиху, манламу йүэщин чёчихали, йигә ба йигә вындини:

– Жымужя фәчи, ба сыйди мин нын жюхани?

²⁷ Эrsa динди ба таму вонлийихар зу фәди:

– Жынму бу нын ганди сычин Анлахў нын ган, йинцысы Анлахў ба са сычин ду нын ганни.

²⁸ Пётр ги Та фәди:

– Ни кан! Вәму ба йиче ду лёха, гыншон Ни зудини.

²⁹ Эrsa ги таму фәди:

– Вә ги ниму фә шыхуа: сый дан ви Вә хуэйжәсы ви Анлахўди Хо Щинвын ба фонзы, дищүнму, зымыйму, нён-лозыму, ваму, тандо лёха, ³⁰ та зэ жыгә дун-яшон яндин дый йибый лэзыди фонзы, дищүнму, зымыйму, нён-лозыму, ваму, тандони. Та шу япыйдини еба, кәсы зэ вонхуди дун-яшон та йинавар хуәни. ³¹ Хошо зэ чянту занди жынму зандо хутуни, зэ хуту занди жынму зандо тунини.

**Эрса ба Та гэжя вучонди
зозор ди санбян фэли**

(Мф 20:17-19; Лк 18:31-34)

³²Таму вон Иерусалим чынпу зуди сыхур, Эрса зэ чянту зудини. Манламу юцудини зэмусы хэпадини. Гыншон таму зуди жынму е ду хэпадини. Эрса ба шыэргэ манламу лингуэчи, ги таму ба вонху лян Та йүди сычин ду кэ тифэли. ³³Та фэди:

– Ниму кан! Заму хазыр вон Иерусалим чынпу зудини. Нэтар ба Аданди Хубый ги яхүтиди да ахунму лян нянжинжынму гигини. Таму ги Та дин сызуйни, йиху ба Та ги вэдожынму гигини. ³⁴Таму ба Та зотани, вон Тади лянмяншон тў түмэни, на бянзы ба Та дани зэмусы ба Та да-сыди ди сан тьян, Та кэ хуэни.

Ягүбэ лян Йихияди чито

(Мф 20:20-28)

³⁵Зеведейди лёнгэ эрзы Ягүбэ лян Йихия зудо Эрса гынчян, ги Та фэди:

– Вуста! Вэму ю йигэ читони, щён жё Ни ги вэму ганни.

³⁶Эрса ба таму вынли:

– Ниму жё Вэ ги ниму ган сани?

³⁷Таму хуэйдади фэсы:

– Ни зуэдо тяншон ю гуонлёнди вифыншонди сыхур, жё вэму лян Ни зуэдо йидарни: йигэ зуэдо Ниди юбонгэ, йигэ зуэдо Ниди зуэбонгэ.

³⁸Эрса ги таму фэди:

– Ниму гэжя бу жыдо ниму ё садини. Ниму ба Вэ хэди йи ванванзы фи нын хэдёма? Ниму зущён Вэ зэ фи литу щиди йиён, ба ниму гэжя зэ фи литу нын щинима?

³⁹Таму хуэйдади фэсы:

– Вэму нын ганни!

Эрса ги таму фэди:

– Ниму лян Вэ йиён, ба йи ванванзы фи хэшонни, зэмусы зущён Вэ зэ фи литу щиди йиён, ба ниму гэжя зэ фи литу щшонни, ⁴⁰кэсы жё сый зуэдо Вэди юбонгэ зэмусы

зуэбонгэ жыгэ сычин бу ю Вэ. Жыщезы вифынсы Анлахү ги сый шэлүхали, зу ги нэгэ гигини.

⁴¹Данлинди шыгэ манламу ба жыгэ хуа тинжян, ги Ягү-бэ лян Йихия сыли чили. ⁴²Йинви жыгэ Эрса жё таму йиче ду до Та гынчян лэ, ги таму фэди:

– Ниму жыдони, дун-яшон нэщезы жыгуан гуйжяди жынму ю чүанли гуан минжынни; зэмусы линшужынму е ю чүанли гуан тамуни. ⁴³Кэсы ниму жымузя ганбудый. Ниму литу сый щён дон дажын, та ё дон нимуди нүни. ⁴⁴Сый щён жан ту йигэ вифын, та ё ги йиче жынму дон нүни. ⁴⁵Йинцысы Аданди Хубый лэ, бусы жё данлинди жынму фусы Тани, кэсы Та гэжя фусы жынмуни зэмусы Та ба гэжяди мин ви жынму гигини, зу жымузя ба хошо жынму мэхуэйлэни.

Эрса ба хазы Вартимей канхоли

(Мф 20:29-34; Лк 18:35-43)

⁴⁶Таму доли Иерихон чынпунили. Эрса лян Тади манламу зэмусы хошо жынму да Иерихон чынпуни зудёди сыхур, йигэ хазы (тасы Тимейди эрзы, минзы жёди Вартимей) зэ лү гынчян зуэди, ё нетидини. ⁴⁷Та тинжян Назарет чынпуниди Эрса лэдини, дашын хантуэли:

– Эрса, Давуди Хубый! Жё Ниди щин до вэшон ван-йихар!

⁴⁸Хошо жынму ги та гиди ниннинди фынфу, бу жё та чү шынчили. Кэсы та йүэщин дашын хантуэли:

– Давуди Хубый! Жё Ниди щин до вэшон ванйихар!

⁴⁹Эрса занха зу фэди:

– Жё нэгэ жын до Вэ гынчян лэ.

Таму зу ги нэгэ хазы фэди:

– Ни фонщин! Челэ, Эрса жё нидини.

⁵⁰Хазы куэкуэди ба шыншон тохади йишон туэдэ, төчелэ, зу доли Эрса гынчянли.

⁵¹Эрса вынли тали:

– Ни жё Вэ ги ни зү сани?

Хазы хуэйдади фэсы:

– Вуста! Жё вэди нянжин хо, ба са ду канжян!

⁵² Эrsa зу ги та фэди:

– Ни чи! Ниди щинфу ба ниди мин жүохали!

Зу нэгэ сыхур хазы ба са ду канжянли, гыншон Эrsa зудёли.

Эrsa жинли Иерусалим чынпунили

(Мф 21:1-11; Лк 19:28-40; Йих 12:12-19)

11 Эrsa лян Тади манламу жин Иерусалим чынпуниди зычян, щянтуни доли Елеон саншонди Вифания лян Виффагия щёнжуоннили. Эrsa ба лёнгэ манла вон чян дафачи, ² зэмусы ги таму фэди:

– Ниму до чянтуди щёнжуонни чи. Жинли щёнжуонни, ниму зу ба нэтар бонди йигэ лүвазы канжянни (сый ду мё чигуэ жыгэ лүвазы). Ниму ба нэгэ лүвазы гэкэ, ладо жытар лэ. ³Сый дан вын ниму: «Ниму виса ган жыгэ сычиндини?» Ниму зу ги та фэ: «Вёмуди Жонгуйди ё тани, йиху Та ба лүвазы йуанхуэй сунлэни».

⁴Манламу доли нэтар ба мын вэту бонхади йигэ лүвазы зэ лўшон канжянли. Таму гэ шынзыди сыхур, ⁵нэтар занди жигэ жын ба таму вынли:

– Виса ниму ба лүвазы гэдини?

⁶Таму зу жочў Эrsaди фынфу ги жынму гили хуэйдали. Нэщезы жынму жё таму ба лүвазы лашон зудёли. ⁷Таму ба лүвазы ладо Эrsa гынчян лэ, ба гэжяди йишон дадо лүвазышонли. Эrsa зу чидо жыгэ лүвазышонли. ⁸Хошо жынму ба гэжяди йишон туэхалэ пудо лўшонли, ющезы жынму да фушон ба фужыжызы канхалэ, е пудо лўшонли. ⁹Чянмяр дэ хумяр зуди жынму ду ханди:

– Осанна!*

Вёму ба Ни куажёндени!

Ни ви Анлахўди минзы лэдини!

¹⁰Вёму ба Ни куажёндени,

йинцысы Ни ба вёмуди Даву лозыди гуйжя нахуэйлэдини.

Осанна зэ тяншонни!

* ^{11:9} Жыгэ хуади йисы кан Мф 21:9.

¹¹ Линйирни Эrsa доли Иерусалим чынпунили. Та жинли Иерусалимди сы литу, ба сыжу-бахани канлийихар. Йинцысы тян кэжя хили, Та зу лян шыэргэ манламу да чынпуни чўчи, жочў Вифания щёнжуонни зутуэли.

Эrsa ба инжирфу жумали

(Мф 21:18-19)

¹² Ди эр тян таму да Вифания щёнжуонни зуди сыхур, зэ лўшон Эrsaди дўзы вэли. ¹³ Та лойуанни ба йигэ инжирфу канжянли; фушон ю хошо еезыни. Эrsa лэ, щён канйихар, фушон ю инжир мэю. Та доли фу гынчян йиканса, чўгуэ еезы фушон са ду мэю, йинцысы же инжирди сыхур хан мэ дони. ¹⁴ Эrsa зу ги нэгэ фу фэди:

– Да жиргэ дашон жё сысый ду бэ чы ниди готянли!
Тади манламу ба жы йигэ хуа ду тинжянли.

*Эrsa ба зў мэмэди жынму
да Иерусалимди сыни ганчўчили*

(Мф 21:12-17; Лк 19:45-48; Йих 2:13-22)

¹⁵ Таму доли Иерусалим чынпунили. Эrsa жинли Иерусалимди сы литу ба сыни зў мэмэди жынму йиче ду ганчўчили. Та ба хуан чян жынди жуэзы лян мэ гэзы жынди йидынзы ду сондоли, ¹⁶ зэмусы бу жё жынму ба дунщи нашон зэ сыни лэ-чи зу. ¹⁷ Та ги жынму жётёди фэди:

– Нандый Китабушон мэю жы йигэ хуама:
Анлахў фэди: «Вэди сы ё чынха йиче жынму чито
Вэди фонзыни?»

Кэсы ниму ба Анлахўди сы зўчын зыйкуди вэзыли!

¹⁸ Яхўтиди да ахунму лян нянжинжынму ба жыгэ хуа тинжян, мусуанди ба Эrsa дасыни. Кэсы таму хэпа Эрсани, йинцысы жынму ба Эrsaди жёщүэ тинли, ду чёчихали.

¹⁹ Хушон Эrsa лян Тади манламу да чынпуни чўчили.

Эrsa жё манламу да инжирфушон канди дый жётёни

(Мф 21:20-22)

²⁰ Ди эр тян ганзо йизор Эrsa лян Тади манламу да нэгэ дифоншон гуэди сыхур, ба зочян жанхади нэгэ инжирфу

канжянли; та лян гын ду гандёли. ²¹Пётр ба жыгэ сычин жичелэ, зу ги Эрса фэди:

– Вуста, Ни кан! Ни жухади нэгэ фу гандёли!

²²Эрса ги таму хуэйдади фэсы:

– Ниму ё щинфу Анлахүни! ²³Вэ ги ниму фэ шыхуа: ниму дан ги жыгэ сан фэ: «Ни челэ, нуэдо хэзы литучи!» зэмусы щинни мэю шанки, ю щинфу, ниму фэхади хуа яндин чынхани. ²⁴Йинви жыгэ Вэ ги ниму фэ: бэ Анлахүди сыхур дансы читоди ёли са дуншили, ниму гуон ё шыщин щинфуни, нимуди йиче читоди сычин ду чынни. ²⁵⁻²⁶Ниму занха чито Анлахүди сыхур, щян ё фоншэ нанвили нимуди жынни, йиху нимуди тяншонди Дада е фоншэ нимуди гўнахарни.

Яхүтиди линшужынму вынли Эрсади чүанлили

(Мф 21:23-27; Лк 20:1-8)

²⁷Таму доли Иерусалим чынпунили. Эрса зэ Иерусалимди сыни лэ-чи зуди сыхур, яхүтиди да ахунму, нянжинжынму лян ложынму кан Та лэли. ²⁸Таму вынли Эрсали:

– Ни на са чүанли ба жыщезы сычин гандини? Сый ги Ни гиди чүанли, жё Ни ба жыщезы сычин ганни?

²⁹Эрса ги таму хуэйдади фэсы:

– Вэ ю йигэ вынтини, ниму дан ги Вэ гили хуэйдали, нэхур Вэ цэ ги ниму фэни, Вэ на са чүанли ба жыщезы сычин гандини. ³⁰Ниму ги Вэ фэ: Йихия ви Анлахү на фи ши жынмуди чүанлисы да нани лэди? Жысы да тяншон лэди, хансы да жынму литу лэди?

³¹Таму шонлэнди фэди:

– Заму ги Эрса ги са хуэйдани? Заму дан фэ: «Да тяншон лэди», нэхур Эрса фэни: «Дан жымужя, ниму виса мэ щинфу Йихия?» ³²Заму дан фэ: «Да жынму литу лэди», кэсы заму хэпа минжынму ба заму дани, йинцысы таму ду щинфуни, Йихиясы шынжын.

³³Таму зу ги Эрса хуэйдади фэсы:

– Вэму бу жыдо.

Эрса ги таму е фэди:

– Дан жымужя, Вэ ги ниму е бу фэ, Вэ на са чүанли ба жыщезы сычин гандини.

*Ю хащинди
хўржямуди бифон*

(Мф 21:33-46; Лк 20:9-19)

12 Эрса на бифон ги таму жётёди фэди:
– Йигэ жын зэли йигэ путо йуанзы; ги йуанзыди жуви зали йигэ чён; зэ йуанзыни вали йигэ ня жюди кын; щюгэли йигэ го лу. Йиху ба путо йуанзы ги хўржяму гиги, та гэжя вон данлинди дифоншон зудёли. ² Шу путоди сыхур та ба йигэ хуэжи дафачи, жё хўржяму ги та ба шучынди йилэзы гигини. ³ Хўржяму ба нэгэ хуэжи дади жё куншу хуэйчили. ⁴ Путо йуанзыди жонгуйди ба данлинди хуэжи кэ дафачили, хўржяму ба жыгэ хуэжиди ту далан, чуашёли тали. ⁵ Путо йуанзыди жонгуйди кэ ба йигэ хуэжи дафачили, хўржяму ба жыгэ хуэжи дасыли. Линху таму ба хошо жынму, ба ющезы дали, ба ющезы дасыли. ⁶ Путо йуанзыди жонгуйди хан ю йигэ шинэди эрзыни. Линйирни та ба гэжяди эрзы дафачи, жё та ба хўржяму канйихарни, щинни жымужя сылэндини: «Таму яндин хэщю вэди эрзыни». ⁷ Кэсы нэщезы хўржяму йигэ ги йигэ фэди: «Тасы путо йуанзы жонгуйди хубый. Зу, заму ба та дасы, та дада ги та шынхади йиче дунщи зу чынха замудили!» ⁸ Таму ба жонгуйди эрзы жуачў дасыли, ба тади шынзы эрдо путо йуанзы вэтули.

⁹ Эрса вынли тамули:

– Жымужя фэчи, жё путо йуанзыди жонгуйди ё замужя банни? Та яндин лэ, ба жыщезы хўржяму щёмедёни, ба путо йуанзы ги данлинди жынму гигини. ¹⁰ Нандый ниму мэ нянгуэ Китабушон щеди йигэ хуама:

«Гэ фонзыди жёнжынму ба нагэ шыту мэ каншон эрдёли,

нэгэ шыту чынли фон гынзыди шытули.

¹¹ Жыгэ сычинсы Анлахў ганхади,

зэ замуди лянмянчян жысы тэ чёчиди сычин!»

¹² Яхўтиди линшужынму жыдо Эрса фэхади бифон фэ тамудини. Йинви жыгэ таму щён ба Эрса жуачўни, кэсы таму хэпали жынмули, ба Эрса лёха зудёли.

**Ги Римди хуоншон чў чян,
бу чў чянди вынти**

(Мф 22:15-22; Лк 20:20-26)

¹³Ющезы фарисейжынму зэмусы Иродди жынму жочў фынфу кан Эрса лэли. Таму щён зэ Тади хуа литу зо йигэ йинйир, ба Та жуачўни. ¹⁴Таму ги Эрса фэди:

– Вуста! Вэму жьдони Нисы шыщинди жын, Ни бу гуаншян жынму замужя сыщённи, е бу кан са жын зэ Ни-ди мянчян, кэсы шыщинди ба Анлахўди лў ги жынму жён-дини. Ни ги вэму фэйихар, вэмуди фалү жё вэму ги Римди хуоншон чў чяннима, хансы бу чў чян?

¹⁵Эрса зэ щинни ба тамуди жанчё жьдоди йимяр, зу ги таму фэди:

– Виса ниму зыян Вэдини? Ги Вэ ги йигэ йинчян, жё Вэ канйихар!

¹⁶Таму ба йигэ йинчян ги Эрса гигили. Эрса зу вынли тамули:

– Жыгэ йинчяншон хуади сыйди лянмян, щеди сыйди минзы?

Таму хуэйдади фэсы:

– Римди хуоншонди лянмян дэ тади минзы.

¹⁷Эрса зу ги таму фэди:

– Ба Рим хуоншонди дунщи ё ги та гигини, ба Анлахўди дунщи ё ги Анлахў гигини.

Таму ба Эрсади хуэйда тинжян, ду чёчихали.

**Вучонлиди жынму
кэ хуэди вынти**

(Мф 22:23-33; Лк 20:27-40)

¹⁸Ющезы саддукейжынму кан Эрса лэли. Таму бу щин-фу вучонлиди жынму кэ хуэни. ¹⁹Таму вынли Эрсали:

– Вуста! Муса шынжын ги вэму гили фалүли: нагэ жын дан вучонли, тади мэ сын-ёнгуэди гуафу пэе шын-хали, нэхур нэгэ жынди щүнди ё ба гуафу чүшонни, ги та гэгэ сын-ён эрнүни. ²⁰Ю чигэ дищүлэ: лода чүли щифур, йиху вучонли, мэ шын вэму. ²¹Лоэр ба лодади гуафу

чүшон, йиху е вучонли, е мә шын ваму. Лосан есы жыму-гә. ²² Дищүнму чигә ба нэгә нүжын чүшон йиху ду вучонли, ду мә шын ваму. Линйирни нэгә нүжын е вучонли. ²³ Жымужя фәчи, зә кә хуәди нәйитян, таму йүанхуэй хуәли, ба жыгә нүжын суан найигә дищүнди пәени? Йинцысы чигә дищүн ду ба та чүгүә.

²⁴ Эрса ги таму хуэйдади фәсы:

– Ниму цуәли. Виса? Йинцысы ниму бу минбый Китабушонди хуа, е бу жыдо Анлахүди лилён. ²⁵ Жынму вучонли, кә хуәди йиху, таму зущён тяншонди Тянщянму йиён, е бу чү щифур, е бу жя нанжын. ²⁶ Нандый ниму зә Муса шынжын щехади фушон мә нянгуә вучонлиди жынму йүанхуэй хуәди хуама? Жыгә сычинсы Муса шынжын зә цыязыфу гынчян йүхади. Анлахү ги Муса фәли: «Вәсы Ибращимәди Анлахү, Исхарди Анлахү, Ягүбәди Анлахү». ²⁷ Жыгә хуади йисысы: Анлахүсы хуә жынмуди Анлахү, бусы вучонли жынмуди Анлахү. Йинви жыгә, ниму ванчүан цуәли.

Дин дади фынфу

(Мф 22:34-40; Лк 10:25-28)

²⁸ Йигә нянжинжын ба тамуди зынжон тинжян, жүәмуди Эрса ги саддукейжынму хуэйдади ходихын, до Эрса гынчян, зу вынли Тали:

– Анлахү ги жын гихади фынфу нагәсы дин ёжинди?

²⁹ Эрса хуэйдади фәсы:

– Ту йигә фынфусы: «Исраил, ни тинйихар! Замуди Жонгуйди Анлахүсы дүйиди. ³⁰ Ни лян ниди йичеди щин, йичеди жиншын, йичеди эргили, йичеди щинжин ба ниди Жонгуйди Анлахү ё щинэни». ³¹ Ди эргә фынфу: «Ни ба ни гынчянди жынму, зущён гэжя йиён, ё щинэни». Би жы лёнгә фынфу зә мәю ёжинди.

³² Нэгә нянжинжын ги Эрса фәди:

– Вуста, Ни фәди хуа дуйдихын! Зущён Ни фәхади йиён, Анлахүсы дүйиди. Чүгүә Та зә мәю данлинди. ³³ Лян заму йичеди щин, йичеди эргили, йичеди щинжин ба Анлахү щинэ зәмусы ба заму гынчянди жынму, зущён гэжя

йиён, шинэ, жыгэ би йиче шоди гүрбани дэ данлинди гүрбани ёжинди дуэ.

³⁴ Эрса канди жыгэ жынди хуэйда ю эргили, зу ги та фэди:

– Ни ли Анлахұ тыншонди Гуйжя бу йуанли.

Да жыгэ йиху сый ду бу ган вын Эрсали.

Мэсихсы сый?

(Мф 22:41-46; Лк 20:41-44)

³⁵ Эрса зэ Иерусалимди сы литу жетё жынмуди сыхур, Та ги жынму гили йигэ вынти:

– Виса нянжинжынму фэди Мэсихсы Давуди Хубый?

³⁶ Даву ба Анлахұди Рух жешуха, зу фэли:

«Анлахұ ги вэди Жонгуйди фэли:

„Ни зуэдо Вэди юбонгэ,

дынди Вэ ба Ниди дүшманму

эрдо Ниди жүэ дихани“».

³⁷ Даву гэжя ба Мэсих жёди «Жонгуйди», замужя Мэсихсы Давуди Хубый?

Эрса фэди ё щёцин нянжинжынмуни

(Мф 23:1-36; Лк 20:45-47)

Хошо жынму ду щихуанди тинли Эрсади хуали. ³⁸ Эрса жёнди фэли:

– Ниму ё щёцин нянжинжынмуни. Таму нэ чуан куан позы, зэ чынпуни лэ-чи зу, хан нэ жё жынму зэ гэшон ги таму фэ сэлямуни. ³⁹ Таму хан нэ зэ синагога литу зэмусы зэ янщишон зуэдо шонконзышонни. ⁴⁰ Таму ба гуафуму ज्याниди фугуй дёчёнди, хан нэ зэ жынмуди мянчян чончонди нян сур. Таму яндин шу ниннинди зуйни.

Йигэ нугуафуди нети

(Лк 21:1-4)

⁴¹ Эрса зуэдо Иерусалим сыди шу нетиди щёнщёнзы мянчян канлийихар, дажя замужя ба тамуди чян вон шу нетиди щёнщёнзы литу эрдини. Дуэдуэди ючянханму ба хошо чян эрдо щёнщёнзы литули. ⁴² Зыху лэли йигэ чүн

нүгуафу, ба лёнгэ лепта* (жыгэ бонжерсы йигэ кодрант**) е эрдо шёншёнзы литули. ⁴³Эрса жё Тади манламу лэ, зу ги таму фэди:

– Вэ ги ниму фэ шыхуа, жыгэ чүн нүгуафу эрдо шу гүрбани шёншёнзы литуди чян би данлинди йиче жынму ду дуэ. ⁴⁴Йинцысы данлинди жынму ду да гэжяди фугуйшон ба фуйүди чян жүчүлэли, жыгэ нүгуафу чүн еба, кэсы та ба гэжяди йиче гуонийинди жёфи ду ги Анлахү жүгили.

*Эрса ба Иерусалимди сы
вонху цыйдёди зозор фэли*

(Мф 24:1-2; Лк 21:5-6)

13 Эрса да Иерусалимди сыни чүлэди сыхур, Тади йигэ манла ги Та фэди:

– Вуста! Ни кан, са шыту, дуэму дади фон!

²Эрса ги та фэди:

– Ни ба жыщезы фонзы каншонлима? Вэ ги ни фэ шыхуа: жыгэ дифоншон ба йиче шыту ду цыйдёни, йигэ шыту зэ данлинди йигэ шытушон шынбуха.

*Эрса зозор фэ жынму замужя шу нан
зэмусы шу япыйни*

(Мф 24:3-14; Лк 21:7-19)

³Эрса зэ Елеон саншон, зэ Иерусалим сыди дуймян зуэди сыхур, Пётр, Ягүбэ, Йихия лян Андрей вынли Тали:

– ⁴Ни ги вэму фэйихар, жыщезы сычин са сыхур йүни? Ба жыщезы сычинди вонху йүди сыхур да сашон нын канлэ? Ю замужяди жихони?

⁵Эрса ги таму фэди:

– Ниму ё щёцинни, бэ жё жынму ба ниму линдо цуэ лўшонли. ⁶Хошо жынму ти Вэди минзы лэ фэни: «Вэ зусы Мэсих». Зу жымужя, таму ба хошо жынму линдо цуэ лўшонни. ⁷Ниму ба дажонди зэмусы жынжанди щинвын

* 12:42 *Лепта (грек йуян)* – жысы йигэ суй тунчян.

** 12:42 *Кодрант (латынь йуян)* – жысы йигэ дашерди тунчян.

тинжян, бә хәпали. Жыщезы сычин дусы яндин йүди, кәсы ба жыгә бу нын суанчын ахыр зәмани. ⁸Йигә минзү лян йигә минзү дажонни, йигә гуйжя лян йигә гуйжя дажонни. Хошо дифоншон ди дунни, жынму ду нә вәдүзыни. Жыщезы сычин зущән нүжын сын-ән вавади сыхур шу тынди йиән.

⁹Ниму гэжя ё щёщинни, йинцысы жынму ба ниму жуачү дин зуйни; ба ниму зә синагога литу дани; ви Вәди минзы ниму ё зандо жыгуанжынмуди дә хуоншонмуди мянчян дон гүвани. ¹⁰Кәсы жыгәди зочян ба Анлахүди Хо Шинвын ги йиче минзүди жынму яндин ё чуанжәни. ¹¹Жынму ба ниму жуачү дин зуйди сыхур, ниму бә данцин фә сани. Нәхур Анлахү ги ниму фә са, ниму зу фә сани, йинцысы ниму фәди нәщезы хуа бусы ниму гэжяди хуа, кәсы Анлахүди Рух зә нимуди вифыншон фәди хуа. ¹²Нәхур жынму ба гэжяди дищүнму мächүчини, жё таму вучонни, дада дуйчү вamu е жымужя ганни. Вamu е фанчелә, ба гэжяди нён-лозы дасыни. ¹³Йинви Вәди минзы дажя хын нимуни, кәсы сый жыннәдо йиршон, та ба гэжяди мин яндин жүхани.

Вадади кўнан

(Мф 24:15-28; Лк 21:20-24)

¹⁴Вонху ниму канжян йигә кәву-сынза дунщини; жыгә кәву-сынза дунщи зә занбудыйди дифоншон занни зәмусы ба Иерусалим чынпу далансандәни (нянди жын яндин ё дун жыгә хуади йисыни). Нәхур зә Яхүтиди дифоншон жүди жынму ё подо саншончини. ¹⁵Зә фондинзышон занди жынму бә халә до фонзыни чи чү гэжяди дунщичи. ¹⁶Зә тандони зү хуәди жынму бә хуэйжя чү тамуди йишончи. ¹⁷Нәжитян хуэвавади нүжынму лян нә вавади мама дуәму кәлян! ¹⁸Ниму ё чито Анлахүни, бә жё жыщезы сычин дунтян йүхали. ¹⁹Йинцысы зущән нәжитянди кўнан, да Анлахү зуэзоли дун-яди сыхур хан мә йүгуәни, вонху е бу йү. ²⁰Анлахү дан ба нәщезы кўнанди жызы вон дуанни бу зү, йигә жын ду бу нын хуә. Кәсы ви Та жянчүләди жынму Та ба нәщезы жызы кәжя дин дуанли.

²¹Жынму дан ги ниму фә: «Ниму кан, Мәсих зә жытарни! Мәсих зә нэтарни!», ниму бә шинфу тамуди хуали. ²²Йинцысы жя-мәсихму лян жя-шынжынму чүлэни, таму щян кэрамэтини зэмусы ган чёчи сычинни, дан ю нынгу ба Анлахү жянчүлэди жынму линдо цуэ лүшонни. ²³Ниму ё щёщинни! Вә ба йиче сычин ду ги ниму зозор фәли.

Аданди Хубый зә димяншон кә лэни

(Мф 24:29-31; Лк 21:25-28)

²⁴Нэщезы кўнанди жызы гуәли йиху, жәту чынха хидини, йүлән е бу щянчүлэ гуонлән, ²⁵щинцю да тяншон дехалэни, тяншонди лилән е дунтанни. ²⁶Нэхур жынму ба Аданди Хубый зә йүнцэшон лян Тади лилән дэ гуонлән до димяншон лэди канжянни. ²⁷Аданди Хубый ба Тади Тянщянму дафалэни, жё таму да дун-яди жыбонгә до дун-яди нэбонгә ба Та жянчүлэди жынму шудо Та гынчян лэни.

«Ниму ё да инжирфушон дый жётёни»

(Мф 24:32-35; Лк 21:29-33)

²⁸Ниму ё да инжирфушон дый жётёни: тади жыжыр ванди зэмусы щин еер жончүлэди сыхур, ниму зу жыдо щятян долэдыйли. ²⁹Лян жыгә йиён, ниму дан канчүлэ жыщезы сычин, ниму зу жыдони, нэгә сыхур куэ зу долэни, зущён зә мынчянту занди йиён. ³⁰Ниму ё жихани: жы йибыйзы жынму хан мә вучонди зычян, жыщезы сычин зу йүни. ³¹Тян дэ ди ду лансандёни, кәсы Вәди хуа йинавар ю жинни.

Сый ду бу жыдо нэгә сыхур дуэхур долэни

(Мф 24:36-44)

³²Сый ду бу жыдо нэгә жызы дэ нэгә сыхур дуэхур долэни: тяншонди Тянщянму ба жыгә е бу жыдо, Эрзы е бу жыдо, гуон Дада йигә жыдони. ³³Ниму канди, бә дюдунли, йинцысы ниму бу жыдо нэгә сыхур дуэхур долэни. ³⁴Зущён йигә жын зу наниди сыхур йиён, ба гэжя жяниди сычин ги хуәжиму жёги, жё таму гуанни: ги мый йигә жын ба тади хуә фынги жё зўни, зэмусы жё канмынди жын бә дюдунли. ³⁵Лян жыгә йиён, ниму е бә дюдунли, йинцысы

ниму бу жыдо нэгэ жяниди жонгуйди са сыхур хуэйлэни: хушонма, бан-енима, тян лёнди зычянма хуэйжэсы жэту чүлэди йиху. ³⁶Жонгуйди дан мынмынди хуэйлэ, бэ жё Та ба ниму фижуэди канжянли. ³⁷Вэ ги ниму фэди хуа ги да-
жя е фэдини: ниму бэ дюдунли.

Яхүтиди да ахунму вонщёнди ба Эrsa дасыни

(Мф 26:1-5; Лк 22:1-2; Йих 11:45-53)

14 Яхүтиди Пасха лян чы мөю жёмян мэмэ жечиди зо лёнтян, яхүтиди да ахунму лян нянжинжынму вонщёнди сы йигэ жянчө, ба Эrsa жуачү, ги Та дин сызуйни. ²Таму фэди:

– Заму зэ гуэ жечиди сыхур бэ ган жыгэ сычин, бэ жё жынму фанчелэли.

*Йигэ нүжын ба Эrsa
на щён-ю мәли*

(Мф 26:6-13; Йих 12:1-8)

³Эrsa зэ Вифания щёнжуонни, зэ Шимэ жяни донли кили (нэгэ Шимэ зочян хэли мафынбинли). Нэхур йигэ нүжын нади жычянди пинзы лэли, литу гуанди жыншы-ди гуйжунди щён-ю. Нэгэ нүжын ба жыгэ пинзы далан, ба щён-ю мөдо Эrsaди тушонли. ⁴Нэтарди жигэ жын йинви жыгэ нүжынди ганбан ду чишонлэли, йигэ ги йигэ фэди:

– Виса жымужа лонфи щён-юдини? ⁵Жыгэ щён-ю нын мэ санбый дуэ йинчян, ба жыщезы чян дан ги чүнжынму санги дуэму хо!

⁶Кэсы Эrsa фэди:

– Ниму бэ дажё тали! Ниму виса винан тадини? Жыгэ нүжын ви Вэ ганли йигэ хо сычин. ⁷Йинцысы чүнжынму йинавар лян ниму зэ йидарнини, ниму дансы юли щинжинли, ниму са сыхур ду нын ги таму бонмон. Кэсы Вэ йинавар лян ниму бу нын зэ йидарни. ⁸Жыгэ нүжын нын ган сали, зу ганли сали. Та ба жыгэ щён-ю мөдо Вэди шыншон, йинцысы та цошинди ба Вэди шынзы зозор шөлүди сундэли. ⁹Вэ ги ниму фэ шыхуа: зэ чүан дун-яшон,

ба Анлахүди Хо Шинвын булун садо нагэ дифоншон еба, жыныму ду фэ жыгэ нүжын ганхади сычинни, жысы йинви жинян тади.

Жүхүти щён ба Эрса ги да ахунму мэгини

(Мф 26:14-16; Лк 22:3-6)

¹⁰ Эрсади шыэргэ манламу литу ю йигэ жынлэ, минзы жёди Жүхүти Искарriot, та до да ахунму гынчян лэ, щён ба Эрса ги таму мэгини. ¹¹ Ахунму ба жыгэ хуа тинчян гошинзали, зу ги Жүхүти ба йинчян щүхали. Да нэгэ сыхур Жүхүти дынли фонбян сыхурли, щён ба Эрса ги таму мэгини.

***Эрса лян Тади манламу
чыли Пасха жечи хушонди фанли***

(Мф 26:17-25; Лк 22:7-14; 21-23; Йих 13:21-30)

¹² Чы мэю жёмян мэмэ жечиди туйитян, зусы ба яхүтиди Пасха жечиди ёнгозы зедёди нэйитян, манламу зу вынли Эрсали:

– Ни жё вэму до натар чи, ба Пасха жечи хушонди фан ги Ни шөлүхани?

¹³ Эрса ба Тади лёнгэ манла дафачи, зу ги таму фэди:

– Ниму вон чынпуни чи, нэтар ниму пынжян йигэ жынни, нэгэ жын нади йигуанзы фи, ниму зу ба та гыншончи. ¹⁴ Нэгэ жын дан жин нагэ фонзы, ниму зу ба нэгэ фонзыди жонгуйди вынйихар: «Вэмуди Вуста фэди: „Вэ лян Вэди манламу ё чы Пасха жечи хушонди фанни; нэйижян дэ киди фонзы зэ натарни?“» ¹⁵ Нэгэ жын ба пуха хуатанди куанжан дэ киди фонзы ги ниму зыгини. Ниму зу зэ нэтар ги заму ба йиче ду шөлүха!

¹⁶ Лёнгэ манла чүчили. Таму жинли чынпуни, канжян йиче сычин Эрса замужя фэли, нэмужя зу йүли. Таму зу зэ нэтар ба яхүтиди Пасха жечи хушон чыди фан шөлүхали.

¹⁷ Хушон, Эрса лян Тади шыэргэ манламу лэли. ¹⁸ Таму зуэха чыфанди сыхур, Эрса ги таму фэди:

– Вэ ги ниму фэ шыхуа, ниму литу ю йигэ лян Вэ йидарни чыфанди жынни, та ба Вэ мэчүчини.

¹⁹ Таму ду юцухали, йигэ гын йигэ вынли Эрсали:

– Жы бусы вэма?

²⁰ Эрсa ги таму хуэйдади фэсы:

– Жыгэ жынсы ниму шыэргэ литуди йигэ; тасы лян Вэ йидарни зэ дезыни занди чы мэмэди жын. ²¹ Вэ, Аданди Хубый, зущён Китабушон щехади йиён, ё шу кунанни; кэсы ба Аданди Хубый мэчүчиди нэгэ жын тэ кэлянди-хын! Ги нэгэ жын би мэ сын-ёнхади хощер!

Эрса лян манламу чыли хушонди фанли

(Мф 26:26-30; Лк 22:14-23)

²² Таму чыфанди сыхур, Эрсa ба йигэ мэмэ начелэ, ги Анлахү долигэ ще, йиху ба мэмэ быйкэ, ги манламу фынги, фэди:

– Ниму чы! Жыгэсы Вэди Жути.

²³ Йиху Та ба йи ванванзы путожю начелэ, ги Анлахү долигэ ще, йиху е ги манламу гигили. Таму ду да жыгэ ванванзыни хэли. ²⁴ Эрсa ги таму фэди:

– Жысы Вэди Ще: на жыгэ Ще Анлахү лян жынму динли хэтунли. Жыгэ Щесы ви хошо жынму тонхади Ще. ²⁵ Вэ ги ниму фэ шыхуа, Анлахү тяншонди Гуйжя лэди нэйитянди зычян, Вэ бу хэ жыгэ путожю. Нэхур Вэ хэ щин путожюни.

²⁶ Таму ба куажён чүзы чонба чүлэ, вон Елеон саншон зудёли.

Эрса ба Пётр фанлянди зозор фэли

(Мф 26:31-35; Лк 22:31-34; Йих 13:36-38)

²⁷ Эрсa ги таму фэди:

– Йиху ниму ду ба Вэ бу жын, зущён Китабушон щехадиди йиён: «Вэ ба фон-ёнди жын дасыни, ёнчүн сандёни».

²⁸ Мэгуэсы кэ хуэлиди йиху, Вэ зэ нимуди туни до Галилея дифоншонни.

²⁹ Пётр ги Эрсa фэди:

– Напа данлинди жынму ду фанлян бу жын Ни, вэ йүнзун бу фанлян!

³⁰ Эрсa ги Пётр фэди:

– Вэ ги ни фэ шыхуа, жиргэ йивэщи гунжи жё ди эрбянди зочян, ни сан бян фэ жынбудый Вэни.

³¹ Пётр йүәщин ниннинди фәди:

– Жә вә лян Ни йидарни вучонни еба, вә хан бу фә, жынбудый Ни!

Данлинди манламу ду е зу жымужя фәли.

Эрса зә Гефсимания фуйүанни читоли Анлахүли

(Мф 26:36-46; Лк 22:39-46)

³² Таму доли йигә дифоншонли, жәдисы Гефсимания. Эрса ги манламу фәди:

– Ниму зә жытар зүәйхар, дынди, Вә чито Анлахүчини.

³³ Та лян Пётр, Ягүбә дә Йихия йидарни зудәли. Эрсади щинни фа юцули зэмусы пәфанхали. ³⁴ Та ги манламу фәди:

– Вәди щинни пәфандихын, зушәнсы Вә вучондыйли. Ниму шындо жытар, кәсы бә дюдунли!

³⁵⁻³⁶ Эрса вон чян зули жи бу, падо дишонли, чито Анлахү фәди:

– Абба*, Вәди тяншонди Ада-я! Вә ба вонхуди бәля нын дуәдәма? Ни ба са сычин ду нын ганни. Вә чито Ни ба жыгә кұнан, зушән йиван кұфи йиён, да Вәди мянчян нагуәчи! Кәсы Ни бә жочү Вәди вонщән ган; Ни жочү Ниди вонщән ган.

³⁷ Та зугуәлә, ба сангә манла фижуәди канжянли. Эрса ги Пётр фәди:

– Шимә! Ни фижәдинима? Ни йигә сышынди литу бә фижә будуйма? ³⁸ Ниму бә дюдунли зэмусы хан ё чито Анлахүни, щёщинди, ниму бә шон иблисди донли. Нимуди жиншын жешы, кәсы шынзы мәю личи.

³⁹ Эрса зугуәчи, йүанхуэй ба чито Анлахүди хуа кә тифәли йибян. ⁴⁰ Йиху Эрса йүанхуэй доли манламуди нәтар лә, ба таму хан фижәди канжянли. Манламу ба гэжяди нянжин зынбукә, е бу жыдо ги Эрса фә са хуани.

⁴¹ Эрса ди санбян зугуәлә, ги таму фәди:

– Ниму хан фижәдинима? Хан хуандинима? Гули, сыхур доли, ба Аданди Хубый ги югүнахар жынму вон

* 14:35-36 *Абба (арамей йүян)* – Дада.

шуни жёгидини. ⁴²Челэ, заму зу! Ниму кан, ба Вэ мэчү-ди нэгэ жын лэли!

Ба Эрса жуачүли

(*Мф 26:47-56; Лк 22:47-53; Йих 18:2-12*)

⁴³Эрса хан фэхуади сыхур, шыэргэ манламу литуди йигэ, минзы жёди Жүхүти, лэли. Йибазы жын лян та йидарни нади до дэ бонзы лэли. Тамусы яхүтиди да ахунму, нянжинжынму лян ложынму дафа лэди жын. ⁴⁴Нэгэ мэ Эрсади жын зочян ё ги таму ги йигэ жихони; та фэди:

– Вэ ба сый щинтынли, Нэ зусы ниму ёди Жын. Ниму ба Та ниннинди жуачү, йиху нашон зу.

⁴⁵Жүхүти хуонхуон-монмонди до Эрса гынчян лэ, ги Та фэди:

– Вуста!

Зу ба Та щинтынлийиха.

⁴⁶Нэшезы жынму ба Эрса жуачүли. ⁴⁷Чянту занди жынму литу ю йигэ жынлэ. Та ба до начүлэ, ба яхүти да ахунди хуэжи канлийихар, зу ба тади йигэ эрдүэ кандёли. ⁴⁸Эрса ги таму фэди:

– Ниму нади до дэ бонзы лэ, щён ба Вэ, зущён зыйку йиён, жуачүнима? ⁴⁹Вэ мый йитян зэ Иерусалимди сы литу зэ ниму донжунни жётё жындини, ниму ба Вэ мэ жуа. Кэсы Китабушон щехади хуа яндин чынхани.

⁵⁰Нэхур манламу ду да Эрса гынчян подёли.

⁵¹Йигэ щёхуэр гыншон Эрса зудини, шыншон гуон пыйди йикуэзы мабу. Жынму щён ба та жуачүни. ⁵²Кэсы та ба нэ йикуэзы мабу эрдё, жинжирди подёли.

Яхүтиди да ахунму ги Эрса динли сызуйли

(*Мф 26:57-68; Лк 22:54-55, 63-71; Йих 18:13-14, 19-24*)

⁵³Таму ба Эрса линдо йигэ да ахун гынчянли. Йиче яхүтиди да ахунму, ложынму лян нянжинжынму ду шудо нэтарли. ⁵⁴Пётр лойүанни гыншон Эрса зудини, доли яхүти да ахунди йүанзыни, зэ хуэжиму донжунни зуэха коли хуэли. ⁵⁵Яхүтиди да ахунму зэ годын шонлён хуэйишон вонщёнди зо йигэ йинийр ги Эрса дин сызуйни, кэсы таму ба

жымугэди йинйир мæ зошон. ⁵⁶Хошо жя гўва лэ фэли фандуй Эрасади хуали, кэсы тамуди хуа йигэ бу щён йигэ.

⁵⁷Йиху жигэ жя гўва занчелэ, фандуй Эраса фэди:

– ⁵⁸Вэму тингуэ Та фэли: «Вэ ба жыгэ лян жынмуди шу щюгэхади Иерусалимди сы цыйдэ, сан тьян йиху ба данлинди йигэ, бусы лян жынмуди шу щюгэхади гэчелэни».

⁵⁹Кэсы тамуди жыгэ хуа е йигэ бу щён йигэ. ⁶⁰Яхўтиди да ахун зэ дажяди лянмянчян занчелэ вынли Эрасали:

– Таму фандуй Ни фэди жыщезы хуа. Ни виса бу ги хуэйда?

⁶¹Эраса йишын ду мæ чў, йигэ хуа е мæ фэ. Яхўтиди да ахун кэ вынли Тали:

– Нисы Мэсихма? Нисы куажёнхади Анлахўди Эрзыма?

⁶²Эраса хуэйдади фэсы:

– Вэ зусы Та! Ниму ду канжяни: Аданди Хубый зуэдо Анлахўди юбонгэни. Та зэ тьяншонди йўнцэшон долэни!

⁶³Яхўтиди да ахун ба гэжяди йишон чэди фэсы:

– Заму зэ бу ё данлинди гўвали! ⁶⁴Ниму гэжя ду тинжанли, Та дэцэли Анлахўли. Ниму фэ, заму ё ган сани?

Таму ду фэди, ги Эраса ё дин сызуйни.

⁶⁵Жыгэ йиху ющезы жынму ги Эрасади ляншон тўли тўмэли, ба Тади лян мынчў, лян чуйту ба Эраса дали, зу вынли Тали:

– Шынжын! Ни цэйихар, сый да Нидини?

Нэщезы хуэжиму е ба Эраса лян бажон дали.

Пётр фанлян бу жын Эрасали

(Мф 26:69-75; Лк 22:56-62; Йих 18:15-18, 25-27)

⁶⁶Нэгэ сыхур Пётр хан зэ йўанзынилэ. Яхўтиди да ахунди йигэ нү хуэжи лэ, ⁶⁷канди Пётр зэ жытар кохуэдини, зу лян нянжин динди ги Пётр фэди:

– Ни есы лян Назарет чынпуниди Эраса йидарни лэди йигэ жын!

⁶⁸Пётр ба жыгэ бу жынди фэди:

– Вэ бу жыдо, е бу дун ни фэди са.

Йиху Пётр доли чянмянди йўанзынили. Жыгэ сыхур гунжи кэжя жэли йибян минли.

⁶⁹ Гуэли йихур нэгэ нү хуэжи канжян та, йүанхуэй ги та гынчян занди жынму фэди:

– Жыгэ жынсы Эрсади манламу литуди йигэ!

⁷⁰ Кэсы Пётр кэ ба жыгэ мө жын.

Гуэли йихур зэ та гынчян занди жынму йүанхуэй ги Пётр фэди:

– Ни шызэ зусы Эрсади манламу литуди йигэ, йинцысы ни есы Галилея дифоншонди жын!

⁷¹ Пётр зу хынхынди дү жуди фэди:

– Ниму фэди нэгэ Жын вэ жынбудый!

⁷² Жыгэ сыхур гунжи кэжя жёли ди эрбян минли. Пётр жыхур цэ ба Эрса ги та фэхади хуа жичелэли: «Гунжи жё ди эрбян минди зочян, ни сан бян фэ жынбудый Вэни». Пётр мө жынчүди күтуэли.

Эрса зэ Пилат мянчяни

(Мф 27:1-2, 11-14; Лк 23:1-5;

Йих 18:28-38)

15 Ди эр тян ганзо йизор, яхүтиди да ахунму донвөр лян ложынму, нянжинжынму дэ годын шонлён хуэйи йидарни толүнли, динли дян ба Эрса бончү, ги Пилат гигили. ² Пилат вынли Эрсали:

– Нисы яхүти жынмуди Хуоншонма?

Эрса ги та хуэйдади фэсы:

– Жысы ни фэхади хуа.

³ Яхүтиди да ахунму ги Эрса золи хошо цуэ, фандуйли Тали. ⁴ Пилат кэ вынли Эрсали:

– Ни кан, таму фэли дуэшо фандуй Ниди хуа. Ни виса бу ги хуэйда?

⁵ Эрса йишын ду мө чү. Пилат чёчихали.

Ги Эрса динли сызуйли

(Мф 27:15-26; Лк 23:13-25;

Йих 18:39-19; 16)

⁶ Мый йихуэй яхүтиди Пасха жечиди сыхур, Пилат жочү жынмуди чито да банфонзыни ё фонкэ йигэ зуйжынни. ⁷ Нэхур ю йигэ жынлэ, минзы жёди Варавва; ба та

лян данлинди жигэ фанпан йидарни ядо банфонзынили, йинцысы таму зофанди сыхур ба жын дасыли. ⁸Жынму шудо йидарниди сыхур, читоди жё Пилат ги таму ган та сўчон ганди сычинни. ⁹Пилат вынли тамули:

– Ниму щён жё вэ ба яхўти жынмуди Хуоншон ги ниму фонкэнима?

¹⁰Пилат жьдони, яхўтиди да ахунму нянжэди йимяр, ба Эрса ги та гигили.

¹¹Кэсы яхўтиди да ахунму ба жынму ханчелэ, жё таму чито Пилат ги таму ба Варавва фонкэни. ¹²Пилат йўанхуэй вынли жынмули:

– Ниму жё вэ ги нэгэ Жын (ниму ба Та жёди «яхўти жынмуди Хуоншон») зў сани?

¹³Таму йўанхуэй дашын ханди:

– Ни ба Та диндо муту шызышон!

¹⁴Пилат вынли тамули:

– Та ганли са буходи сычинли?

Таму йўэшин дашын ханди:

– Ба Та диндо муту шызышон!

¹⁵Пилат щён жё жынму разыни, зу ги таму ба Варавва фонкэли. Та гиди фынфу, жё ба Эрса на бязы дани, йи-ху ги жынму гиги, жё ба Эрса диндо муту шызышонни.

Донбинди жынму зотали Эрсали

(Мф 27:27-31; Йих 19:2-3)

¹⁶Донбинди жынму ба Эрса линдо жынфуди йўанзы литу, жё дуйву йиман шудо жытарли. ¹⁷Таму ги Эрса ба йигэ хун янсыйди позы чуаншонли, на цыязыди тэзы бянли йигэ чўанчўанзы ги Та дэдо тушонли. ¹⁸Йиху дэ вынхуди ги Та фэди:

– Яхўти жынди хуоншон, Ни хома!

¹⁹Таму на йигэ ши бонбонзы ба Эрсади ту дади, ги Тади ляншон тўли тўмэли, гуйдо Тади мянчян бэвон Тали.

²⁰Таму ба Эрса зоталиди йиху, ба хун янсыйди позы да Тади шыншон тўэхалэ, ба Тади йишон ги Та кэ чуаншонли, йиху ба Эрса нашон зудэли, щён ба Та диндо муту шызышонни.

Ба Эрса диндо муту шызышонли

(Мф 27:32-44; Лк 23:26-43; Йих 19:17-27)

²¹Лұшон донбинди жынму пынжанли йигә жың, минзы жёди Шимэ, тасы Киринея дифоншонди жың, тасы Ис-кандер дә Руфьди дада. Шимэ да щёнжуонни хуэйлэди сы-хур, донбинди жынму гўди жё та ба дин Эрсади муту шы-зы быйшонни. ²²Таму ба Эрса линдо йигә дифоншонли, жыгә дифон жёдисы Голгофа (йисысы «Тукәлон дифон»). ²³Нэтар донбинди жынму ги Эрса гилищер лян жытыңди йүөцо похади путожоу, жё Та хәни. Кәсы Эрса мә хә. ²⁴Та-му ба Эрса диндо муту шызышонди сыхур, жуали чирли, сый ба Тади йишон ги гэжя фынкә нашонни. ²⁵Ганзо, жү-гә сышыншон, таму ба Эрса диндо муту шызышонли. ²⁶Ба Тади сызуй зэ банбанзышон жымужя щеддини:

«Тасы яхўти жынмуди Хуоншон».

²⁷⁻²⁸Зу нэгә сыхур таму хан ба лёнгә зыйку лян Эрса йиён е диндо данлинди лёнгә муту шызышонли, ба йигә диндо Эрсади юбонгәли, ба ди эргә диндо Тади зуэбонгәли. ²⁹Гуә нэгә дифонди жынму чуашёли Эрсали. Таму ба ту ёди фёди:

– Хэ! Ни фәгуә, Ни ба Иерусалимди сы цыйдө, сан тяң йиху ба та йүанхуэй щюгэшонни. ³⁰Наму Ни хазыр зу да муту шызышон халэ, ба гэжяди мин жүха!

³¹Яхўтиди да ахунму лян нянжинжынму е жымужя зота-ли Эрсали, йигә ги йигә фёди:

– Та ба данлинди жынму ду жүхали, кәсы ба гэжяди мин жүбуха! ³²Мәсих! Израилди хуоншон! Ни хазыр зу да муту шызышон халэ, жё вәму ба жыгә канйихар, нэхур вә-му цэ щинфу Нини!

Лян Эрса йиён диндо муту шызышонди жынму е мали Тали.

Эрсади вучон

(Мф 27:45-56; Лк 23:44-49; Йих 19:28-30)

³³Шонвуди сыхур, хинан ба чүан диже зонянли, зу жы-мужя гуәли сангә сышынли. ³⁴Гуәли сангә сышынди йиху, Эрса дашын ханди:

– Элои! Элои! Лема савахтани?

Жыгэди йисысы: «Вэди Анлахү! Вэди Анлахү! Ни виси ба Вэ лөхали?»

³⁵ Зэ Та гынчян занди жынму ба жыгэ тинжян, фэди:

– Ниму тинйихар, Та хан Илиясдини!

³⁶ Йигэ жын погуэчи, ба йигэ бубузы на цү сынли, бондо ганзышон, надо Эрсади зуй гынчян, фэди:

– Дынйихар, вэму кан, Илияс дансы лэ ба Та да муту шызышон чүхалэнима?

³⁷ Эрса дашын ханли йишын, зу дуанли чили.

³⁸ Жыгэ сыхур зэ Иерусалимди сы литу гуади булянзы мынмынди да готу до диха чэлан, фынчын лён бангэзыли.

³⁹ Зэ муту шызы чянтү занди йигэ жүнгуан канжян Эрса жымузя дашын ханди вучондөли, та фэли:

– Жыгэ Жын шызэсы Анлахүди Эрзы!

⁴⁰ Ли жыгэ вөр лойуанни занди жигэ нүжын ба жыгэ сычин е канжянли. Таму литу ю Магдала дифоншонди нүжын Мариам, хан ю йигэ Мариамни (тасы шё Ягүбэ лян Иосияди мама) зэмусы йигэ нүжын, тади минзысы Саломия.

⁴¹ Эрса зэ Галилея дифоншонди сыхур жышезы нүжынму ду гыншон Та зуди фусыли Тали. Хан ю хошо данлинди лян Эрса йидарни доли Иерусалим чынпуниди нүжынни.

Ба Эрсади мэти сундөли

(Мф 27:57-61; Лк 23:50-56; Йих 19:38-42)

⁴²⁻⁴³ Хушон, Аримафея шёнжуонниди йигэ жын, Юсуф, лэли. Тасы йигэ ю миншынди жын, годин шонлён хуэййиди йуан. Та ба Анлахү тяншонди Гуйжя е дындини. Нэ йитянсы жўма, ги шанбэ шөлүди туйитян. Юсуф ба данзы фонда, доли Пилат гынчян, читоди жё Пилат ба Эрсади мэти ги та гигини. ⁴⁴ Пилат тинжян Эрса кэжя вучонли, та чёчихали. Та ба жүнгуан ханлэ, вынли:

– Эрса кэжя вучонлима?

⁴⁵ Ба жүнгуан фэхэди хуа тинжян, Пилат зу ба Эрсади мэти ги Юсуф гигили. ⁴⁶ Юсуф мэли йикуэзы мабу, ба Эрсади мэти да муту шызышон чүхалэ, на нэ йикуэзы мабу ба Та гуэчүли, йиху сундо саншон тохади йигэ ёдуннили. Та ба йигэ шыту гундилэ, диндо ёдун мын

чянтули. ⁴⁷Магдала дифоншонди Мариам лян Иосияди мама Мариам канли, ба Эрса сундо нагэ дифоншонли.

Эрса кэ хуэли

(Мф 28:1-8; Лк 24:1-12; Йих 20:1-10)

16 Шанбэди нэйтян гуэли, Магдала дифонди Мариам, Иосияди мама Мариам лян Саломия ба щён-ю мэшон, чи щён ба Эрсади мэти мэйихарни. ²Екшанбэди нэйтян ганзо йизор, жэту жён чүлэди сыхур, таму зу жочү ёдун зули. ³⁻⁴Зэ лүшон тамуди шинни сйлэнди:

– Сый ги вэму бонйихар, ба ёдун мын чянтуди шыту гунгуэчини?

Йинцысы нэсы йигэ да шыту. Кэсы таму йиканса, дыйдо сый ба нэгэ шыту кэжя гунгуэчили. ⁵Таму вон ёдунни жинди сыхур, ба йигэ щёхуэр канжянли, та зэ ёдунди юбонгэ зуэдини, чуанди бый янсыйди куан позы. Ба таму ду хали йитё.

⁶Нэгэ щёхуэр фэди:

– Ниму бэ хэпали! Вэ жыдони, ниму зо диндо муту шызышонди Назарет чынпуниди Эрсадини. Та мэ зэ жытар, Та кэ хуэли! Ниму кан, жысы гэха Та мэтиди дифон. ⁷Ниму куэкуэди чи ги Пётр дэ Эрсади данлинди манламу фэйихар, Эрса зэ нимуди туни до Галилея дифоншонни. Нэтар ниму лян Та йүмянни, зущён Та ги ниму зочян фэхади йиён.

⁸Нүжынму ду чёчихали зэмусы хэли пали. Таму хуонхуон-монмон да ёдун литу чүлэ, подёли. Таму ба жыгэ сычин ги данлинди жынму мэ фэ, йинцысы таму хэпадихын.

Манламу ба Эрса канжянли

(Мф 28:9-10, 16-20; Лк 24:13-49;

Йих 20:11-23; Ап 1:6-8)

⁹Екшанбэди нэйтян ганзо йизор, Эрса кэ хуэли. Та шянтуну доли Магдала дифоншонди Мариамди мянчанли (Эрса зочян да нэгэ нүжын кэлон литу ба чигэ гуй ганчүчили). ¹⁰Нэгэ нүжын пошон лэди сыхур, гыншон Эрса зуди жынму ду фа юцудини, күди тон нянлуйдини. Нэгэ нүжын ба йиче сычин ги таму ду фэли. ¹¹Кэсы таму ба Эрса

кә хуәли зэмусы Мариам ба Та жянлиди хуа тинжян, мө щинфу.

¹² Жыгәди йиху, лөнгә вон щёнжуонни зуди манла жянли Эрсали. Та на данлинди ёншы ләли. ¹³ Таму хуэйлэ ги данлинди манламу ба жянхади ду фәли. Кәсы дажя хан мө щинфу таму.

¹⁴ Линйирни, шыйигә манла чыфанди сыхур, Эрса ләли. Эрса ба таму мали, виса таму мәю щинфу, виса тамуди щин ниндихын, виса таму мө щинфу жынму жянли Та кә хуәлиди хуали. ¹⁵ Эрса ги таму фәди:

– Ниму до дун-яди мый йигә дифоншон чи, ба Анлахүди Хо Щинвын ги йиче жынму ду чуанжөчи. ¹⁶ Нагә жын дан щинфу, йиху ба та ви Анлахү зә фи литу щини, нэхур ба тади мин жюхани. Нагә жын дан бу щинфу, ги та дин зуйни. ¹⁷ Щинфуди жынму ю шян кэрамәтиди бынсыни: таму на Вәди минзы ба зонгуй ганчүчини, таму фә щин йүянди хуани, ¹⁸ ба чончун лян гэжяди шу жуачүни; дан хәли носы жынди дүйүәли, бу шу хә; таму ба шу гәдо бинжынмуди шыншон, ба тамуди бин канхони.

Эрса шонли тянли

(Лк 24:50-53; Ап 1:9-11)

¹⁹ Эрса Жонгуйди ба жыщезы хуа ги таму фәван, шонли тянли, зуәдо Анлахүди юбонгәли. ²⁰ Манламу зули, ба Анлахүди Хо Щинвын зә мый йигә дифоншон чи чуанжөли. Жонгуйди ги таму гиди бонцу, лян йиче щянчүләди кэрамәти ба таму чуанжөхади хуа жунчынли.





ЛУКА ЩЕХАДИ ИНЖИЛ

Хуатур

1 Гуйжунди Феофил, ни хома!
Ни жydони, хошо жынму ба вэму донжунни йухади сычын кэжя шегуэ. ²Таму щехади богосы жочў нэщезы датур лян гэжyди нянжин жанха жыщезы сычинди жынму зэмусы зочян чуанжё жыгэ хо щинвынди жынму, щехади. ³Вэ ба жыщезы сычин ду датур щищин-щийиди е цали. Йинви жыгэ вэ щён ба йигэ суй йигэди сычин ги ни ду щейихарни, ⁴жё ни жыдоха, ни щищўехади жёщўэсы жыншыди.

Ба Йихия шынжынди сын-ён зозор фэли

⁵Ирод хуоншон гуан Яхўти гуйжyди сыхур, ю йигэ яхўтиди ахунлэ, минзы жёди Закария. Тасы Авия ахун банзыди жын. Тади пэе жёдисы Елизавета, тасы Харунэ шынжынди хубый. ⁶Таму лёнгэр зэ Анлахўди лянмянчян дусы гундожын, таму ба Анлахўди йиче фынфу дэ минлин ду зунхўдини, лёнгэр дусы мэцуэди. ⁷Таму мёю ваму; йинцысы Елизавета бу нын сын-ён, лёнкузы е лоли.

⁸Йихуэй Закарияди банзы лэди сыхур, Закария зэ Анлахў мянчян ганли яхўти ахунди гунсыли. ⁹Та жочў яхўти ахунди куйчын жуали чирли, йиху жинли Иерусалимди Анлахўди сыни, зэ нэтар дянли щёнли. ¹⁰Та дян щёнди сыхур, хошо жынму ду зэ вэту бэли Анлахўли. ¹¹Мынмынди Анлахў дафади Тянщян зандо дян щёнди дифонди

юбонгэли. ¹² Закария ба та канжян, хэли пали. ¹³ Кэсы нэгэ Тянщян ги та фэди:

– Закария, ни бэ хэпали! Анлахү ба ниди чито тинжян-ли. Ниди пэе Елизавета ги ни сын-ён йигэ эрвазыни, ни ё ги та нан йигэ минзыни, жыгэ минзысы Йихия. ¹⁴ Ни вонху гошинни; хошо жынму ба ниди эрвазы сын-ёнхади жыдо е гошинни. ¹⁵ Та зэ Анлахүди лянмянчан чынха йигэ видади жынни; та ба путожю дэ быйжю е бу хэ; та зэ мамади дўзыниди сыхур, зу ба Анлахүди Рух жешухани. ¹⁶ Ниди эрзы жё хошо Исраилди жынму жочү тамуди Жонгуйди Анлахү жуангуэлэни. ¹⁷ Та зудо Жонгуйди чян-туни зэмусы, зушён Илияс шынжын йиён, ю жиншын дэ лилённи. Ниди эрзы жё дадаму лян ваму донжунни ю тэ-пинни, жё бу тин Анлахү хуади жынму жуангуэлэ зудо гундожынди лўшонни; та ги минжын бонмонди жё ба Жонгуйди жешухани.

¹⁸ Закария ги нэгэ Тянщян фэди:

– Вэ да са сычиншон ба жыгэ нын жыдоха? Вэ кэжя ло-ли; вэди пэе е лоли.

¹⁹ Тянщян ги та фэди:

– Вэсы зэ Анлахү мянчан занди Жэбраил Тянщян; Анлахү ба вэ дафалэ, жё вэ ги ни фэ хуани, ба жыгэ хо щинвын ги ни фэгини. ²⁰ Йинцысы ни мэ щинфу вэди хуа, ни чынха йигэ ябани. Сыхур дони, вэ фэхади жыгэ вавади сычин яндин йүни; жыгэ сычин йүди зочян ни бу нын фэхуа.

²¹ Жыгэ сыхур, жынму дын Закариядини, ду бу минбый виса та жыму дади гунфу шындэ Иерусалимди сы литу-дини. ²² Закария чўлэди сыхур, чынли ябали. Жыхур жынму минбыйли, Закария зэ Иерусалимди сы литу кан-жянли чёчи сычинли. Закария бу нын фэхуа, гуон ги да-жя дянли тули.

²³ Та зэ Иерусалимди сыни ба тади гунсы ганван, хуэйли жяли. ²⁴ Гуэли житян, тади пэе Елизаветади дўзыни хуэйли вавали; та вугэ йүэ мэ чў мын. ²⁵ Елизавета фэди:

– Жыхур Анлахү ги вэ ганли жыму ходи сычинли, Та щинванди канжян вэли, бу жё вэ зэ жынму гынчан хэщю.

Ба Эрасди сын-ён зозор фэли

²⁶ Елизаветади дўзыни хуэйли вава люгә йүәди сыхур, Анлахү дафачиди Жэбраил Тянщян доли Галилея дифоншонди йигә чынпунили (жыгә чыпсу жәдисы Назарет). ²⁷ Та ёжян йигә гүнәнни, минзы жәди Мариам. Нәгә гүнән лян Давуди йигә хубый кәжә динли хунли; жыгә жынди минзы жәди Юсуф. ²⁸ Тянщян до Мариам гынчян лә фәди:

– Хома! Анлахү ба ни жанчүлэли! Та лян ни зә йидарни!

²⁹ Мариам ба жыгә хуа тинжан, тә бу нанвынли, та сыләнди, жыгә вынху ю са йисыни? ³⁰ Тянщян ги та фәди:

– Мариам, ни бә хәпали, йинцысы Анлахү ба ни жанчүлэли. ³¹ Ниди дўзыни хуә Вавани, йиху сын-ён йигә Эрвазыни. Ни ги Та нан йигә минзыни, жәди Эрас. ³² Та чынха видади Жынни, ба Та жә вида Анлахүди Эрзыни. Анлахү жә Та зүәдо Тади лозы Даву хуоншонди вифыншонни. ³³ Та йинавар чынха Ягүбә хубыйди хуоншонни; Тади хуоншонди чүанли йүнзун бу ван.

³⁴ Мариам ги Тянщян фәди:

– Вә хан мә чү жяни, йинви жыгә ни фәхади сычин замужя йүни?

³⁵ Тянщян ги та хуэйдади фәсы:

– Анлахүди Рух халә, луәдо нишонни зәмусы вида Анлахүди лилән, лян йинйинзы йиән, ба ни гәчүни. Йинви жыгә ба йиху сын-әнхади, Анлахү жанчүләди жыгә Вава жә Анлахүди Эрзыни. ³⁶⁻³⁷ Ни кан, ниди чинчин Елизавета кәжә лолли, жынму зочян фәгуә та бу нын сын-ён вава, кәсы та дўзыниди вава кәжә люгә йүәли, йинцысы Анлахү са сычин ду нын ган.

³⁸ Мариам фәди:

– Вәсы Анлахүди нү. Вә панвонди жә ни фәхади сычин зә вәшон яндин чынни.

Тянщян зу да Мариам гынчян зүдәли.

Мариам зәмусы Елизавета

³⁹ Нәжитян Мариам челә, хуонхуон-монмонди вон сан дифоншон зуди, доли Яхүти йигә чынпунили. ⁴⁰ Та жинли

Закарияди жяни, ги Елизавета фэлигэ сэляму. ⁴¹⁻⁴² Елизавета тинжян Мариам вынху тади сыхур, тади дўзыниди вава зу дунтанли. Елизавета ба Анлахўди Рух жешуха, дашын ханди:

– Ни зэ данлинди нўжынму литу дин ю берекетиди! Ниди дўзыниди Вава е ю берекетини! ⁴³ Вэ Жонгуйдиди мама замужя кан вэ лэли? ⁴⁴ Вэ тинжян ни вынхуди сыхур, вэди дўзыниди вава зу гошинди дунтанли. ⁴⁵ Йинцысы ни шинфули Анлахў ги ни фэхади хуа яндин чынни, ни дуэму гошин!

Мариам куажёнли Анлахўли

⁴⁶ Мариам фэди:

– Вэди шин куажён Анлахўдини;

⁴⁷ Вэди жиншын тэ гошиндини,
йинцысы Анлахў жүли вэди минли;

⁴⁸ йинцысы Та ба вэ, Тади дижянхади нў, жичелэли.
Да жиргэ дашон, мый йибыйзы жынму ду куажён
вэни,

⁴⁹ йинцысы лилёндади Анлахў ги вэ ганли да
сычинли.

Тади минзы гуйжун;

⁵⁰ Анлахўди шин до хэпа Тади мый йибыйзы
жынмушон вандихын.

⁵¹ Анлахў лян Тади да лилён ганли видади сычинли,
Та ба шинни гоноди жынму ду далансандёли.

⁵² Анлахў ба лилёндади хуоншонму да таму жанди
вифыншон туйхачили;

Та жё дижянхади жынму шыншончили.

⁵³ Анлахў жё нэ вэдўзыди жынму ба хо дунци
дыйшонли,

жё ючянханму кун шу хуэйчили.

⁵⁴⁻⁵⁵ Анлахў зущён ги замуди зўзў-быйбый фэхади
йиён,

ги Тади хуэжи, Израилди минжын, гили бонцули.
Анлахў ба Тади шин йинавар до Ибрашимэ дэ тади
хубыйшон вандихынди жичелэли!

⁵⁶ Мариам зэ Елизаветади жяни занли сангэ йүө, йиху хуэйли гэжяди жяли.

Ба Йихия сын-ёнхали

⁵⁷ Елизавета сын-ён вавади сыхур кэжя доли, та зу ба йи-гэ эрвазы сын-ёнхали. ⁵⁸ Тади линжүму лян чинчинму ба Анлахү ги та ганхади жыму хо сычин тинжян, лян Елизавета йидарни ду гошинзали.

⁵⁹ Ба вава сын-ёнхади ди батян, жынму лэ ги вава зү сун-нэтиди сыхур, шён лян та дадади минзы йиён, ба та жёчын Закарияни. ⁶⁰ Кэсы та мама фэди:

– Бу дыйчын! Ба та ё жё Йихияни.

⁶¹ Таму ги Елизавета фэли:

– Ниди чинчинму литу сый ду мөю жыгэ минзы. ⁶² Таму зу ба вавади дада дянту-фэшу вынли, та шён ги вава нан са минзыни.

⁶³ Закария жё ги та налэ йигэ шезыди банбанзы*, зу щели:

– Тади минзысы Йихия.

Дажя ду тэ чёчихали. ⁶⁴ Жыхур Закария донвөр кэ ку фё-кэ хуали, куажёнли Анлахүли. ⁶⁵ Жыщезы сычин ба тамуди линжү ду хажинли. Яхүти сан дифоншонди жынму сы-жу-баха ду жёнли жыщезы сычинли. ⁶⁶ Жынму ба жыгэ сы-чин тинжян, щинни ду сылёнли:

– Жыгэ вава чынха замужяди жынни?

Йинцысы Анлахү шызэ ги вава гили Та гэжяди лилёнли.

Закария ба Йихия ё йүди сычин зозор фэли

⁶⁷ Йихияди дада Закария ба Анлахүди Рух жешуха, зу ба Анлахү ги та гихади хуа фэли:

– ⁶⁸ Жё вөму куажён Анлахү, Израилди Жонгуйдини!
Анлахү лэ ги Тади жынму гили бонцули,
ба таму жефончүлэли.

⁶⁹ Анлахү зэ Тади хуэжи, Давуди жящяни
ги вөму гили йигэ лилёндади Жюминжя.

* 1:63 Зочян жынму зэ мөха лади банбанзышон хуади щели зыли.

⁷⁰ Зочян Анлахұ чечұ Тади шынжынму фәгуә:

⁷¹ Анлахұ ба вәмуди дұшман дабә,

зу жүю вәмуди минни,

ба вәму да хын вәмуди йиче жынмуди шуни

жефончүлэни.

⁷² Анлахұди щин до вәмуди зүзү-быйбыйшон

вандихын;

Анлахұ ба Та динхади гуйжунди хәтун жичелэни.

⁷³⁻⁷⁵ Анлахұ ги вәмуди Ибрашимә лозы дұ жуди фәли:

Та ба вәму да вәму дұшманди шуни жефончүлэни,

жә вәму чынха Анлахұ жянчүлэди гундожынмуни,

йибыйбыр бу хәпади чито Тани.

⁷⁶ Вәди эрзы! Ба ни жәчын вида Анлахұди шынжынни,

йинцысы ни до Жонгуйди лянмянчянни, ги Та ба лұ

шәлүхани.

⁷⁷ Ни жә Тади минжынму жыдохани,

Анлахұ ба тамуди гұнахар фоншәни,

ба тамуди мин жүюхани,

⁷⁸ йинцысы вәму Анлахұди щин вандихын;

Та зуцән жәту чүлэди сыхур щянчүди гуонлән йиән

да готу ба вәму жоләнни.

⁷⁹ Сый зә вучонди, хинанди дифоншон жүди,

Анлахұ ба нәщезы жынму жоләнни,

жә вәму зудо тәпинди лұшонни.

⁸⁰ Нәгә вава жянжян жондини, тади жиншын дә шынзы жянжян жешыдини. Та шындо кунтаннини, йичыр до та зә Исраилди жынму донжунни ганкә тади гунсыди сыхур.

Ба Эрса Мәсих сын-әнхали

2 Нәжитян, Римди хуоншон Август гиди фынфу жә чүан гуйжяди жынму ду ба тамуди фур суанчүлэни, йинви жыгә таму ё до гэжяди чынпуни чи, ба тамуди щинмин щени. ² Квирийини гуан Сирия дифонди сыхур, жысы жынму туйибян чи щели гэжяди щинминли. ³ Йиче жынму ду до гэжяди чынпуни ще щинминчили.

⁴ Юсуф е да Галилея дифоншонди Назарет чынпуни чүлэ, доли Яхүтиди дифоншон Давуди чынпуни (жыгә

чынпу жёдисы Вифлеем), йинцысы Юсуф зусы Даву йи-
зў-йиждаи жын. ⁵Юсуф лян Мариам лёнгэр е ще шинмин
чили. Нэгэ сыхур таму лёнгэр цэ динли хунли; Мариам дў-
зыни кэжя хуэди Вава. ⁶Таму до Вифлеем чынпуниди сы-
хур, Мариам куэ ё зуэйүэни. ⁷Та ба ту йигэ Эрзы сын-ён-
хали; ба йүөвазы на бу гуэчү, чедо нюцонили, йинцысы
кифонзыни мәю вифынлэ.

⁸Нэгэ дифоншон ю фон-ёнжынмулэ, таму зэ чынпу вэту
йивэщи хуанбанзыди кан ёндини. ⁹Мынмын Анлахү дафа-
лэди Тянщян зандо тамуди мянчанли; Анлахү щянчүлэди
гуонлён сымян-баха ба фон-ёнжынму жолёнли, ба таму
казали. ¹⁰⁻¹¹Нэгэ Тянщян ги таму фэди:

– Ниму бэ хэпали! Вэ ги ниму фэ до йиче жынмушон
шызэ гошинди сычин: жиргэ зэ Давуди чынпуни ги ниму
ба Жюминжя сын-ёнхали. Та зусы Мэсих Жонгуйди.
¹²Ниму зэ нэтар ба йигэ йүөвазы зэ нюцони фиди на бу
гуэди зожуэни; жы зусы ги ниму кангиди йигэ жихо.

¹³⁻¹⁴Мынмын тяншонди да жүндуй лян нэгэ Тянщян йи-
дарни куажён Анлахү фэли:

– Жыган тяншонди Хўда!

Ги Тади щинэ жынму зэ дишон панвон пиннан!

¹⁵Тянщянму ба фон-ёнжынму лёха, шонли тянли.
Фон-ёнжынму йигэ ги йигэ фэди:

– Заму зудо Вифлеем чынпуни чи кан Анлахү ги заму
фэхади сычин зу.

¹⁶Таму хуонхуон-монмонди чили шынли, доли нэгэ ди-
фон, зу ба Мариам лян Юсуф дэ нюцони фиди Эрвазы зо-
жуэли. ¹⁷Йиху таму зу ба Тянщян фэхади нэгэ Эрвазыди
сычин ги дажя ду фэли. ¹⁸Дажя ба фон-ёнжынму фэхади
хуа тинжян, ду чёчихали. ¹⁹Мариам ба жыщезы сычин жи-
до гэжяди шиннили. ²⁰Фон-ёнжынму хуэйлэ зу куажёнли
Анлахүли, йинцысы таму тинхади дэ жанхади йиче сычин
лян нэгэ Тянщян ги таму фэхади йиён.

²¹Гуэли ба тянли. Ги Вава зў суннэтиди сыхур, ги Та
ба Эрса минзы наншонли. Мариамди дўзыни хан мә хуэ
Вавади сыхур, Тянщян ба жыгэ минзы ги Та кэжя нан-
гили.

Ба Эрса надо Анлахүди сынили

²²Таму йижязы жочү Муса шынжынди фынфу чынха ганжиндили. Йиху Юсуф лян Мариам дэ тамуди га Вава зули Иерусалим чынпунили, воншёнди ба Вава гәдо Анлахүди мянчяни. ²³Зушён зэ Анлахүди фалушон шехади йиён: «Ба ту йигә эрвазы яндин ё ги Анлахү жянчүлэни». ²⁴Таму е шён жочү Анлахүди фалү ба йидуйзы бангэзы хуэйжэсы лёнгә гөвазы ги Анлахү жүгини.

²⁵Нэгә сыхур зэ Иерусалим чынпуни ю йигә жыплэ. Тади минзы жёди Шимэ, тасы хэпа Анлахүди гундожын, та панвонди жё Анлахү ба Израилди жынмуди мин жүхани. Анлахүди Рух лян та зэ йидарнини. ²⁶Анлахүди Рух зэ фимынни ги та фәли: та вучонлиди зочян ба Анлахүди Мәсих яндин канжяни. ²⁷Йихуэй Анлахүди Рух жё Шимэ доли Иерусалимди сы лэли. Зу жыгә сыхур Эрсади нён-лозы дэ га Эрса е жинлэли, шён жочү Муса шынжынди фалү ба вава либянди фынфу зунхүни. ²⁸Шимэ ба Эрса бошон, куажёнли Анлахүли:

– ²⁹Тяншонди Жонгуйди! Ни ба Ни шүхади хуа кәжя ганчынли;

жиргә Ни жё вә, Ниди нү, пиннан-вусы вучонни.

³⁰⁻³¹Жысы Ни ги йиче минжынму шәлүхади
Жюминжя.

Вә лян гәжяди нянжин ба Та канжяни.

³²Та ё ба вэдожынму, зушён гуонлён йиён, жолённи зэмусы ги Ниди Израилди минжын ги миншынни.

³³Вавади нён-лозы ба Шимэ фәхади Вава либянди хуа тинжян, чөчихали. ³⁴⁻³⁵Шимэ ги таму панвонли холи зэмусы ги Вавади мама Мариам фәди:

– Анлахү ба жыгә Вава жянчүлэли, жё Израилди хошо жынму йинви Та дедони, йинви Та занчелэни. Хошо жынму фандуй Тани, зу жымужя ба хошо жынму шинниди сылён шяншяр канжяни. Вонху лэди пәфан е ба ниди шин зушён на до канлиди йиённи.

³⁶Нэтар ю йигә нүжынлэ, тасы йигә шынжын, минзы жёди Анна; тасы Асир зүди Фануилди нүзы. Та кәжя лоли,

зочян та ю нанжынлэ, лян та йидарни жўли чи нян, ³⁷ йиху чынли гуафули, жыхур кэжя башы сы суйли. Та да Иерусалимди сыни бу зу, йитян йивэши фынзэдини, бэвон зэмусы чито Анлахўдини. ³⁸ Зу жыгэ сыхур, нэгэ нўжын до таму гынчян лэ, куажёнли Анлахўли. Сый панвонди жё Анлахў ба Иерусалим чынпу куэкуэди жефонни, Анна ги таму ба жыгэ Вавади сычин ду фэли.

***Эрса хуэйли Назарет
чынпули***

³⁹ Юсуф лян Мариам ба Анлахўди фалушон йиче йүнди фынфу ду ганли, зу йуанхуэй доли Галилея дифоншонли, доли тамуди Назарет чынпунили. ⁴⁰ Тамуди Вава жанжян жондали, нинбонли, е ю эргилили; Анлахўди нэчин зэ Ташонлэ.

***Эрса зэ Иерусалимди
сыннини***

⁴¹ Эрсади нён-лозы мый йинян ду до Иерусалим чынпуни чи, гуэ яхўтиди Пасха жечидини. ⁴² Эрса шыэр суйди сыхур, таму жочў куйчын доли Иерусалим чынпуни лэ, е гуэли жечили. ⁴³ Жечи гуэли. Таму хуэйжяди сыхур, га Эрса шындо Иерусалим чынпунили. Тади нён-лозы ба жыгэ сычин мэ жыдо, ⁴⁴ йинцысы таму сылэнди, Эрса лян зулўди жынму йидарни зудини. Таму зули йитянди лў, зэ чинчин дэ ляншуму донжунни золи Эрсали. ⁴⁵ Таму ба Эрса мэ зожуэ, зу хуэйли Иерусалим чынпули. ⁴⁶ Гуэли сан тян, таму зэ Иерусалимди сы литу ба Эрса зожуэли. Та зэ яхўти жёмынди вустаму донжунни зуэдини, тин тамуди хуадини зэмусы вын тамудини. ⁴⁷ Жынму ба Эрса фэхади хуа тинжян, ду чёчихали, йинцысы та гихади хуэйда цунминдихын. ⁴⁸ Эрсади нён-лозы ба Эрса канжян, е чёчихали. Тади мама ги Та фэди:

– Вэди Ва, Ни виса ги вэму ганли жымужяди сычинли? Вэ лян Ниди дада даншинди, ба Ни мангэчўр золи!

⁴⁹ Эрса ги таму хуэйдади фэсы:

– Ниму виса зо Вэдини? Нандый ниму бу жыдома, Вэ зэ Вэ Дадади жяни литу яндин ё зуэни?

⁵⁰ Кэсы таму мә минбый Эрсa фэха хуади йисы. ⁵¹ Эрсa лян таму йидарни хуэйли Назарет чынпули, йинавар тин тамуди хуадини. Тади мама ба жышезы сычин ду жидо гэжяди щиннили. ⁵² Эрсa жондини, е ю эргилили; Анлахұ дэ жынму ду ба Та щинэдини.

Йихия шынжынди чуанжэ

(Мф 3:1-12; Мк 1:1-8; Йих 1:19-28)

3 Римди хуоншон Тиверий гуан гуйжя ди шыву нянди нэ-йинян, Понтий Пилат гуан Яхұти дифонди сыхур, Ирод гуан Галилея дифонди сыхур, тади щүнди Филипп гуан Итурия дэ Трахонити дифонди сыхур, Лисаний гуан Авиллинея дифонди сыхур, ² Ханна лян Каиафа дон яхұтиди да ахунмуди сыхур, Закарияди эрзы Йихия зэ кунтанни ба Анлахұ ги та фэхади хуа тинжанли. ³ Йихия доли Иордан хэ жуви ди йиче дифоншон лэ, ги жынму чуанжэди фэди, жэ таму ба гэжяди гўнахар жынни, ба таму щинни сылэн-хади гэбянни, жэ Йихия ба таму зэ фи литу щини, жыгэди йиху Анлахұ цэ ба тамуди гўнахар фоншэни. ⁴ Зущэн Исаяй шынжынди фушон шехади йиён:

«Кунтанниди йигэ жын хандини:

– Ги Жонгуйди ба лў шэлүха,
ги Та ба лўлўзы зў пинпирди.

⁵ Ба мый йигэ сангў ду тьянманни;

жэ мый йигэ сан дэ лён ду

чынха дидирдини;

жэ ванванзыди лў

чынха жыжырдини;

жэ гэда-вашыди лў е

чынха пинпирдини.

⁶ Йиче жынму ду канжян Анлахұ ба тамуди мин замужя жюхани».

⁷ Хошо жынму чўлэ, жэ Йихия ба таму ви Анлахұ зэ фи литу щили. Йихия ги таму фэди:

– Нимусы дўйүэ чончунму! Анлахұ ё ги ниму дин зуйни, ниму сылэнди ниму ба жыгэ нын дуэдэма? ⁸ Ниму ё ган хо сычинни; жыгэ зущэн йигэ жихо йиён, зыфэдисы ниму ба

гўнахар кәжя жынли, ба шинниди сылән гәбянли. Ниму бә сыләнди нимусы Ибрацимәди хубый, йинви жыгә Анлахұ зу ги ниму бу дин зуй. Вә ги ниму фә, Анлахұ на жыщезы шыту ги Ибрацимә ба хубый нын зонн! ⁹Футу кәжя зә фу гынзы гынчан гәдини, ба мый йигә мәю хо готянди фу ду ё кандё, эрдо хуә литуни.

¹⁰ Жынму вынли Йихияли:

– Жымужя фәчи, жё вәму ё ган сани?

¹¹ Йихия хуэйдади фәсы:

– Сый ю лёнгә хансанзыни, ба йигә ги мәюди жын фынги; сый ю чыдини е зу жымужя ё ганни.

¹² Ющезы шуфиди жын е ләли, жё Йихия ба таму ви Анлахұ зә фи литу щини, зу вынли Йихияли:

– Вуста, жё вәму ё ган сани?

¹³ Йихия ги таму фәди:

– Ниму чўгуә фалұшон динхади чян бә шу данлинди чянли.

¹⁴ Ющезы донбинди жынму е лә вынли тали:

– Жё вәму ё ган сани?

Йихия ги таму фәди:

– Ниму ба жынди чян бә чён, нингўди е бә ё чянли; гуон йинви ниму зынхади чян ё разыни.

¹⁵ Минжынди зывон йүәщин голи. Дажя зә шинни сыләндини, Йихия хаба зусы Мәсих? ¹⁶Йинви жыгә Йихия ги таму фәди:

– Вә на фи щинимудини еба, кәсы хан лә йигә Жынни, Тади лилён би вәди да, вә бу жыгў ба ё гуха ги Та гә хэдэзычи. Та лян Анлахұди Рух дә хуә щинимунни. ¹⁷Тади шуни нади луәсэзы, Та ба жунзы ён ганжин, ба мыйзы шудо цонфон литу, ба шынхади йизы на йүнзун бу меди хуә шодёни.

¹⁸ Йихия ба Анлахұди Хо Шинвын ги минжынму чуанжёли, на хошо заёнди фонфа чўанфәли тамули. ¹⁹Кәсы Йихия пипинли Ирод хуоншонли, йинцысы Ирод ба та гэжяди щўндиди пәе чўшонли зәмусы ганли хошо данлинди бу ходи сычинли. ²⁰Йиху Ирод чўгуә жыщезы йиче бу ходи сычин хан ганли данлинди йигә ха сычин, жы зу-сы ба Йихия ядо банфонзынилиди.

Йихия ба Эрса ээ фи литу щили

(Мф 3:13-17; Мк 1:9-11)

²¹Жыгэди зочян, Йихия ба йиче жынму ду ээ фи литу щиди сыхур, Эрса е лэли, жё Йихия ба Та щили. Эрса чито Анлахүди сыхур, тян кэкэли, ²²Анлахүди Рух, зушён гэзы йиён, да тяншон фихалэ, луэдо Эрсади шыншонли. Жыгэ сыхур йигэ шынчи да тяншон халэ фэди:

– Нисы Вэди щинэ Эрзы, Вэ до Нишон ю нэчинни!

Эрсади зүзү-бийбий

(Мф 1:1-17)

²³Эрса зүкэ чуанжэди сыхур, Та ю саншыжи суй. Жынму суанди Тасы Юсуфди Эрзы, Юсуфсы Илиди эрзы, ²⁴Илисы Матфатди эрзы, Матфатсы Левийди эрзы, Левийсы Мелхийди эрзы, Мелхийсы Ианнайди эрзы, Ианнайсы Юсуфди эрзы, ²⁵Юсуфсы Маттафийди эрзы, Маттафийсы Амосди эрзы, Амоссы Наумди эрзы, Наумсы Еслиди эрзы, Еслисы Наггейди эрзы, ²⁶Наггейсы Маафди эрзы, Маафсы Маттафийди эрзы, Маттафийсы Семейди эрзы, Семейсы Иосихди эрзы, Иосихсы Яхүтиди эрзы, ²⁷Яхүтисы Иоаннанди эрзы, Иоаннансы Рисади эрзы, Рисасы Зоровавелди эрзы, Зоровавелсы Салафиилди эрзы, Салафиилсы Нириди эрзы, ²⁸Нирисы Мелхийди эрзы, Мелхийсы Аддийди эрзы, Аддийсы Косамди эрзы, Косамсы Елмадамди эрзы, Елмадамсы Ирди эрзы, ²⁹Ирсы Иосийди эрзы, Иосийсы Елиезерди эрзы, Елиезерсы Иоримди эрзы, Иоримсы Матфатди эрзы, Матфатсы Левийди эрзы, ³⁰Левийсы Шимэди эрзы, Шимэсы Яхүтиди эрзы, Яхүтисы Юсуфди эрзы, Юсуфсы Ионамди эрзы, Ионамсы Елиакимди эрзы, ³¹Елиакимсы Мелеайди эрзы, Мелеайсы Менади эрзы, Менасы Маттафайди эрзы, Маттафайсы Натамди эрзы, Натамсы Давуди эрзы, ³²Давусы Иессейди эрзы, Иессейсы Овидди эрзы, Овидсы Воозди эрзы, Воозсы Салмонди эрзы, Салмонсы Наассонди эрзы, ³³Наассонсы Аминадавди эрзы, Аминадавсы Админди эрзы, Админсы Арнийди эрзы, Арнийсы Есромди эрзы, Есромсы Фаресди эрзы, Фарессы

Яхүтиди эрзы, ³⁴ Яхүтисы Ягүбэди эрзы, Ягүбэсы Исхарди эрзы, Исхарсы Ибрашимэди эрзы, Ибрашимэсы Фаради эрзы, Фарасы Нахорди эрзы, ³⁵ Нахорсы Серухди эрзы, Серухсы Рагавди эрзы, Рагавсы Фалекди эрзы, Фалексы Еверди эрзы, Еверсы Салади эрзы, ³⁶ Саласы Каинанди эрзы, Каинансы Арфаксадди эрзы, Арфаксадсы Симди эрзы, Симсы Нухди эрзы, Нухсы Ламехди эрзы, ³⁷ Ламехсы Мафусалди эрзы, Мафусалсы Енохди эрзы, Енохсы Иаредди эрзы, Иаредсы Малелеилди эрзы, Малелеилсы Каинанди эрзы, ³⁸ Каинансы Еносди эрзы, Еносы Сифди эрзы, Сифсы Аданди эрзы, Адансы Анлахү зуэзохади.

Эрса шули иблисди зыянли

(Мф 4:1-11; Мк 1:12-13)

4 Эрса ба Анлахүди Рух жешуха, да Иордан хэянзышон хуэйлэли. Анлахүди Рух зу ба Та линдо савэнили. ² Нэтар Эрса сышы тян шули иблисди зыянли. Нэщезы тян литу Та са ду мө чы. Сышы тян гуэлиди йиху, Эрса цэ жүэлэ дўзы вэли. ³ Иблис ги та фэди:

– Ни дансы Анлахүди Эрзыли, Ни ги жыгэ шыту гигэ фынфу, жё та бянчын мэмэчи!

⁴ Эрса ги та хуэйдади фэсы:

– Китабушон щедисы: «Жын гуон бусы кочү чыди хуэни».

⁵ Иблис ба Эрса линдо йигэ хын годи дифоншон, жё Та йиха ба дун-яди йиче гуйжя канжянли, зу ги та фэди:

– ⁶⁻⁷ Ни дан гуйха бэвон вэ, вэ зу ба жыщезы гуйжяди чүанли лян фугуй ду ги Ни гигини; йинцысы ба жы йиче дусы ги вэ гихади; вэ щён дан ги сый гини, зу ги та гигини.

⁸ Эрса ги иблис фэди:

– Китабушон щедисы: «Ни гуон ё ги ниди Жонгуйди Анлахү гуйха бэвонни, гуон ё ба Та щинэни!»

⁹ Иблис ба Эрса линдо Иерусалим чынпунили, жё Та зандо Иерусалим сыди диндиршон, зу ги Та фэди:

– Ни дансы Анлахүди Эрзыли, Ни зу да жытар тэхачи!

¹⁰ Йинцысы Китабушон щедисы: «Анлахү ги Тади Тянщянму гиди фынфу, жё таму ба Ни бохүни»; ¹¹ хан щедисы:

«Таму на шу ба Ни жуачўни, бу жё Ниди жүэ пындо шытушон».

¹² Эrsa ги та хуэйдади фэсы:

– Китабушон шедисы: «Ни бу жун зыян ниди Жонгуйди Анлахў».

¹³ Иблис ба йиче зыян ганван, зу да Эrsa гынчян зудёли, йичыр до тади долёди сыхуршон.

*Назарет чыппуниди жынму
ба Эrsa мә жын*

(Мф 4:12-17; 13:53-58; Мк 1:14-15; 6:1-6)

¹⁴ Эrsa хуэйлэ, доли Галилея дифоншонли. Анлахўди Рухди лилён лян Та зё йидарнини. Тади миншын зу садо нэ йиче дифоншонли. ¹⁵ Та зё мый йигэ синагога литу жё-тёли жынмули, жынму ду куажёнли Тали.

¹⁶ Эrsa доли Назарет чыппунили. Жысы Та жондалиди дифон. Шанбёди нэйитян Эrsa, лян сўчонди йиён, жинли синагога литули. Нэтар Та занчелэ, шён няньихар Китабуни. ¹⁷ Йигэ жын ба Исаяя шынжынди фу ги Та гигили. Та ба фу дакэ, ба йигэ дифон зожуэли. Нэгэ дифоншон шедисы:

¹⁸ «Анлахўди Рух луэдо Вэшонли,
йинцысы Та ба Вэ жанчўлэли,
жё Вэ ги чўнжынму ба Хо Шинвын чуанжёни.
Та ба Вэ дафачи, жё Вэ ги гуэгуэчиди жынму фэни,
ба таму жефонни;
ги хазыму фэни, тамуди нянжин канжянни;
ги шу япыйди жынму фэни, ба таму е жефончўлэни;
¹⁹ хан жё Вэ чуанжёни: Анлахўди хо нянщян кэжя доли».

²⁰ Эrsa ба фу хэчў, ги синагогади хуэжи гиги, зуэхали. Синагога литуди жынму ду динди вон Тадини, ²¹ Эrsa ги таму фёди:

– Ниму жиргэ тинхади жыщезы Китабушонди хуа кэжя чынли.

²² Дажа ду занчынли Тали. Таму ба Эrsa фэхади дин ю щинфуди хуа тинжян чёчихали, зу фёди:

– Нандый жыгэ жын бусы Юсуфди эрзыма?

²³ Эrsa ги таму фэди:

– Ниму яндин ба жыгэ кулор ги Вэ фэни: «Дэфу, ни ба ни гэжя канхо!» Ниму хан нын ги Вэ фэ: «Вэму тинжянли Ни зэ Капернаум щёнжуонни ганхади сычинли. Ни ба жымужяди сычин зэ Ни гэжяди чынпуни ганйихар!» ²⁴ Вэ ги ниму фэ шыхуа, ба шынжын зэ та сын-ёнхади дифоншон бу тэнэ. ²⁵ Илияс шынжынди сыхур, Израил гуйжяни ю хошо гуафумулэ. Нэхур, сан нян лин люгэ йүэ мэ шя йү; йиче дифоншон жынму ду нэли вэли. ²⁶ Кэсы Анлахү ба Илияс шынжын мэ дафачи кан тамучи. Илияс гуон доли Сидон дифоншонди Сарепта щёнжуонни, лян йигэ гуафу йүмянчили. ²⁷ Елисей шынжынди сыхур, Израил гуйжяни ю хошо хэ мафынбинди жынмулэ, таму литу гуон ба йигэ жын канхоли; тасы Сирия дифоншонди жын, минзы жёди Нееман.

²⁸ Синагога литуди йиче жынму ба жыщезы хуа тинжян, ду чишонлэли. ²⁹ Таму челэ, ба Эrsa линдо чынпу вэтули, до санбяншон (тамуди чынпусы зэ йигэ саншон шюгэхадиди), щён ба Эrsa щянхачини. ³⁰ Кэсы Эrsa да жынму донжунни зудёли.

Кэлон литу ю зонгуйди йигэ жын

(Мк 1:21-28)

³¹ Эrsa доли Галилея дифоншонди Капернаум щёнжуоннили. Шанбэди нэйтян Та зэ нэтар жётёли жынмули. ³² Дажя ба Тади жёщүэ тинли, ду чёчихали, йинцысы Тади хуа ю жинни. ³³ Нэгэ сыхур синагога литу ю йигэ жынлэ, зонгуй ба та начүдини. Та дашын ханди:

– ³⁴ Эrsa, Назарет чынпуниди жын, вэму лян Ни ю са щёнганни? Ни щёме вэму лэлима? Вэ жыдо Нисы сый, Нисы Анлахү жанчүлэди Жын.

³⁵ Эrsa ги жыгэ зонгуй гиди ниннинди фынфу фэди:

– Бэ янчуан, ни да жыгэ жынди кэлон литу чүлэ!

Зонгуй зэ дажяди мянчян ба нэгэ жын эрдо дишоннили, зу да тади кэлон литу чүлэли; нэгэ жын йидяр ду мэ шу хэ.

³⁶ Жыгэ сычин ба жынму ду хажинли. Таму йигэ ги йигэ фэди:

– Жысы са хуа? Жыгэ Жын ю чүанли дэ бынсыди ги зонгуй гиди фынфу, таму зу чўлэдини.

³⁷ Эрседи миншын садо нэ йиче дифоншонли.

Эрса ба хошо бинжынму канхоли

(Мф 8:14-17; Мк 1:29-34)

³⁸ Эрса да синагога литу чўлэ, доли Шимэди жянили. Шимэди вэмунён бушинхали, та фашоли. Жынму читоди жё Эрса ги та бонмонни. ³⁹ Эрса лэ, зандо Шимэ вэмунёнди чуон гынчянли, бу жё та зэ фашоли. Та зу бу фашоли, донвөр челэ, фусулы тамули.

⁴⁰ Хушон жэту луэди сыхур, жынму ба хэ заён бинди жынму йиче ду линдо Эрседи мянчянли. Эрса ба гэжяди шу гэдэ мый йигэ бинжынди шыншонли, ба таму ду канхоли.

⁴¹ Хан ющезы гуй да хошо жынмуди кэлонни чўлэ, ханди:

– Нисы Анлахўди Эрзы!

Эрса ги гуйму гиди фынфу, бу жё таму фэхуа, йинцысы гуйму жьдони Тасы Мэсих.

Эрса зэ Галилея дифоншон чуанжэли

(Мк 1:35-39)

⁴² Жэту чўлэди сыхур, Эрса чўлэ, зули мэю жынди дифоншонли. Жынму сымян-баха ду золи Тали. Таму ба Эрса зожуэли, шён ба Та люхани, бу жё Та зу. ⁴³ Кэсы Эрса ги таму фэди:

– Вэ хан ё зэ данлинди чынпуни чини, ба Анлахў Гуйжяди Хо Шинвын чуанжэни, йинцысы ба Вэ ви жыгэ сычин дафалэли.

⁴⁴ Эрса зу зэ Яхўти дифоншонди мый йигэ синагога литу зўли чуанжэли.

Эрса ба манламу жянчўлэли

(Мф 4:18-22; Мк 1:16-20)

5 Йихуэй Эрса зандо Геннисаретди хэанзышонли. Жынму ба Та жичўли, шён тин Та фэ Анлахўди хуани. ² Эрса канжян лёнгэ фичуан зэ хэанзышон зандини, дэ йўди жын да чуаншон халэ, зэ хэанзышон щили вонли. ³ Эрса шонли

Шимэди чуаншон, жё Шимэ ба тади чуан да хэянзы гынчян шүэви фуйихарни. Эрса зуэха, да чуаншон жётёли жынмули. ⁴Ба жётё жёнван, Та ги Шимэ фэди:

– Ни ба чуан вон хэзы донжунни бэйихар, йиху ни лян ляншуму ба вон шяшон да йүчи!

⁵Шимэ фэди:

– Вуста, вэму жынжыр йивэщи фи гункүди дэли йүли, сыса ду мэ дэшон. Кэсы йинви Ни жымужя фэди, вэ шя вон чини.

⁶Таму шяли вон, жуали хошо йү; ба дэ йүди вон нянвэр чэландыйли. ⁷Таму зу ги данлинди чуаншонди ляншуму дянли ту, жё таму гуэлэ бонмонлэни. Ляншуму лэли, ба йү манманди жуондо лёнгэ чуаншонли, чуан нянвэр янхачидыйли. ⁸Шимэ (та зусы Пётр), канжян жыгэ сычин, зу гуйдо Эрса гынчян фэди:

– Жонгуйди! Вэ жё Ни да вэ гынчян зудё, йинцысы вэсы йигэ югүнахарди жын!

⁹Йинцысы таму дэли жымудуэди йү, ба Шимэ дэ данлинди ляншуму ду хажинли. ¹⁰Шимэди лёнгэ ляншу – Зеведейди эрзы Ягүбэ лян Йихия – е зу жымужя хэли пали. Эрса ги Шимэ фэди:

– Ни бэ хэпали! Да жиргэ дашон ни ба жын зущён дэ йүди йиён, жуани.

¹¹Таму ба чуан ладо хэянзышонли, ба йиче дунщи ду лёха, зу гыншон Эрса зудёли.

Эрса ба хэ мафынбинди жын канхоли

(Мф 8:1-4; Мк 1:40-45)

¹²Йихуэй, Эрса зэ йигэ чынпуниди сыхур, нэтар ю йигэ жынлэ, тади шыншон мафынбинди куэкуэзы жонманли. Та ба Эрса канжян, гуйха зу читоди ги Та фэди:

– Жонгуйди! Ни дан йүанйили, Ни ба вэди бин канхо.

¹³Эрса ба шу чынкэ, ба нэгэ жын дулийихар фэсы:

– Вэ йүанйи, ни хони!

Ба нэгэ жынди мафынбин донвэр зу канхоли. ¹⁴Эрса ги та гиди фынфу фэди:

– Ни кан, ба жыгэ сычин ги сый ду бэ фэли, ни чи жё яхүтиди ахун ба ни канйихар. Йиху ни ё жочү Муса шынжынди

фынфу ба гүрбани ду ги Анлахү жүги, жё дажя ду жыдоха, ниди шынзы кэжя ганжинли.

¹⁵ Эраси миншын йүэшин дали. Хошо жынму шудо йи-дарни, шён тин Эраси чуанжёни зэмусы читоди жё Та ба тамуди бин канхони. ¹⁶ Кэсы Эраса до мәжын-янди дифоншон чи, читоли Анлахүли.

Эраса ба хэ тантанзы бинди жын канхоли

(Мф 9:1-8; Мк 2:1-12)

¹⁷ Йихуэй Эраса жётёли жынмули. Ющезы да Галилея лян Яхүти дифоншонди мый йигэ щёнжуонни зэмусы Иерусалим чынпуни лэди фарисейжынму лян жёмын фалүди вустаму зэ гынчян е зуэдини. Нэхур Анлахү ги Эраса гили нынгу, жё Та ба бинжын канхони. ¹⁸ Нэгэ сыхур лэли жигэ жын. Таму тэди йигэ зэ вузышон фиди хэ тантанзы бинди жын, вонщёнди зо йигэ фонфа ба та тэдо фонзы литуни, гэдо Эраси мянчянни. ¹⁹ Фонзыниди жынму дуэди йимяр, таму ба хэ тантанзы бинди жын мэдый тэдо фонзы литу. Йинви жыгэ таму зу ба бинжын тэдо фондинзышон, нэтар кэли йигэ кўлун, ба вузышон фиди хэ тантанзы бинди жын да кўлунни фонхачи, гэдо донжуннили, Эраси мянчянли. ²⁰ Эраса канжян тамуди щинфу дади йимяр, зу ги хэ тантанзы бинди жын фэди:

– Вэди ляншу, ба ниди гўнахар фоншэли!

²¹ Нянжинжынму лян фарисейжынму фэди:

– Жыгэ жынсы сый? Та фэди жысы дэцэ Анлахүди хуа. Чўгуэ Анлахү, сый нын фоншэ гўнахар?

²² Эраса жыдо таму жымузя сылёнди, зу ги таму хуэйдади фэсы:

– Виса ниму зэ щинни жымузя сылёндини? ²³ Ниму кан, ги бинжын фэ: «Ба ниди гўнахар фоншэли», хуэйжэсы фэ: «Челэ зу зу». Жы лёнжү хуа литу найигэ хофэ? ²⁴ Йинви жё ниму жыдо Вэ, Аданди Хубый, зэ дишон ю фоншэ гўнахарди чүанлини, – Эраса зу ги хэ тантанзы бинди жын фэди:

– Вэ ги ни ги фынфу: ни занчелэ, ба ниди вузы нашон, зу хуэй жячи!

²⁵ Нэгэ жын донвэр зэ дажды мянчян занчелэ, ба гэжя фиди вузы начелэ, зу куажён Анлахүди, хуэйли жяли.
²⁶ Жынму ду тэ чөчихали. Таму хэпади куажён Анлахүди фэсы:

– Жиргэ вэму жянли жыму чөчи сичинли!

Эрса жё Левий гыншон Та зун

(Мф 9:9-13; Мк 2:13-17)

²⁷ Жыгэди йиху, Эрса чүчили, канжян йигэ шуфиди жынли. Жыгэ жынди минзы жёди Левий, та зэ шуфиди вөршон зуэдини. Эрса зу ги нэгэ жын фэди:

– Ни гыншон Вэ зу!

²⁸ Левий занчелэ, ба йиче дунши ду лёха зу гыншон Эрса зули. ²⁹ Левий зэ тади жяни ви Эрса гуэли да яншили. Хошо шуфиди жынму дэ данлинди жынму лян таму йидарни зэ коншон тонди чыли фанли. ³⁰ Жигэ фарисейжынму лян нянжинжынму ги Тади манламу гүнунди фэди:

– Ниму виса лян шуфиди жынму дэ югүнахарди жынму йидарни лян чы дэ хэдини?

³¹ Эрса ги таму хуэйдади фэсы:

– Мэю бинди жын бу ё дэфу, гуон хэбинди жын ё дэфуни. ³² Вэ лэ бусы жё гундожынму, кэсы жё югүнахарди жынму шущинни, ба гэжяди гүнахар жынни.

Фынзэди вынти

(Мк 9:14-17; Мк 2:18-22)

³³ Фарисейжынму лян нянжинжынму ги Эрса фэди:

– Йихияди манламу ду чинчир фынзэдини зэмусы чито Анлахүдини; фарисейжынмуди манламу е жымужя гандини, гуон Ниди манламу ду лян чы дэ хэдини.

³⁴ Эрса ги таму фэди:

– Шиннүшү жехунди сыхур, нандый тади кижынму нын фынзэма? ³⁵ Кэсы сыхур дони, шиннүшү ё да таму гынчян зудёни, зу нэгэ сыхур таму ё фынзэни.

³⁶ Эрса ги таму фэли йигэ бифон:

– Сый ду бу нын ба щин йишон чэлан, ба чэхади нэгэ будин будо жү йишоншон, йинцысы та ба щин йишон

чэланли еба, кэсы да щин йишоншон чэхэди нэгэ будин ги жү йишоншон е бу щин. ³⁷Сый ду бу нын ба щинщүан путожю гуандо жү пидэни, йинцысы щинщүан путожю ба жү пидэ жонланни, путожю тондөни, пидэ е ладони. ³⁸Йинви жыгэ ба щинщүан путожю яндин ё гуандо щин пидэ литуни. ³⁹Сый дан ба жү путожю хэли, та бу щён хэ щинщүан путожюни; йинцысы та фэди: «Жю путожю ходихын!»

Шанбэди вынти

(Мф 12:1-8; Мк 2:23-28)

6 Шанбэди нэйтян, Эrsa зэ мыйзы дини зудини; Тади манламу ба мыйсуйзы жүшон, на шу цуэди чыли.

²Жигэ фарисейжын канжян жыгэ зу фэди:

– Ниму виса шанбэди нэйтян ба бу ганди сычин гандини?

³Эrsa ги таму хуэйдади фэсы:

– Ниму мэ нянгүэ Даву лян тади ляншуму йидарни нэ вөдүзыди сыхур, ганли са сычинди? ⁴Даву жинли Анлахүди сы литу, ба жүги Анлахүди мэмэ гэжя чыли зэмусы ги тади ляншуму е гиди жё таму чыли, мөгуэсы ба жыщезы мэмэ чүгуэ яхүтиди ахун, сысый ду чыбудый.

⁵Йиху Эrsa ги таму фэди:

– Вө, Аданди Хубыйсы шанбэди Жонгуйди.

Эrsa ба шу гандёди жынди бин канхоли

(Мф 12:9-14; Мк 3:1-6)

⁶Данлинди шанбэ итян, Эrsa кэ жинли синагога литу, жётёли жынмули. Нэтар ю йигэ жынлэ; тади юшу гандёдини. ⁷Нянжинжынму лян фарисейжынму люшынди канлэли, шанбэди нэйтян Эrsa ба нэгэ жынди бин канхо канбухо; да жыгэшон таму щён ги Эrsa динзуйни. ⁸Эrsa ба тамуди вонщён жыдоди йимяр, зу ги шу гандёди жын фэди:

– Ни челэ, зандо донжунни.

Нэгэ жын зу челэ, занхали. ⁹Йиху Эrsa ги дажя фэди:

– Вө вын нимуни: нан замуди фалү, шанбэди жыйитян жынму ду ё ган хонима хуэйжэсы ган хани? Ё жү миннима хуэйжэсы хэ минни?

¹⁰ Йиху Эрса ба жувиди йиче жынму канлийхар, зу ги нэгэ жын фэди:

– Ни ба шу чынкэ!

Нэгэ жын ба шу чынкэли, зу жымуужа ба тади шу канхоли. ¹¹ Нянжинжынму лян фарисейжынму ду чишонлэли, йигэ лян йигэ шонлэнди, ги Эрса ё ган сани.

*Эрса ба шыэргэ Апостолму
жянчүлэли*

(Мф 10:1-4; Мк 3:13-19)

¹² Йихуэй, Эрса шонли йигэ саншон чито Анлахү чили. Нэтар Та жынжыр йивэщи читоли Анлахүли. ¹³ Жэту чүлэди сыхур, Эрса ба Тади манламу жёдо Та гынчян лэли. Таму литу Эрса ба шыэргэ жын жанчүлэ, ба «Апостолму»ди минзы ги таму нангили. ¹⁴ Тамусы Шимэ (Эрса ги та нанхади минзысы Пётр), Андрей (тасы Пётрди щүнди), Ягүбэ, Йихия, Филипп, Варфоломей, ¹⁵ Матфей, Фома, хан ю йигэ Ягүбэни (тасы Алфейди эрзы) дэ йигэ Шимэни (жынму ба та жёди «Зилот»), ¹⁶ дэ Яхүтини (та дадади минзысы Ягүбэ), зэхалэ хан ю йигэ жынни, минзы жёди Жүхүти Искарот, та йиху ба Эрса мэчүчили.

Эрса жётёли жынмули

(Мф 4:23-25; 5:1-12)

¹⁷ Эрса лян манламу йидарни да саншон халэли. Та лян хошо Тади манламу йидарни зандо пинвэршонли. Хошо жынму да йиче Яхүтиди дифоншон дэ Иерусалимшон дэ хэянзышонди Тир чынпушон лян Сидон чынпушон доли нэтарли. ¹⁸ Таму щён тин Эрсади хуани дэ панвонди жё Та ба тамуди бин канхони. Хан ю жё зонгуй жэмэхэди жынму е лэли, ба тамуди бин е канхоли. ¹⁹ Дажа ду щён ба Эрса дуйхарни, йинцысы лилён да Тади шынзы литу чүлэ, ба таму канхоли. ²⁰ Эрса жочү Тади манламу вонлийиха, зу ги таму фэди:

– Чүнжынму дуэму гошин,
йинцысы нимусы Анлахү Гуйжяди жынму!

²¹ Хазыр нэ вэдүзыди жынму дуэму гошин,

йинцысы ниму яндин чыбони!
Хазыр кўди жынму дуэму гошин,
йинцысы ниму яндин щёни!

²² Йинви Адан Хубыйди минзы жынму хын нимуни, дуан нимуни, хэщүэ нимуни, ба нимуди минзы суанчын хадини. Нэхур ниму зу дуэму гошинни! ²³ Зочян тамуди зўзў-быйбый ги шынжынму е жымужя гангуэ. Нэйтян ниму тэ гошинни, йинцысы зэ тяншон ги ниму шөлүхади шонхо дадихын.

²⁴ Хазыр ю чянди жынму дуэму кэлян,
йинцысы ниму кэжя разыли!

²⁵ Хазыр чыбоди жынму дуэму кэлян,
йинцысы ниму вонху нэ вэдўзыни!
Хазыр щёди жынму дуэму кэлян,
йинцысы ниму вонху дакў-луанхуни!

²⁶ Жынму дан ба ниму ду куа, ниму е кэлян, йинцысы зочян тамуди зўзў-быйбый ги жя-шынжын е фэгуэ жымужяди хуали.

«Ё щинэ дўшманмуни»

(Мф 5:38-48; 7:12)

²⁷ Нимусы тин Вэди хуади жынму, Вэ ги ниму фэ: ниму ё щинэ нимуди дўшманни, ги хын нимуди жынму ё ган хони; ²⁸ ниму ги жума нимуди жынму ё панвон хони, ви хэщүэ нимуди жынму ё чито Анлахўни. ²⁹ Сый дан ба ниди ляншон шан йи бажон, ни ба ди эр бонгэ е ги та зыги! Сый дан ба ниди готу йишон нашонли, ни жё та ба хансанзы е нашон! ³⁰ Сый дан да ни гынчян ё са, ни зу ги та гиги; сый дан ба ниди дунщи нашонли, бэ жё та ги ни хуан. ³¹ Ниму зэ щён жё данлинди жынму ги ниму замужя ган, ниму гэжя е ё ги таму нэмуужя ганни.

³² Ниму дан ба щинэ нимуди жынму щинэ, ниму ю са гунлони? Югўнахарди жынму ба щинэ тамуди жынму е щинэдини! ³³ Ниму дан гуон ги ниму ганха ходи жынму ган хо, ниму ю са гунлони? Югўнахарди жынму е жымужя гандини! ³⁴ Ниму дан ба чян гуон ги зывон ги ниму хуанди жынму жегини, ниму ю са гунлони? Югўнахарди жынму е

ба чян ги югўнахарди жынму жени, йинцысы таму вонщѣнди ба нѣмушезы чян шухуэйлэни! ³⁵ Кэсы ниму ё щинѣ нимуди дўшманмуни, ги таму ган хони; ниму ё ба чян ги жынму жегини, бѣ вонщѣнди шухуэйлэ. Жымужя вонху ги ниму шѣлүхади шонхо дадихын, ниму чынха вида Анлахўди эрнүмуни, йинцысы Анлахў е ги вондѣ ги Та дощѣди жынму зѣмусы ги бу ходи жынму ган ходини. ³⁶ Нимуди щин ё ванни, зущѣн ниму тьяншонди Дадади щин ванди йиѣн.

**«Бѣ ги данлинди жынму
динзуйли»**

(Мф 7:1-5)

³⁷ Ниму бѣ гондо данлинди жынмули, Анлахў е зу бу гондо ниму; ниму бѣ ги данлинди жынму дин зуйли, Анлахў ги ниму е бу дин зуй; ниму дан фоншѣ жынмули, Анлахў е зу фоншѣ нимуни. ³⁸ Ниму дан ги данлинди жынму ги, Анлахў е зу ги ниму гини. Та зущѣн ба лѣншы лян ё дѣ няди вон кудѣни жуонманманди йиѣн, ниму нын на дуѣшо, зу ги ниму ги дуѣшони. Ниму замужя лѣндини, Анлахў ги ниму е зу нѣмужя лѣнни.

³⁹ Эрса хан ги таму жѣнли йигѣ бифон:

– Хазы бу нын лин данлинди хазы зу лў. Дан жымужя, таму лѣнгѣр ду дѣдо кын литуни. ⁴⁰ Манла бу нын би тади вуста го, кэсы та шищўэлиди йиху, чынха лян тади вуста йиѣн гони. ⁴¹ Ни виса гуон ба данлин жынди нянжин литуди суй жыжызы канжяндини, кэсы ба гѣжяди нянжин литуди да жуонзы канбужян? ⁴² Ни гѣжяди нянжин литу ю да жуонзыди йимяр, ни замужя ги данлинди жын нын фѣ: «Дищўн, жѣ вѣ ба ниди нянжин литуди жыжызы точўлѣ»? Нисы мунафик! Ни щянтуни ба гѣжяди нянжин литуди да жуонзы точўлѣ, нѣхур цѣ нын канжян, замужя ба жынжяди нянжин литуди суй жыжызы точўлэни.

Фу лян тади готян

(Мф 7:16-20; 12:33-35)

⁴³ Хо фу бу нын же бу ходи готян зѣмусы бу ходи фу е бу нын же хо готян. ⁴⁴ Нагѣ фу хо, нагѣ фу бу хо, ба жыгѣ да

тади готяншон нын канчӱлэни. Ниму бу нын да цыязы фушон шу инжир хуэйжэсы путо. ⁴⁵Хожын да тади хо шинчонни шянчӱлэ ходини; хажын да ха шинчонни шянчӱлэ хадини. Са дан ба жынди шин жуонманли, тади зуй зу фэ сани.

Лёнгэ щюгэ фонзыди жын

(Мф 7:24-27)

⁴⁶Ниму виса ба Вэ жэди: «Жонгуйди! Жонгуйди!», кэсы ба Вэ ги ниму гихади фынфу бу ган? ⁴⁷Вэ ги ниму фэ: сый до Вэ гынчян лэ, ба Вэди хуа дан тинли зэмусы ба Вэ фэхади ганли, та щён са жын йиён? ⁴⁸Та щён йигэ щюгэ фонзыди жын йиён; та ба тӱ вади шыншынди, ба фон гынзы задо шытушонли. Йиху фи фалиди сыхур, хэниди филон ба нэгэ фонзы дали, кэсы фонзы мэ дун-ё, йинцысы ба та щюгэди хо. ⁴⁹Сый ба Вэди хуа дан тинли, кэсы ба Вэ фэхади мэ ган, та е щён йигэ щюгэ фонзыди жын йиён; та мэ ла гынзы, ба фонзы гэдо дишонли. Хэниди филон ба нэгэ фонзы далиди сыхур, фонзы йиман зу тадэли.

Эрса ба жүнгуанди хуэжиди бин канхоли

(Мф 8:5-13; Йих 4:43-54)

7 Эрса ги жынму ба жыщезы хуа фэван, зу доли Капернаум щёнжуоннили. ²Нэтар ю йигэ Римди жүнгуанлэ, тади йигэ тэнэ хуэжиди бин жүндихын, куэ вучондыйли. ³Нэгэ жүнгуан тинжян Эрса лэли, зу ба жигэ яхӱти жынмуди ложын дафачи, жё Эрса лэ ба тади хуэжи канхони. ⁴Таму до Эрса гынчян, читоди ги та фэди:

– Ни ги жыгэ жын бонйихар, та тэ жыгӱдихын. ⁵Жыгэ жын нэ вэму яхӱтиди минжын, зочян та ги вэму щюгэли йигэ синагогали.

⁶Эрса гыншон таму чили. Та хан мэ до жүнгуанди жяни, нэгэ сыхур жүнгуан ба тади жигэ ляншу дафачили, жё таму ги Эрса фэни:

– Жонгуйди! Ни бэ мафан Ни гэжяли. Вэ бу жыгӱ жё Ни до вэди жяни лэ; ⁷вэ гэжя е бу жыгӱ до Ни гынчян чи.

Ни гуон фэ йигэ хуа, вэди хуэжи зу хони. ⁸Йинцысы вэ ю гуан вэди тузыни, вэ гэжя е гуан вэди донбинди жынмуни. Вэ ги жыгэ жын дан фэ: «Ни чи!», та зу чини; вэ ги нэгэ жын дан фэ: «Ни лэ!», та зу лэни; вэ ги вэди хуэжи дан фэ: «Ни ган жыгэ», та зу ганни.

⁹Эрса ба жыгэ хуа тинжян, чёчихали, жуангуэлэ жочү гыншон Та зуди жынму фэди:

– Вэ ги ниму фэ, зэ Израилди жынму литу Вэ мэ тингуэ жыму дади шинфу!

¹⁰Дафалэди жынму хуэйли жүнгуанди жяни, йиканса нэгэ хуэжи кэжя холи.

*Эрса жё йигэ гуафуди вучондөди
эрзы кэ хуэли*

¹¹Йиху Эрса зули Наин чынпунили. Тади манламу лян хошо жынму ду гыншон Та зули. ¹²Эрса доли чынпу гэмынди сыхур, нэтар жынму сун йигэ гуафуди эрзыди мэтидини. Жысы тади луэмур йигэ эрзы. Хошо жынму лян нэгэ гуафу йидарни да чынпуни чүлэли. ¹³Эрса Жонгуйди канжян нэгэ гуафуди сыхур, Тади щин ванли, Та зу ги гуафу фэди:

– Ни бэ кү!

¹⁴Йиху Та вон чян чи, ба гуанцэ дулийихар; тэ гуанцэди жынму занхали. Эрса фэди:

– Щёхуэр, Вэ ги ни фэ, ни челэ!

¹⁵Нэгэ вучонлиди щёхуэр зу зуэчелэ, фэкэ хуали. Эрса ба та ги мама гигили. ¹⁶Ба дажя ду хазали. Таму куажён Анлахүди фэди:

– Видади Шынжын доли вэму донжуннили! Анлахү ги Тади минжын гили бонцули!

¹⁷Жыгэ щинвын зу садо йиче Яхүти дэ жувиди дифоншонли.

*Йихия шынжынди манламу
кан Эрса лэли
(Мф 11:2-19)*

¹⁸Йихияди манламу ба жыщезы йиче сычин ги Йихия ду фэли. Йихия ба лёнгэ манла жёлэ, ¹⁹ба таму дафадо Эрса

Жонгуйди гынчян чи, жё таму вын Эрсачини: «Ни зусы ё лэди нэгэ Жынма* хуэйжэсы вэму хан ё дын данлинди йигэ жынни?»

²⁰ Таму доли Эрса гынчян, зу фэди:

– Щижынмуди Йихия ба вэму дафалэ, жё вэму вын Ни ни: Ни зусы ё лэди нэгэ Жынма хуэйжэсы вэму хан ё дын данлинди йигэ жынни?

²¹ Зу нэгэ сыхур Эрса ба хошо бушинхади, хэ жунбинди жынму кэжэ канхоли, ба жынмуди кэлон литуди зонгуй ганчүчили зэмусы жё хошо хазыму йүанхуэй нын канжян гуонлэнли. ²² Эрса ги Йихияди манламу хуэйдади фэсы:

– Ниму хуэйчи, ба йиче канжянлиди дэ тинжянлиди сычин ги Йихия ду фэги: хазыму ду канжянли, чүэзыму зудини, хэ мафынбинди жынму ганжинли, лунзыму тинжяндини, вучонлиди жынму кэ хуэли, чүнжынму ба Анлахүди Хо Шинвын тинжянли. ²³ Сый дан щинфу Вэли, зэ мёю шанкили, та дуэму гошин!

²⁴ Йихия дафачиди жынму зудёли. Эрса зу ги жынму фэли Йихияли:

– Ниму зочян до кунтанни зо Йихияди сыхур, вонщёнли канжян сани? Нандый ниму вонщёнли канжян дунтанни визинима? ²⁵ Нэтар ниму вонщёнли канжян сани? Нандый вонщёнли канжян чуан гуйжун йишонди жыннима? Кэсы чуан гуйжун йишонди зэмусы чы хо чыдиди жынму ду зэ хуоншонди жинлу-бодян литу жүдини! ²⁶ Нэтар ниму хан вонщёнли жян сани? Вонщёнди жян шынжыннима? Дуйдини. Вэ ги ниму фэ, Йихия би шынжын хан да. ²⁷ Та зусы зэ Китабушон тифэхэди нэгэ жын:

«Анлахү фэди: „Ни кан! Вэ жё Вэ дафачиди жын ги
Ни зэ туни ба лү шэлүхани“».

²⁸ Вэ ги ниму фэ, зэ жынму литу мёю зущён Йихия йиён видади жын; кэсы зэ Анлахү тяншонди Гуйжяни дин щёди жын би Йихия хан вида!

* 7:19 «Ё лэди нэгэ Жын» – жыгэ хуа зыфэдисы «Мэсих».

²⁹Йиче жынму зэмусы шуфиди жынму ба Эрседи хуа тинжян, ду ба Анлахұ жынчын гундодили, йинцысы Йихия ба таму ви Анлахұ зэ фи литу кэжя шили. ³⁰Кэсы фарисейжынму лян жёмын фалүди вустаму мө жё Йихия ба таму зэ фи литу ши, зу жымужя таму фандуйли Анлахұ нансуанхади сычинли.

³¹Эрса хан фэди:

– Жымужя фэчи, Вэ ба жы йибыйзы жынму на са нын бини? Таму щён сани? ³²Таму зущён чонзыни зуэди ваму йиён; таму литу йибазы ги данлинди йибазы ханди фэди: «Вэму ги ниму на суэназы чуйли гошин йиндөли, кэсы ниму мө тё! Вэму чонли пэфан чүзыли, кэсы ниму е мө кў!» ³³Зу жымужя, щижынмуди Йихия лэ, бу чы бу хэ, ниму фэди: «Тади кэлон литу ю гуйни!» ³⁴Аданди Хубый лэ, е чыдини, е хэдини, кэсы ниму фэди: «Та нэ хэ жү зэмусы нэ чы жуни, Тасы шуфиди жынму дэ югўнахарди жынмуди ляншу!» ³⁵Анлахұди эргили зэ йиче жешу эргилиди жынмушон щянчўлэли.

Эрса ба йигэ югўнахарди нўжын фоншэли

³⁶Йигэ фарисейжын чин Эрса лян та йидарни чы фанчини. Эрса зу доли тади жяни, тондо коншонли. ³⁷Нэгэ чынпуню ю йигэ нўжынлэ, тасы йигэ югўнахарди нўжын. Та тинжян Эрса зэ нэгэ фарисейжынди жяни чыфандини, зу нали йигэ жычянди пинзы, литу гуанди щён-ю. ³⁸Та зандо Эрсади жибый хуту, зэ Тади жүэ гынчян кўтуэли. Тади нянлуй дедо Эрсади жүэшонли. Нэгэ нўжын зу лян гэжяди туфа ба Эрсади жүэ ца ган, ба Тади жүэ щинтынли, на щён-ю мэли. ³⁹Чинди жё Эрса чыли фанди нэгэ фарисейжын ба жыгэ канжян, щинни сылөнди: «Жыгэ Жын дансы шызэди шынжынли, Та яндин жыдо-ни, дули Тади нэгэ нўжынсы замүгэ нўжын; тасы югўнахарди нўжын!»

⁴⁰Эрса зу ги нэгэ фарисейжын фэди:

– Щимэ, Вэ щён ги ни фэ йигэ хуани.

Щимэ фэди:

– Вуста, Ни фэ!

⁴¹Эрса фэди:

– Лёнгэ жын жели йигэ жынди чянли: йигэ жын жели вубый йинчян*, данлинди йигэ жели вушыгэ йинчян.

⁴²Жы лёнгэ жын ду мэю нынгу ба жон ги нэгэ жели чянди жын хуанги. Йинви жыгэ, нэгэ жын бу ё гэжяди жонли. Ни сылёнйихар, жы лёнгэ жын литу сый ба нэгэ жели чянди жын дуэйү нэни?

⁴³Щимэ хуэйдади фэсы:

– Вэ сылэнди, сыйди жон дуэшер, та зу йүө нэ нэгэ жынни.

Эрса фэди:

– Ни фэди дуйдини.

⁴⁴Йиху Та жуангуэлэ жочү нэгэ нүжын зыди ги Шимэ фэди:

– Ни ба жыгэ нүжын канжянлимэ? Вэ до ниди жяни вонщёнди ши жүэни, ни ги Вэ мэ ги фи, кэсы жыгэ нүжын лян гэжяди нянлуй ба Вэди жүэ щили зэмусы лян гэжяди туфа ца ганли. ⁴⁵Ни вынху Вэди сыхур, ба Вэ мэ щинтын, кэсы жыгэ нүжын да Вэ жинлэди сыхур, зу ба Вэди жүэ бутынди щинтындини. ⁴⁶Ни ба Вэди ту лян чин-ю ду мэ мэ, кэсы жыгэ нүжын ба Вэди жүэ лян щён-ю мэли. ⁴⁷Вэ ги ни фэ, тади нэчин дади йимяр, ба тади хошо гўнахар фоншэли. Ги сый ба гўнахар фоншэди шо, тади нэчин е щё.

⁴⁸Эрса зу ги нэгэ нүжын фэди:

– Ба ниди гўнахар фоншэли.

⁴⁹Лян Та йидарни зуэди жынму щинни сылэнди:

– Жыгэ жынсы са Жын? Та ба жынди гўнахар фоншэдини!

⁵⁰Эрса ги нэгэ нүжын фэди:

– Ниди щинфу ба ниди мин жюхали; ни пиннан-вусы хуэйчи!

Гыншон Эрса зуди нүжынму

8 Гуэли житян, Эрса ба мый йигэ чынпу лян щёнжуон зу-гуэди сыхур, ба Анлахү Гуйжяди Хо Шинвын чуанжэли; шыэргэ Апостолму лян Та йидарни зудини. ²Чүгуэ таму хан

* ^{7:41} Жыгэ йинчян жёди «динарий».

ю жигэ нүжынни, зочян жё зонгуй лян бин жэмэхади, кэсы Эрса ба таму кэжя канхоли. Таму литу ю Магдала дифоншонди Мариамни, зочян Эрса да тади кэлон литу ба чигэ зонгуй ганчүчили; ³хан ю Иоаннани, тасы Хузади пэе (Хузасы Ирод хуоншонди жокан жяди гуанжын); хан ю Сусаннани зэмусы хошо данлинди нүжынмуни. Таму ду на гэжяди цэбый ба Эрса лян Тади манламу гунйүнли.

Са мыйзы жунзыди бифон

(Мф 13:1-9; Мк 4:1-9)

⁴Жынму да мый йигэ чынпуни лэ, кан Эрса лэли. Хошо жынму шудо йидарниди сыхур, Эрса на бифон ги таму фэкэ хуали:

– ⁵Йигэ са мыйзы жунзыди жын чүчи са жунзычили. Та са жунзыди сыхур, ющезы жунзы дедо лү бянбярнили; жынму ба жы жигэ жунзы тали. Йиху чөр фидилэ ба жунзы чыдэли. ⁶Ющезы жунзы дедо шытушонли; мыйзыди мёмёзы жончүлэ, донвэр гандэли, йинцысы тў литу мёу фи. ⁷Ющезы жунзы дедо цыязы литули; цыязы жончелэ, ба мёмёзы жячүли. ⁸Хан ющезы жунзы дедо хо тўшонли; мыйзыди мёмёзы жончүлэ, гили йибый лэзыди шучын.

Эрса хан ги таму фэди:

– Ю эрдуэди жынму, ду хохор тин!

Са жунзы бифонди йисы

(Мф 13:10-23; Мк 4:10-20)

⁹Эрсади манламу вынли Тади жыгэ бифонди йисыли.

¹⁰Эрса ги таму фэди:

– Ниму ба Анлахү Гуйжяди бимиди сычин йиче ду жыдоха, кэсы ги данлинди жынму ба жымужяди йиче сычин ду ё на бифон фэни, жымужя таму кандини, кэсы канбужян; тиндини, кэсы тинбудун. ¹¹Жыгэ бифонди йисысы жымужяди: жунзысы Анлахүди хуа. ¹²Дедо лү бянбярнилиди жунзы зущён ющезы жынму йиён. Таму ба Анлахүди хуа тинжян, иблис лэли, зу ба Анлахү ги таму щинни сахади хуа дуэдэни, бу жё таму щинфу жыгэ хуа, зу жымужя бу жё ба тамуди мин жүха. ¹³Дедо шытушонди жунзы зущён ющезы

жынму йиён, таму ба Анлахўди хуа тинжян, гошинди зу ба жыгэ хуа жешуни, кэсы тамуди щинни мөю гынгынзы, тамуди шинфу бусы чонйүанди; йинви Анлахўди хуа шу зыянди сыхур, таму фанлян бу жын жыгэ хуа. ¹⁴ Дедо цыязы литуди жунзы зушён ющезы жынму йиён, таму ба Анлахўди хуа тинли, кэсы дун-яди цошин, фугуй дэ футанди воншён ду ба Анлахўди хуа жячўли, бу жё жынму ги шучын. ¹⁵ Зэму-сы дедо хо тўшонди жунзы зушён ющезы жынму йиён, таму лян гэжя шызэ ходи щин ба Анлахўди хуа тинли, вон чонйүанни бохўли, зу гили хошо шучынли.

Гуэ дихади юдынзанди бифон

(Мк 4:21-25)

¹⁶ Сый ду ба юдынзан дянжуэ, вон гуэ диха хуэйжэсы чуон диха бу гэ. Та ба юдынзан гедо дынзанди тэзышон, жё жинлэди жынму канжян гуонлённи. ¹⁷ Мый йигэ бимиди сычин яндин щянчўлэни; жынму ба мый йигэ цонхади сычин жыдони. ¹⁸ Йинви жыгэ ниму ё люшынди тинни! Сый юли, ги та хан тянни; сый мөюли, ба та сылён та юди нэйидяндя е дуэдэни.

Эрсади мама зэмусы дишүнму

(Мф 12:46-50; Мк 3:31-35)

¹⁹ Эрсади мама лян дишүнму кан Та лэли. Кэсы жынму дуэди йимяр, таму бу нын до Эрса гынчян лэ. ²⁰ Жынму ги Эрса фэди:

– Ниди мама лян дишүнму зэ вэту зандини, щён ба Ни жяньихарни!

²¹ Эрса ги таму хуэйдади фэсы:

– Тин Анлахўди хуа зэмусы жочў жыгэ хуа ганди жынму зусы Вэди мама лян Вэди дишүнму!

Эрса жё фын зэмусы филон жўхали

(Мф 8:23-27; Мк 4:35-41)

²² Йихуэй Эрса лян Тади манламу йидарни шонли чуан, зу ги таму фэди:

– Заму зу хэзы нэбонгэ.

Таму зу зули. ²³Чуан фушон зуди сыхур, Эрса фижуэ-ли. Мынмынди хэзыни да фын гуачелэли; фи ба чуан гуанманли, данщүандихынли. ²⁴Манламу лэ ба Эрса ханщин, фэди:

– Вуста! Вөму нянвэр сыдыйли!

Эрса челэ, ги да фын лян да филон гиди ниннинди фынфу, жё таму жўхани. Да фын лян филон донвэр жўхали, хэзы е нанвынхали. ²⁵Эрса вынли манламули:

– Нимуди щинфу зэ натарни?

Тади манламу ду хэли пали, тэ чёчиди йигэ ги йигэ фэли:

– Жыгэ Жынсы са жын? Та ги фын лян филон гиди фынфу, таму ду тин Тади хуадини!

*Эрса зэ Герасин дифоншон
ба зонгуй ганчўчили*

(Мф 8:28-34; Мк 5:1-20)

²⁶Таму доли Галилеяди хэзы нэбонгэ, доли Герасин жынмуди дифоншонли. ²⁷Эрса доли хэянзышон, зу ба нэгэ дифоншонди йигэ жын пынжянли; зонгуйму ба та начўдини. Жыгэ жын хошо гунфу мэ чуан йишон, зэ жяни мэ жў, та зэ фынйўанни жўдини. ²⁸Та ба Эрса канжян, зу дашын ханди:

– Эрса, вида Анлахўди Эрзы! Вэ лян Ни ю са щёнганни? Вэ зэ Анлахў мянчянни читоди: Ни ба вэ бэ жэмэли!

²⁹Та фэ жыгэ хуади, йинцысы Эрса кэжя ги зонгуй гили фынфу, жё та да жыгэ жынди кэлон литу чўлэни. Зонгуй хошо гунфу кэжя ба нэгэ жын начўдини; жынму на тешын зэмусы мабан ба нэгэ жын бончўгуэ, кэсы та ба тешын лян мабан ду жюдуангуэ. Зонгуй ба та гандо кунтанни чигуэ.

³⁰Эрса ба та вынли:

– Ниди минзы жёди са?

Та фэди:

– Вэди минзы жёди «йи да чүн», йинцысы тади кэлон литу зонгуй дуэдихын. ³¹Зонгуйму читоди ги Эрса фэди, бу жё ба таму вон дуэзэхэ литу ган. ³²Нэтарди санпэзышон

йи чүн жў фондини. Зонгуйму чито Эрседи, жё таму жин нэщезы жўди кэлон литу чи. Эрса донвэр ги таму гили кухуанли. ³³Зонгуйму зу да нэгэ жынди кэлон литу чўлэ, жинли нэщезы жў литули. Жўчүн да саншон вон хэзыни тёхачи, зу зэ хэзыни янсыли.

³⁴Фонжўди жынму ба жыгэ сычин канжян, зу подёли. Таму подо чынпуни зэмусы жувици щёнжуонни чи, ба жыгэ сычин ги дажя ду фэли. ³⁵Дажя ду лэ щён канйи-харни, йўли са сычинли. Таму доли Эрса гынчян зу канжянли, замужя зонгуйму да нэгэ жынди кэлон литу кэжя чўлэли; та гэжя зэ Эрседи жўэ гынчян зуэдини, чуанди йишон, е минбыйдини. Жыгэ сычин ба таму ду хажинли. ³⁶Жянха жыгэ сычинди жынму ги дажя ду фэли, замужя ба кэлон литу зочян ю зонгуйди жын канхоли. ³⁷Герасин дифоншонди жынму ду читоди жё Эрса да тамуди дифоншон зудёни, йинцысы таму ду шызэ хэли пали. Эрса зу шонли чуан, фушон зудёли. ³⁸Жыгэди зочян, кэлон литу зочян ю зонгуйди нэгэ жын лэ, читоди ги Эрса фэди:

– Жё вэ шындо Ни гынчян.

Кэсы Эрса ба та дафачи, зу ги та фэди:

– ³⁹Ни хуэй ниди жяни чи, ба Анлахў ги ни ганхади хо сычин ги дажя ду фэги.

Нэгэ жын зудё, зэ нэгэ чынпуни сыжу-баха ба Эрса ги та ганхади хо сычин ги дажя чуанжёли.

Иаирди нүр кэ хуэли

зэмусы йигэ хэ лющевинди нүжын холи

(Мф 9:18-26; Мк 5:21-43)

⁴⁰Эрса йўанхуэй доли хэзы нэбонгэди сыхур, жынму ду ба Та жейинли, йинцысы дажя ду ба Та дындини. ⁴¹Жытар синагогади да йимаму, минзы жёди Иаир, е лэли. Та ба Эрса канжян, гуйдо Тади жўэ гынчян, зу читоди жё Эрса до тади жяни чини, ⁴²йинцысы тади луэмур йигэ шыэр суйди нүр вучондыйли.

Эрса зуди сыхур, хошо жынму ба Та жичўли. ⁴³Нэтар ю йигэ нүжынлэ, та хэли шыэр нян лющеди бинли. Дэфу ду

ба та кангуэ; йинви кан тади бин та ба жяниди йиче цэ-
бый ду сыхуандёли, кэсы сый ду ба тади бин мө канхо.
44 Та лян жынму йидарни лэ, зу зэ Эрседи жибый хуту ба
Тади йишонди бянбянзы дулийихар; тади ше донвөр бу
тонли. 45 Эрса вынли:

– Сый ба Вэ дулийихар?

Дажя ду мө жын. Нэхур Пётр ги Эрса фэди:

– Вуста, Ни кан! Ни жувиди жынму дуэдихын, таму ба
Ни жичүдини.

46 Кэсы Эрса фэди:

– Йигэ жын жён ба Вэ дулийихар, йинцысы Вэ жүэму-
ди, Вэди йидяр лилён да Вэди шынзы литу чүчили.

47 Нэгэ нүжын минбыйли, ба тади ганбан кэжя жыдоли;
та жанди, лэ гуйдо Эрседи мянчян, зэ дажяди лянмянчян
ги Эрса фэли, виса та ба Эрса дулийихар зэмусы тади
бин замужя йиха холи. 48 Эрса ги та фэди:

– Вэди нүр! Ниди щинфу ба ниди мин жүхали! Ни
пиннан-вусы хуэйчи!

49 Эрса фэ жыгэ хуади сыхур, йигэ жын да нэгэ да йи-
мамуди жяни лэ, фэсы:

– Ниди нүр кэжя вучонли. Ни виса мафан Вустани?

50 Эрса ба жыгэ тинжян, ги нэгэ да йимаму фэди:

– Ни бэ хэпали, ни гуон щинфу, ба ни нүрди мин ян-
дин жүхани!

51 Эрса доли Иаирди жяниди сыхур, Та чүгуэ Пётр,
Ягүбэ, Йихия зэмусы вавади нён-лозы бу жё данлинди
жынму лян Та йидарни жинчи. 52 Нэтарди жынму ду ви
жыгэ нүр вава дакү-луанхудини. Эрса фэди:

– Ниму бэ күли! Жыгэ вава мө вучон, та фижэдини.

53 Таму ду цыщёли Эрсали, йинцысы таму жыдони вава
кэжя вучонли. 54 Кэсы Эрса ба вавади шу жуачү, зу ги та
фэди:

– Вэди ва, ни занчелэ!

55 Нэгэ вавади луэхур хуэйлэ, та донвөр зу занчелэли.
Эрса жё жынму ги вава ба чыди гигини. 56 Вавади нён-ло-
зы ду чёчихали. Эрса хан ги таму гиди фынфу, ба жыгэ
сычин ги сый ду бу жун фэ.

Эрса ба шыэргэ Апостолму дафачили

(Мф 10:5-15; Мк 6:7-13)

9 Эрса ба шыэргэ Апостолму жёдо гынчян, ги таму ба лилён дэ бынсы гигили, жё таму ба йиче зонгуй ганчүчи-ни зэмусы ба жынмуди бин канхони. ²Йиху Эрса ба таму дафа зудёли, жё таму чи ба Анлахү Гуйжяди Хо Шинвын чуанжёни зэмусы жё ба бинжынму канхони. ³Эрса ги таму фэди:

– Ниму зу лүди сыхур, ба са дунши ду бэ нали: бэ на жүгунзы, бэ на тибо, бэ на мэмэ; бэ на чян, бэ на лёнгэ хансанзы. ⁴Ниму дан доли булүн нагэ фонзыли, зу шындо нэтар йичыр до ниму зуди сыхур. ⁵Нэтарди жынму дан ба ниму бу жешули, ниму зу да нэгэ чынпуни зудё, ба ниму жүэшонди тў түдө, зушён ги таму ю зуйди йигэ жихо йиён.

⁶Манламу чүчи, ба мый йигэ шёнжуон зужуангуэлэ, ба Анлахүди Хо Шинвын чуанжёли, зэ сыжу-бахани ба жынмуди бин канхоли.

Ирод хуоншон бусүщинхали

(Мф 14:1-12; Мк 6:14-29)

⁷Галилея дифонди хуоншон Ирод ба Эрса ганхади йиче сычин тинжян, щинни бусүщинхали, йинцысы ющезы жынму фэди:

– Жысы щижынмуди Йихия кэ хуэли.

⁸Ющезы жынму фэди:

– Жысы Илияс шынжын лэли.

Хан ющезы жынму фэди:

– Жысы йигэ зочянди шынжын кэ хуэли.

⁹Ирод фэди:

– Вэ ба Йихияди ту кандёли, кэсы жыгэ Жынсы сый?

Вэ тинжян Та либянди хошо сычинли.

Ирод щён жянийхар Эрсани.

Эрса жё вучян жын чыболи

(Мф 14:13-21; Мк 6:30-44; Йих 6:1-13)

¹⁰Апостолму хуэйлэ, зу ба таму ганхади сычин йиче ду ги Эрса фэли. Эрса лян таму йидарни туту-мэмэди жочү

Вифсаида щёнжуонни зудёли. ¹¹ Жынму ба жыгә жыдо, зу гыншон Та зули. Эрса ба таму жейинли, зу ги таму жёнли Анлахұди Гуйжяли зэмусы ба бушинхади жынму канхоли.

¹² Хушон манламу до Эрса гынчян, зу ги Та фәди:

– Ни ба жынму фонкә, жё таму гәжя до жувиди щёнжуонни чи, ба гәжя занди вәр дэ чыди зойихарчи, йинцысы жыгә дифонсы йигә кунтан.

¹³ Кәсы Эрса ги таму фәди:

– Ниму ги таму ба чыди гиги!

Таму ги Эрса фәди:

– Вәму цә ю вугә мәмә лян лёнгә йүни. Нандый Ни жё вәму чи, ги жыщезы жынму ба чыди мәшон, жё таму чынима?

¹⁴ Жынму литу ю вучян нанжынмуни.

Эрса ги Тади манламу фәди:

– Жё жынму йибазы-йибазыди зуәха, мый йибазы бонжер ю вушыгә жынни.

¹⁵ Манламу зу жочұ Тади хуа ганли, жё жынму ду зуәхали. ¹⁶ Эрса ба вугә мәмә зэмусы лёнгә йү начелә, жочұ тяншон канлийихар, ги Анлахұ долигә ше, ба мәмә дә йү быйкә ги манламу гигили. Манламу зу ги дажя фынгили.

¹⁷ Дажя чыли, ду чыболи. Манламу ба шынхади мәмә дә йү жуонли шыэргә да куонзы.

Пётр фәди Эрсасы Мәсих

(Мф 16:13-21; Мк 8:27-29)

¹⁸ Йихуэй Эрса йигәр чито Анлахұди сыхур, манламу кан Та ләли. Эрса вын тамули:

– Данлинди жынму фәди, Вәсы сый?

¹⁹ Таму хуэйдади фәсы:

– Ющезы жынму фәди, Нисы щижынмуди Йихия; ющезы жынму фәди Нисы Илияс шынжын; хан ющезы жынму фәди Нисы йигә кә хуәлиди зочянди шынжын.

²⁰ Эрса кә вынли тамули:

– Ниму фә, Вәсы сый?

Пётр хуэйдади фәсы:

– Нисы Анлахұди Мәсих.

²¹Эрса ги таму гиди ниннинди фынфу, ба жыгэ ги сый ду бу жун фэ.

²²Та хан фэди:

– Аданди Хубый яндин ё шу хошо кунанни. Яхүтиди ложынму, да ахунму лян нянжинжынму ду ба Та бу жынни; йиху ба Та дасылиди ди сан тян, Та кэ хуэни.

Замужя нын гыншон Эрса зунн

(Мф 16:24-28; Мк 8:27 – 9:1)

²³Эрса ги дажя фэди:

– Сый дан щён гыншон Вэ зу, та ё ба гэжя вондөни зэмусы, лян Вэ йиён, мый йитян вонщөнди ба гэжяди мин жүшонни*, нэхур цэ нын гыншон Вэ зу. ²⁴Йинцысы сый щён ба гэжяди мин жүха, та ба тади мин хэни. Кэсы ви Вэ ба гэжяди мин жүгиди жын ба тади мин жүхани. ²⁵Жынму дан ба жыгэ дун-я дыйшонли, кэсы ба гэжяди мин хэли, ги тамушон ю са хони? ²⁶Сый дан хэщю Вэ дэ Вэди хуа, Аданди Хубый зэ Та Дадади гуонлөн литу лян Тади Тянщянму йидарни лэди сыхур е хэщю нэгэ жынни. ²⁷Вэ ги ниму фэ шыхуа, жытар занди жынму литу ющезы жынни, таму вучонди зычян ба Анлахү тяншонди Гуйжя долэди канжянни.

Эрсади ёнзы гэбянли

(Мф 17:1-8; Мк 9:2-8)

²⁸Эрса ба жыщезы хуа фэдэ, гуэли ба тянли. Та лян Пётр, Йихия дэ Ягүбэ йидарни шонли йигэ саншон, чито Анлахү чили. ²⁹Эрса чито Анлахүди сыхур, Тади ёнзы гэбянли; Тади йишон бянчын быйбырдили зэмусы сакэ гуонлөнли. ³⁰Мынмынди лёнгэ жын лэ лян Эрса фэкэ хуали, жы лёнгэ жынсы Муса шынжын лян Илияс шынжын. ³¹Таму зэ гуонлөн литу лян Эрса толүнли вонху Та зэ Иерусалим чынпунни ё вучонди сычинли. ³²Нэхур Пётр лян тади ляншуму ду фикөдини. Таму щинлэ, ба Эрса

* ^{9:23} Йижү лян йижү фангуэлэди: «Та ё мый йитян ба гэжяди муту шызы нашонни».

сакэди гуонлён зэмусы лян Та йидарни занди лёнгэ жын ду канжянли. ³³Нэ лёнгэ жын да Эрса гынчян зудёди сыхур, Пётр ги Эрса фёди:

– Вуста, вөму шындо жытар ходихын! Жё вөму да сангэ вөпынзы: ги Ни йигэ, ги Муса шынжын йигэ зэмусы ги Илияс шынжын йигэ.

Пётр гэжя шызэ бу жыдо та фэ са хуадини. ³⁴Та хан фө-хуади сыхур, йикуэр йүнцэ ба таму зонянли. Нэ йикуэр йүнцэ до манламу гынчянди сыхур, таму ду хэли пали. ³⁵Мынмынди да йүнцэ литу чүлэли йигэ шынчи фёди:

– Жысы Вэди Эрзы, Вэ ба Та жянчүлэли. Ниму ё тин Тади хуани!

³⁶Нэгэ шынчи тинбужянли; гуон Эрса йигэр зэ нэтар зандилэ. Нэжитян манламу мэ чүшын, ба таму канжянди йиче сычин ги сый ду мэ фө.

Эрса ба кэлон литу ю зонгуйди вава канхоли

(Мф 17:14-18; Мк 9:14-27)

³⁷Ди эр тян таму да саншон халэди сыхур, хошо жынму лэ ба Эрса жейинли. ³⁸Йигэ жын мынмынди да жынму донжунни ханди фёди:

– Вуста, вэ читоди жё Ни ба вэди эрзы канйихарни; тасы вэди луэмур йигэ эрзы! ³⁹Зонгуй чинчир ба та жуачү, та дашын хандини; зонгуй ба тади жин жүчүди сыхур, жё тади зуйни тонди бый мэзы; бутынди ба та жэмэди, бу жё та хуанйихар! ⁴⁰Вэ читоли Ниди манламу ба жыгэ зонгуй ганчүчини, кэсы таму ба жыгэ сычин мэ дый ган.

⁴¹Эрса фёди:

– Ниму жы йибыйзы мэю шинфуди, ганха хасычинди жынму! Вэ лян ниму йидарни хан ё шын дуэшо гунфуни? Вэ ба ниму хан ё жыннэ дуэшо сыхурни?

Йиху Та ги нэгэ жын фёди:

– Ни ба вава линдо жытар лэ!

⁴²Нэгэ вава лэди сыхур, зонгуй ба та эрдо дихали, ба тади жин жүчүли. Эрса ги нэгэ зонгуй гиди ниннинди фынфу, зу жымужя ба вава канхоли, ба та ги та дада гигили.

⁴³Дажя йинви Анлахүди да лилён ду чөчихали.

Эрса ба Та гэжя вонху вучонди зозор ди эрбян фэли

(Мф 17:22-23; Мк 9:30-32)

Дажя йинви Эрса ганхади йиче сычин хан чёчиди сыхур, Эрса ги Тади манламу фэди:

– ⁴⁴ Ниму ба Вэ ги ниму фэди хуа бэ вондэли: Ба Вэ, Аданди Хубый, вонху ги жынмуди шуни гигини.

⁴⁵ Манламу ба жыгэ хуади йисы мэ дун, йинцысы жыгэди йисы бу минщян, таму бу минбый. Кэсы таму ба жыгэ хуа либян мэ ган вын Эрса.

Сыйсы дин видади?

(Мф 18:1-5; Мк 9:33-37)

⁴⁶ Манламу толүнли йигэ вынти: таму литу сыйсы дин видади? ⁴⁷ Эрса ба таму щинниди сылён жыдоха, зу ба йигэ вава зожуэ, жё та зандо Та гынчянли. ⁴⁸ Йиху Эрса ги таму фэди:

– Сый дан ви Вэди минзы ба жымужяди йигэ вава жешуха, та зу ба Вэ жешухали. Сый ба Вэ жешухали, та ба Вэ дафалэди Дада жешухали. Ниму литу сыйсы дин щёди, та зусы дин видади.

«Сый дан бу фандуй заму, та зусы занчын замуди»

(Мк 9:38-40)

⁴⁹ Йихия ги Эрса фэди:

– Вуста! Вэму жянли йигэ жын, та чечү Ниди минзы ба зонгуй ганчүчили. Вэму ба та донли, йинцысы та мэ суйшон вэму зуди.

⁵⁰ Эрса хуэйдади фэсы:

– Ниму бэ донгуа тали, йинцысы сый дан бу фандуй заму, та зусы занчын замуди.

Самария дифоншонди жынму ба Эрса мэ жешу

⁵¹ Эрса шон тянди жызы куэ зу дони, Та нансуанхади вон Иерусалим чынпуни чини. ⁵² Эрса ба жынму дафади, жё туни зуни. Таму доли Самария дифоншонди йигэ щёнжуонни, вонщёнди ги Эрса ба йиче ду шөлүхани. ⁵³ Кэсы

нэгэ дифоншонди жынму ба Эrsa мa жешу, йинцысы Та вон Иерусалим чынпуни чидини. ⁵⁴Тади манламу Ягүбэ лян Йихия ба жыгэ сычин канжян, зу фэди:

– Жонгуйди! Ни шён жё вөму ба тяншонди хуэ хан халэ ба таму шодёнима?

⁵⁵Эrsa жуангуэлэ, донгуали тамули. ⁵⁶Таму дажя донвөр зули данлинди шёнжуоннили.

Шён гыншон Эrsa зуди жынму

(Мф 8:19-22)

⁵⁷Таму зу лүди сыхур, йигэ жын лэ, ги Эrsa фэди:

– Ни булүн до натар чи, вэ е ба Ни гыншонни.

⁵⁸Эrsa ги та фэди:

– Ехүзы ю дунни, чёр е ю вэвэзыни, кэсы Вэ, Аданди Хубый, мөю фижэди вөр.

⁵⁹Эrsa хан ги данлинди йигэ жын фэди:

– Ни гыншон Вэ зу.

Кэсы нэгэ жын фэди:

– Жонгуйди! Ни жё вэ шян хуэйчи, ба вэ дадади мэти сундө.

⁶⁰Эrsa ги та фэди:

– Ни жё вонжынму чи ба таму вонжынди мэти сундөчи! Ни гэжя ё чи ба Анлахү Гуйжяди Хо Шинвын чуанжёчини!

⁶¹Хан йигэ жын фэди:

– Жонгуйди! Вэ шён гыншон Ни зуни, кэсы Ни жё вэ шян хуэйчи ги вэ жяниди жынму фэ йигэ «хозэди» хуа!

⁶²Кэсы Эrsa ги та фэди:

– Сый дан ба шу гэдо лихуашон вон хуту кан, нэгэ жын ги Анлахү тяншонди Гуйжя мөю хочү!

Эrsa ба чишы эргэ манламу дафачили

Ю Жыгэди йиху, Эrsa Жонгуйди хан ба данлинди чишы эргэ жын жанчүлэли, ба таму лёнгэ жынжя йибазы-йибазыди дафачили; жё таму туни зудо Та ё гуэди мый йигэ чынпу лян данлинди дифоншонни. ²Эrsa ги таму фэди:

– Шучын дуэдихын, кэсы зүхуэди жынму шодихын. Йинви жыгэ, ниму ё чито шучынди жүжынни, жё та ба

зүүхуэди жынму дафачи, шу тади шучынчини. ³Ниму чи! Вэ ба ниму зушён ба ёнгозыму вон лон чүнни йиён дафачини. ⁴Ниму бэ на жябозыли, бэ на тиболи; бэ на хэли; лүшон е бэ занха вынху жынмули. ⁵Ниму дан доли булүн нагэ фонзынили, щянтуни ё фэни: «Ги жыгэ фонзы панвон пиннан!» ⁶Нэтар дан ю щинэ тэпинди жынли, ниму панвонхади пиннан зу шындэ нэгэ жыншонни; нэтар дан мэю жымужяди жынли, нэгэ пиннан зу хуэйдо нимушонни. ⁷Ниму ё зэ нэгэ фонзыни жўни; нэтарди жынму ги ниму ги са, ниму зу ё чы сани, хэ сани, йинцысы зүүхуэди жынму шызэ жыгў ба таму зынхади чян дыйшонни. Ниму да йигэ фонзы вон данлинди фонзыни бэ зули. ⁸Ниму дан доли булүн нагэ чынпунили, нэтарди жынму дан ба ниму жешули, ги ниму ги са чыди, ниму зу чы са. ⁹Ниму ба нэгэ чынпуниди бинжынму ё канхони, ги таму ё фэни: «Анлахў тяншонди Гуйжя ли ниму жиндихын!» ¹⁰Ниму дан доли булүн нагэ чынпунили, нэтарди жынму дан ба ниму бу жешули, ниму зудо да хонзыни зу фэ: ¹¹«Вэму ба ниму чынпуни жандо вэму жўэшонди тў е ги ниму тудэни, жё ниму жыдоха, Анлахў тяншонди Гуйжя ли ниму жиндихын!» ¹²Вэ ги ниму фэдини, Анлахў ги жынму дин зуйди нэйтян, Содом чынпуниди жынму шуди зуй би нэгэ чынпуниди жынму шуди зуй яндин ё чинщерни!

*Виса жигэ щёнжуонниди жынму
кэляндихын*

(Мф 11:20-24)

– ¹³Хоразин щёнжуон, ни дуэму кэлян! Вифсаида щёнжуон, ни дуэму кэлян! Вэ зэ ниму донжунни щянхади кэрамэти дан зэ Тир лян Сидон чынпуни щян, нэтарди жынму зозор ба цўмабу йишон чуаншон, зуэдо хуэй литу, зыфэ таму шушин, кэжя ба гэжяди гўнахар жынли! ¹⁴Анлахў ги жынму дин зуйди нэйтян, Тир лян Сидон чынпуниди жынму шуди зуй би ниму шуди зуй яндин ё чинщерни! ¹⁵Капернаум щёнжуон! Нандый ни шондо тяншонни-ма? Ни яндин ё дедо дуэзэхэ кын литуни!

¹⁶ Эrsa хан ги Тади манламу фэди:

– Сый дан тинли нимуди хуали, та зу тин Вэди хуадини; сый дан ба ниму бу жешули, та зу ба Вэ бу жешу; сый дан ба Вэ бу жешули, та зу ба Вэ дафалэди Дада бу жешу.

Чишы эргэ манламу хуэйлэли

¹⁷ Зочян дафачиди чишы эргэ жын гошинди хуэйлэ, ги Эrsa фэди:

– Жонгуйди, вэму чечү Ниди минзы ги фынфуди сыхур, зонгуйму ду тин вэмуди хуадини!

¹⁸ Эrsa ги таму фэди:

– Вэ жянли: иблис зущён шандянди йиён да тяншон дехалэли. ¹⁹ Ниму тин! Вэ кэжя ги ниму ба чончун дэ щезы на жүэ тади бынсы гигили, е жё ниму ба дүшманди йиче лилён дабэни; сыса ду бу нын хэ ниму. ²⁰ Кэсы йинви зонгуйму тин нимуди хуа, ниму бэ гошинли. Ниму йинви ба ниму гэжяди минзы зэ тяншон кэжя щехалиди ё гошинни.

Эрсади гошин

(Мф 11:25-27; 13:16-17)

²¹ Жыхур Эrsa ба Анлахүди Рух жешуха, зу гошинди фэди:

– Вэди тяншонди Ада! Нисы чүан дун-яди Жонгуйди! Вэ ба Ни куажёнди, йинцысы Ни бусы жё ю эргилиди, щичүэхади жынму, кэсы жё мэ щичүэхади жынму ба жыщезы сычин жыдоли. Дуйдини, Вэди Ада, жысы Ни щинэди вонщён! ²² Вэ Дада ги Вэ ба йиче ду гигили. Чүгуэ Дада, сый ду бу жыдо Эрзысы сый; чүгуэ Эрзы дэ Та щён жё сый жыдоди, сый ду бу жыдо, Дадасы сый.

²³ Эrsa жочү манламу жуангуэлэ, туту-мэмэди ги таму фэди:

– Йинцысы ниму канжян жыщезы сычин, ниму дуэму гошин! ²⁴ Вэ ги ниму фэ, хошо шынжынму лян хуоншонму вонщёнли ба ниму канжянди йиче сычин канжянни, кэсы таму мэ канжян; таму хан вонщёнли ба ниму тинжянди йиче сычин тинжянни, кэсы мэ тинжян.

«Сыйсы вэ гынчянди жын?»

²⁵ Нэтар ю йигэ жыдо жёмын фалүди вусталэ. Та занчелэ, щён ба Эрса зыянийхар, зу фэди:

– Вуста! Йинви жё вэ йинавар хуэ, вэ ё зў сани?

²⁶ Эрса ги та фэди:

– Фалүшон щедисы са? Ни зэ нэтар нян са хуадини?

²⁷ Нэгэ жын хуэйдади фэсы:

– Фалүшон щедисы: «Ни лян ниди йичеди щин, йичеди жиншын, йичеди щинжин, йичеди эргили ба ниди Жонгуйди Анлахў ё щинэни» зэмусы «Ни ба ни гынчянди жын, зущён гэжя йиён, ё щинэни».

²⁸ Эрса ги та фэди:

– Ниди хуэйда дуйдини. Ни дан жымужя ган, зу йинавар хуэни.

²⁹ Нэгэ фалүди вуста щён пэщё тади вынтини, зу вынли Эрсали:

– Сыйсы вэ гынчянди жын?

³⁰ Эрса фэди:

– Йигэ жын да Иерусалим чынпу вон Иерихон чынпуни зуди сыхур, мынмынди пынжянли зыйкумули. Таму ба нэгэ жынди йишон туэдё, ба та дади бансылахуэди зу эрдо нэтарли. ³¹ Нэгэ сыхур йигэ яхўтиди ахун зэ нэгэ лўшон зудилэ. Та ба нэгэ жын канжян, зу зугуэчили. ³² Лян жыгэ йиён, йигэ левитжын зэ нэгэ дифоншон зудилэ; та вон чян чи, ба нэгэ жын канжян, е зугуэчили. ³³ Линийрни йигэ Самария дифоншонди жын зэ нэтар зудилэ. Та ба нэгэ жын канжян, тади щин ванли. ³⁴ Та до нэгэ жынди гынчян на чин-ю дэ путожю ба тади шон мэли, ба шон бочў, жё нэгэ жын чидо гэжяди лүлүзышон, ладо йигэ кифонзынили, зэ нэтар жоканли тали. ³⁵ Ди эр тян, та ба лёнгэ йинчян начўлэ ги кифонзыди жонгуйди гиги, зу фэди: «Вэ чито ни ба нэгэ жын жоканйхар, ни дан дуэ хуа чянли, вэ хуэйлэди сыхур, ба жыщезы чян ги ни е хуангини».

³⁶ Эрса зу вындини:

– Ни сылёнйхар, жы сангэ жын литу сый доли нэгэ пынжянли зыйкумуди жын гынчянли?

³⁷ Нэгэ жёмын фалүди вуста хуэйдади фэсы:

– Шинванлиди, ги та бонли монди нэгэ жын зусы та гынчянди жын.

Эрса зу фэди:

– Дан жымужяли, ни чи, е зу жымужя ганчи!

*Эрса зэ Марфа лян Мариамди жяни
донли кили*

³⁸ Эрса лян Тади манламу зу лүди сыхур, доли йигэ щён-жуоннили. Нэтар ю йигэ нүжынлэ, тади минзысы Марфа; та зэ тади жяни ба Эрса жейинли. ³⁹ Марфа ю йигэ мый-мыйни, минзы жёди Мариам. Мариам лэ, зуэдо Эрса Жонгуйди жүэ гынчян, тинли Тади хуали. ⁴⁰ Марфа йинви монди ган хошо сычинди, до Эрса гынчян зу фэди:

– Жонгуйди! Вэди мыймый жё вэ йигэр ган жымудуэ сычиндини, Ни виса бу гуанщян? Жё та лэ ги вэ бонйихар!

⁴¹ Эрса Жонгуйди ги та хуэйдади фэсы:

– Марфа! Марфа! Йинви ни цошин хошо сычиндини, ни хуонмондихын. ⁴² Кэсы жын шызэ ёдисы йигэ сычин. Мариам ба жыгэ дин ходи сычин жанчүлэли; ба жыгэ сычин да тади шуни йүнзун дуэбудё.

Замужя ё чито Анлахүни

(Мф 6:9-13; 7:7-11)

11 Йихуэй Эрса зэ йигэ дифоншон читоли Анлахүли. Та читован, йигэ манла ги Та фэди:

– Жонгуйди! Ни ба вэму жёйихар, замужя ё чито Анлахүни, зущён Йихия шынжын ба гэжяди манламу жёли йиён.

² Эрса ги таму фэди:

– Ниму чито Анлахүди сыхур,
ё жымужя фэни:

Ада!

Вэму панвонди жё жынму ба Ниди гуйжун минзы ду тэнэни;

Вэму панвонди жё Ниди Гуйжя куэ до дун-яшон лэни.

³ Жё Ни ба мый йитян вэму чыди мэмэ ги вэму гигини,

⁴ Жё Ни фоншэ вэмуди гүнахарни,

йинцысы вэму ба нанвили вэмуди йиче жынмуди
гўнахар е фоншэни;

Ни бэ жё вэму шу жынбучўди зыянли.

⁵Йиху Эрса ги Тади манламу фэди:

– Ниму литу йигэ жын дан бан-ени до тади ляншуди
жяни, ги та фэ: «Вэди ляншу, ни ги вэ же сангэ мэмэ;
⁶вэди йигэ ляншу гуэ лўди сыхур, до вэди жяни лэли. Вэ
мэю са чыди ги та ги». ⁷Нэгэ ляншу дан да фонзыни
хуэйдади: «Ни бэ мафан вэли, вэ ба мын кэжя гуанчўли,
вэди вэму лян вэ йидарни е шонли кон фижэчили, вэ бу
нын челэ ги ни ги сачи». ⁸Вэ ги ниму фэ, та дан бу челэ
ги тади ляншу ги мэмэ, тади ляншу дан ниннинди чито
тали, нэхур та хан ё челэ, ба нэгэ жын ёди йиче дунши ду
ги та гигини. ⁹Йинви жыгэ Вэ ги ниму фэ, ниму дан чи-
толи, зу дыйшонни; ниму дан зокэли, зу зожуэни; ниму
дан коли мынли, ги ниму ба мын зу кэкэни; ¹⁰йинцысы
мый йигэ читоди жын дыйшонни; мый йигэ зоди жын
зожуэни; ги мый йигэ ко мынди жын ба мын кэкэ-
ни. ¹¹Зэсы ниму литу йигэ дадади эрзы дан ё йү, нандый
та дада ба чончун ги та гигинима? ¹²Хуэйжэсы дан ё жи-
дан, ба щезы ги та гигинима? ¹³Нимусы дэ жынму еба,
кэсы нын ба хо дунши ги нимуди эрнүму гиги; нимуди
тяншонди Дада нандый ба Тади Рух ги чито Тади жынму
бу гима?

Эрса зэмусы Веельзевул

(Мф 12:22-30; Мк 3:20-27)

¹⁴Эрса да йигэ ябади кэлон литу ба зонгуй ганчўчили;
зонгуй чўчи, нэгэ жын зу фэкэ хуали. Жынму ду тэ чёчи-
хали. ¹⁵Кэсы таму литу ющезы жынму фэди:

– Та на Веельзевул гуйвонзыди чўанли ба зонгуй ганчў-
чидини!

¹⁶Хан ющезы жынму е щён зыянийхар Эрсани, жё Та да
тяншон ги таму шян йигэ кэрамэтини. ¹⁷Эрса ба тамуди
сылён жыдоха, зу ги таму фэди:

– Булүн нагэ гуйжя дан гэжя фынкэ, дан гэжя лян гэжя
дажон, нэгэ гуйжя яндин лансандэни. Булүн найижязы

дан гэжя фынкэ, дан гэжя лян гэжя дажон, нэ йижэзы е яндин лансандэни. ¹⁸ Жымужя канчи, иблисди гуйжя дан гэжя фынкэ, дан гэжя лян гэжя дажон, та замужя нын занчүни? Ниму фэ Вэ на Веельзевулди чүанли ба зонгуй ганчүчидини. ¹⁹ Жыгэ дан жымужяли, нимуди эрэыму лян сый ба зонгуй ганчүчини? Йинви жыгэ нимуди эрэыму зыфэ нимуди цуэдини! ²⁰ Вэ дан лян Анлахүди лилён ба зонгуй ганчүчидини, жыгэ зыфэдисы Анлахүди Гуйжя кэжя доли ниму донжуннили.

²¹ Ю хошо жүнчиди, да личиди йигэ жын ба гэжяди жяни бохүди сыхур, тади жяниди дунци мэю даншүан. ²² Кэсы би та хан лилёндади йигэ жын дан лэ, ба та дабэ, зу ба та кочүди куйжя лян до ду чёншонни, ба тади цэбый фынгини. ²³ Сый дан бу лян Вэ зэ йидарни, та фандуй Вэни; сый дан бу лян Вэ йидарни шужю, та лонфидини.

Зонгуй хуэйлэли

(Мф 12:43-45)

²⁴ Зонгуй да жынди кэлон литу чүчиди сыхур, зугуэ гантан, мэю фиди дифон, зо та хуанди вэрчини; мэ зожуэди йимяр, зу фэди: «Вэ йүанхуэй зэ зочян жүхадифонзыни чини!» ²⁵ Та хуэйлэ, канжян дажэхади, ганжинди фонзыли. ²⁶ Нэхур та чи, ба чигэ би та хан дэди гуйму дэхуэйлэли; таму ду лэ йидарни жүхали. Жымужя фэчи, нэгэ жынди йихуди гуонийин би зочянди гуонийин йүэщин хани.

Сый ю жынышэди гощинни?

²⁷ Эрса фэ жыщезы хуади сыхур, йигэ нүжын да жынму донжунни дашын ги Та фэди:

— Ба Ни зэ дүзыни хуэди зэмусы ба Ни нэхади нэгэ нүжын дуэму гощин!

²⁸ Эрса фэди:

— Дуйдини, кэсы тин Анлахү хуади зэмусы зунхү жыгэ хуади жынму хан ю йүэщин дади гощинни!

Жынму ёли кэрамэтили

(Мф 12:38-42; Мк 8:12)

²⁹ Нэгэ сыхур жынму шудо Эрседи жувинили. Эrsa кә фәтуәли:

– Жы йибыйзы жынму дуәму дә! Таму ё чёчи жихони, кәсы чўгуә Юнус шынжынди жихо ги таму бу шян данлинди чёчи жихо. ³⁰ Юнус замужя ги Ниневия чынпуниди жынму чынха йигә чёчи жихоли, зу жымужя Вә, Аданди Хубый, ги жы йибыйзы жынму е чынха йигә чёчи жихони. ³¹ Анлахұ ги жынму дин зуйди нәйитян, нанфонди нүхуоншон занчелә ги жы йибыйзы жынму ё динзуйни, йинцысы та да йүанйүанди дифоншон гуәлә ба Сульманә хуоншонди ю эргилиди хуа тинли. Ниму кан, жытар ю би Сульманә хан видади сычинни! ³² Анлахұ ги жынму дин зуйди нәйитян, Ниневия чынпуниди жынму занчелә ги жы йибыйзы жынму ё динзуйни, йинцысы таму ба Юнусди чуанжә тинжян, ба гэжяди гүнахар ду жынли. Ниму кан, жытар ю би Юнус хан видади сычинни!

Шынзыди дынзан

(Мф 5:15; 6:22-23; Мк 4:21; Лк 8:16)

³³ Сый дан дянжуә юдынзан, ба та вон жё литу бу цон, вон гуә диха е бу гә. Та ба юдынзан гәдо дынзанди тэзышон, жё жинләди жынму канжян гуонләнни. ³⁴ Ниди нянжин зуцән шынзыди дынзан йиән. Ниди нянжин дан хо, хуншын зу лёнләрдини; ниди нянжин дан ха, хуншын зу хинандини. ³⁵ Йинви жыгә, ни ё щёщинни, бу жё ни литуди гуонлән бянчын хинанли. ³⁶ Ниди хуншын дан лёнләрди, йидяр хинан е мәю, та зу шян гуонләнни, зуцән дынзанди гуонлән ба ни жоләнди йиәнни.

***Эrsa пипинли фарисейжынму
ляя жёмын фалүди вустамули***

(Мф 23:1-36; Мк 12:38-40; Лк 20:45-47)

³⁷ Эrsa ба жыщезы хуа фәван, йигә фарисейжын ба Та чиндо жяни чы фанчини. Эrsa жинчи, зу зуәхали. ³⁸ Жыгә

фарисейжын канжян Эрса чыфанди зычян мѣ ши шу, зу чѣчихали. ³⁹Эрса Жонгуйди зу ги та фѣди:

– Ниму фарисейжынму ба ванванзы лян дезыди вѣту щиди ганжиндихын, кѣсы нимуди щин жишыдихын зѣмусы жичудихын. ⁴⁰Нимусы мынтуму! Нандый Анлахѹ ба йиче вѣтуди дунши зуѣха, ба литуди мѣ зуѣхама? ⁴¹Ниму гуон ъ ба ванванзы лян дезы литуди дунши ги чѹнжын сунгини; зу жымужя, йиче дунши до нимушон дусы ганжинди. ⁴²Ниму фарисейжынму дуѣму кѣлян! Ниму на бѣхѣ, щѣхунщѣн лян данлинди щѣн видоди цо ги Анлахѹ е чѹ зѣкатидини еба, кѣсы ба гундо зѣмусы дуйчѹ Анлахѹди щинѣ ду вондѣли. Ниму ба жыгѣ ъ ганни, ба нѣгѣ е бѣ вондѣли. ⁴³Ниму фарисейжынму дуѣму кѣлян! Йинцысы ниму зѣ синагога литу нѣ зѣ шонконзышон зуѣ зѣмусы нѣ жѣ жынму ги ниму зѣ гѣшон фѣ сѣляму. ⁴⁴Ниму дуѣму кѣлян! Йинцысы ниму лян канбучѹлѣди фынкын йиѣн: жынму зѣ шонту зудини, кѣсы бу жыдо жыгѣ.

⁴⁵Йигѣ жѣмын фалѹди вуста ги Эрса фѣди:

– Вуста, жымужя фѣди Ни ба вѣму е нанвили!

⁴⁶Эрса хуѣйдади фѣсы:

– Ниму жѣмын фалѹди вустаму е дуѣму кѣлян! Ниму ба жунди, нан быйди данзы гѣдо данлинди жынмуди жягуѣзышон, кѣсы ниму гѣжя лян йигѣ зыту е бу щѣн ба жыгѣ данзы дуйихар. ⁴⁷Ниму дуѣму кѣлян! Йинцысы ниму ги шынжынму щюгѣ гунбѣзыдини, кѣсы нимуди зѹзѹ-быйбый ба нѣщѣзы шынжынму ду дасыли. ⁴⁸Зу жымужя, ниму ги жыгѣ сычин донли гѹвали зѣмусы ги зѹзѹ-быйбый йиче ганхади сычин ду дайинли; таму ба шынжынму дасыли, ниму ги нѣщѣзы шынжынму щюгѣ гунбѣзыдини. ⁴⁹Йинви жыгѣ, Анлахѹди Эргили зочян фѣгуѣ: «Вѣ ба шынжынму лян Апостолму дафадо таму гынчянчини; кѣсы таму ба ющѣзы дасыни, ба ющѣзы жуйни». ⁵⁰⁻⁵¹Йинви жыгѣ, да зуѣзоха дун-яди сыхур, ба дасы шынжынму йичеди зуй ду ъ ги жы йибыйзы жынму динни, зусы да дасы Хабил шынжынди зуй йичыр до дасы Закария шынжынди зуй (ба Закария зѣ Иерусалим сыни зѣ шо гѹрбаниди жуѣзы лян гуйжунди вѣр донжунни дасыли). Дуйдини, Вѣ ги ниму фѣ, жы йибыйзы жынму йинви жыщѣзы йиче сычин яндин ъ шу зуйни! ⁵²Ниму

жёмын фалүди вустаму е дуэму кэлян! Йинцысы ниму ба кэ эргилиди цонфонди йүэсы нашонли, гэжя бу щён жинчи, е бу жё данлин щён жинчиди жынму жинчи!

⁵³⁻⁵⁴ Эrsa да нэгэ дифоншон зудёди сыхур, нянжинжынму лян фарисейжынму пудо Та гынчян, ги Та гили хошо нан вынти, щён зойихар Та фэцуэди хуа.

Фарисейжынмуди «жёмьян»

(Мф 10:26-27; Мк 8:15)

12 Нэгэ сыхур, мэфурди жынму шудо йидарнили; йигэ ба йигэ тадини. Эrsa щянтуни ги манламу фэди:

– Ниму ё щёщин фарисейжынмуди «жёмьянни», жы зу-сы бэ дон мунафикли. ²Мый йигэ бимиди сычин яндин щянчүлэни; жынму ба мый йигэ цонхади сычин ду жыдохани. ³Йинви жыгэ, жынму ба ниму зэ хинанни фэхади хуа зэ гуонлённи ду тинжянни; ба ниму зэ фонзы литу фэхади хуа жынму зэ фондинзышон чуанжёни.

Ё хэпа сыйни?

(Мф 10:28-31)

⁴Вэди ляншуму, ниму тин Вэ: ниму бэ хэпа нэщезы гуон ба нимуди шынзы дасыди жынму, йинцысы таму чү-гуэ жыгэ зэ бу нын хэ ниму. ⁵Вэ ги ниму фэ, ниму ё хэпа сыйни: ниму ё хэпа Анлахүни. Ба жынди мин дансы хэли, Анлахү ю чүанли ба нэгэ жын эрдо дуэзэхэ литуни. Дуйдини, Вэ ги ниму зэ фэ, ниму яндин ё хэпа Анлахүни! ⁶Ба вугэ мачёр на лёнгэ тунчян нын мэшон, кэсы Анлахү ба таму литуди йигэ мачёр ду бу вондэ. ⁷Та ба ниму туфади фур е жыдони. Ниму бэ хэпали, йинцысы ниму би хошо мачёр жычянди дуэ!

Зэ жынмуди мянчян ба Мэсих ё жынни

(Мф 10:19-20; 10:32-33; 12:32; Мк 3:28-29; 13:11)

⁸Вэ ги ниму фэ: сый дан зэ жынмуди мянчян ба Вэ жынли, нэхур Вэ, Аданди Хубый, зэ Анлахү Тянщянмуди мянчян ба нэгэ жын е жынни; ⁹сый дан зэ жынмуди мянчян ба Вэ бу жынли, нэхур Вэ, Аданди Хубый, зэ Анлахү Тянщянмуди

мянчян ба нэгэ жын е бу жын. ¹⁰Сый дан фэ дэцэ Адан Ху-
быйди хуали, ба тади жыгэ гўнахар фоншэни, кэсы сый дан
фэ дэцэ Анлахў Рухди хуали, ба тади жыгэ гўнахар бу фон-
шэ. ¹¹Жынму ба ниму линдо синагога литу хуэйжэсы линдо
линшужынму лян гуанжынму мянчянди сыхур, ниму бэ дан-
щин ги са хуэйдани, фэ сани, ¹²йинцысы нэгэ сыхур Анла-
хўди Рух ги ниму жётёни, жё ниму фэ сани.

Йигэ мынту ючянханди бифон

¹³Жынму литуди йигэ жын ги Эрса фэди:

– Вуста, Ни ги вэди гэгэ ги йигэ фынфу, жё та ба вэму
дада шынхади фугуй ги вэ фынги!

¹⁴Эрса хуэйдади фэсы:

– Вэди ляншу! Сый ба Вэ дафалэ, жё ги ниму дин зуйни
хуэйжэсы ба ниму жяниди фугуй фынкэни?

¹⁵Эрса хан ги дажя фэди:

– Ниму ё щёщинни, ниму бэ нэ фугуйли, йинцысы жын
ю дуэмудади фугуй еба, лян тади жыншыди мин мёю сыса
лянщи.

¹⁶Эрса ги таму хан жёнли йигэ бифон:

– Ю йигэ ючянханлэ; тади ди гили хошо шучын. ¹⁷Та
щинни зу сылёнкэли: «Вэ мёю гэ шучынди да цонфон. Жё
вэ замужя банни?» ¹⁸Та зу ги гэжя фэди: «Хо, вэ ба жү цон-
фон цыйдэ, ба дащерди щин цонфон щюгэха, ба лёншы лян
данлинди дунщи гэдо литуни. ¹⁹Нэхур вэ фэни: „Вэсы ю да
йүнчиди жын! Жыхур вэ юли хошо хо дунщили, ги вэ хын-
жинян ду гуни; жыхур вэ хуанни, хунчы-дахэни, гощинни!“»
²⁰Кэсы Анлахў ги та фэли: «Нисы мынту! Жиргэ хили, дан
ба ниди мин ёдэли, ба ни шэлүхади жыщезы фугуй ги сый
шынхани?» ²¹Жымужя фэчи, сый дан гуон ги гэжя шужю
фугуй, бу ги Анлахў шужю, та зу йү жымужяди сычинни.

Жынмуди цоцин дэ данщин

(Мф 6:25-34; 19-21)

²²Эрса ги Тади манламу фэди:

– Йинви жыгэ Вэ ги ниму фэ, ниму бэ цоцин сынхуэ-
шон ё чыди дунщи зэмусы шыншон чуанди йишон.

²³ Жынди мин би чыди гуйжунди дуэ; шынзы е би йишон гуйжунди дуэ. ²⁴ Ниму ба ловаму канйихар! Таму бу са жунзы, бу шу шучын, е мөю цонфон, Анлаху ги таму ги чыдидини. Кэсы ниму би чөр дуэму гуйжун! ²⁵ Ниму литу сый цошинди жё нын дуэ хуэ житяни? ²⁶ Ниму дан ба жыму щёди сычин ганбулё, виса цошин данлинди сычиндини? ²⁷ Ниму ба бый хэхуар канйихар, таму замуя жондини! Таму мө зү хуэди, е бу фын йишон, кэсы Вэ ги ниму фэ, зочян Сульманэ хуоншон чуанли дуэму хоканди йишон еба, ба тади йишон лян жымуяди йигэ хуар ду бу нын бийихар! ²⁸ Жиргэ тандони жончүлэди ехуар минтян дан гандё, ба таму эрдё хуэлу литу шодёдини еба, Анлаху ба таму дабанди тэ хокан. Дан жымуяли, нандый Анлаху ба йишон ги ниму бу гигима? Нимуди щинфу щёдихын! ²⁹ Йинви жыгэ, ниму бэ цошин нимуди чыхэ зэмусы бэ даншинли. ³⁰ Жыгэ дун-яшонди вэдожынму ба жыщезы дунщи ду зодини. Ниму тяншонди Дада жыдо ниму ё жыщезы дунщидини. ³¹ Ниму щянтуни ё ба Анлаху тяншонди Гуйжя зони, Анлаху зу ба жыщезы дунщи ги ниму ду гигини. ³² Нимусы щё йибазы жынму, ниму бэ хэпали, йинцысы нимуди Дада щён ба Тади Гуйжя ги ниму гигини. ³³ Ниму ба гэжяди йиче дунщи ду ё мэдёни, ба чян ги чүнжынму сангини; ги ниму гэжя ба лансанбудёди «жябозы» ё шөлүхани, ба жыншыди фугуй цондо Тяншонни. Нэтар ба нимуди фугуй сыйунбуван; йинцысы зыйвазы ба та тубудё, нэтар е мөю кэ йишонди чун. ³⁴ Нимуди фугуй зэ натар, нимуди щин е зэ нэтарни.

Кочүди зэмусы кобучүди хуэжиму

(Мф 24:45-51)

³⁵ Ниму са сыхур ду ё шөлүхони: ёни ба пидэзы жишон, дынзан литу ба лён жанжуэ, ³⁶ зущён хуэжиму ба тамуди жўжын дындини, та са сыхур да жехунди янщишон хуэйлэни. Жўжын хуэйлэ ко мынди сыхур, таму донвэр ги та ба мын ё кэкэни. ³⁷ Жўжын хуэйлэ дан канжян жыщезы хуэжиму мө дюдун, до тамушон дуэ гошин! Вэ ги ниму фэ шыхуа, нэхур жўжын жё таму зуэха чы фанни, гэжяди ёни

жиди дэзы фусы хуэжимуни. ³⁸Жўжын дан цыдѐли, бан-ени хуэйжэсы тьян лѐнди сыхур хуэйлэ, та дан ба хуэжиму мѐ дюдунди канжянли, до тамушон дуэ гошин! ³⁹Ниму ба жыгѐ ѐ жихани: зэсы йижэзыди жўжын дан жыдо зыйвазы са сыхур лэ ту дунщини, та яндин бу жѐ нѐгѐ зыйвазы ба мын далан жинчи. ⁴⁰Ниму са сыхур ду ѐ шѐлүхони, йинцысы ниму бу жыдо Аданди Хубый са сыхур лэни.

⁴¹Пѐтр фѐди:

– Жонгуйди! Ни ба жыгѐ бифон гуонсы ги вѐму фѐли-ма, хансы ги жынму е фѐли?

⁴²Жонгуйди фѐди:

– Сыйсы нѐгѐ кочўди, цунмин гуан жяди жын? Та жочў жўжынди йитуэ ба жяниди сычин гуандини, та зѐ йўнди сыхуршон ба лѐншы ги данлинди хуэжиму фындини. ⁴³Жўжын хуэйлэди сыхур, дан канжян жыгѐ хуэжи зу жы-музя ганди, до жыгѐ хуэжишон дуѐму гошин! ⁴⁴Вѐ ги ниму фѐ шыхуа, жўжын жѐ нѐгѐ хуэжи гуан тади йиче фугуйни. ⁴⁵Кэсы жыгѐ хуэжи зѐ щинни дан жымузя сылѐн: «Вѐди жўжын бу хуэйлэ жыму зо», нѐхур та ба данлин хуэжиму дѐ яхуанму дани, гѐжя лян чы дѐ хѐ зѐмусы хѐзуйни. ⁴⁶Мѐгуѐ-сы тади жўжын зѐ та бу дынди нѐйитян, та бу жыдоди сы-хур хуэйлэни. Жўжын жѐ тади жүѐ вонху жонхани, жѐ та лян данлинди кобучўди хуэжиму йидарни шу зуйни. ⁴⁷Жыгѐ хуэжи жыдо жўжын жѐ та ган сани, кэсы та ба жы-гѐ мѐ зў зѐмусы жочў тади жўжынди вонщѐн мѐ ган; йин-ви жыгѐ, ба та на бянзы жунжунди дани. ⁴⁸Данлинди хуэ-жи мѐ жыдо жўжын жѐ та ган сани, зу ганли ганбудыйди сычинли, ба та на бянзы чинщѐр дани. Анлахў ги сый гиди дуэ, зу да ташон ѐди е дуэ; Анлахў ги сый йитуѐди дуэ, зу да ташон читоди е дуэ.

Эрсасы фын жынмуди йинйир

(Мф 10:34-36; 16:2-3)

⁴⁹Вѐ лѐ, ги дишон ба хуѐ налэли. Вѐ дуѐму щѐн жѐ нѐгѐ хуѐ куѐ жуѐчелэни! ⁵⁰Вѐ яндин ѐ шу кўнанни, ба Вѐ яндин ѐ зѐ кўнан литу щини. Дынди шу жыгѐ кўнан, Вѐди щин дан-щиндихын! ⁵¹Ниму бѐ сылѐн Вѐ ги жыгѐ дун-я ба тѐпин

налэли. Вэ ги ниму фэ, Вэ бусы ба тэпин налэли, кэсы Вэ лэ жё жынку фынкэни. ⁵²Да жиргэ дашон, йижэзыди вугэ жынду фынкэни: сангэ фандуй лёнгэни, лёнгэ фандуй сангэни. ⁵³Дада лян эрзы фынкэни, эрзы лян дада е фынкэни; мама лян нүр фынкэни, нүр лян мама е фынкэни; пэпэ лян щифур фынкэни, щифур лян пэпэ е фынкэни.

⁵⁴Эрса ги жынку фэди:

– Ниму дан канжян щибонгэ ю йүнцэли, зу фэни: «Куэ щя йүни». Йү жыныды зу щяни. ⁵⁵Нанбонгэ гуа фынди сыхур, ниму е фэни: «Тянчи куэ жэни». Тянчи зу жэни. ⁵⁶Нимусы мунафикму, йинцысы ниму жыдо заму-жя цагуан дун-яди тынчини, наму виса ба жыгэ шыдэ канбучүлэ?

Лян дўшман ё хони

(Мф 5:25-26)

⁵⁷Ниму гэжя виса бу суан, нагэ сычин дуйдини? ⁵⁸Сый дан лян ни да гуансы, щён ги ни динзуйни, ни зэ лўшон зуди сыхур, гэжя ё на йичеди нынгу читоди жё та лян ни хони, бэ жё та ба ни ги вынгуансыди жынд жёгили, бэ жё вынгуансыди жынд ба ни ги яйи жёгили, бэ жё яйи ба ни ядо банфонзынили. ⁵⁹Вэ ги ни фэ, ни дан йичыр ба лин-йирди чян гиги, ни цэ да банфонзыни чўлэни.

Гўнахар зэмусы вучон

13 Нэгэ сыхур, нэтар йищезы жынку ги Эрса фэли, заму-жя Галилея дифоншонди жигэ жынд ги Анлахў жү гўр-баниди сыхур, Пилат ба таму дасыли. ²Эрса ги таму фэди:

– Йинцысы жыщезы Галилея дифоншонди жынку шу-ли зуйли, ниму зу сылэнди тамуди гўнахар би йиче дан-линди Галилея дифоншон жынкуди гўнахар дама? ³Вэ ги ниму фэ, жыгэ мэ дуйди. Ниму дан бу жынд нимуди гўна-харли, ниму е зу нэмужя вандёни. ⁴Силоамди го лу дедоди сыхур, ба шыбагэ жынд нясыли. Ниму сылэнди тамуди гў-нахар би данлинди зэ Иерусалим чынпуни жүди жынкуди гўнахар дама? ⁵Вэ ги ниму фэ, жыгэ мэ дуйди. Ниму дан бу жынд нимуди гўнахарли, ниму е зу нэмужя вандёни.

Бу же готянди инжирфу

⁶Йиху Эrsa ги таму жёнли йигэ бифон:

– Йигэ жын зэ гэжяди путо йүанзыни зэли йигэ инжирфу. Йихуэй та лэ щён зэ фушон зо готянни, кэсы мэ зо-жуэ. ⁷Нэхур та ги кан йүанзыди жын фэди: «Ни кан, вэ зэ жыгэ фушон кэжя сан нянли зо готяндени, кэсы ба са ду мэ зожуэ. Ни ба нэгэ фу кандёчи! Виса та быйкэр жан вәрдини?» ⁸Кан йүанзыди жын ги та хуэйдади фэсы: «Жў-жын, ни зэ дын йи нян, дынди вэ ба фуди жуви тў вайихар, ба фын шоншон. ⁹Минян фу хаба жени; зэ бу жели, нэхур ни зу ба та кандёчи».

*Эrsa ба ё гунхади йигэ нүжын
канхоли*

¹⁰Шанбэди нэйтян, Эrsa зэ йигэ синагога литу жётөли жынмули. ¹¹Нэтар ю йигэ нүжынлэ, зонгуй ба та начўдини. Нэгэ нүжын хэли шыба нянди бинли, тади ё гундини, та бу нын дуандуар занха. ¹²Эrsa ба та канжян, жёдо Та гынчян лэ, зу ги та фэди:

– Нүжын, ниди бин кэжя холи!

¹³Йиху Эrsa на шу ба та дулийихар, тади ё донвэр холи, та зу челэ, куажёнли Анлахўли. ¹⁴Синагогади да йимаму канжян шанбэди нэйтян Эrsa замужя ба бин канхоли, чишонлэ, зу ги дажя фэди:

– Лю тянди жызы литу ду нын ган сыса хуэ. Сый дан ю бинни, жё та жы лю тьян литу лэ кан бинлэ, мэгуэсы шанбэди нэйтян та бу нын лэ кан бин.

¹⁵Эrsa Жонгуйди ги та хуэйдади фэсы:

– Нисы мунафик! Нандый ниму шанбэди нэйтян ба нюцошон бонхади ню хуэйжэсы лүлүзы бу гэкэ, ба таму бу лади лэ жё хэ филэма? ¹⁶Жыгэ нүжынсы Ибрацимэди хубый, иблис ба та бонха шыба нянли. Нандый шанбэди нэйтян бу нын ба бонха тади жыгэ «тешын» гэкэма?

¹⁷Эrsaди жыгэ хуа жё Тади дўшманму ду хэли щюли, кэсы жынму йинви Та ганхади йиче чёчи сычин ду го-щинзали.

Анлахұди Гуйжя щён са?

(Мф 13:31-33; Мк 4:30-32)

¹⁸ Эrsa фәди:

– Анлахұди Гуйжя щён са? Вә ба та на са нын бини?

¹⁹ Анлахұди Гуйжя зущён йигә жемәзыди жунзы йиён. Йигә жын ба жемәзыди жунзы садо тади йуанзынили. Жыгә жунзы жончелә, чынха йигә фули, тяншонди чөр зу зә тади жыжызышон дядли вәвәзыли.

²⁰ Эrsa хан фәди:

– Вә ба Анлахұди Гуйжя на са нын бини? ²¹ Анлахұди Гуйжя зущён жёмян йиён. Йигә нұжын ба жыгә жёмян налә лян сышыгә килоди быймян хуәдо йидарнили, жё жыгә быймян ду чичеләни.

Зыйзырди фонмын

(Мф 7:13-14, 21-23)

²² Эrsa вон Иерусалим чынпуни чиди сыхур, зә лўшон зугуәли хошо чынпу лян щёнжуонли, зә нэтар жётё жынмули. ²³ Йигә жын вын Тали:

– Жонгуйди! Ба сыйди мин жүдини, жымужяди жынму дуәма?

²⁴ Эrsa ги таму хуэйдади фәсы:

– Ниму ё зынзади да зыйзырди фонмынни жинчини. Вә ги ниму фә, хошо жынму щён жинчини, кәсы жинбучи. ²⁵ Зу жымужя, йижязыди жүжын челә ба мын гуанчўди сыхур, ниму цә зандо мын вэту ко мынди фәни: «Жўжын! Вәму чито ни ги вәму ба мын кәкә!» Кәсы та ги ниму хуэйдади фәни: «Вә бу жыдо нимусы да натар ләди!» ²⁶ Нәхур ниму фәни: «Вәмусы зочян лян ни йидарни лян чы дә хәхади; ни зә вәмуди да хонзыни жётё жынмули». ²⁷ Та кә фәни: «Вә ги ниму фә, вә бу жыдо нимусы да натар ләди. Нимусы жыщезы ган бугундо сычинди жынму, ниму да вәди мянчян гун!» ²⁸ Лян жыгә йиён, ниму вонху канжян Ибрашимә, Исхар, Ягўбә зәмусы данлинди йиче шынжынму ду шындо Анлахұ тяншонди Гуйжяни, кәсы ба ниму ганчўчини; нәхур ниму зу ба я нәди дакў-луанхўни! ²⁹ Жынму

да чүан дун-яди мый йигэ дифоншон ду лэ цанжя Анлахү Гуйжяди янщини. ³⁰ Нэхур зэ хуту занди жынму зандо чян-туни; зэ чянту занди жынму зандо хутуни.

*Эрса йинви Иерусалим чынпу
пэфанхали*

(Мф 23:37-39)

³¹ Зу нэгэ сыхур, жигэ фарисейжынму кан Эрса лэли, зу ги Та фэди:

– Ни да жытар до данлин дифоншон чи, йинцысы Ирод хуоншон щён ба Ни дасыни.

³² Эрса ги таму хуэйдади фэсы:

– Ниму чи ги нэгэ «ехүзы» фэги: «Ни кан! Жиргэ лян миргэ Вэ ё ба зонгуй ганчүчи, ба жынмуди бин канхони, ган ди сан тян Вэ зу ё ба Вэди хуэ ганванни». ³³ Зу жы-мужя, жиргэ, миргэ, хургэ Вэ яндин ё вон чян зуни, йин-цысы чүгүэ Иерусалим чынпу, ба шынжын зэ нани ду сабудё.

³⁴ Иерусалим чынпу! Иерусалим чынпу! Ни ба шынжын-му ду дасыли, ба Анлахүди вон ни гынчян дафачиди жын-му лян шыту ду дасыли! Вэ хын жихуэй вонщёнди ба ниди эрнүму бохүни, зущён мужи ба живазы шудо тади бонзы дихади йиён, кэсы ниму мэ вонщён жыгэ! ³⁵ Ниму кан! Нимуди фонзы вонху бячын кунтанни. Вэ ги ниму фэ: йичыр до ниму фэ жыгэ хуади сыхур: «Вэму ба Ни куа-жёндини! Ни ви Анлахүди минзы лэдини!», ниму ба Вэ канбужян.

*Эрса ба хэ фижунбинди йигэ жын
канхоли*

14 Шанбэди нэйтян Эрса доли йигэ фарисейжынмуди линшуди жяни чы фан лэли; ющезы жынму люшын-ди канли, Та зу сани. ² Зу нэгэ сыхур Эрса гынчян ю йигэ жынлэ, тади хуншын ду жундини. ³ Эрса зу вынли жёмын фалүди вустаму лян фарисейжынмули:

– Жочү замуди фалү шанбэди жыйитян нын кан бинма, бу нын кан?

⁴Дажа йишын ду мæ чӕ. Эrsa ба нэгæ жындулийхар, зу ба та канхоли зэмусы жӕ та хуэйчили. ⁵Йиху Эrsa ги дажа фӕди:

– Ниму литу сыйди эрзы хуэйжӕсы ню шанбӕди нӕйитян дан дедо жин литу, нандый та донвӕр ба таму бу лачӕлӕма?

⁶Таму ги Эrsaди жыгӕ вынти мӕ гишон хуэйда.

Фӕ кижынмуди бифон

⁷Эrsa люшынди канли, замужа кижынму зӕ янщишон тӕжӕн шонконзыди вифындини. Та зу на бифон ги дажа фӕди:

– ⁸Сый дан ба ни чиндо жехун янщишон дон ки, нӕхур ни зӕ шонконзышон бӕ зуӕ, йинцысы кижынмуди литу хабан ю би ни тӕнӕ дайидярди кижынни; ⁹бӕ жӕ ба ниму лӕнгӕр чинлӕди жӕжын ги ни фӕ: «Ни ба ниди вифын ги жыгӕ жындонги!» Нӕхур хӕщюди ни зу ӕ да шонконзы халӕ, зуӕдо дин хатуди вифыншонни. ¹⁰Сый дан ба ни чиндо жехун янщишон дон ки, нӕхур ни зуӕдо дин хатуди вифыншон, жӕ жӕжын лӕ ги ни фӕ: «Вӕди ляншу, вӕ чин ни зуӕдо шонконзышон!» Нӕхур, ни зӕ кижынмуди мянчан зу юли тӕнӕли. ¹¹Йинцысы ба мый йигӕ ю гоноди жындижӕнни, ба мый йигӕ дижанхади жындон гони тӕжӕни.

¹²Эrsa ги чинди жӕ Та чы фанди жӕжын фӕди:

– Ни шонву хуэйжӕсы хушон гуӕ яншиди сыхур, бӕ чинниди ляншуму, дищӕнму, чинчинму хуэйжӕсы ючянди линжӕму чы фанлӕ, йинцысы таму ба ни е нын чинди жӕ чы фанчини, зу жымужа ги ни ба жон хуангини. ¹³Ни чин киди сыхур, зу ба чӕнжынму, баннянханму, чӕзӕзыму, хазыму жӕ чы фанлӕ; ¹⁴жымужа, ни вонху зу ю хындади гошинни, йинцысы нӕщезы жынму мӕю нынгу ги ни хуан жон. Гундожынму кӕ хуӕлиди сыхур, Анлахӕ гӕжа ги ни хуан жонни.

Фӕ да яншиди бифон

(Мф 22:1-10)

¹⁵Лян Эrsa йидарни чыфанди йигӕ жындон ба жыщезы хуатинжӕн, зу ги Эrsa фӕди:

– Зӕ Анлахӕ тӕншонди Гуйжӕни чы фанди жындон дуӕму гошинни!

¹⁶ Эrsa ги та фэди:

– Йигэ жын щён гуэ да янщини. Та ба хошо кижын-му чинди жё чы фанлэли. ¹⁷ Гуэ яншиди сыхур, та ба йигэ хуэжи дафачи, жё ги чинлэди кижынму фэгини: «Ниму куэ лэ! Ба йиче ду шэлүхали!» ¹⁸ Кэсы таму йигэ йигэди гили дуанжүэхуали. Ту йигэ жын фэди: «Вэ жёнцэ мэли йикуэ ди, вэ ё чи ба та канйихарчини. Бэ хэчили, вэ чибуха». ¹⁹ Данлинди йигэ жын фэди: «Вэ мэли ву дуйзы ню, вэ ё чи ба таму зыанйихарчини. Бэ хэчили, вэ чибуха». ²⁰ Хан ю йигэ жын фэди: «Вэ жёнцэ жели хунли, йинви жыгэ вэ чибуха». ²¹ Нэгэ хуэжи хуэйлэ ба жыщезы сычин ги тади жўжын ду фэгили. Жўжын чишонлэ, зу ги хуэжи фэди: «Ни куэ чўчи, до чынпуниди да-щёди хонзыни чи, ба чүнжынму, бан-нянханму, хазыму, чүэзыму ду линдо жытар лэ!» ²² Гуэ-ли йихур, нэгэ хуэжи хуэйлэ зу фэди: «Жўжын, вэ ба ниди йиче гихади фынфу ду кэжя банхоли; кэсы янщи-шон хан ю хошо щян вифынни!» ²³ Жўжын зу ги нэгэ хуэжи фэди: «Ни зэ да лўшон дэ зый лўшон сыжу-баха зуди, жё жынму зэ жытар лэ, ба вэди фонзы зуэман!» ²⁴ Вэ ги ниму фэ, бу жё щянтуни чинхади нэщезы жын-му зэ вэди янщишон чыфанлэ!»

*Дон Эрседи манлачи
нандихын*

(Мф 10:37-38; 5:13; Мк 9:50)

²⁵ Хошо жынму лян Эrsa йидарни зудини. Эrsa жуангуэ-лэ ги таму фэди:

– ²⁶ До Вэ гынчян лэди жын дан бу хын гэжяди нён-лозы, пэе, вamu, шүнди, жемый зэмусы та гэжяли, та бу нын дон Вэди манла. ²⁷ Сый бу щён ба гэжяди мин жү-шон* зэмусы гыншон Вэ зу, та е бу нын дон Вэди манла. ²⁸ Ниму литу сый дан щён щюгэ йигэ го луни, та щянтун-ни зуэха ба жёфи ё суанйихарни, та ба йичеди гунзуэ

* ^{14:27} Йижү лян йижү фангуэлэди: «Сый бу щён ба гэжяди муту шызы нашон».

нын зўванма хансы бу нын? ²⁹⁻³⁰ Дан бу жымуужяли, та ба фон гынзы щюгэхо, бу нын ба луфон гэшон. Канжян жыгэди жынму ду нын цыщё та: «Жыгэ жын щюгэкэ сали, щюгэбуван!» ³¹ Хуэйжэсы нагэ гуйжяди хуоншон ю йиван жынди дуйву дан щён лян данлинди ю лёнван жын дуйвуди хуоншон дажонни, та щянтуни зуэха ба гэжяди шызэди лилён ё суанйихарни, та лян жымуужяди дўшман нын дажонма хансы бу нын? ³² Та дан мэю нынгули, ба дўшман зэ лойуанни канжян, та ё ба жын дафачи лян дўшман фэйихар тэпинди тэжянни. ³³ Лян жыгэ йиён, ниму литу сый дан ба гэжяди йиче цэбый бу эрдё, та зу бу нын дон Вэди манла.

³⁴ Янсы хо дунщи, кэсы ян дан ба тади хан видо дюдё, замужя йуанхуэй ба тади ханчи дыйшонни? ³⁵ Ба жыгэ ян садо жундиди тў литу хуэйжэсы шондо фын литучи е бу нынчын, гуон ба та ё эрдёни. Ю эрдүэди жынму, ду хор тин!

Миллүди ён

(Мф 18:12-14)

15 Йихуэй хошо шуфиди жынму лян югўнахарди жынму ду тин Эрсади чуанжёлэли. ² Фарисейжынму лян нян-жинжынму зу гўнунди фэди:

– Жыгэ Жын ба югўнахарди жынму жешудини зэмусы лян таму йидарни чы фандини!

³ Йинви жыгэ, Эрса ги таму жёнли йигэ бифон:

– ⁴ Ниму литуди йигэ жын дан ю йибый ёнли, таму литуди йигэ ён дан мили лўли, жё нэгэ жын замужя банни? Та яндин ба данлинди жюшы жюгэ ён лёха, чи ба миллүди нэгэ ён зожуэни. ⁵ Та дан зожуэли, зу гошинди ба нэгэ ён быйдо гэжяди жягуэзышон, ⁶ надо жяни, ба тади ляншуму дэ линжүму жёлэ, зу ги таму фэни: «Ниму лэ лян вэ йидарни гошинйихар! Вэ ба миллүди жыгэ ён зожуэли!» ⁷ Вэ ги ниму фэ, лян жыгэ йиён, йигэ югўнахарди жын дан шушинли, зэ бу ган гўнахарли, тяншон Анлахў ви та гошинни; жыгэ гошин би ви жюшы жюгэ мэю гўнахарди гундожынмуди гошин хан дани!

Дюдёди йинчян

⁸Йигэ нүжын дан ю шыгэ йинчянли, дан ба йигэ дюдёли, та ё замуя банни? Та яндин ба дын дяншон, ба фонзы сойхар, зэ мый йигэ вэршон щипин-щийиди зони, йичыр ба нэгэ йинчян зожуэни. ⁹Та дан зожуэли, зу жё тади ляншуму дэ линжуму лэ, зу ги таму фэни: «Ниму лэ лян вэ йидарни гошинйхар! Вэ ба дюдёди нэгэ йинчян зожуэли!» ¹⁰Вэ ги ниму фэ, лян жыгэ йиён, йигэ югўнахарди жын дан шуцинли, зэ бу ган гўнахарли, Анлахўди Тянщянму ви та е гошинни.

«Милиўди» эрзы

¹¹Эрса хан фэди:

– Йигэ жын ю лёнгэ эрзыни. ¹²Тади щё эрзы ги дада фэди: «Ада! Ни ба ги вэму ё шынди фугуйди йилэзы хазыр ги вэ зу фынги». Дада зу ба тади цэбый ги лёнгэ эрзы фынкэли. ¹³Гуэли житян, щё эрзы ба тади йиче цэбый ду шужюшон, зудёли. Та доли йигэ йўан дифоншон, зэ нэтар гуэли хўган-хўшинди сынхуэли, ба тади цэбый ду хуадёли. ¹⁴Та ба йиче цэбый хуадё йиху, нэгэ дифоншон йўли вэнянли. Та шули нанли. ¹⁵Нэхур та коли нэгэ дифоншонди йигэ жынли. Нэгэ жын ба та дафадэ тади тандони жё фон жүчили. ¹⁶Та вонщёнди ба жү чыди дугэзы чыни, кэсы сый ду ги та мэ ги жыгэ чыди. ¹⁷Линийрни та минбыйгуэлэ зу ги гэжя фэди: «Вэ дадади хошо гунжынму ю дуэйўди лёншыни, кэсы вэ зэ жытар ё вэсынима? ¹⁸Вэ челэ, хуэйчи до вэ дада гынчян, ги та ё фэни: „Ада! Вэ зэ Анлахў мянчян ганли гўнахарли, зэ ни мянчян е ганли гўнахарли. ¹⁹Вэ бу жыгў ги ни дон эрзы; чито ни ба вэ суанчын ниди йигэ гунжынчи!“» ²⁰Та зу челэ хуэйли та дада гынчянли.

Та ли жя хан лойўанниди сыхур, та дада ба та канжян, щин кэжя ванлиди йимяр, вон чян по, ба эрзы бочў, щинтынли. ²¹Эрзы ги та фэди: «Ада! Вэ зэ Анлахў мянчян ганли гўнахарли, зэ ни мянчян е ганли гўнахарли. Вэ бу жыгў ги ни дон эрзы». ²²Кэсы дада ги тади хуэжиму гиди фынфу: «Ниму куэ ба дин ходи йишон налэ ги вэди эрзы чуаншон,

ба гэжызы ги та дэшон, ба хэ ги та чуаншон, ²³ба йигэ ю бёди нювазы жуачў, зедё, жё вэму чыди гошинйихар!
²⁴Йинцысы вёди жыгэ эрзы зушён вучонли йиён, йиху кэ хуэли, зушён мили лў йиён, йиху ба та зожуэли». Дажя ду гошинкэли.

²⁵Нэхур тади да эрзы зэ тандонилэ. Та хуэйлэ, ли жя бу йүанди сыхур, тинжянли щёнчин лян тёвуди шынчили.
²⁶Та ба йигэ хуэжи ханди, вынли жысы са сычин. ²⁷Нэгэ хуэжи хуэйдади фёсы: «Ниди щүнди хуэйлэли, ни дада канжян та пиннан-вусы хуэйлэди, зу ба йигэ ю бёди нювазы зедёли». ²⁸Да эрзы зу чишонлэ, бу щён жин фонзычи. Та дада чўлэ чүанфэ тали. ²⁹Кэсы та ги дада фёди: «Ни кан, вэ жыму дуэди няншон, зушён нў йиён, ви ни ган хуэдини, ба ниди фынфу ду зунхүдини, ни ба йигэ жүлү ду мэ ги вэ гиги, жё вэ лян вёди ляншуму йидарни гошинйихар!» ³⁰Кэсы ниди жыгэ эрзы лян бушүэходи нүжынму йидарни ба ниди цэбый хуадё, хуэйлэли, ни зу ги та ба йигэ ю бёди нювазы зедёли!» ³¹Та дада ги та фёди: «Вёди ва! Ни йинавар лян вэ зэ йидарнини; вёди йиче цэбый дусы ниди цэбый. ³²Ниди жыгэ щүнди зушён вучонли йиён, йиху кэ хуэли, зушён мили лўли йиён, йиху ба та зожуэли; йинви жыгэ заму ё шызэ гошинни».

Гуан жяди жын

16 Эрса ги Тади манламу фёди:
 – Йигэ ючянхан ю йигэ гуан жяди жынни. Жынму ги та фёли, жыгэ гуан жяди жын быйкэр сыйүн тади цэбыйдини. ²Жўжын зу ба нэгэ гуан жяди жын жёди лэ, ги та фёди: «Ни либян вэ тинжянлищер хуа. Ба ни гуан жяди божонфу ги вэ налэ! Вончян чи ни бу нын дон гуан вёди жяди жынли». ³Нэгэ гуан жяди жын шинни сылёнди: «Вёди жўжын бу жё вэ гуан тади жяли, жё вэ ё замужя банни? Жё вэ ва тўнима? Вэ мэю жин. Жё вэ ё нетинима? Вэ хэщюни. ⁴Дуйдини, вэ ба гунзуэ дюдёди сыхур, вэ жыдо замужя ё банни, жё вёди ляншуму зэ тамуди жяни ба вэ жешуни». ⁵Та зу ба ги тади жўжынди гэли жонди жынму йигэ йигэжя жёди лэли. Та ба йигэ жын вынди: «Ни жели

вәди жўжынди дуэшо чян лян дунши?» ⁶ Нэгэ жын хуэйдади фэсы: «Вә жели йибый тунзы чин-ю». Нэгэ гуан жяди жын ги та фәди: «Жысы ниди жонданданзы; ни куэ зуэха, щечын „вушы тунзы чин-ю“». ⁷ Йиху та вын данлинди йигә жынни: «Ни жели дуэшо?» Нэгэ жын хуэйдади фэсы: «Йибый кудә мыйзы». Гуан жяди жын ги та фәди: «Жысы ниди жонданданзы; ни щечын „башы кудә мыйзы“». ⁸ Нэгә жўжын зу ба тади бу шыщинди гуан жяди жын ви тади цунминди ганбан куалийихар. Йинцысы жыгә дун-яшонди жынму цошин гэжяди сьчинди сыхур би Анлахўди жынму* цунминщер.

⁹ Йиху Эрса фәди:

– Вә ги ниму фә, ниму ё на жыгә бу гундо дун-яди фугуй ги ниму гэжя зо ляншумуни; жымужя, фугуй сыйўнванлиди сыхур, ба ниму зә жынму йинавар хуәди фонзыни жешуни. ¹⁰ Ба сый зә щё сьчиншон кочўни, та зә да сьчиншон есы кочўди; сый зә щё сьчиншон бу шышин, та зә да сьчиншон есы бу шыщинди. ¹¹ Ниму сыйўн жыгә бу гундо дун-я фугуйди сыхур дан кобучўди, сый ба жыншыди фугуй ги ниму йитуәни? ¹² Ниму сыйўн данлин жынди дуншиди сыхур дан кобучўди, сый ба ниму гэжяди дунши ги ниму гигини? ¹³ Йигә хуәжи бу нын фусы лёнгә жўжын, йинцысы та ба йигә хынни, ба ди эргә щинәни, хуэйжәсы тәжү йигәни, канбуче ди эргәни. Ниму бу нын йихани дон Анлахўди нў, йихани дон фугуйди нў.

Мусади фалу зэмусы Тяншонди Гуйжя

(Мф 5:31-32; 11:12-13; Мк 10:11-12)

¹⁴ Нәщезы нэчянди фарисейжынму ба жыщезы хуа тинжян, зу цыщёли Эрсали. ¹⁵ Эрса ги таму фәди:

– Ниму зә данлинди жынму гынчян дон гундожынмудини, кәсы Анлахў ба нимуди щин канчўләдини; йинцысы жынму тәжүди йиче дунши до Анлахўшон кәвудихын. ¹⁶ Ба Муса шынжынди фалу лян данлин шынжынмуди фу йичыр до щижынмуди Йихия ләди сыхур чуанжәли. Да жыгә сыхур

* ^{16:8} Йижү лян йижү фангуәләди: «Гуонләнди жынму».

дашон ба Анлахү Гуйжяди Хо Шинвын чуанжөкэли; жынму дан сыйүн да личи, цэ жин жыгэ Гуйжяни. ¹⁷Кэсы ба фалүшонди йигэ дяндыр тэ нан чүдө: жыгэ би тян дэ ди лансандёди хан нан! ¹⁸Мый йигэ нанжын дан лян тади пәе лингандё, ба данлинди нүжын чүшон, та зу ганли хўлонди гўнахарли. Мый йигэ нанжын дан ба жынжя лингандёди нүжын чүшон, та е ганли хўлонди гўнахарли.

Ючянхан зэмусы чүнжын Лазарь

¹⁹Зочян ю йигэ ючянханлэ; та чуанди гуйжунди йишон, мый йитян гуэди да янши. ²⁰Нэхур хан ю йигэ ё нетиди чүнжынлэ, минзы жёди Лазарь; тади хуншыншон ду ю куэкуэзыни. Та зэ ючянханди мын гынчян чинчир тондини; ²¹вонщөнди ба ючянханди жуэзышон дехалэди чыди нашон чыни; гу е до та гынчян, ба тади куэкуэзы тяндини. ²²Йиху жыгэ чүнжын вучонли. Тянщянму ба та надо Ибрашчимэ шынжын гынчянли. Ибрашчимэ шынжын ба та зущөн шинэ жын йиён, бочўли. Нэгэ ючянхан е вучонли; ба тади мэти сундөли. ²³Ючянхан зэ дуэзэхэкынни шу эрзабуди сыхур, та ба ту тэчелэ, лойүанни ба Ибрашчимэ шынжын канжянли, ба та гынчянди Лазарь е канжянли. ²⁴Ючянхан зу ханди: «Вэди Ибрашчимэ лозы! Жё ниди шин до вэшон ванйихар! Вэ чито ни ба Лазарь дафалэ, жё та лян тади зыту занщер фи, ба вэди шэту лёнйихар, йинцысы вэ зэ жыгэ хуэкын литу шу эрзабудини!» ²⁵Кэсы Ибрашчимэ шынжын фэди: «Вэди ва! Ни жидинима, зэ дун-яшон сынхуэди сыхур, ниди йүнчи дадихынлэ, нэгэ сыхур Лазарь шули хошо кў. Жыхур та зэ жытар гуэ пиннан-вусыди сынхуэдини, кэсы ни шу эрзабудини. ²⁶Чўгуэ жыгэ, вэму лян ниму донжунни хан ю мэйирди шын кынни. Жынму дан щён да жыбонгэ вон ниму нэбонгэ гуэчинни, жысы будыйчынди; жынму дан щён да ниму нэбонгэ вон вэму жыбонгэ гуэлэни, жы есы будыйчынди». ²⁷Нэгэ ючянхан зу фэди: «Вэди Ибрашчимэ лозы! Дан жымужяли, вэ читоди жё ни ба Лазарь дафачи, жё та до вэ дадади ज्याни чи. ²⁸Вэ ю вугэ дищүнни, жё Лазарь чи ги таму тифөйихар, бэ жё таму е до жыгэ шу эрзабуди дифоншон лэ».

²⁹ Ибрашимэ шынжын ги та фэди: «Ниди дишүнму жыдо Муса лян данлинди шынжынму шехади хуани, жё ниди дишүнму тин тамучи!» ³⁰ Ючянхан кә фэди: «Вәди Ибрашимэ лозы! Жыгә бу гу. Йигә жын дан вучонли йиху, кә хуәли, до вәди дишүнму гынчян, таму зу жын гәжяди гўнахарни». ³¹ Ибрашимэ шынжын ги та кә фэди: «Таму дан бу тин Муса лян данлинди шынжынмуди хуали, бугуан сый вучонли йиху, кә хуәли, таму е бу шинфу нэгә жын!»

Сасы шинфуди жынамуди жынвару?

(Мф 18:6-7; 21-22; Мк 9:42)

17 Эрса ги Тади манламу фэди:
– Ба жын хунди жё ган гўнахар – жысы яндин ё йүди, кәсы ган жымугә сычинди жын дуәму кәлян! ² Нэгә жын дан михунди жё йигә шинфу Вәди щёжын ган гўнахар, нэхур ги нэгә жын ба мәпаншы бондо бәзыни педо хэзыни хошер. ³ Ниму ё щёщинни!

Ниди дишүнму литуди йигә дан ган гўнахарли, ни ё ба та чүанфәйхарни; та дан жынли гўнахарли, ни зу ё фоншә тани. ⁴ Та йитян литу дан ги ни ганли чи хуэй гўнахар, мый йихуэй та дан хухуэйди ги ни фә: «Вә ба вәди гўнахар жынни!» ни ду ё фоншә тани.

⁵ Апостолму ги Эрса Жонгуйди фэди:

– Чито Ни ги вәмуди шинфу ги жин!

⁶ Жонгуйди фэди:

– Ниму дан ю, зушён йигә жемэзы жунзы йиён, суй шинфу, зу ги жыгә инжирфу фә: «Ни лян гындынзы йидарни ба гәжя да ди литу бачүлэ, йүанхуэй зедо хэзыничи!», нэгә инжирфу зу тин нимуди хуани.

⁷ Ниму литу сый дан ю жун диди хуэйжәсы фон-ёнди хуәжили; та да тандо хуэйлэди сыхур, жўжын ги та ханнын фәма: «Ни куэ зуәха чы фанчи?» ⁸ Донжан бу нын фә! Та ги хуәжи фәни: «Ни щянтуни ги вә ба чыди шәлүха зәмусы ба дэзы жишон фусы вә; жысы вә чыванли, нэхур ни цә чычи». ⁹ Нэгә хуәжи жочў жўжынди фынфу ганди сыхур, нандый жўжын ги та дощенима? ¹⁰ Ниму есы жымужяди: ниму ба Анлахў ги ниму гихади йиче фынфу ганванди

сыхур, ё фәни: «Вәмусы мәю хочўди хуәжиму; вәму гуон ба ё ганди сычин ганли».

Эрса ба шыгә хә мафынбинди жынму канхоли

¹¹⁻¹³ Эрса вон Иерусалим чынпуни чидини. Зә лўшон зугә Самария лян Галилея дифонди сыхур, Та жинли йигә щәнжуоннили; нэтарди шыгә хә мафынбинди жынму вынхули Эрсали. Таму зандо лойўанни, дашын ханли:

– Эрса вуста! Жё Ниди щин до вәмушон ванйихар!

¹⁴ Эрса канжян таму, зу фәди:

– Ниму чи, жё яхўтиди ахун ба ниму канйихарчи!

Нәщезы жынму чиди сыхур, тамуди шынзы кәжя ганжинли. ¹⁵ Таму литуди йигә жын канжян тади бин холи, монмонди хуэйлэ, дашын куажён Анлахўли. ¹⁶ Та гуйдо Эрсади жўе гынчян ги Та долигә щели. Жыгә жын бусы яхўти жын, тасы Самарияди жын. ¹⁷ Эрса фәди:

– Ба шыгә жынди бин канхоли, данлинди жүгә жын зә натарни? ¹⁸ Виса гуон жыгә данлин минзўди жын хуэйлэ ги Анлахў доли щели?

¹⁹ Эрса зу ги нәгә жын фәди:

– Ни челә зу чи! Ниди щинфу ба ниди мин жүхали!

Анлахў тяншонди Гуйжя са сыхур долэни

(Мф 24:23-28, 37-41)

²⁰ Ющезы фарисейжынму вынли Эрсали:

– Анлахў тяншонди Гуйжя са сыхур долэни?

Эрса ги таму хуэйдади фәсы:

– Жынму на нянжин канбужян Анлахўди Гуйжя замужя долэни. ²¹ Жынму бу нын фә: «Кан! Та зә жытарни!» хуэйжәсы фә: «Кан! Та зә нэтарни!» Йинцысы Анлахўди Гуйжя зә нимуди щиннини.

²² Йиху Эрса ги Тади манламу фәди:

– Вонху ниму ба Вә, Аданди Хубый долэди жызы панвонди канжянни, кәсы канбужян. ²³ Жынму дан ги ниму фә: «Кан! Та зә нэтарни!» хуэйжәсы фә: «Кан! Та зә жытарни!» Ниму бә чўчи канчи, е бә гыншон таму зу. ²⁴ Аданди Хубый долэди жызы зущән да тянди жыбонгә вон тянди нэбонгә

шан дянди йиён. ²⁵ Кэсы Аданди Хубый сянтунни яндин ё шу хошо кўнанни; жы йибыйзы жынму ба Та бу жын. ²⁶ Аданди Хубый ди эрбян долэди сыхур йўди сычин зушён Нух шынжынди сыхур йўхади сычин йиённи. ²⁷ Нэгэ сыхур жынму, лян сўчонди йиён, чыли, хэли, жели хунли, йичыр до Нух шынжын жинли дачуанди нэйитян; нэхур хунфи фали, ба таму ду щёмедёли. ²⁸ Аданди Хубый ди эрбян долэди сыхур йўди сычин е щён Лут шынжынди сыхур йўхади сычин йиённи. Нэгэ сыхур жынму, лян сўчонди йиён, чыли, хэли, зўли мэмэли, жунли дили, щюгэли фонзыли, ²⁹ йичыр до Лут да Содом чынпунни зудёди нэйитян; нэхур хуэ лян лүнхуон да тяншон дехалэ, ба таму ду шодёли. ³⁰ Аданди Хубый долэди нэйитян е йү жымужяди сычинни.

³¹ Нэйитян, зэ фондинзышон занди жынму бэ халэжин фонзыни чү тамуди дунщичи. Зэ тандони зў хуэди жынму бэ хуэй жячили. ³² Ниму ё жичелэ Лут шынжынди пэе йўхади бэляни! ³³ Йинцысы сый щён ба гэжяди мин жюхани, та ба гэжяди мин хэни. Кэсы ба гэжяди мин жүгиди жын, та ба гэжяди мин жюхани. ³⁴ Вэ ги ниму фэди, нэ йивэщи лёнгэ жын дан зэ йигэ коншон фи, ба йигэ дэшон зуни, ба данлинди йигэ шынхани; ³⁵⁻³⁶ лёнгэ нүжын йидарни дан мян мэ, ба йигэ дэшон зуни, ба данлинди йигэ шынхани.

³⁷ Манламу зу вынли Эрсали:

– Жонгуйди! Жыщезы сычин зэ натар йүни?

Эрса ги таму хуэйдади фэсы:

– Мэти зэ натарни, нэлойин е шудо нэтарни.

Нүгуафу лян вынгуансыди жын

18 Эрса ги манламу жёнли йигэ бифон, жё таму йинавар чито Анлахўни, бу жё таму фа юцу. ² Та фэди:

– Йигэ чынпунни ю йигэ вынгуансыди жынлэ, та бу хэпа Анлахў, е бу тэнэ жынму. ³ Нэгэ чынпунни ю йигэ нүгуафулэ, та чинчир до нэгэ вынгуансыди жын гынчян лэ, читоди ги та фэдини: «Ни ги вэ бонйихар, ба вэ лян вэ дўшманди гуансы вон гундо банйихар». ⁴ Жыгэ вынгуансыди

жын шянтуни бу щён ги та бонмон, кэсы йиху та шинни сылэнди: «Вэ бу хэпа Анлахұ еба, бу тэнэ жынму еба, ⁵кэсы жыгэ гуафу будуанди дажэ вэдини; вэ ги та ё бонйихар, ба гуансы бан хощерни, бу жё та чинчир дажэ вэли».

⁶Йиху Эрса Жонгуйди фэди:

– Ниму ба нэгэ бугундоди вынгуансыди жын фэхади хуа тинйихар! ⁷Нандый Анлахұ ги тянтян-вумый чито Тади жынму бу бонмонма? Нандый Та ёнвон ги таму бонмонма? ⁸Вэ ги ниму фэ, Та яндин куэкуэди ги таму бонмонни. Кэсы Аданди Хубый лэди сыхур, Та зэ дишон ба шинфу Тади жынму зожуэнима?

Фарисейжын лян шуфиди жын

⁹Эрса ги нэщезы шинни сылэнди тамусы гундожынму, кэсы канбуче йиче данлинди жынму хан жёнли йигэ бифон:

– ¹⁰Лёнгэ жын доли Иерусалимди сы литу, чито Анлахұ лэли: йигэсы фарисейжын, йигэсы шуфиди жын. ¹¹Нэгэ фарисейжын занчелэ, шинни гэжя читоди ги Анлахұ фэди: «Анлахұ! Вэ ги Ни дощедини, йинцысы вэ бу щён данлинди жишыди, бугундоди, хўлонди жынму йиён, е бу щён нэгэ шуфиди жын йиён. ¹²Вэ мый йичи лён бяжя фынзэдини, да вэ зынхади йиче чяншон ги Анлахұ чў экатидини». ¹³Нэгэ шуфиди жын зэ лойуанни занди, бу ган жочў Тяншон кан, гуон ба тади конзы пыйди фэди: «Анлахұ! Жё Ниди шин до вэ, жыгэ югўнахарди жыншон, ванйихар!»

¹⁴Вэ ги ниму фэ, жы лёнгэ жын литу Анлахұ ба нэгэ шуфиди жын, зущён жыншыди гундожын йиён, жешухали. Йинцысы ба мый йигэ югоноди жын дижянни, ба мый йигэ дижянхади жын вон гони тэжүни.

Эрса ги вamu панвон холи

(Мф 19:13-15; Мк 10:13-16)

¹⁵Ющезы жынму ба вamu налэ, жё Эрса ба таму дуйихарни. Канжян жыгэ, манламу зу донгуа тамули. ¹⁶Кэсы Эрса жё вamu до Та гынчян лэ, фэди:

– Ниму жё жыщезы вamu до Вэ гынчян лэ, бэ донгуа тамули, йинцысы Анлахұ тяншонди Гуйжясы тамуди.

¹⁷ Вә ги ниму фә шыхуа: сый дан бу лян вава йиён ба Анлахұ тыншонди Гуйжя жешуха, та бу нын дон жыгә Гуйжяди жын.

Йигә ючянханди вынти

(Мф 19:16-30; Мк 10:17-31)

¹⁸ Йигә яхұтиди линшужын лә, вын Эрсали:

– Дин ходи Вуста! Йинви жё вә йинавар хуә, вә ё зұ сани?

¹⁹ Эрса вын тали:

– Ни виса ба Вә жёди дин ходи? Чүгүә Анлахұ зә мёю данлинди дин ходи. ²⁰ Ни жыдо жыщезы фынфунима: пәе-ханзы бә хұлон, бә дасы жын, бә ту дунши, бә дон жя гўва, ё тәнә нён-лозыни.

²¹ Нэгә жын хуэйдади фәсы:

– Вә да суйди сыхур зу ба жыщезы фынфу йиче ду зун-хўдини.

²² Эрса ба жыгә хуа тинжян, ги та кә фәди:

– Ни хан ю йигә дуанбянни: ни ё ба йиче дунши мэдё, ба чян ги чүнжынму санги, нэхур ни зә Тяншон дый фу-гуйни; зу жымужя ни цә нын гыншон Вә зу.

²³ Нэгә жын ба жыгә хуа тинжян, пәфанхали, йинцысы тасы йигә да ючянхан. ²⁴ Эрса ба та канлийихар зу фәди:

– Жё ючянханму дон Анлахұ Гуйжяди жынмучи – жысы тә нанди сычин! ²⁵ Жё ючянди жынму дон Анлахұ Гуйжяди жын – жыгә би луәтуә зуангуә жын нянзыди хан нан!

²⁶ Тинжян жыщезы хуади жынму зу вынли:

– Дан жымужяли, ба сыйди мин нын жюхани?

²⁷ Эрса фәди:

– Жынму бу нын ганди сычин Анлахұ ду нын ганни.

²⁸ Пётр ги Та фәди:

– Ни кан! Вәму ба йиче ду лёха, гыншон Ни зудини.

²⁹ Эрса ги таму фәди:

– Вә ги ниму фә шыхуа: сый дан ви Анлахұ тыншонди Гуйжя ба фонзы, пәе, дищүнму, нён-лозыму, вәму лёха, ³⁰ та зә жыгә дун-яшон яндин дый йүәщин дуәди чинчин-му дә дунщини, зә вонхуди дун-яшон та е йинавар хуәни.

*Эрса ба Та гэжя вучонди
зозор ди санбян фэли*

(Мф 20:17-19; Мк 10:32-34)

³¹ Эрса ба шыэргэ манламу лингуэчи, ги таму фэди:

— Ниму кан! Заму хазыр вон Иерусалим чынпуни зуди-ни. Ба шынжынму щехади Аданди Хубый либянди йиче сычин зу ё йүни. ³²⁻³³ Нэхур ба Аданди Хубый ги вэдожын-му зу гигини. Таму ба Аданди Хубый зотани, мани, вон Тади лянмяншон тў тўмәни, на бянзы ба Та дани зэмусы ба Та дасыди ди сан тян, Та кә хуәни.

³⁴ Манламу ба жыщезы хуа литуди йигә хуа ду мә дун, е бу жыдо Эрса фэли сали, йинцысы нәщезы хуади йисысы манчәнхади.

*Эрса ба йигә хазы
канхоли*

(Мф 20:29-34; Мк 10:46-52)

³⁵ Эрса до Иерихон чынпуни гынчяндыйли; йигә хазы зә лўбянни зуәди ё нетидини. ³⁶ Та тинди жынму гуәдини, зу вынли жысы са сычин. ³⁷ Жынму ги та фэди:

— Назарет чынпуниди Эрса да жытар гуәдини.

³⁸ Нэгә хазы зу ханди:

— Эрса, Давуди Хубый! Жё Ниди щин до вәшон ванйихар!

³⁹ Чянту зуди жынму ги та гиди ниннинди фынфу, бу жё та чў шынчи. Кәсы та йүәщин хантуәли:

— Давуди Хубый! Жё Ниди щин до вәшон ванйихар!

⁴⁰ Эрса занха зу гиди фынфу, ба нэгә хазы жё линдо Та гынчян ләни. Нэгә жын доли Эрса гынчянди сыхур, Эрса вынли тали:

— ⁴¹ Ни жё Вә ги ни зў сани?

Хазы хуәйдади фәсы:

— Жонгуйди! Жё вәди нянжин хо, ба са ду канжян!

⁴² Эрса зу ги та фэди:

— Жё ни ба са ду канжян! Ниди щинфу ба ниди мин жүхали!

⁴³Зу нэгэ сыхур хазы ба са ду канжянли, куажён Анлаху́-ди гыншон Эрса зудёли. Канжян жыгэ сычинди йиче жынму е куажёнли Анлаху́ли.

Эрса лян Закхей

19 Эрса жинли Иерихон чынпуни, щён ба нэгэ чынпу зугуэни. ²Нэтар ю йигэ шуфиди жынмуди тузылэ, минзы жёди Закхей, тасы йигэ ючянхан. ³Закхей щён ба Эрса канйихар, Тасы замугэ Жын, кэсы тади гэзы цуэдиыхн, та зэ жынму донжунни ба Эрса канбужян. ⁴Закхей подо дажды тунни, шонли йигэ инжирфушон, щён ба Эрса канжянни, йинцысы Эрса ё да жытар гуэни. ⁵Эрса доли нэгэ дифонди сыхур, ба ту тэче жочу́ Закхей канлийихар, зу ги та фэди:

– Закхей! Ни куэкуэди халэ! Жиргэ Вэ ё зэ ниди жяни дон кини.

⁶Закхей хуонхуон-монмонди да фушон халэ, гошинди ба Эрса жейинли.

⁷Канжян жыгэ дажя ду гунунди фэди:

– Жыгэ Жын зэ югунахарди жынди жяни дон кидини!

⁸Закхей занчелэ ги Эрса Жонгуйди фэди:

– Жонгуйди! Вэ ба вэди бангэзы цэбый ги чунжынму сангини; вэ дан ба сыйди чян хунди чёншонли, ги та хуансы лэзыди чянни.

⁹Эрса ги та фэди:

– Жиргэ ба жы йижязы жынмуди мин жүохали, йинцысы жыгэ жын есы Ибрацимэди хубый. ¹⁰Вэ, Аданди Хубый, лэ ба милилүди жынму зожуэни, ба тамуди мин жүохани.

Фэ шыгэ жинчянди бифон

(Мф 25:14-30)

¹¹Дажя тин жыщезы хуади сыхур, Эрса ги таму жёнли йигэ бифон, йинцысы Эрса куэкуэди ё до Иерусалим чынпунини, жынму сылёнди: Анлаху́ тяншонди Гуйжя куэ зу долэни. ¹²Эрса фэди:

– Линшужынди йигэ хубый до йуан дифоншон чи, щён ба хуоншонди чунли дыйшон, кэ хуэйлэни. ¹³Та зуди зычан, ба шыгэ хуэжиму жёдо та мянчан лэ, ги мый йигэ

жын ба йигэ жинчян гиги, фэди: «Вэ мэ зэ жяниди сыхур, ниму на жыщезы жинчян зү мэмэчи». ¹⁴ Нэгэ гуйжяди жынму хын тади йимяр, зэ тади хуту ба дэбёму дафачи, жё фэчили: «Вэму бу шён жё жыгэ жын дон вэмуди хуоншон». ¹⁵ Нэгэ линшужынди хубый ба хуоншонди чүанли дыйшон, хуэйлэли; та донвэр гиди фынфу ба нэщезы нали жинчянди хуэжиму жёдо та гынчян, шён жыйихар, хуэжиму литу мый йигэ жын зү мэмэди сыхур зынли дуэшо чян. ¹⁶ Ту йигэ жын лэ фэди: «Жўжын, вэ на ни ги вэ гихади нэгэ жинчян зынли шыгэ жинчян». ¹⁷ Жўжын зу ги та фэди: «Ходихын! Нисы йигэ хо хуэжи! Ни зэ щё сычиншонсы кочўди, вэ жё ни гуан шыгэ чынпуни». ¹⁸ Ди эргэ хуэжи лэ фэди: «Жўжын, вэ на ни ги вэ гихади нэгэ жинчян зынли вугэ жинчян». ¹⁹ Жўжын зу ги та фэди: «Вэ жё ни гуан вугэ чынпуни». ²⁰ Ди сангэ хуэжи лэ фэди: «Жўжын, ниди жинчян зэ жытарни; вэ на шужинзы ба та бочўли. ²¹ Вэ сыдуэхур хэпа нини, йинцысы нисы йигэ дэдў жын. Ни ба ни гэжя мэ гэхади дунши нашондини; ба ни гэжя мэ жунхади мыйзы шугэдини». ²² Жўжын ги та фэди: «Нисы йигэ бу ходи хуэжи! Вэ жочў ни гэжя фэхади хуа ги ни динзуйни! Йинцысы ни жыдо вэсы йигэ дэдў жын, ба вэ гэжя мэ гэхади дунши нашондини, ба вэ гэжя мэ жунхади мыйзы шугэдини. ²³ Жымужя фэчи, ни виса ба вэ ги ни гихади жинчян мэ гэдо йинхонничи, виса бу жё вэ хуэйлэди сыхур, лян бынчян йидарни ба зынхади чян нахуэйлэни?» ²⁴ Жўжын зу ги тади жуви занди жынму фэди: «Ба тади жинчян дуэдё, ги нэгэ ю шыгэ жинчянди хуэжи гиги!» ²⁵ Таму ги жўжын фэди: «Жўжын, нэгэ жын кэжя ю шыгэ жинчянниму». ²⁶ Жўжын фэди: «Вэ ги ниму фэ, сый юли, ги та хан тянни; сый мэюли, ба та юди нэйидяндяр е дуэдёни. ²⁷ Ниму ба нэщезы бу шён жё вэ дон таму хуоншон вэди дўшманму линдо жытар лэ, зэ вэ мянчян ба таму зэдё!»

Эрса жинли Иерусалим чынпунили

(*Мф 21:1-11; Мк 11:1-11; Йих 12:12-19*)

²⁸ Эрса ба жыщезы хуа фэван, вон Иерусалим чынпу зу-дэли. ²⁹ Та до Елеон саншонди Вифания лян Вифагия

щёнжуон гынчяндыйли, ба лёнгэ манла дафадо чянту, ³⁰ ги таму фэди:

– Ниму вон чянтуниди щёнжуонни чи. Жинли щёнжуонни, ниму зу ба нэтар бонди йигэ лүвазы канжянни (сый ду мэ чигуэ жыгэ лүвазы). Ниму ба нэгэ лүвазы гэкэ, ладо жытар лэ. ³¹Сый дан вын ниму: «Виса ниму гэ лүвазыдини?» Ниму зу ги та фэ: «Вэмуди Жонгуйди ё тани».

³²Манламу доли нэтар, зущён Эrsa ги таму фэхади йиён, ба йиче сычин ду йүжянли. ³³Таму ба лүвазы гэкэди сыхур, нэгэ лүвазыди жонгуйдиму ба таму вынди:

– Ниму виса ба бонхади лүвазы гэдини?

³⁴Таму хуэйдади фэсы:

– Вэмуди Жонгуйди ё тадини.

³⁵Таму ба лүвазы ладо Эrsa гынчян лэ, ба гэжяди йишон дадо лүвазышон, жё Эrsa чишонли. ³⁶Эrsa чиди лүвазы вон чян зуди сыхур, дажя ба гэжяди йишон туэхалэ пудо лүшонли. ³⁷Эrsa кэжя до Елеон санпэзы гынчяндыйли. Манламу ви зочян канжянди йиче кэрамэти ду куажёли Анлаху́ли, гошинди дашын ханди:

– ³⁸Вэму ба Ни куажёнди!

Нисы ви Анлаху́ди минзы лэди Хуоншон!

Панвонди жё Тяншон пиннанди!

Жыган видади Ху́да!

³⁹Жыщезы жынму литуди жигэ фарисейжын ги Эrsa фэди:

– Вуста! Ни жё Ниди манламу бэ чў шынли!

⁴⁰Эrsa хуэйдади фэсы:

– Вэ ги ниму фэ, таму дан бу чў шынли, жыщезы шыту ду дашын ханни.

Эrsa йинви Иерусалим чынпу фали юцули

⁴¹⁻⁴²Эrsa до Иерусалим гынчяндыйли. Та ба жыгэ чынпу канжян, жочў та тон нянлуйди кўли:

– Иерусалим чынпу-я! Жиргэ ни дан жыдо вон тэпинни линди лўса, кэсы ни хазыр лян хазы йиён. ⁴³Вонхуди сыхур ниди дўшманму зэ ниди жуви ба тўчён чичелэ, ба ни да сымян-баха чүанчўни. ⁴⁴Таму ба ни лян ни литуди жынму ду

щёмедёни, бу жё йигэ шыту шындо данлинди йигэ шытушон, йинцысы ни мэ жыдо Анлахұ са сыхур лэ жю ниди минлэли.

*Эрса ба зұ мэмэди жыну
да Иерусалимди сыни ганчўчили*

(Мф 21:12-17; Мк 11:15-19; Йих 2:13-22)

⁴⁵Эрса жинли Иерусалимди сы, зу ба нэтар зұ мэмэди йиче жыну ду ганчўчили, ⁴⁶ги таму фэди:

– Китабушон щедисы:

«Анлахұ фэди: „Вэди сы ё чынха жыну чито Вэди фонзыни“».

Кэсы ниму ба Анлахұди сы зўчын зыйкуди вэзыли!

⁴⁷Эрса мый йитян зэ Иерусалимди сыни жётёли жынумули. Яхўтиди да ахунму, нянжинжынму лян минжынди линшуму мусуанди ба Эрса дасыни. ⁴⁸Кэсы таму бу жыдо замужя ган жыгэни, йинцысы жынуму ду гыншон Эрса зуди, люшынди тин Тади хуадини.

*Яхўтиди линшуму
вынли Эрсади чўанлили*

(Мф 21:23-27; Мк 11:27-33)

20 Йихуэй Эрса зэ Иерусалимди сыни жётёли жынумули, чўанжё Анлахұди Хо Шинвынли. Яхўтиди да ахунму, нянжинжынму лян ложынму кан Та лэли. ²Таму вын Эрсали:

– Ни ги вөму фэ, Ни на са чўанли ба жыщезы сычин гандини? Сый ги Ни гили жымужяди чўанлили?

³Эрса ги таму хуэйдади фэсы:

– Вэ ю йигэ вынтини, ниму ги Вэ ги хуэйда: ⁴Йихия ви Анлахұ на фи ши жынумуди чўанлисы да нани лэди? Жысы да Тяншон лэди, хансы да жынуму литу лэди?

⁵Таму шонлэнди фэди:

– Заму ги Эрса ги са хуэйдани? Заму дан фэ: «Да Тяншон лэди», нэхур Эрса фэни: «Дан жымужяли, ниму виса ба Йихия мэ щинфу?» ⁶Заму дан фэ: «Да жынуму литу лэди», минжынму на шыту да замуни, йинцысы таму ду щинфуди Йихиясы шынжын.

⁷Жыщезы жынму зу хуэйдади фэсы:

– Вөму бу жыдо да нани лэди.

⁸Эрса ги таму кә фәди:

– Дан жымужяли, Вә е ги ниму бу фә, Вә на са чүанли ба жыщезы сычин гандини.

Ю хащинди хўржямуди бифон

(Мф 21:33-46; Мк 12:1-12)

⁹Йиху Эрса на бифон ги жынму жётёди фәди:

– Йигә жын зэли йигә путо йүанзы, йиху ба путо йүанзы ги хўржяму гигили, та гэжя зули данлинди дифоншонли, зә нэтар жүли хошо жызы. ¹⁰Шу путоди сыхур та ба йигә хуәжи дафачи, жә хўржяму ги та ба шучынди йилэзы гигини. Кәсы хуржяму ба нэгә хуәжи дади жә куншу хуэйчили. ¹¹Путо йүанзыди жонгуйди ба данлин йигә хуәжи кә дафачили, хўржяму ба жыгә хуәжи е дали, ба та чуашёли зэмусы жә та куншу хуэйчили. ¹²Путо йүанзыди жонгуйди кә ба ди сангә хуәжи дафачили. Хўржяму ба жыгә хуәжи дали, та дэли шонли. Линху таму ба хуәжи да путо йүанзыни печүчили. ¹³Нэхур путо йүанзы жонгуйди фәди: «Вә замужя ё банни? Вә ба вәди щинэди эрзы дафачи, таму хаба хэщю вәди эрзыни». ¹⁴Нэщезы хўржяму ба жонгуйди эрзы канжян, йигә ги йигә фәди: «Тасы путо йүанзы жонгуйди хубый. Заму дан ба та дасы, та дада ги та шынхади йиче дунщи зу чынха замудини!» ¹⁵Таму ба жонгуйди эрзы да путо йүанзы литу ганчүчи, дасыли.

Эрса вынли жынмули:

– Жымужя фәчи, жә путо йүанзыди жонгуйди замужя банни? ¹⁶Та яндин лә ба жыщезы хўржяму щёмедё, ба путо йүанзы ги данлинди жынму гигини.

Жынму ба жыщезы хуа тинжян, ду фәди:

– Бә жә жымужяди сычин йүхали!

¹⁷Эрса ба таму канлийихар, зу фәди:

– Китабушон щеди жымужяди йигә хуа:

«Гә фонзыди жәнжынму ба нагә шыту мә каншон эрдёли,

нэгә шыту чынли фон гынзыди шытули».

Жы йигэ хуа ю са йисыни? ¹⁸Сый дедо нэгэ шытушон, та пынсыни; нэгэ шыту дедо сыйди шыншон, ба та е нясыни.

¹⁹Нянжинжынму лян яхүтиди да ахунму минбыйли, Эрсади бифон фэ тамудини. Йинви жыгэ таму нэхур зу вонщёнди ба Эрса жуачүни, кэсы таму хэпали жынмули.

Ги Римди хуоншон чү чян, бу чү чянди вынти

(Мф 22:15-22; Мк 12:13-17)

²⁰Таму дынди фонбян сыхур ган жыгэни. Таму ба жигэ жын чуэсуэди дафачи, жё таму жуонди гундожынму ги Эрса ги нан вынтини, зэ Тади хуашон зо йигэ йинйир ба Та жуачүни, ги ю чүанлиди гуанжын гигини. ²¹Жыщезы жынму лэ вынли Эрсали:

– Вуста! Вэму жыдони Ни ги жынму фэди шыхуа зэмусы жётё тамудини, Ни бу кан са жын зэ Ниди мянчянни, кэсы шыщин ба Анлахүди лү ги жынму жёнди. ²²Ни ги вэму фэйихар, вэмуди фалү жё вэму ги Римди хуоншон чү чяннима, хансы бу чү чян?

²³Эрса зэ шинни ба тамуди жанчё канлэди йимяр зу ги таму фэди:

– ²⁴Виса ниму зыян Вэни? Ги Вэ налэ йигэ йинчян, жё Вэ канйихар! Жыгэ йинчяншон хуади сыйди лянмян, щеди сыйди минзы?

Таму хуэйдади фэсы:

– Римди хуоншонди лянмян дэ тади минзы.

²⁵Эрса зу ги таму фэди:

– Ба Римди хуоншонди дунци ё ги та гигини, ба Анлахүди дунци ё ги Анлахү гигини.

²⁶Таму ба Эрсади хуэйда тинжян ду чёчихали, зэ бу ган жынмуди мянчян ги Эрсади хуашон зо сыса йинйир, е ги Та зэ мэ ги данлинди вынти.

Вучонлиди жынму кэ хуэди вынти

(Мф 22:23-33; Мк 12:18-27)

²⁷Ющезы саддукейжынму кан Эрса лэли. Йиче саддукейжынму бу шинфу вучонлиди жынму йүанхуэй хуэди. Таму зу вынли Эрсали:

– ²⁸ Вуста! Муса шынжын ги вәму гихади фынфу: сый дан вучонли, тади мә сын-ёнгуәди гуафу пәе шынхали, нэхур жё нэгә жынди шүнди ба гуафу чүшонни, ги та гәгә ё сын-ён эрнүни. ²⁹ Ю чигә дишүнлэ: лода чүли щифур, кәсы вучонли, мә шын вamu. ³⁰ Лоэр ба лодади гуафу чүшон е вучонли. ³¹ Лосан кә ба нэгә гуафу чүшон е вучонли; зу жымужя, дишүнму чигәр ба нэгә нүжын чүшон, ду вучонли, ду мә шынха вamu. ³² Линйирни нэгә нүжын е вучонли. ³³ Жымужя фәчи, зә кә хуәди нәйитян, ба жыгә нүжын суан найигә дишүнди пәени? Йинцысы чигә дишүн ду ба та чүгүә.

³⁴ Эrsa ги таму хуэйдади фәсы:

– Жыгә дун-яди жынму ду чү щифурдини, чүжядини; ³⁵ кәсы сый дан вучонли, Анлахү кә жё та хуәни зэмусы зә вонхуди дун-яшон гуә жызыни, таму е бу чү щифур, е бу жя нанжын. ³⁶ Таму лян Тянщянму йиён бу вучон. Тамусы Анлахүди эрнү, йинцысы таму дан вучонли, кә хуәни. ³⁷ Муса шынжын ба вучонлиди жынму кә хуәниди сычин миндамин е жынли. Та ба цыязы жуәди сычин щелиди сыхур, жымужя фәли: «Анлахүсы Ибрашимәди Анлахү, Исхарди Анлахү, Ягүбәди Анлахү». ³⁸ Жыгәди йисысы: Анлахүсы хуә жынмуди Анлахү, бусы вучонли жынмуди Анлахү; йинцысы зә Анлахүди мянчян йиче жынму дусы хуәди.

³⁹ Ющезы нянжинжынму фәди:

– Вуста, Ни фәди ходихын!

⁴⁰ Жыгәди йиху, таму зә бу ган вын Эрсали.

Мәсих либянди вынти

(Мф 22:41-46; Мк 12:35-37)

⁴¹ Эrsa ги таму фәди:

– Виса жынму фәди Мәсихсы Давуди Хубый? ⁴² Даву гәжя зә Зәбур Китабушон фәли:

«Анлахү ги вәди Жонгүйди фәли:

„Ни зуәдо Вәди юбонгә,

⁴³ дынди Вә ба Ниди дүшманму

эрдо Ниди жүә дихани“».

⁴⁴ Даву гэжя ба Мэсих жёди «Жонгуйди», замужя Мэсих нын дон Давуди Хубыйни?

Эрса фэди ё щёцин нянжинжынмуни

(Мф 23:1-36; Мк 12:38-40)

⁴⁵ Дажя тин Эрсadini. Та ги манламу фэди:

— ⁴⁶ Ниму ё щёцин нянжинжынмуни. Таму нэ чуан куан позы зэ чынпуни лэ-чи зу, хан нэ жё жынму зэ гэшон ги таму фэ сэлямунуни. Таму хан нэ зэ синагога литу зэмусы зэ янцишон зуэдо шонконзышонни. ⁴⁷ Таму ба гуафуму жя-ниди фугуй дёчёндини, хан нэ зэ жынмуди мянчян чончонди нян сур. Таму яндин шу ниннинди зуйни.

Йигэ нугуафуди нети

(Мк 12:41-44)

21 Эрса ба ту тэчелэ канлийихар, ючянханму замужя ба гэжяди чян эрдо шу нетиди щёнщёнзы литули. ² Та канжян йигэ чүн нугуафу ба лёнгэ суй тунчян* е эрдо щёнщёнзы литули. ³ Эрса зу фэди:

— Вэ ги ниму фэ шыхуа, жыгэ чүн нугуафу эрхади чян би данлин жынму ду эрхади дуэ. ⁴ Йинцысы данлин жынмусы да тамуди фугуйшон ба фуйүди чян жүчүлэли, нэгэ нугуафу чүн еба, кэсы та ба гэжяди йиче сынхуэди жёфи ду ги Анлаху жүгили.

*Эрса ба Иерусалимди сы вонху
цыйдёди зозор фэли*

(Мф 24:1-21; Мк 13:1-219)

⁵ Ющезы жынму фэли, ба Иерусалимди сы на са жычянди шыту зэмусы на са гуйжунди лицин дабанди. Эрса фэди:

— ⁶ Вонху ба ниму канжянди жыгэ сыди йиче шыту ду цыйдёни, бу жё йигэ шыту шындон данлинди йигэ шытушон.

⁷ Манламу вынли Эрсали:

— Вуста! Жыщезы сычин са сыхур йүни? Ба жыщезы сычин йүди сыхур да сашон нын канлэ? Ю замужяди жихони?

* ^{21:2} Жыгэ суй тунчян жёди «лепта».

⁸ Эrsa фэди:

– Ниму ё щёшинни, бэ жё жынму ба ниму линдо цуэ лўшонли. Хошо жынму ти Вэди минзы лэ фэни: «Вэ зу-сы Мэсих» зэмусы «Сыхур доли!» Ниму гыншон таму бэ зу. ⁹ Ниму ба дажонди зэмусы фанлуанди щинвын тин-жан, бэ хэпали. Жыщезы сычин ду яндин щянтунни йүни, кэсы ба жыгэ бу нын суанчын ахыр зэмани.

¹⁰ Йиху Эrsa ги таму фэди:

– Вонху йигэ минзү лян йигэ минзү дажонни, йигэ гуйжя лян йигэ гуйжя жынжанни. ¹¹ Хошо дифоншон ди дунни, жынму нэ ведўзыни зэмусы хэ вынбинни. Тян-шонди чигуэди сычин ба жынму ду хажинни. ¹² Жыщезы сычин йүди зычян, жынму ба ниму жуачўни, ниму зу шу япыйни; зэ синагога литу ги ниму дин зуйни, ба ниму ядо банфонзыни; ви Вэди минзы ба ниму линдо линшу-жынму зэмусы хуоншонму мянчанни. ¹³ Нэ зусы ниму ги Анлахўди Хо Щинвын дон гўвади сыхур. ¹⁴ Йинви жыгэ ниму жиха, гэжя бэ данщин фэ сани; ¹⁵ йинцысы Вэ ба фэ хуади бынсы лян эргили ги ниму ду гигини, бу жё нимуди дўшманму фандуй ниму йиче фэхади хуа. ¹⁶ Нэхур нимуди нён-лозыму, дишўнму, чинчинму, ляншуму ба ниму мэчўчини; ба ниму литуди ющезы жынму дасыни. ¹⁷ Ви Вэди минзы дажя хын нимуни; ¹⁸ кэсы ниму ба йигэ туфа ду бу дюдё. ¹⁹ Ниму дан жыннэ, цэ ба гэжяди мин жюхани.

²⁰ Ниму канжян дўшманди жўндуйму ба Иерусалим чынпу чўанчўди сыхур, ниму зу жыдо ба та далансанди сыхур куэ лэни. ²¹ Нэхур зэ Яхўти дифоншон жўди жынму ё подо саншонни; зэ Иерусалим чынпуни жўди жынму да чынпуни ё чўлэни; зэ щёнжуонни жўди жынму е бэ жин чынпуничи; ²² йинцысы жысы «Дин зуйди нэжитян»; нэхур Китабушон шехади йиче хуа зу чынхани. ²³ Нэжитян хуэвавади нўжынму лян нэ вавади мама дуэму кэлян! Йинцысы нэгэ сыхур дишон йү йигэ да кўнанни. Жыгэ минжын жё Анлахў чишонлэни. ²⁴ Ба ющезы жынму на до дасыни, ба ющезы жынму нингўди линдо данлинди йиче гуйжянини. Вэдожынму ба Иерусалим

чынпу зотани; таму ба жыгэ йичыр гандо тамуди сыхур-ди йиршонни.

Аданди Хубый зэ димяншон кэ лэни

(Мф 24:29-31; Мк 13:24-27)

²⁵Нэхур жэтушон, йүөлөншон, щинцюшон йү чигуэди сычинни. Хэниди да филон чў хэлын-дотынди шынчини, жё дишонди жынму ду луанлуан-хуонхуонни. ²⁶Зэ дун-яшон вонху йүди сычин ба жынму нянвар хасыдыйни, йинцысы тяншонди лилён е дунтанни. ²⁷Нэхур жынму ба Аданди Хубый зэ йүнцэшон лян Тади лилён дэ гуонлён до димяншон лэди канжяни. ²⁸Жыщезы сычин йүди сыхур, жё ниму занчелэ ба ту тэчелэни, йинцысы нэхур жү ниму минди жызы долэни!

«Ниму бэ дюдунли»

(Мф 24:32-35; Мк 13:28-31)

²⁹Эрса ги таму жёнли йигэ бифон:

– Ниму ба инжирфу лян данлинди фу канйихар. ³⁰Тамуди щин еер жончўлэди сыхур, ниму зу жыдони: щятян долэдыйли. ³¹Лян жыгэ йиён, ниму дан ба жыщезы сычин канчўлэ, нэхур ниму зу жыдони, Анлахў тяншонди Гуйжя долэдыйли. ³²Ниму ё жихани: жы йибыйзы жынму хан бу вучонди зычян, жыщезы сычин зу йүни. ³³Тян дэ ди ду лансандёни, кэсы Вэди хуа йинавар ю жинни.

³⁴⁻³⁵Ниму ё щёщинни, ниму бэ хэ жү, жонди бэ чы, бэ цоцин дун-яди сычин, зу жымужя бэ жё нимуди нозы хундёли. Бэ жё нэщезы жызы, зущён вон йиён, мынмынди ба ниму чанчўли; йинцысы нэщезы жызы ги чўан дун-яшонди йиче жынму ду ё долэни. ³⁶Ниму бэ дюдунли, йинавар ба Анлахў читоди, жё ниму ю нынгу ба жыщезы йиче йүди сычин жыннэ зэмусы зандо Аданди Хубый мянчян, ё ги Та ги жэвабуни.

³⁷Эрса йитянжя зэ Иерусалимди сыни жётё жынмудини, хушон да чынпуни чўлэ, зэ Елеон саншон фикжэдини.

³⁸Жынму ганзо йизор зу до Иерусалимди сыни лэ, щён тин Эрсади чуанжёни.

Жүхүти щён ба Эрса ги да ахунму мэгини

(Мф 26:1-5; 14-16; Мк 14:1-2; 10-11; Йих 11:45-53)

22 Чы мөю жёмян мэмэди жечи долэдыйли (ба жыгэ жечи хан жёди Яхүтиди Пасха). ² Яхүтиди да ахунму лян нянжинжынму вонщёнди зо йигэ фонбян фонфа ба Эрса дасыни, кэсы таму хэпа минжынни.

³ Нэгэ сыхур иблис жинли Жүхүти Искариотди щинни-ли. Нэгэ Жүхүтисы Эрсади шыэргэ Апостолмуди йигэ. ⁴ Та чи, лян яхүтиди да ахунму зэмусы Иерусалим сыди жүнгуанжынму йидарни шонлөнлийихар, замужя ба Эрса ги таму гигини. ⁵ Таму ба жыгэ хуа тинжян гошинзали, зу ги Жүхүти ба йинчян шүхали. ⁶ Жүхүти е дайинли, зу дынли фонбян сыхурли, вонщёнди жынму бу зэди нэйижыр ба Эрса ги таму мэгини.

*Эрса лян Тади манламу
чыли Пасха жечи хушонди фанли*

(Мф 26:17-25; Мк 14:12-26; 21-23; Йих 13:21-30)

⁷ Гуэ мөю жёмян мэмэ жечиди сыхур, ба яхүтиди Пасха жечиди ёнгозы зэди жызы доли. ⁸ Эрса ба Пётр лян Йихия дафачи, ги таму фэди:

– Ниму чи, ба Пасха жечи хушонди фан ги заму шөлүхачи!

⁹ Таму зу вынли Эрсали:

– Ни жё вэму до натар чи шөлүчини?

¹⁰ Эрса ги таму фэди:

– Ниму вон чынпуни зуди сыхур, нэтар пынжян йигэ жынни, нэгэ жын нади йигуанзы фи, ниму зу гыншон та чи. Та дан жин нагэ фонзыли, ¹¹ ниму зу ба нэгэ фонзыди жонгуйди вынйихар: «Вэмуди Вуста вын нидини: „Вэ лян Вэди манламу ё чы Пасха жечи хушон фанни; нэ йижян дэ киди фонзы зэ натарни?“» ¹² Нэгэ жын ба пуха хуатанди куанжан дэ киди фонзы ги ниму зыгини. Ниму зу зэ нэтар ба йиче ду шөлүха!

¹³ Манламу чүчи, канжян йиче сычин Эрса заму фэли нэмужя зу йүли. Таму зу зэ нэтар ба Пасха жечи хушон

чыди фан шэлүхали. ¹⁴Чы фанди сыхур доли, Эрса лян Апостолму йидарни зуэхали. ¹⁵Эрса ги таму фэди:

– Шу кўнанди зычян Вэ тэ шён лян ниму йидарни чы жыгэ Пасха жечи хушон фанни. ¹⁶Вэ ги ниму фэ, Анлахў тяншонди Гуйжя долэди сыхур, жыгэ хушонди фан ю жыншыди йисыни. Йү жыгэ сычинди зычян Вэ зэ бу чы жыгэ фан.

¹⁷Йиху Эрса ба йи ванванзы путожю начелэ, ги Анлахў долигэ ще, зу фэди:

– Ниму ба жыгэ ванванзы нашон, ги ниму гэжя фынкэ хэчи. ¹⁸Вэ ги ниму фэ, да жиргэ дашон, Анлахў тяншонди Гуйжя лэди нэйтянди зычян, Вэ зэ бу хэ жыгэ путожю. ¹⁹Эрса ба йигэ мэмэ начелэ, е ги Анлахў долигэ ще, ба мэмэ быйкэ, ги манламу фынги, фэди:

– Жыгэсы Вэди Жути; Вэ ба Та ви нимуди мин жүшондини. Вонхў ниму ба Вэ жичелэди сыхур, ё ба Вэди ганбан чунфуни.

²⁰Лян жыгэ йиён, ба фан чыван Эрса ба йи ванванзы путожю начелэ, фэди:

– Жы йи ванванзы путожюсы Вэди Ще: на жыгэ Ще Анлахў лян жынму динли шин хэтунли. Жыгэ Щесы ви ниму тонхади Ще. ²¹Кэсы ниму кан, нэгэ ба Вэ мэчўди жын лян Вэ йидарни зэ жыгэ жүэзышон зуэдини! ²²Аданди Хубый жочў Анлахўди воншён ё шу кўнанни; кэсы ба Аданди Хубый мэчўди нэгэ жын дуэму кэлян!

²³Манламу йигэ ба йигэ вынди:

– Щён ган жыгэ сычинди жынсы сый?

Сыйсы дин видади?

(Мф 20:24-28; 19:28; Мк 10:41-45)

²⁴Манламу зынжонли йигэ вынти: тамуди литу ба сый суандисы дин видади? ²⁵Эрса ги таму фэди:

– Дун-яшонди хуоншонму гуан минжындини; ба гуан тамуди жынму жёди «минжынди ляншуму». ²⁶Кэсы ниму жы-мужя ганбудый. Ниму литуди дажын ё лян щёжын йиённи, линшужын ё лян хуэжи йиённи. ²⁷Зуэха чыфанди жын да-ма, хансы фусы тади жын да? Донжансы зуэха чыфанди

жын да. Кэсы Вэ зэ ниму литусы фусыди жын. ²⁸ Вэ шули кўнанди сыхур, ниму йинавар лян Вэ зэ йидарнилэ. ²⁹ Жы-хур Вэ ба Вэди Дада ги Вэ гихади хуоншонди чўанли ги ниму е гигини. ³⁰ Вэди Гуйжя лэди сыхур, жё ниму лян Вэ йидарни зэ Вэди жуэзышон чы фанни зэмусы зуэдо хуоншон вифыншон ги Исраилди шыэргэ зўди жынму дин зуйни.

Эрса ба Пётр фанлянди зозор фэли

(Мф 26:31-35; Мк 14:27-31; Йих 13:36-38)

³¹ Эрса хан фэди:

– Шимэ, Шимэ! Иблис кэжя юли зыян нимуди кухуанли, вонщёнди, зущён хўржя на луэсэзы сэ мыйзыди йиён, ба ниму «сэйихарни». ³² Вэ ба Анлахў кэжя читоли, бу жё ни ба шинфу дюдёли. Вонху ни шущин, жочў Вэ жуангуэ-лэди сыхур, зу ги ни дищўнмуди шинфу ги жин.

³³ Пётр ги Эрса фэди:

– Жонгуйди! Вэ йўаньи лян Ни йидарни зуэдо банфонзыни, лян Ни йидарни вучонни!

³⁴ Эрса фэди:

– Пётр, Вэ ги ни фэ, жиргэ гунжи жёминди зочян, ни сан бян фэ жынбудый Вэни.

Жябозы, тибо зэмусы до

³⁵ Эрса ги манламу фэди:

– Зочян Вэ ба ниму дафачиди сыхур, бу жё ниму на жябозы, тибо хуэйжэсы хэ. Нэхур ниму чўэшоли са дунщили?

Таму хуэйдади фэсы:

– Сыса дунщи ду мэ чўэшо.

³⁶ Эрса фэди:

– Кэсы хазыр сый ю жябозы хуэйжэсы тибо, жё нэгэ жын ба таму нашон; сый мэю до, жё нэгэ жын ба тади йишон мэдё, ба до мэшон. ³⁷ Вэ ги ниму фэ, Китабушон щеди йигэ хуа: «Ба Та суанчын зуйжынли». Жыгэ хуа до Вэшон яндин ё йўхани. Фэ Вэди хуа кэжя доли йиршонли.

³⁸ Манламу фэди:

– Жонгуйди! Ни кан, жытар ю лёнгэ дони.

Эрса зу ги таму фэди:

– Гули!

**Эрса зэ Гефсимания фуй уанни
читоли Анлахұли**

(Мф 26:36-46; Мк 14:32-42)

³⁹Эрса да чынпуни чўчи, лян сўчонди йиён, вон Елеон саншон зули. Манламу е гыншон Та чили. ⁴⁰Таму доли нэ-гэ дифонди сыхур, Эрса ги манламу фэди:

– Ниму ё чито Анлахұни, щёщинни, ниму бэ шон иблисди донли.

⁴¹⁻⁴²Эрса да таму мянчян зудё, ли манламу бонжер эр йигэ шыту йуанди дифоншон гуйха, чито Анлахұди фэди:

– Вэди тьяншонди Ада-я! Ни дан ю вонщёнли, зу ба жыгэ кўнан, зущён йиван кўфи, да Вэди мянчян нагуэчи! Кэсы Ни бэ жочў Вэди вонщён ган; Ни жочў Ниди вонщён ган.

⁴³Йигэ Тьянчян да тьяншон до Эрса гынчян лэ, ги Та гили жинли. ⁴⁴Эрса щинни тэ нанди сыхур, Та йуэщин жэщинди читоли Анлахұли. Тади хан, зущён щедяндяр йиён, дедо дишонли. ⁴⁵Эрса читован, челэ, кэ доли манламуди мянчян, ба таму фа юцуди фижуэди канжянли. ⁴⁶Эрса зу ги манламу фэди:

– Ниму виса фижёдини? Ниму челэ, чито Анлахұчи, щёщинди, ниму бэ шон иблисди донли.

Ба Эрса жуачўли

(Мф 26:47-56; Мк 14:43-50; Йих 18:2-12)

⁴⁷Эрса хан фэхуади сыхур, йибазы жын лэли. Шыэргэ манламу литуди йигэ, минзы жёди Жўхўти, зэ жыщезы жынмуди туни зудини. Та вон чян чи, щён ба Эрса щинтынйихарни. ⁴⁸Эрса ги Жўхўти фэди:

– Жўхўти, ни дэ щинтынди щён ба Аданди Хубый мэчўчинима?

⁴⁹Лян Эрса йидарни занди манламу ба жыгэ сычин канжян, зу фэди:

– Жонгуйди! Жё вэму ба жыщезы жынму на до кандёнима?

⁵⁰Манламу литуди йигэ жын на до ба яхүти да ахунди хуэ-
жи канлийихар, зу ба тади ю эрдүэ кандёли. ⁵¹Эрса фэди:

– Ниму тынха! Бэ дажонли!

Йиху Эрса на шу ба нэгэ жынди эрдүэ дулийихар, зу ба
тади эрдүэ канхоли. ⁵²Эрса ги нэщезы щён ба Та жуачүди
яхүтиди да ахунму, бохү Иерусалим сыди жынмуди тузыму
зэмусы яхүтиди ложынму фэди:

– Ниму нади до дэ бонзы лэ, щён ба Вэ, зущён зыйку
йиён, жуачүнима? ⁵³Вэ тянтянмир лян ниму йидарни зэ
сыни зуэдини, ниму ба Вэ мэ жуа. Жыхур ниму ган жыгэ-
ди сыхур доли; хинанди лилён дунтанкэли.

Пётр фанлян бу жын Эрса

(Мф 26:57-58, 69-75; Мк 14:53-54, 66-72;

Йих 18:12-18, 25-27)

⁵⁴Жыхур таму ба Эрса жуачү, линдо яхүтиди да ахунди
фонзы литули. Пётр лойүанни гыншон таму зудини. ⁵⁵Та-
му зэ йүанзы литу дянди хуэ, зэ хуэдуй жуви зуэдини.
Пётр е зуэдо тамуди донжуннили. ⁵⁶Йигэ нү хуэжи канди
Пётр зэ хуэдуй гынчян зуэдини, зу лян нянжин динди ги
Пётр фэди:

– Жыгэ жын есы Эрса йидарниди жын!

⁵⁷Пётр ба жыгэ бу жынди фэди:

– Нүжын! Вэ жынбудый Та!

⁵⁸Гуэли йихур, данлинди йигэ жын канжян Пётр фэди:

– Ни есы Эрсади манламу литуди йигэ!

Пётр кэ фэди:

– Вэди ляншу! Вэ бусы таму литуди!

⁵⁹Гуэли бонжер йигэ сышынли, данлинди йигэ жын
ниннинди фэди:

– Жыгэ жын шызэ зусы Эрса йидарниди йигэ жын,
йинцысы та есы Галилея дифоншонди жын!

⁶⁰Пётр кэ фэди:

– Вэди ляншу! Вэ бу дун ни фэди са!

Та ба жыгэ хуа хан мэ фэван, гунжи жёли минли.

⁶¹Жыхур Эрса Жонгуйди ба ту жуангуэлэ, ба Пётр канли-
йихар. Пётр жыхур цэ жичелэ Эрса Жонгуйди ги та фэхади

хуали: «Жиргэ гунжи жё минди зочян, ни сан бян фэ жынбудый Вэ». ⁶² Пётр зу чўчи, кўтуэли.

Ба Эрса зотали

(Мф 26:67-68; Мк 14:65)

⁶³ Бохў Эрсади жынму дади зотали Тали. ⁶⁴ Таму ба Эрсади лян мынчў вынли Тали:

– Шынжын! Ни цэйихар, сый да Нидини?

⁶⁵ Таму хан фэли хошо данлинди дэцэ Эрсади хуали.

Эрса зэ яхўтиди годын шонлён хуэйишонни

(Мф 26:59-66; Мк 14:55-64; Йих 18:19-24)

⁶⁶ Жэту чўлэди сыхур, яхўтиди ложынму, да ахунму лян нянжинжынму ду шудо йидарнили, ба Эрса линдо тамуди годын шонлён хуэйишонли. ⁶⁷ Таму вынли Эрсали:

– Ни ги вэму фэ, Нисы Мэсихма?

Эрса ги таму хуэйдади фэсы:

– Вэ дан ги ниму фэ еба, ниму хан бу шинфу Вэ; ⁶⁸ Вэ дан ги ниму ги са вынти еба, ниму е бу ги хуэйда. ⁶⁹ Да жиргэ дашон Вэ, Аданди Хубый, зуэдо лилёндади Анлахўди юбонгэни.

⁷⁰ Дажа ду фэди:

– Суанхалэ, Нисы Анлахўди Эрзыма?

Эрса ги таму хуэйдади фэсы:

– «Вэсы Анлахўди Эрзы» – жыгэ хуасы ниму фэхади.

⁷¹ Таму фэди:

– Заму зэ бу ё данлинди гўвали! Заму ду тинжян Эрса гэжя фэхади хуали.

Эрса зэ Пилат мянчяни

(Мф 27:1-2, 11-14; Мк 15:1-5; Йих 18:28-38)

23 Йиче жынму ду челэ, ба Эрса линдо Пилат мянчянли. ² Зэ нэтар таму ги Эрса динзуйди фэди:

– Вэму канлэли жыгэ Жын чүнди, жё вэмуди минжын фанчелэ, бу жё вэму ги Римди хуоншон чў фи, хан фэди, Та гэжясы Мэсих, Тасы хуоншон.

³ Пилат вынли Эрсали:

– Нисы яхўти жынмуди Хуоншонма?

Эрса ги та хуэйдади фэсы:

– Жысы ни фэхади хуа.

⁴Пилат ги яхүтиди да ахунму дэ жынму фэди:

– Вэ канбучүлэ жыгэ Жын ю са цуэни.

⁵Кэсы таму йүэщин ниннинди фэди:

– Та зэ чүан Яхүти дифоншон чуанжөдини, жё минжын фанчелэни, жыхур да Галилея дифоншон доли жытарли.

Эрса зэ Ирод мянчяни

⁶Пилат ба жыгэ хуа тинжян, зу вынли:

– Жыгэ Жынсы Галилея дифоншонди жынма?

⁷Та жьдони, Эрсасы Ирод гуанди Галилея дифоншонди жын, йиху ба Эрса сундо Иродди мянчянли. Нэгэ сыхур Ирод е зэ Иерусалим чынпунилэ. ⁸Ирод ба Эрса канжян гошинзали, йинцысы та тингуэ Эрсади сычин; та зочян зу щён жяньихар Эрсани, зывонди канйихар Та щян йигэ кэрамэтини. ⁹Йинви жыгэ, Ирод ги Эрса гили хошо вынти, кэсы Эрса йигэ хуа е мэ фэ. ¹⁰Яхүтиди да ахунму лян нянжинжынму ду зэ нэтар занди, ниннинди ги Эрса динзуйдини. ¹¹Ирод лян тади донбинди жынму йидарни зота Эрсали зэмусы чуашё Тали. Таму ги Эрса чуанли йигэ гуйжунди йишон, ба Та йүанхуэй ги Пилат сунчили. ¹²Жы йитян Ирод лян Пилат чынли ляншумули; йинцысы жыгэди зычян таму лёнгэрсы дүшманмулэ.

Ги Эрса динли сызуйли

(Мф 27:15-26; Мк 15:6-15; Йих 18:39–19:16)

¹³Пилат жё яхүтиди да ахунму, минжынди линшуму дэ данлинди жынму до тади мянчян лэ, ¹⁴зу ги таму фэди:

– Ниму ба жыгэ Жын линдо вэди мянчян, фэди Та жё минжын фанчелэни. Вэ зэ нимуди мянчян шынвын Тали, кэсы ба ниму ги Та фэхади цуэ вэ канбучүлэ. ¹⁵Ирод е канбучүлэ Тади цуэ, йинцысы та ба жыгэ Жын йүанхуэй сундо жытарли. Да жыгэшон канчүлэни, жыгэ Жын мэ ганха сыса сычин, бу жыгү ги Та дин сызуй. ¹⁶Вэ жё вэди жынму на бянзы да жыгэ Жын ни, йиху ба Та фонкэни.

17-18 Кәсы йиче жынму ду дашын ханди:

– Ни ба Та дасычи! Ба Варавва ги вәму фонкэ!

19 Варавва зочян зэ чынпуни ганли фанлуанли зэмусы ба жын дасыли, йинви жыгэ ба та ядо банфонзынили. 20 Пилат щён ба Эrsa фонкэни, йүанхуэй чүанфэли жынмули.

21 Кәсы таму йүэщин дашын ханди:

– Ни ба Та диндо муту шызышон! Ни ба Та диндо муту шызышон!

22 Пилат ди санбян ги таму кә фэди:

– Та ганли са буходи сычинли? Вә канбучүлэ, ги Та ё дин сызуйди. Вә жё жынму на бянзы ба жыгэ Жын дани, йиху ба Та фонкэни.

23 Жынму ниннинди дашын ханди, читоди жё Пилат ба Эrsa диндо муту шызышонни. Линийрни тамуди ханшын юли дыйшынли. 24 Пилат жочү тамуди чито зу ганли. 25 Та ба ганли фанлуанди, дасыли жынди зэмусы ядо банфонзыниди Варавва фонкэли, ба Эrsa ги таму гигили, жё таму щён ган сали, зу ганчини.

***Ба Эrsa диндо муту
шызышонли***

(Мф 27:32-44; Мк 15:21-32; Йих 19:17-27)

26 Донбинди жынму ба Эrsa нашон зуди сыхур, лүшон ба йигэ да щёнжуонни вон чынпуни хуэйлэди жын пынжянли. Тасы Киринае дифоншонди жын, минзы жёди Щимэ. Донбинди жынму ба жыгэ жын жуачү, ба муту шызы гәдо тади жягуэзышон, жё та гыншон Эrsa зуни.

27 Хошо жынму е гыншон Эrsa зули; таму литу ющезы нүжынму ви Та фа юцуди кўдини. 28 Эrsa ба ту жуангуәлэ, дуйчү таму фэди:

– Иерусалимди нүжынму! Ниму ви Вә бә кўли! Ниму ви ниму гәжя зэмусы нимуди ваму ё кўни! 29 Жызы куэ зу долэни, жынму фэни: «Мә хуэвавади, мә сын-ёнди, мә нэ вавади нүжынму дуэму гощин!» 30 Нэхур жынму ги сан фэни: «Ниму дедо вәмушон!» Ги го лён е фэни: «Ниму ба вәму гәчү!» 31 Йинцысы, таму дан ги лю фу ба жымужяди сычин ганли, нэхур ги ган фу ган са сычинни?

³² Донбинди жынму ба лёнгэ зуйжын дэшон, щён ба таму лян Эrsa йиён е диндо муту шызышонни. ³³ Таму доли йигэ дифоншон (жыгэ дифонди минзы жёди «Тукэ-лон дифон»), нэтар ба Эrsa диндо муту шызышонли. Зу нэгэ сыхур таму хан ба лёнгэ зуйжын лян Эrsa йиён диндо данлинди лёнгэ муту шызышонли, ба йигэ диндо Эrsaди юбонгэли, ба ди эргэ диндо Тади зуэбонгэли.

³⁴ Эrsa фэди:

– Ада! Ни ги таму ба жыгэ гўнахар фоншэдэ, йинцысы таму бу жыдо таму ган сadini.

Донбинди жынму жуали чир, ба Эrsaди йишон ги таму гэжя фынкэли. ³⁵ Жынму ду занди кан жыгэдини. Яхўтиди линшужынму цыщэ Эrsaди фэди:

– Та ба данлин жынмуди мин ду жюхали. Та дан шызэ зусы Анлахў жянчўлэди Мэсихли, жё Та ба гэжяди мин жюха!

³⁶⁻³⁷ Донбинди жынму е цыщэли Эрсали. Таму вон чян чи, ба цў надо Эrsaди зуй гынчан, фэди:

– Ни дансы яхўти жынмуди Хуоншонли, Ни ба Ни гэжяди мин жюха!

³⁸ Эrsaди шонмян гуади йигэ банбанзы, жыгэ банбанзышон щеди:

«Тасы яхўти жынмуди Хуоншон».

³⁹ Лян Эrsa йиён диндо муту шызышонди лёнгэ зуйжын литуди йигэ жын дэцэ Эrsa фэди:

– Нандый Ни бусы Мэсихма? Ни ба Ни гэжяди мин лян вэмуди мин ду жюха!

⁴⁰ Мэгуэсы ди эргэ донгуали та, зу фэди:

– Ни лян Та шу йиёнди зуйдини, ни виси бу хэпа Анлахў? ⁴¹ Заму шу гундоди зуйдини, йинцысы заму жочў заму ганхади сычин шу жыгэ зуйдини. Мэгуэсы жыгэ Жын са ха сычин ду мэ гангуэ.

⁴² Йиху жыгэ жын ги Эrsa фэди:

– Эrsa! Ни дон хуоншонди сыхур, чин Ни ба вэ жичелэ!

⁴³ Эrsa ги та фэди:

– Вэ ги ни фэ шыхуа, жиргэ ни лян Вэ йидарни жин тянтонни!

Эрсади вучон

(Мф 27:45-56; Мк 15:33-41; Йих 19:28-30)

⁴⁴⁻⁴⁵Бонжер шонвуди сыхурли, мынмынди жәтуди гуонлән мәюли, хинан ба чүан диже зонянти; зу жымузя гуәли сангә сышын. Зә Иерусалимди сы литу гуади лянзы мынмынди чәлан, фынчын лән бангәзыли. ⁴⁶Нәхур Эрса дашын ханди:

– Вәди Ада! Вә ба Вәди мин ги Ни гидини!

Ба жыгә хуа фәван, Эрса зу дуанли чили. ⁴⁷Йигә жүнгуан канжян жыгә сычин замузя йүли, зу куажән Анлахүди фәди:

– Жыгә Жын шызә зусы гундожын!

⁴⁸Зә жуви занди жынму ба жыщезы сычин канжян, ду пәфанхали, ба гәжяди конзы пыйди хуэйчили. ⁴⁹Жынды й Эрсади жынму зәмусы да Галилея дифоншон гыншон Та ләди нүжынму ду зә лойүанни занди, канли жыщезы сычинли.

Ба Эрсади мәти сундәли

(Мф 27:57-61; Мк 15:42-47; Йих 19:38-42)

⁵⁰⁻⁵¹Аримафея шәнжуонниди йигә жын, минзы жәди Юсуф, ләли. Тасы йигә хо гундожын; та ба Анлахү тяншонди Гуйжя е дындини. Суйжан Юсуфсы йигә годин шонлән хуэйиди йүан еба, та мә даин нәгә хуэйи данлин йүанмуди мусуан дә ганбан. ⁵²Юсуф доли Пилат гынчян, читоди жә Пилат ба Эрсади мәти ги та гигини. ⁵³Йиху та ба Эрсади мәти да муту шызышон чүхалә, на йикуэзы мабу гуәчү, сундо саншон тохади йигә ёдуннили. Зочян вон жыгә ёдунни ба сысыйди мәти ду мә сунгуә. ⁵⁴Нәйитянсы жүма, ги шанбә шәлүди туйитян. Шанбә куә зу доләни. ⁵⁵Нәщезы да Галилея дифоншон гыншон Эрса ләди нүжынму лян Юсуф йидарни чи, ба жыгә ёдун канжянли, ба Эрсади мәти замузя сундәди е канжянли. ⁵⁶Таму хуэйчи, ги Эрсади мәтишон ба заёнди шән-ю ду шәлүхали. Йиху таму жочү Муса шынжынди фынфу шанбәди нәйитян хуанхали.

Эрса кә хуәли

(Мф 28:1-8; Мк 16:1-8; Йих 20:1-10)

24 Екшанбэди нэйитян ганзо йизор, жәту жән чүлэди сыхур, нэщезы нүжынму ба шәлүхади щән-ю нашон, зу жочү ёдун зули. ²Таму йиканса, дыйдо сый ба шыту да ёдун гынчян кәжя гунгуэчили. ³Нүжынму жинли ёдун литу, кәсы ба Эрса Жонгуйди мәти мә зожуә. ⁴Таму бусүщинхали. Мынмынди лёнгә жын зандо таму мянчянли; таму чуанди йишон са гуонлөндени. ⁵Нүжынму ду хәли пали, таму ба ту дихали. Нэ лёнгә жын ги таму фәди:

– Ниму виса зэ вучонлиди жынму донжунни зо хуә Жындини? ⁶Та мә зэ жытар; Та кә хуәли. Ниму ба Та зэ Галилея дифоншонди сыхур ги ниму фәгуәди жыгә хуа жидинима: ⁷«Ба Аданди Хубый ги югүнахарди жынму гигини. Таму ба Та диндо муту шызышон, ди сан тян Та кә хуәни».

⁸Нүжынму ба Эрсади жыщезы хуа жичелә, ⁹да ёдун литу чүлә зу хуэйчили. Йиху таму ба жыщезы сычин ги шыйигә Апостолму зэмусы данлинди жынму ду фәгили. ¹⁰Ба жыщезы хуа ги Апостолму фәгиди нүжынму литу ю Магдала дифоншонди Мариам, Йоанна, Ягүбэди мама, минзы е жәди Мариам, зэмусы данлинди нүжынмуни. ¹¹Кәсы Апостолму сылөнди жыщезы нүжынму хүфә-бадо, таму мә щинфу нүжынмуди хуа. ¹²Пётр челә, жочү ёдун подөли; до нэтар та ба ё гуа, жочү ёдун литу йиканса, гуон ба йикуэзы сабу канжянли. Пётр ба жыщезы йүхади сычин канжян, чөчиди хуэйчили.

Лөнгә манла ба Эрса канжянли

(Мк 16:12-13)

¹³Зу нэйитян манламу литуди лёнгә вон йигә щәнжуонни зудини. Жыгә щәнжуонди минзы жәди Эммаус, ли Иерусалим чынпу бонжер ю шыйигә километрни. ¹⁴Лүшон таму ба жыщезы йүхади йиче сычин толүнли. ¹⁵Таму фә хуади сыхур, мынмынди Эрса доли таму гынчянли, лян таму йидарни зутуәли. ¹⁶Таму канжян Эрсали, кәсы ба Та мә жындый. ¹⁷Эрса вынли тамули:

– Ниму зуди толүн садини?

Таму занхали, ляншон юли юцуди ёншыли. ¹⁸Таму литуди йигэ жын, минзы жёди Клеопа, вынли Эрсали:

– До Иерусалим чынпуни лэди жынму литу Ни луэмур йигэр бу жыдо жыщезы жызы литу зэ нэтар йұха са сычинлима?

¹⁹Эрса ги таму фэди:

– Са сычинса?

Таму хуэйдади фэсы:

– Жы зусы Назарет чынпуниди Эрсади сычин! Тасы йигэ Шынжын, Та ю бынсы зэ Анлахұ зэмусы жынму мянчян фэхуа, ган чёчи сычинни. ²⁰Вэмуди да ахунму лян линшужынму ба Та ги Пилат гиги, ги Та динли сызуй, йиху диндо муту шызышонли. ²¹Вэму зывонди, Та лэ ба Исраилди жынму жефончүлэни! Чүгүэ жыгэ, жыщезы сычин йұхади кэжя сан тянли; ²²вэму литуди жигэ нұжын жё вэму чёчихали. Таму ганзо йизор до ёдунни чи, ²³ба Эрсади мэти мэ зожуэ. Йиху таму хуэйлэ фэди, таму ба Тянщянму канжянли; Тянщянму ги таму фэди, Эрса кэ хуэли. ²⁴Вэму литуди жигэ жын до ёдунни чи канлийихар, ба йиче сычин ду лян нұжынму фэхади йиён канжянли; кэсы ба Эрса мэ канжян.

²⁵Эрса ги таму фэди:

– Ниму мындихын! Нимуди щин виса жыму нин, ниму виса бу ган щинфу шынжынму фэхади йиче хуа? ²⁶Нандый Мэсих бу шу жыщезы кұнан нын дыйшон Тади миншынма?

²⁷Йиху Эрса да Муса зэмусы данлин шынжынмуди фу дашон ги таму пэщёли Китабушон щеди Та либянди йиче хуали. ²⁸Жыхур таму до щён чиди нэгэ щёнжуон гынчяндыйли. Эрса жуонди хан ё вон чян зуни. ²⁹Таму ба Эрса чүанфэди фэди:

– Кэжя хушонли, тян е хили, чито Ни лян вэму йидарни шынха!

Эрса зу жинчи, щён лян таму йидарни шынхани. ³⁰Таму зуэха чы фанди сыхур, Эрса ба мэмэ начелэ, ги Анлахұ долигэ ще, ба мэмэ быйкэ, ги таму гигили. ³¹Тамуди нянжин мынмынди зынкэли; жыхур таму цэ ба Эрса жындыйли.

Кэсы Эрса мынмынди бужянти. ³²Таму йигэ ги йигэ фэди:

– Лўшон Эрса ги заму фэхуади сыхур, ги заму пэщэ Китабуди сыхур, нандый замуди шин, лян хуэ йиён, мэ жуэма?

³³⁻³⁴Таму донвэр челэ, хуэйли Иерусалим чынпули. Нэ-тар таму канжянли шыйигэ Апостолму лян данлинди жынму шудо йидарнили. Таму ги жы лёнгэ жын фэди:

– Эрса Жонгуйди шызэ кэ хуэли! Шимэ ба Та жянли!

³⁵Нэ лёнгэ жын е ги дажя фэли, лўшон таму йүхади са сычин зэмусы Эрса бый мэмэди нэгэ сыхур, таму замужя ба Та жындыли.

Эрса доли манламу мянчянли

(Мф 28:16-20; Мк 16:14-18; Йих 20:19-23; Ап 1:6-8)

³⁶Таму фэ жыщезы хуади сыхур, мынмынди Эрса гэжя зандо таму донжунни, ги таму фэди:

– Вэ ги ниму панвон пиннан!

³⁷Ба таму ду хажинли; таму сылэнди жысы йигэ луэхур.

³⁸Эрса ги таму фэди:

– Ниму виса хэпадини? Нимуди шинни виса ю шанкини? ³⁹Ниму ба Вэди шу дэ жүэ канйихар! Жысы Вэ, бусы данлинди жын! Ниму ба Вэ дуйихар зу жыдоли; йинцысы луэхур мэю жу, е мэю гүдү. Ниму кан, жыщезы Вэ ду юни.

⁴⁰Эрса ба жыгэ хуа фэван, жё таму канйихар Тади шу дэ жүэни. ⁴¹Таму гошинли дэ чёчили, хан бу шинфу жысы Эрса. Эрса вынли тамули:

– Ниму жытар ю са чыдини?

⁴²Таму зу ба йи куэзы кохади йү ги Эрса гигили. ⁴³Та жешуха, зэ таму мянчянни чыли. ⁴⁴Йиху Эрса ги таму фэди:

– Зочян Вэ лян ниму зэ йидарниди сыхур, ба жыщезы сычин ги ниму ду фэгүэ: Мусади фалўшон, данлин шын-жынмуди фушон зэмусы Зэбур Китабушон Вэ либян щехади жыщезы йиче сычин яндин йүни.

⁴⁵Жыхур Эрса ги таму гили эргили, жё таму ба Китабушон щехади хуа минбыйни, ⁴⁶зу ги таму фэди:

– Китабушон щеди: Мэсих ё шу кўнанни, вучонлиди ди сан тян, Та кэ хуэни. ⁴⁷Ниму ё ви Тади минзы да Иерусалим

чынпуни дашон йичыр до данлинди йиче гуйжяни ба жынму ду чуанжэни, жё жынму шущин, ба тамуди гўнахар жынни, йиху Анлахў ги таму ба гўнахар цэ фоншэни. ⁴⁸Ниму зу ги жыщезы сычин дон гўвамуни. ⁴⁹Вэ ба Вэ Дада шўхади сычин ги ниму гигини; жё ниму зэ Иерусалим чынпуни дынди йичыр до Тяншонди Лилён до нимушон халэни.

Эрса шонли тянли

(Мк 16:19-20; Ап 1:9-11)

⁵⁰Жыгэди йиху, Эрса ба таму линдо чынпу вэтули, доли Вифания щёнжуоннили. Нэтар Эрса ба Тади шу тэчелэ, ги таму панвон холи. ⁵¹Эрса ги таму панвон ходи йиху, да таму мянчян зудё, шонли тянли. ⁵²Таму зу ги Эрса гуйхали, го-го-шинщинди хуэйли Иерусалим чынпули. ⁵³Нэтар таму йинавар куажён Анлахўди, шындо Иерусалимди сы литули.





ЙИХИЯ ЩЕХАДИ ИНЖИЛ

Анлахүди Хуа

1 Датуршон, ба дун-я зохади зочян, Хуа кэжя юлэ. Хуа лян Анлахү зэ йидарнилэ; Хуа зусы Анлахү. ² Датуршон, Хуа лян Анлахү зэ йидарнилэ. ³ Анлахү лян Тади Хуа ба дун-яшонди йиче дунщи зохали; йиче зохади дунщи литу мөю йигэ дунщи бусы лян Та зохади. ⁴ Хуасы сынхуэди гынзы; жыгэ сынхуэ ба Гуонлён ги жынму гидини. ⁵ Гуонлён зэ хинан литу са лёндини; хинан ба гуонлён мэ нячү.

⁶ Ю йигэ жынлэ, минзы жёди Йихия. Тасы Анлахү дафалэди жын. ⁷ Йихия лэ, щён миндамин фэ нэгэ Гуонлён, жё дажя ба тади хуа тинжян, ду шинфуни. ⁸ Йихия гэжя бусы нэгэ Гуонлён, кэсы та ё миндамин фэ нэгэ Гуонлённи. ⁹ Нэгэ гуонлёнсы жыншыди Гуонлён. Та до дун-яшон лэ, ба йиче жынму ё жолённи. ¹⁰ Хуа зэ дун-яшон юлэ; Анлахү лян Та ба дун-я зохали, кэсы дун-яшонди жынму ба Та мэ жын. ¹¹ Хуа доли гэжяди дифоншонли, кэсы Та гэжяди жынму ба Та мэ жешу. ¹² Сый ба Та жешухали, шинфули Тали, Хуа ги таму гили нынгу, жё таму дон Анлахүди эрнүмуни. ¹³ Ба жымужяди жынму бусы на нён-лозыди ще сын-ёнхади, е бусы жутиди вонщён сын-ёнхади, е бусы нанжынди вонщён сын-ёнхади, кэсы Анлахү гэжя чынли тамуди Дадали.

¹⁴ Хуа чынли жынли, зэ вөму донжунни гуэли жызыли. Хуа йиман ю Анлахүди нэчин дэ жынлини. Заму ба Тади

гуонлён канжянли; гуон Дадади луэмур йигэ Эрзы ю жыгэ гуонлённи. ¹⁵Йихия миндамин фэ Эрзыдини зэмусы ханди:

– Вэ зочян фэли Тали: Та зэ вэди хуту лэни, кэсы Та би вэ вида, йинцысы ба вэ сын-ёнхади зочян, Та кэжя юлэ.

¹⁶Да Эрзыди фужу нэчиншон вэму ду дыйли Анлахүди нэчинли; нэчиншон хан жяли нэчинли. ¹⁷Анлахү чечү Му-са шынжын ба Тади фалу гигили, кэсы нэчин лян жынли чечү Эрса Мэсих лэли. ¹⁸Сый ду мэ жангуэ Анлахү; лян Дада тунйиди луэмур йигэ Эрзы цэ жё жынму ба Анлахү жыдоли.

Йихиясы сый?

(Мф 3:1-12; Мк 1:1-8; Лк 3:1-18)

¹⁹Жысы Йихия дон гүвади хуа. Иерусалим чынпуниди яхүти жынму ба тамуди ахунму лян левитжынму дафадо Йихия гынчян, вынли тали:

– Нисы сый?

²⁰Йихия мэ ги дуанжүэхуа, зу миндамин жынли:

– Вэ бусы Мэсих.

²¹Таму кэ вынли:

– Жымужя фэчи, нисы сый? Нисы Илияс шынжынма?

Йихия хуэйдади фэсы:

– Вэ бусы Илияс.

Таму кэ вынли:

– Нисы шынжынма?

Йихия кэ хуэйдади фэсы:

– Вэ бусы шынжын.

²²Линйирни таму фэди:

– Наму, ни ги вэму фэ, нисы сый, жё вэму ги дафа вэ-муди жынму ги са хуэйдани. Ни гэжя фэ, нисы са жын?

²³Йихия кэ фэди:

– Зущён Исаяя шынжын фэхади йиён:

«Вэ зусы зэ кунтанни ханди йигэ жын:

„Ги Жонгуйди ба лү зү пинпирди!“»

²⁴⁻²⁵Нэщезы дафалэди фарисейжынму кэ вынли Йихияли:

– Ни дан бусы Мэсихли, бусы Илиясли, е бусы шын-жынли, ни виса ба жынму ви Анлахү зэ фи литу щидини?

²⁶ Йихия хуэйдади фэсы:

– Вэ зэ фи литу ба жынму щидини; кэсы зэ ниму дон-жунни занди йигэ Жын, ниму ду ба Та жынбудый. ²⁷ Та зэ вэди хуту лэдини, вэ бу жыгү ба ё гуха ги Та гэ хэдэзычи.

²⁸ Жыщезы сычин зэ Иордан хэ нэбонгэди Вифания дифоншон йүхали (жы зусы Йихия щиди жынмуди дифон).

Анлахүди Ёнгозы

²⁹ Ди эр тьян, Йихия канжян Эрса до та гынчян лэдини. Йихия зу фэди:

– Ниму кан! Жысы Анлахүди Ёнгозы. Та ба чүан дун-я жынмуди гүнахар щёмедёдини! ³⁰ Жы зусы вэ фэхади нэгэ Жын: «Вэди хуту лэ йигэ Жынни, Та би вэ вида, йинцысы ба вэ сын-ёнхади зочян, Та кэжя юлэ». ³¹ Зочян вэ мэ жындый нэгэ Жын; хазыр вэ лэ, зэ фи литу ба жынму щиди, жё Исраилди жынму ба Та жындыйни.

³² Жыхур Йихия миндамин фэди:

– Вэ канжянли: Анлахүди Рух, зушён гэзы йиён, да тьяншон фихалэ, луэдо жыгэ Жынди шыншонли. ³³ Вэ хан мэ жындый Та, кэсы Анлахү ба вэ дафачиди сыхур, жё вэ зэ фи литу ба жынму щиди, зу ги вэ фэли: «Ни дан канжян Анлахүди Рух фихалэ, луэдо сыйди шыншонли, Та зусы лян Анлахүди Рух ба жынму щиди Жын». ³⁴ Вэ ба жыгэ сычин кэжя канжянли; йинви жыгэ вэ ги ниму фэ: Та зусы Анлахүди Эрзы!

Эрса ба ту жигэ манламу жянчүлэли

³⁵ Гуэли йитян, Йихия лян тади лёнгэ манла йүанхуэй зэ нэтар занхали. ³⁶ Йихия канжян Эрса лэдини, зу фэди:

– Ниму кан! Жысы Анлахүди Ёнгозы!

³⁷ Тади лёнгэ манла ба жыгэ хуа тинжян, зу гыншон Эрса зули. ³⁸ Эрса жуангуэлэ, канжян таму гыншон Та зуди-ни, зу вынли тамули:

– Ниму зо садини?

Таму хуэйдади фэсы:

– Рабби! Ни зэ натар жүдини?

(«Рабби» жыгэ хуади йисысы «Вуста».)

³⁹ Эrsa ги таму хуэйдади фэсы:

– Ниму лэ канйихар!

Таму лян Эrsa йидарни чи, ба Та жўди вөр канжянли, зу нэйитян лян Эrsa шындод йидарнили. Нэхур шонву гуэли бонжер сыгэ сышынли.

⁴⁰ Ба Йихияди хуа тинжян, гыншон Эrsa зуди нэ лёнгэ жын литуди йигэсы Андрей, тасы Шимэ-Пётрди шүнди.

⁴¹ Та шянтуни чи, ба тади гэгэ зожуэ, зу фэди:

– Вэму ба Мэсих зожуэли!

(«Мэсих» на грек хуа фэдисы «Христос».)

⁴² Андрей зу ба Шимэ линдо Эrsa гынчянли. Эrsa ба Шимэ вонлийихар, фэди:

– Нисы Йихияди эрзы Шимэ, Вэ хан ги ни нан йигэ минзыни, жэди Кифа.

(«Кифа»ди йисы, лян Пётрди йиён, зусы «Шыту».)

*Эrsa жё Филипп дэ Нафанаил
гыншон Та зун*

⁴³ Гуэли йитян, Эrsa щён зу Галилея дифоншончини. Та ба Филипп зожуэ, зу ги та фэди:

– Ни гыншон Вэ зу!

⁴⁴ Филиппсы Вифсаида чынпуниди жын, та лян Андрей дэ Пётрсы йигэ чынпуниди жын. ⁴⁵ Филипп ба Нафанаил зожуэ, зу ги та фэди:

– Муса шынжын зэ фалушон лян данлинди шынжын-му зэ тамуди фушон щели Сыйли, вэму ба Та кэжя зожуэли. Та зусы Эrsa, Юсуфди эрзы, Назарет чынпуниди Жын.

⁴⁶ Нафанаил зу вынли тали:

– Нандый да Назарет чынпуни нын чўлэ са ходима?

Филипп ги та фэли:

– Ни лэ гэжя канйихар!

⁴⁷ Эrsa канжян Нафанаил до Та гынчян лэдини, зу фэди:

– Ниму кан! Жысы йигэ жыншыди Израилжын; тади щинни йидяр гуйжи ду мёю!

⁴⁸ Нафанаил вынли Эрсали:

– Ни да нани жындый вэни?

Эрса хуэйдади фэсы:

– Филипп хан мө жё ниди сыхур, Вэ ба ни зэ инжирфу диха зуэди кэжя канжянли.

⁴⁹Нафанаил ги Эрса фэди:

– Вуста, Нисы Анлахүди Эрзы; Нисы Израилди Хуоншон!

⁵⁰Эрса ги та фэди:

– Йинцысы Вэ ги ни фэли: «Вэ ба ни зэ инжирфу диха зуэди сыхур канжянли», ни зу шинфулима? Вонху ни канжян би жыгэ хан видади сычинни!

⁵¹Эрса ги таму кэ фэди:

– Вэ ги ниму фэ шыхуа, вонху ниму канжянни: тян кэ-кэни, Анлахүди Тянщянму до Вэ, Аданди Хубый гынчян халэ-шончини.

*Эрса зэ Кана чыппуни жехунди янщишон
донли кили*

2 Ди сан тян, зэ Галилея дифоншонди Кана чыппуни йигэ жын жели хунли. Эрсади мама зэ нэтарлэ. ²Ба Эрса лян Тади манламу е чиндо жехун янщишон жё донли кили. ³Кижынму ба путожю хэван, Эрсади мама ги Эрса фэди:

– Таму мөю путожюли.

⁴Эрса ги та фэди:

– Ама! Ни виси дажэ Вэдини? Вэди сыхур хан мө дони.

⁵Кэсы Эрсади мама ги хуэжиму гилигэ фынфу:

– Та жё ниму ган сани, ниму зу жочү Тади хуа ганчи!

⁶Нэтар ю люгэ шыту гуанзылэ; яхүти жынму жочү куйчын ши шуди сыхур, ба жыщезы шыту гуанзы сыйүндини; вон мый йигэ гуанзыни нын гуан бонжер йибый литр фи.

⁷Эрса ги хуэжиму фэди:

– Ниму ба гуанзы на фи гуанман!

Таму зу ба гуанзы гуан манмардили. ⁸Эрса кэ фэди:

– Жыхур ниму ёщер фи, ги жокан яншиди жын сунчи.

Таму зу сунчили. ⁹Жокан яншиди жын ба нэгэ фи чонлийхар: жысыма, нэгэ фи кэжя бянчын путожюли. Жокан яншиди жын бу жыдо жыгэ путожю да натар лэли; ба жыгэ сычин гуон гуан фиди хуэжиму жыдо-

ни. Жокан яншиди жын ба шиннүшү жёлэ, ¹⁰ зу ги та фэди:

– Данлинди жынму щянтунни ба хо путожю гини, дынди кижынму хэгули, цэ ба бухощерди путожю гини. Кэсы ни ба дин ходи путожю шындо жыхурли!

¹¹Зу жымужя, Эрса зэ Галилея дифоншонди Кана чынпунни ба Тади ту йигэ кэрамэти щянчүлэли. Да жыгэ сычиншон ба Анлахү ги Эрса гихади лилён нын канлэ. Эрсади манламу зу щинфули Тали.

¹²Жыгэди йиху, Эрса лян Тади мама, дищүнму дэ манламу йидарни доли Капернаум щёнжуоннили, зэ нэтар занли житян.

Эрса ба Иерусалимди яхүтиди сы зү ганжнли

(Мф 21:12-13; Мк 11:15-17; Лк 19:45-46)

¹³Яхүти жынмуди Пасха жечи куэ зу долэни. Эрса зули Иерусалим чынпунили. ¹⁴Зэ Иерусалим сыди йүанзыни Та канжян юди жынму ба ню, ён дэ гэзы мэдини, юди жынму зуэди хуан йинчяндени. ¹⁵Эрса зу на шынзы бянлигэ бянзы, ба ню дэ ён да сыди йүанзыни ду ёчүчили, ба хуан йинчян жынмуди жуэзы щяндоли; чян ду гундо дихали. ¹⁶Йиху Эрса ги мэ гэзыди жынму е фэли:

– Ниму ба жыщезы дунщи ду начүчи, ба Вэ Дадади сы бэ зүчын базэрли!

¹⁷Нэхур Эрсади манламу зу ба Китабушон щехади хуа жичелэли:

«Анлахү! Вэди щин ви Ниди сы цошиндини,
лян хуэ йиён жуэдини!»

¹⁸Яхүтиди линшужынму зу вынли Эрсали:

– Ни нын щян замугэ кэрамэти, жё вэму жыдойихар, Ни ю ган жыщезы сычинди чүанлинима?

¹⁹Эрса хуэйдади фэсы:

– Ниму ба жыгэ сы цыйдэ; сан тян йиху, Вэ ба та йүанхуэй гечелэни.

²⁰Таму фэди:

– Ба жыгэ сы гэли сышы лю нян. Нандый Ни сан тян литу нын ба та йүанхуэй гечелэма?

²¹ Кэсы Эрса на «сы» жыгэ хуа зыфэли Та гэжяди шынзыли. ²² Эрса вучонли зэмусы кэ хуэлиди йиху, Тади манламу ба Та фэхади жыгэ хуа жичелэли, нэхур таму зу щинфули Китабушон шехади дэ Эрса фэхади хуали.

*Эрса ба жынмуди
щинчон жыдони*

²³ Эрса зэ Иерусалим чынпуни гуэ яхүтиди Пасха жечиди сыхур, хошо жынму ба Та йиче щянчүлэди кэрамэти канжян, щинфули Тали. ²⁴ Кэсы Эрса гэжя ба таму бу щинфу, йинцысы Та ба йиче жынмуди щинчон ду канлэни. ²⁵ Та е бу ё жё сый ги Та фэ, жынмуди щинчонсы замужяди, йинцысы Та гэжя ба жынмуди щинчон жыдони.

Эрса зэмусы Никодим

З Ю йигэ фарисейжынлэ, минзы жёди Никодим; тасы яхүтиди линшужын. ² Хили та до Эрса гынчян лэ, зу фэди:

– Вуста, вэму жыдо Анлахү ба Ни дафалэли. Анлахү данлян сый бу зэ йидарни, ба Ни щянхади кэрамэти сый ду бу нын щян.

³ Эрса ги та хуэйдади фэсы:

– Вэ ги ни фэ шыхуа, ба сый дан ди эр хуэй мэ сын-ёнха*, та ба Анлахү тяншонди Гуйжя канбужян.

⁴ Никодим кэ вынли Эрсали:

– Ба суйфу лолиди йигэ жын замужя нын йүанхуэй сын-ёнхани? Нандый та нын ди эрбян жин мамади дўзыни, йиху йүанхуэй ба та сын-ёнхама?

⁵ Эрса хуэйдади фэсы:

– Вэ ги ни фэ шыхуа, ба сый дан на фи дэ Анлахүди Рух мэ сын-ёнха, та бу нын чынха Анлахү Гуйжяди жын.

⁶ Жынди шынзысы тади нён-лозы сын-ёнхади, кэсы жынди рухсы Анлахүди Рух йүанхуэй сын-ёнхади. ⁷ Ниму бэ чёчили, Вэ ги ниму фэгуэ: «Ба ниму ё йүанхуэй сын-ёнхани».

* ^{3:3} «Ба сый дан ди эр хуэй мэ сын-ёнха» – жыгэ хуа хан ю данлинди йисыни: «Ба сый дан да тяншон мэ сын-ёнха».

⁸Фын* щён вон нани гуани, зу вон нэни гуани. Ни ба тади шынчи тинжянни, кэсы бу жыдо та да нани лэдини, вон нани фидини. Мый йигэ лян Анлахүди Рух сын-ёнхади жын есы жымужяди.

⁹Никодим кэ вынли Эрсали:

– Жымугэ сычин замужя нын йүни?

¹⁰Эрса ги та хуэйдади фэсы:

– Нисы Исраилди жынму жёмынди вуста; ни ба жыгэ сычин виса бу минбый? ¹¹Вэ ги ни фэ шыхуа, вэму гуон ба жыдоди сычин жёндени. Вэму гуон ба гэжя канжянлиди сычин миндамин фэдини, кэсы ниму бу щён ба вэмуди хуа жешу. ¹²Вэ ба жыгэ дун-яди сычин ги ниму фэли, кэсы ниму бу щинфу. Вэ дан ба тяншонди сычин ги ниму фэ, ниму замужя нын щинфуни? ¹³Чүгүе да тяншон халэди Аданди Хубый, сый ду мэ шонгуэ тян.

¹⁴Зущён Муса шынжын зэ кунтанни ба тун чончун тэчелэди йиён, ба Аданди Хубый е яндин ё тэчелэни, ¹⁵жё мый йигэ щинфу Тади жын йинавар хуэни. ¹⁶Анлахү ба дун-яшонди жынму жыму щинэди йимяр, Та ба Тади луэмур йигэ Эрзы ги жынму гигили, жё мый йигэ щинфу Тади жын бу вучон зэмусы йинавар хуэни. ¹⁷Анлахү ба Тади Эрзы дафадо дун-яшонли, бусы жё Та ги дун-яшонди жынму дин зуй, кэсы жё Та ба жынмуди мин жүохани.

¹⁸Сый дан щинфу Эрзыли, ги та бу дин зуй. Сый дан бу щинфу Эрзыли, ги та кэжя ба зуй динхали, йинцысы та бу щинфу Анлахүди луэмур йигэ Эрзы. ¹⁹Замужя ги таму динли зуйли? Гуонлён доли дун-яшонли, кэсы дун-яшонди жынму бу нэ гуонлён. Таму ба хинан нэдихын, йинцысы таму ганхади сычин хадихын. ²⁰Мый йигэ ган ха сычинди жын ба гуонлён хындини, та вон гуонлёнди мянчян е бу лэ, йинцысы та хэпа жынму ба та ганхади ха сычин жыдохани. ²¹Кэсы сый ган жыншыди сычиндини, та вон гуонлён мянчян лэдини, жё жынму ба та ганхади сычин жыдони, йинцысы та ба жыщезы сычин жочү Анлахүди вонщён ганли.

* 3:8 «Фын» – хан нын данлинжя фэ: «(Анлахүди) Рух».

Эрса зэмусы щижынмуди Йихия

²² Жыгэди йиху, Эрса лян Тади манламу зули Яхүти дифоншонли. Нэтар Эрса лян таму йидарни занли житян зэмусы зэ фи литу ви Анлахү ба жынму щили. ²³ Зу жыгэ сыхур, Йихия зэ Айнон дифонни (Айнон ли Салим дифон бу йүан) ба жынму е зэ фи литу ви Анлахү щили; йинцысы нэгэ дифоншон фи дуэ, жынму ду лэ, жё Йихия ба таму щили. ²⁴ Нэхур ба Йихия хан мә ядо банфонзыни. ²⁵ Йихияди жигэ манла лян йигэ яхүти жын ба щи абдэзыди вынти зынжонли. ²⁶ Таму доли Йихия гынчян, зу ги та фэди:

– Вуста! Ни кан, зочян лян ни йидарни зэ Иордан хэ нэбонгэ лэди Жын (ни миндамин фэли нэгэ Жынли) Та хазыр е зэ фи литу ви Анлахү щи жынмудини; дажя ду до Та гынчян чили!

²⁷ Йихия хуэйдади фэсы:

– Анлахү дан ги сый бу ги, нэгэ жын гэжя ба са ду дыйбушон. ²⁸ Вэ зочян фэгүэ, вэ бусы Мэсих; вэсы Тади туни дафалэди жын. Ниму гэжя ги вэди жыгэ хуа донли гүвамули. ²⁹ Чү щифурди жынсы щиннүшү; щиннүшүди ляншу зандо та гынчян тиндини; та ба щиннүшүди шынчи тинжян, зу щихуанхали. Лян жыгэ йиён, вэ кэжя юли жыгэ щихуанли. ³⁰ Эрса ё чынха видадини, вэ ё чынха суйдини.

«Да тяншон лэди Жын»

³¹ Да тяншон лэди Жын би йиче жынму ду вида. Да дишон лэди жынсы дишонди жын, та фэди дусы дишонди сычин; кэсы да тяншон лэди Жын би йиче жынму ду вида. ³² Та ба гэжя канжянди дэ тинжянди сычин миндамин фэдини, кэсы сый ду ба Тади хуа бу жешу. ³³ Сый ба Тади хуа жешули, та зу жынли Анлахүсы жынди. ³⁴ Анлахү дафачиди нэгэ Жын ба Анлахүди хуа фэдини, йинцысы Анлахү ба Тади Рух ги Та мэфурди гидини. ³⁵ Дада ба Эрзы щинэди-хын, Та ги Эрзы ба йиче ду гигили. ³⁶ Щинфу Эрзыди жын йинавар хуэни; бу щинфу Эрзыди жын мёю мин, кэсы Анлахү ё динди зуй йинавар шындо ташонни.

Эрса зэмусы Самария дифоншонди нүжын

4 ¹⁻² Фарисейжынму жыдоли: Эрсади манламу би Йихия-ди манламу дуэли зэмусы Эрса ви Анлахү зэ фи литу ба жынму би Йихия е щиди дуэ (шыдашы Эрса гэжя ба жынму зэ фи литу мэ щиди, Тади манламу щили жынмули). ³ Йинви жыгэ, Эрса зу да Яхүти дифоншон зудё, йүанхуэй доли Галилея дифоншонли. ⁴ Жыхур Та ё гуэ Самария дифонни. ⁵ Эрса зу доли Самария дифоншонди Сихар щёнжуоннили. Жыгэ щёнжуон ли Ягүбэ шынжын ги тади эрзы Юсуф гихади йигэ дифон бу йүан; ⁶ Ягүбэ шынжынди жин зу зэ нэтарни. Эрса фалиди йимяр, зу зуэдо жыгэ жин гынчянли; жыгэ сыхур бонжерсы шонвулэ.

⁷ Зу жыгэ сыхур Самария дифоншонди йигэ нүжын да фи лэли. Эрса ги та фэди:

– Ни ги Вэ гишер фи, жё Вэ хэшер.

⁸ Жыгэди зочян Эрсади манламу до щёнжуонни чи, мэ чыди чили. ⁹ Нэгэ нүжын хуэйдади фэсы:

– Нисы яхүти жын, весы Самария дифоншонди нүжын. Яхүти жынму лян Самарияди жынму мэю лэвон. Ни виса жё вэ ги Ни ги фи, жё Ни хэни?

¹⁰ Эрса ги та хуэйдади фэсы:

– Ни дан жыдо Анлахү дуангиди лишин, хан жыдо хазыр сый ги ни фэ: «Ни ги Вэ гишер фи, жё Вэ хэшер», нэхур ни гэжя ё чито Тани, Та зу ба хуэфи ги ни гини.

¹¹ Нэгэ нүжын ги Эрса кэ фэди:

– Жонгуйди, Ни мэю да фиди гонзы, кэсы жыгэ жин шындыхын, Ни да нани ба хуэфи налэни? ¹² Вэмуди лозы Ягүбэ шынжын ба жыгэ жин ги вэму гигили; та гэжя, тади эрнүму дэ тади тугү да жыгэ жин литу ду хэгуэ фи. Нандый Ни гэжя сылэнди Ни би та хан видама?

¹³ Эрса ги нэгэ нүжын хуэйдади фэсы:

– Сый ба жыгэ фи хэли, та хан конни. ¹⁴ Кэсы сый ба Вэ гихади фи хэ, та йүнзун бу кон. Вэ гихади фи зэ тади щинни чынха йигэ фичүанни, жыгэ хуэфи бутынди тонни, жё нэгэ жын йинавар хуэни.

¹⁵ Нэгэ нүжын ги Эрса кэ фэди:

– Жонгуйди, Ни ги вэ ба жыгэ фи гиги, жё вэ йүнзун бэ конли, е зэ жытар бэ да фи лэли.

¹⁶ Эрса ги та кэ фэди:

– Ни чи, ба ниди нанжын жёйихар, йиху ни йүанхуэй до жытар лэ.

¹⁷ Нүжын ги Та хуэйдади фэсы:

– Вэ мэю нанжын.

Эрса ги та кэ фэди:

– Ни фэди ни мэю нанжын, жыгэ хуасы жынди. ¹⁸ Зо-чян ни ю вугэ нанжынлэ, хазыр ни юди нэгэ жын е бусы ниди нанжын. Ни фэди жыгэ хуасы жынди.

¹⁹ Нүжын ги Эрса фэди:

– Жонгуйди, вэ канчүлэли: Нисы йигэ шынжын. ²⁰ Вэму Самария жынмуди зүзү-быйбый зэ жыгэ саншон бэвонли Анлахүли, кэсы ниму яхүти жынму фэди, Иерусалимсы бэвон Анлахүди дифон.

²¹ Эрса ги та фэди:

– Нүжын, ни ё шинфу Вэни! Жызы куэ зу долэни, нэ-хур жынму бу зэ жыгэ саншон, е бу зэ Иерусалим чынпу-ни бэвон тяншонди Дадани. ²² Ниму Самария дифонди жынму бу жыдо, ниму бэвондисы сый; вэму яхүти жынму жыдониди, вэму бэвондисы сый, йинцысы жюминди сычин да яхүти жынмушон лэни. ²³ Сыхур куэ зу долэни зэмусы кэжя доли; жыхур шыщин-шыйиди бэвон Дадади жынму ё зэ тамуди рух жыншыди бэвон Тани, йинцысы Дада ба жымужя бэвон Тади жынму зодини. ²⁴ Анлахүсы Рух. Бэ-вон Тади жынму яндин ё зэ тамуди рухни жыншыди бэ-вон Тани.

²⁵ Нэгэ нүжын ги Эрса кэ фэди:

– Вэ жыдо Мэсих (жы зусы Христос) лэни. Та лэди сы-хур, зу ба йиче сычин ги вэму ду фэни.

²⁶ Эрса ги та фэди:

– Лян ни фэхуади Жын зусы Та!

²⁷ Жыхур Эрсади манламу хуэйлэли. Таму канжян Эрса лян йигэ нүжын фэхуадини, зу чёчихали, кэсы сый ду мэ-вын Эрса: «Ни вын та ё сани?» хуэйжэсы «Ни виси лян та

фэхуадини?»²⁸ Нэгэ нүжын ба фигуан гәха, до щёнжуонни, ги жынму фэли:

–²⁹ Ниму лэ канйихар! Йигэ Жын ба вэ ганхади йиче сычин ду ги вэ фэли. Жыгэ Жын хабасы Мэсих?!

³⁰ Дажя да чынпуни чүчи, кан Эрса чили.

³¹ Жыгэ сыхур манламу чүанфэ Эрса фэди:

– Вуста, Ни чы йидяр чыди!

³² Кэсы Эрса ги таму фэди:

– Вэ ю чыдини, ниму ба жыгэ чыди ду бу жыдо.

³³ Манламу йигэ ги йигэ фэди:

– Нандый сый ба са чыди ги Та гигилима?

³⁴ Эрса ги таму кэ фэди:

– Вэди чыдысы – ба Вэ дафалэди Дадади вонщён ганванни зэмусы ба Тади сычин ванчынни.³⁵ Ниму фэди: «Гуэли сыгэ йүэ, шу лёншыди сыхур долэни». Вэ ги ниму фэ, ниму ба нэщезы тандо канйихар: мыйзы кэжя фули, ба та нын шугэни!³⁶ Шугэди жын ба тади шонхо дыйшонни, ба мыйзы цонхани, зу жымужя та йинавар хуэни, жё жун диди жын лян шугэди жын йидарни гошинни.³⁷ «Йигэ жын са жунзыдини, данлинди жын шугэдини», – жыгэ хуасы жынди.³⁸ Вэ ба ниму дафачи, жё ниму ба гэжя мэ сахади мыйзы шугэни; данлинди жынму фили гункүли, кэсы ниму ба таму фиха гункүди жегуэ сыйүнли.

³⁹ Самария дифоншонди нэгэ щёнжуонни хошо жынму щинфули Эрсали, йинцысы нэгэ нүжын фэли: «Та ба вэ ганхади йиче сычин ду ги вэ фэли». ⁴⁰ Самарияди жынму до Эрса гынчян лэ, читоди жё Та лян таму шындо йидарнини; Эрса зу зэ нэтар занли лён тян.⁴¹ Ба Эрсади хуа тинлиди йиху, щинфу Тади жынму йүэщин дуэли.⁴² Таму ги нэгэ нүжын фэди:

– Жыхур вэму бусы щинфули ни фэхади хуа, кэсы вэму гэжя ба Тади хуа тинжян, зу жыдо Та шызэ зусы дун-яди Жюминжя.

Эрса ба йигэ гуанжынди эрзы канхоли

⁴³ Гуэли лёнтян, Эрса да нэгэ дифоншон вон Галилея зудёли; ⁴⁴ йинцысы Та гэжя фэли:

– Шынжын зэ та сын-ёнхади дифоншон мэю жынмуди тэнэ.

⁴⁵ Эrsa доли Галилеяди сыхур, нэтарди жынму ба Та же-шули. Зочян таму доли Иерусалим чынпунили, гуэли яхү-тиди Пасха жечили. Нэгэ сыхур таму ба Эrsa ганхади йиче сычин ду канжянли.

⁴⁶ Эrsa йуанхуэй доли Галилея дифоншонди Кана чынпунили. Зочян Та зэ жытар жё фи бянчын путожюли. Жытар ю йигэ гуанжынлэ; тади эрзы зэ Капернаум щёнжуонни хэбиндини. ⁴⁷ Нэгэ гуанжын тинжян Эrsa да Яхүти дифоншон доли Галилеяли, зу до Эrsa гынчян, читоди жё Та вон Капернаум щёнжуонни чини, ба та эрзыди бин канхони; йинцысы тади эрзы куэ зу вучонни. ⁴⁸ Эrsa ги та фэди:

– Ниму дан ба кэрамэти дэ чёчи сычин бу жан, ниму бу шинфу.

⁴⁹ Нэгэ гуанжын ги Эrsa кэ фэди:

– Жонгуйди, вэди эрзы хан мэ вучонни, вэ читоди жё Ни лян вэ йидарни зунн.

⁵⁰ Эrsa ги та фэди:

– Ни чи! Ниди эрзы хуэни!

Нэгэ жын шинфули Эrsaди хуа, зу хуэйчили. ⁵¹ Лүшон тади хуэжиму ба та жейинли, зу ги та фэди:

– Ниди эрзы хуэдини!

⁵² Нэгэ жын вынли тамули, та эрзыди бин са сыхур холи. Таму хуэйдади фэсы:

– Зуэргэ шонву гуэли йигэ сышын, та зу бу фашоли.

⁵³ Дада ба зуэргэ зу нэгэ сыхуршон Эrsa ги та фэхади хуа жичелэли: «Ниди эрзы хуэни!» Йинви жыгэ та лян та жя-ниди жынму ду шинфули Эрсали. ⁵⁴ Жыгэсы Эrsa да Яхүти дифоншон до Галилея хуэйлэди йиху, Та щянчүлэди ди эргэ кэрамэти.

Эrsa ба хэ тантанзы бинди жын канхоли

5 Жыгэди йиху, яхүти жынмуди йигэ жечи доли. Эrsa зу-ли Иерусалим чынпунили. ² Иерусалим чынпуню ю йигэ лобани, на яхүтиди хуа тади минзы жёди «Вифзата». Жыгэ лоба зэ йигэ дифонди бонгэрни, ба жыгэ дифон жёди «Ёнмын». Лоба жуви ю вугэ гуэдозыни. ³⁻⁴ Хошо

бинжынму: хазыму, чүэзыму, хэ тантанзы бинди жынму ду зэ нэщезы гуэдозыни фидини. ⁵Нэтар хан ю йигэ жынлэ; та хэли саншы ба нянди бинли. ⁶Эрса канжян та зэ нэтар фидини, ба та кэжя хэли хошо нянди бин жыдоха, зу вынли тали:

– Ни щён ба ниди бин канхонима?

⁷Нэгэ бинжын хуэйдади фэсы:

– Жонгуйди! Лобаниди фи фалонди сыхур, сысый ги вэ ду бу бонмон, ба вэ гэдо лоба литу. Вэ щён вон лоба литу хачиди сыхур, вэди туни данлинди жын кэжя зу хачили.

⁸Эрса ги та фэди:

– Ни занчелэ, ба ниди вузы нашон, зу зу!

⁹Нэгэ жынди бин донвэр холи; та ба тади вузы нашон, зу зудёли.

Нэйтянсы шанбэлэ; ¹⁰йинви жыгэ яхўтиди линшужынму ги нэгэ кэжя холиди жын фэди:

– Жиргэсы шанбэ, ни бу нын ба ниди вузы нашон.

¹¹Нэгэ жын ги таму хуэйдади фэсы:

– Ба вэди бин канхолиди Жын ги вэ фэли: «Ни ба ниди вузы нашон, зу зу!»

¹²Таму вынли тали:

– Сый ги ни фэли: «Ни ба ниди вузы нашон, зу зу?»

¹³Нэгэ кэжя холиди жын бу жыдо Тасы сый; йинцысы нэтарди жынму дуэдихын, Эрса хуэдо таму донжунни дуэдёли.

¹⁴Жыгэди йиху, Эрса зэ Иерусалимди сы литу ба нэгэ жын кэ зожуэ, зу ги та фэди:

– Ни кан, ниди бин кэжя холи; вонху ни бэ ган гўнахарли, бэ жё ни зэ йү йүэщин дади бэляли.

¹⁵Нэгэ жын чи, зу ги яхўтиди линшужынму фэли, ба тади бин канхолиди Жынсы Эрса. ¹⁶Таму зу жуйкэ Эрсали, йинцысы Эрса шанбэди нэйтян ба бинжын канхоли. ¹⁷Эрса ги таму фэди:

– Вэди Дада йичыр до жиргэ ган садини, Вэ е лян Та йиён зу ган нэгэдини.

¹⁸Йинви жыгэ хуа яхўтиди линшужынму йүэщин щён ба Эрса дасыни; йинцысы Та гуон бусы ба шанбэди фалү пэланли, хан фэди Анлахўсы Тади Дада, зу жымужя фэди, Та лян Анлахўсы йиёнди.

Эрзыди чүанли

¹⁹ Йиху Эрса ги таму фэди:

– Вэ ги ниму фэ шыхуа, Эрзы гэжя бу нын ган са; Та кан Дада ган садини, гэжя е зу ган нэгэдини. Ба Дада ганди сычин Эрзы е гандини. ²⁰ Йинцысы Дада ба Эрзы щинэдини, зу жё Эрзы ба Та ганди йиче сычин канжянни. Дада жё Эрзы канжян би жыщезы хан видади сычинни, жё ниму ду чёчини. ²¹ Зущён Дада жё вучонлиди жынму кэ хуэни, ги таму ба сынхуэ гигиди йиён, Эрзы щён ба сынхуэ ги сый гини, Та зу ги таму гигидини. ²² Дада гэжя ги сый ду бу дин зуй; Та ба динзуйди йиче чүанли ду ги Эрзы гигили, ²³ жё жынму ба Эрзы ду тэнэни, зущён таму ба Дада тэнэди йиён. Сый бу тэнэ Эрзы, та ба Дада е бу тэнэ, йинцысы Дада ба Эрзы дафалэли. ²⁴ Вэ ги ниму фэ шыхуа: сый тин Вэди хуа зэмусы шинфу ба Вэ дафалэди Дада, та зу йинавар хуэни; ги та е бу дин зуй, кэсы та ба вучон дуэдё, йинавар ё хуэни. ²⁵ Вэ ги ниму фэ шыхуа, сыхур куэ зу долэни зэмусы кэжя доли, жыхур вучонлиди жынму ба Анлахүди Эрзыди шынчи тинжян, ду кэ хуэни. ²⁶ Зущён Дадасы сынхуэди гынзы йиён, Та е жё Эрзы чынли сынхуэди гынзыли. ²⁷ Дада ба динзуйди чүанли ги Эрзы е гигили, йинцысы Эрзысы Аданди Хубый. ²⁸⁻²⁹ Йинви жыгэ ниму бэ чёчили, йинцысы сыхур куэ зу долэни, нэхур йиче зэ фынкынни фиди жынму ду ба Адан Хубыйди шынчи тинжян, зу да фынкынни чүлэни. Сый ганли холи, та кэ хуэни зэмусы йинавар хуэни; сый ганли хали, та кэ хуэлиди еба, ги та ё дин зуйни.

Сый ги Эрса дон гүвадини

³⁰ Вэ гэжя бу нын ган са. Вэ жоҷү Анлахүди вонщён дин зуйдини. Вэ динди зуйсы гундоди, йинцысы Вэ бу щён ба Вэ гэжяди вонщён ган, кэсы щён ба Вэ дафалэди Дадади вонщён ганни. ³¹ Вэ дан ги Вэ гэжя донли гүвали, Вэди хуа бусы жыншыди. ³² Кэсы ю данлинди Йигэ, Та ги Вэ дон гүвадини. Вэ жыдони, Та фэ Вэди сыхур, Тади хуасы жынди. ³³ Зочян ниму ба жынму ги Йихия дафачили. Ниму

тинжянли Йихия фэхади Вэ либянди хуа есы жынди. ³⁴Кэсы Вэ бу ё жё жынму ги Вэ дон гўва. Вэ фэ жыгэ хуади, йинцысы Вэ шён ба нимуди мин жюхани. ³⁵Йихия зушёнсы йигэ дянжуэди лёнлёрди дынзан йиён; ниму шён зэ тади гуонлён гынчян бу дади гунфу гошинни. ³⁶Кэсы Вэ ю би Йихия хан видади жихони — жы зусы Вэ ганди йиче сычин. Вэ Дада ба жыщезы сычин ги Вэ жёгили, жё Вэ ба таму ганчынни. Вэ ганди йиче сычин жё ниму жыдохани: Дада ба Вэ дафалэли. ³⁷Ба Вэ дафалэди Дада гэжя ги Вэ донли гўвали. Ниму ба Тади шынчи йүнзун мэ тинжянгүэ, ба Тади ёншы йүнзун мэ жянгүэ, ³⁸нимуди щинни е мэю Тади хуа, йинцысы ниму бу щинфу Та дафалэди Жын. ³⁹Ниму сылёнди, Китабу ги ниму ба йинавар сынхуэ гидини. Ниму зу ба Китабу цайихар: Китабу литуди хуа фэ Вэдини! ⁴⁰Кэсы ниму бу шён до Вэ гынчян лэ, жё ниму йинавар хуэни.

⁴¹Вэ бу ё жынму куажён Вэ. ⁴²Вэ ба ниму канчўлэли: ниму щинни бу нэ Анлахў. ⁴³Вэ ви Вэ Дадади минзы лэли, кэсы ниму ба Вэ бу жешу. Сый дан ви та гэжяди минзы лэли, ниму ба та жешуни. ⁴⁴Ниму нэ йигэ ба йигэ куани, кэсы ниму бу шён жё луэмур йигэ Анлахў куа ниму. Ниму замужя нын ю щинфуни? ⁴⁵Ниму бэ сылён, Вэ зэ Вэ Дадади мянчян ги ниму дин зуйни. Ниму ю йигэ ги ниму динзуйди жынни, та зусы ниму зывонди Муса шынжын. ⁴⁶Ниму дан шызэ щинфули Муса шынжынли, ниму яндин щинфу Вэни, йинцысы Муса шынжын зэ тади фушон щели Вэли. ⁴⁷Ниму дан бу щинфу та щехади фули, ниму замужя щинфу Вэди хуани?

Эрса жё вучян жын чыболи

(Мф 14:13-21; Мк 6:30-44; Лк 9:10-17)

6 Гуэли йихур, Эрса зули Галилея хэзы нэбонгэли (ба жыгэ хэзы хан жёди Тивериада хэзы). ²Хошо жынму гыншон Та зули, йинцысы таму жанли Эрса ба бинжынму канхолиди кэрамэтили. ³Эрса шонли сан, лян Тади манламу йидарни зуэхали. ⁴Нэгэ сыхур яхўти жынмуди Пасха жечи куэ зу долэни. ⁵Эрса ба ту тэчелэ зу канжянли: хошо

жынму вон Та гынчян лэдини. Эрса зу ги Тади йигэ манла, Филипп, фэди:

– Вэму зэ нани ба мэмэ мэшон, жё жыщезы жынму ду чыбони?

⁶Эрса ба жыгэ хуа фэли, щён ба Филипп зыанйихарни, йинцысы Эрса кэжя жыдони, ё замужя банни. ⁷Филипп ги Та хуэйдади:

– Вэму дан на эрбый йинчян* ба мэмэ мэшон, жё мый йигэ жын чы йикуэр мэмэ, ги та гунима, хансы бу гу?

⁸Данлинди йигэ манла, минзы жёди Андрей (тасы Ши-мэ-Пётрди шүнди), ги Эрса фэди:

– ⁹Жытар ю йигэ эрвазыни, та ю вугэ дамый мэмэ лян лёнгэ йүни. Кэсы жыщер чыди ги жымудуэди жынму гунима?

¹⁰Эрса ги таму гиди фынфу фэди:

– Ниму жё жынму ду зуэха.

Нэтар жонди хошо цо. Дажя ду зуэха, таму литу бонжер ю вучян нанжынмуни. ¹¹Эрса ба мэмэ начелэ, ги Анлахү долигэ ше, ба мэмэ дэ йү ги зуэди жынму фынкэли. Сый щён чы дуэшо, та зу чыли дуэшо. ¹²Жынму ду чыболиди йиху, Эрса ги Тади манламу фэди:

– Ниму ба шынхади зазар ду шушон, бэ жё таму ладоли.

¹³Манламу зу ба жынму шынхади мэмэ манман жуонли шыэргэ куонзы. ¹⁴Дажя ба Эрса шянчүлэди кэрамэти канжян, зу фэди:

– Жыгэ Жын зусы до дун-яшон ё лэди нэгэ Шынжын!

¹⁵Эрса жыдоли: таму щён ба Та жуачү, нингүди жё Та дон хуоншонни; йинви жыгэ, Та йигэр зу вон саншон зудёли.

Эрса зэ хэзы готу зули

(Мф 14:22-33; Мк 6:45-52)

¹⁶Хушон Эрсади манламу доли хэянзышонли. ¹⁷Таму шонли фичуан, вон хэзы нэбонгэди Капернаум щёнжуонни фушон зудёли. Нэхур тян кэжя хили, Эрса хан мэ до манламуди гынчян. ¹⁸Мынмынди хэзыни да фын гуачелэли, да филон е челэли. ¹⁹Манламу ба чуан бэшон, фули

* ^{6:7} Жыгэ йинчян жёди «динарий».

ву-люгэ километр. Мынмынди таму ба Эрса зэ хэзы готу вон чуан гынчян бушин лэди канжянли. Таму ду хэли пали. ²⁰ Эрса ги таму фэди:

– Бэ хэпали! Жысы Вә!

²¹ Нэхур таму зэ чуаншон гошинди ба Эрса жешули; чуан донвэр доли таму чиди вэршонли.

Жынму золи Эрсали

²² Ди эр тян, шындо хэзы нэбонгэди йибазы жын минбыйли: зуэргэ нэтар гуон ю йигэ чуанлэ, кэсы таму канжян Эрсади манламу фушон зудэди сыхур, Эрса лян таму йидарни мө шон нэгэ чуан. ²³ Нэхур да Тивериада дифоншон лэди данлинди жигэ чуан зандо хэянзышонли. Ли жыгэ дифон бу йүан Эрса Жонгуйди зочян ги Анлахү долигэ ше, ба мэмэ ги дажя фынкэли, жё таму чыли. ²⁴ Жыщезы жынму минбыйли: Эрса лян Тади манламу кэжя мө зэ нэтар; йинви жыгэ таму зу шонли жы жигэ чуан вон Капернаум щёнжуонни фушон зудэли, щён ба Эрса зожуэни.

Эрсасы сынхуэди мэмэ

²⁵ Таму зэ хэзы нэбонгэ ба Эрса зожуэ, зу вынли Тали:

– Вуста, Ни са сыхур доли жытарли?

²⁶ Эрса ги таму хуэйдади фэсы:

– Вә ги ниму фэ шыхуа, виси ниму зо Вэдини: бусы йинви ниму ба кэрамэти канжянли, кэсы ниму чыли мэмэ, ду чыболи, йинви жыгэ ниму зо Вэдини. ²⁷ Ниму ви жыгэ нын ладоди чыди бэ фи гункүли, ниму ё ви данлинди чыди фи гункүни, жыгэ чыди жё ниму йинавар хуэни. Аданди Хубый ба жымужяди чыди ги ниму гигини, йинцысы Тади Дада Анлахү ги Аданди Хубый ба Тади жихо гигили.

²⁸ Таму вынли Эрсали:

– Жё вэму замужя ган Анлахүди сычинни?

²⁹ Эрса ги таму хуэйдади фэсы:

– Ниму ё щинфу Анлахү дафалэди Жынни – жы зусы Анлахү жё ниму ганди сычин.

³⁰ Таму кә вынли Эрсали:

– Ни нын щян замугә кэрамэти, жё вәму ба жыгә кэрамэти канжян зу шинфу Нини? Ни ганди сычин додисы са?

³¹ Вәмуди зүзү-быйбый зә савәни ба «манна» ләншы чыли, зущён Китабушон щехадии йиён: «Та да тьяншон ба мәмә ги таму гигили, жё таму чыли».

³² Эрса ги таму фәди:

– Вә ги ниму фә шыхуа: бусы Муса шынжын ба мәмә да тьяншон ги ниму гигили; жысы Вә Дада ба жыншыди мәмә да тьяншон ги ниму гидини. ³³ Йинцысы Анлаху гиди мәмә зусы да тьяншон халәди зәмусы ги дун-я ги сынхуәди мәмә.

³⁴ Таму ги Эрса фәди:

– Жонгуйди, вәму читоди жё Ни ба жымужяди мәмә тьянтянмир ги вәму гиги!

³⁵ Эрса ги таму кә фәди:

– Вә зусы сынхуәди мәмә; до Вә гынчян ләди жын йүнзун бу нә вә дүзы; шинфу Вәди жын йүнзун бу кон. ³⁶ Вә ги ниму кәжя фәгуә, ниму ба Вә канжянли еба, хан бу шинфу Вә. ³⁷ Дада ба сый ги Вә жәгили, та зу до Вә гынчян ләни. Сый до Вә гынчян лә, Вә ба та бу жуйдә. ³⁸ Йинцысы Вә да тьяншон халә, бусы ба Вә гәжяди вонщён гандини, кәсы ё ба Вә дафаләди Дадади вонщён ганни. ³⁹ Жы зусы ба Вә дафаләди Дадади вонщён: Та ба сый ги Вә жәгили, нәгә жын зу бу вучон; зә ахыр зәмани нәйитян Вә жё та кә хуәни. ⁴⁰ Жы зусы ба Вә дафаләди Дадади вонщён: сый канжян зәмусы шинфу Эрзы, жё та йинавар хуәни; зә ахыр зәмани нәйитян Вә жё та кә хуәни.

⁴¹⁻⁴² Яхүтиди линшужынму ба Эрса фәхади хуа: «Вә зусы да тьяншон халәди мәмә» тинжян, гүнунди фәди:

– Нандый Та бусы Эрса, Юсуфди Эрзыма? Вәму ба Тади нён-лозы ду жындыини. Хазыр Та замужя фәдини: «Вә да тьяншон халәли»?

⁴³ Эрса ги таму хуәйдади фәсы:

– Ниму бә гүнунли! ⁴⁴ Ба Вә дафаләди Дада ба сый дан ладо Вә гынчянли, нәгә жын цә нын до Вә гынчян ләни. Сый дан до Вә гынчян лә, зә ахыр зәмани нәйитян Вә жё

та кә хуәни. ⁴⁵Шынжынмуди фушон шеди: «Анлахұ ба жынму ду жётёни». Сый тин Дадади хуа зэмусы ба Тади жётё жешуха, нэгә жын до Вә гынчян ләни. ⁴⁶Вә бу шён фә, юди жын ба Дада канжянли. Чўгуә да Анлахұ мянчян ләди Эрзы, сый ду мә жангуә Дада. ⁴⁷Вә ги ниму фә шыхуа, ю шинфуди жын йинавар хуәни. ⁴⁸Вә зусы сынхуәди мәмә. ⁴⁹Нимуди зўзў-быйбый зә савәни ба «манна» лёншы чыли еба, таму ду вучонли. ⁵⁰Кәсы сый дан чыли да тяншон халәди жыгә мәмәли, та бу вучон. ⁵¹Вә зусы да тяншон халәди сынхуәди мәмә. Сый дан ба жыгә мәмә чыли, та йинавар хуәни. Вә ги жынму гиди мәмә зусы Вәди Жути, зусы ви дун-яшонди жынму жүгиди Жути, жё таму хуәни.

⁵²Йинви жыгә хуа яхўти жынму йигә лян йигә зынжонкәли. Таму фәди:

– Жыгә Жын замужя нын ба гэжяди Жути ги вәму гиги, жё вәму чыни?

⁵³Эрса ги таму кә фәди:

– Вә ги ниму фә шыхуа, ниму дан ба Адан Хубыйди Жути бу чы, ба Тади Ше бу хә, нэхур ниму мәю жыншыди сынхуә. ⁵⁴Сый дан ба Вәди Жути чыдини, ба Вәди Ше хәдини, та зу йинавар хуәни; зә ахыр зэмани нәйитян Вә жё та кә хуәни. ⁵⁵Вәди Жутисы жыншыди чыди, Вәди Шесы жыншыди хәди. ⁵⁶Сый дан ба Вәди Жути чыдини, ба Вәди Ше хәдини, та зә Вә литу хуәни, Вә е зә та литу хуәни. ⁵⁷Йинавар хуәди Дада ба Вә дафаләли. Зу йинви Та Вә е хуәдини. Лян жыгә йиён, сый дан ба Вәди Жути чыдини, та е йинви Вә хуәни. ⁵⁸Жы зусы да тяншон халәди мәмә. Чы жыгә мәмәди жын йинавар хуәни. Жыгә мәмә бу шён нимуди зўзў-быйбый чыгуәди мәмә; йинцысы таму чыли еба, ду вучонли.

⁵⁹Эрса зә Капернаум шёнжуонди синагогани жётё жынмуди сыхур, ба жыщезы хуа ду фәли.

Эрсади хуа ба йинаварди сынхуә гидини

⁶⁰Хошо манламу ба жыщезы хуа тинжян, зу фәди:

– Жыгә жёщүә тә нан тин! Сый нын тин жыгә хуани?

⁶¹Эрса шинни жыдоли, Тади манламу туту-мәмәди ба жыгә сычин толүнди, зу ги таму фәди:

– Нандый ниму тинжян жыгә хуа, ба шинфу дюдөлима?

⁶²Ниму дан канжян Аданди Хубый йүанхуэй вон Та зочянди вәршон шондини, нэхур ниму нын сылән сани? ⁶³Анлахүди Рух ги жын ги сынхуэдини, жынди жути са ду бу ги. Вә ги ниму фәди хуа – жы зусы ба сынхуэ гиди Рух. ⁶⁴Кәсы ниму литуди ющезы жынму бу шинфу.

Эрса зозор зу жыдони, сый бу шинфу Та зэмусы сый ба Та мәчүчини.

⁶⁵Эрса кә фәди:

– Йинви жыгә Вә ги ниму фәгуә, Вәди Дада дан ги сый ба нынгу гиги, нэгә жын цә нын до Вәди мянчян лә.

⁶⁶Да жыгә сыхур дашон, зочян гыншон Эрса зуди хошо жынму ду да Та гынчян зудәли, бу гыншон Та зули. ⁶⁷Эрса ба Тади шыэргә Апостолму вынли:

– Ниमुна? Ниму е щән зудәнима?

⁶⁸Шимә-Пётр ги Та хуэйдади фәсы:

– Жонгүиди! Ниди хуа ба йинаварди сынхуэ гидини, вә му хан гыншон сый зунн? ⁶⁹Вәму шинфули зэмусы жыдоли, Нисы Анлахү жянчүләди Жын.

⁷⁰Эрса кә фәди:

– Вә ба ниму шыэргә жын жянчүләлима, хансы мә жянчүлә? Кәсы ниму литуди йигә жынсы иблис!

⁷¹Эрсади жыгә хуа ба Шимәди эрзы Жүхүти Искарриот зыгили. Жүхүтисы шыэргә Апостолму литуди йигә, та йиху ба Эрса мәчүчили.

Эрса лян Тади дишүнму

7 Жыгәди йиху, Эрса зә Галилея дифоншон зужуанли. Та бу щән зә Яхүти дифоншон зужуан, йинцысы яхүтиди линшужынму щән ба Та дасыни.

²Яхүти жынмуди Да вәпынзыди жечи куә зу доләни.

³Йинви жыгә Эрсади дишүнму ги Та фәди:

– Ни да жытар вон Яхүти дифоншон чи, жә Ниди манламу ба Ни ганди сычин ду жянйихар. ⁴Сый щән ба миншын дыйшон, та бу нын туту-мәмәди ган сычин. Ни дан

ган жыщезы сычин, Ни жё дун-яшонди жынму ба Ни жыдоха!

⁵Эрсади дишүнму е мә шинфу Та.

⁶Эрса ги таму фэди:

– Вэди сыхур хан мә дони; кэсы нимуди сыхур йинавар бянийидини. ⁷Жыгэ дун-яшонди жынму бу нын хын ниму, кэсы таму хын Вэни, йинцысы Вэ ба таму ганхади ха сычин миндамин фэдини. ⁸Ниму гэжя зэ жыгэ жечишон чи. Вэ шян бу чи, йинцысы Вэди сыхур хан мә дони.

⁹Эрса ба жыщезы хуа фэван зу шындо Галилея дифоншонли.

*Эрса зэ Иерусалим чынпунни
гуэли вэтынзыди жечили*

¹⁰Эрсади дишүнму зудёди йиху, Эрса е гуэ жечи чили. Та бусы миндамин чили, Та туту-мэмэди чили. ¹¹Гуэ жечиди сыхур, яхўтиди линшужынму сыжу-бахани золи Эрсади. Таму фэди:

– Та зэ натарни?

¹²Жынму ба Эрсади сычин йигэ лян йигэ толүнли. Юди жын фэди:

– Тасы йигэ хожын.

Юди жын фэди:

– Бусы, Та хун жынмудини.

¹³Дажа ду бу ган миндамин фэ Эрсади сычин, йинцысы таму хэпа яхўтиди линшужынмуни.

¹⁴Бангэ жечи гуэлиди сыхур, Эрса доли Иерусалим сыни, жётёли жынмули. ¹⁵Яхўтиди линшужынму ду чёчиха, фэди:

– Жыгэ Жын мә шишүөгүэ, кэсы Та да нани жыдо жыщезы эрлинни?

¹⁶Эрса ги таму хуэйдади фэсы:

– Вэди жёшүэ бусы Вэ гэжяди жёшүэ, жысы ба Вэ дафалэди Дадади жёшүэ. ¹⁷Сый дан щён ган Анлахўди вонщён, та жыдонни, Вэди жёшүэсы Анлахў гихадима, хансы Вэ гэжя фэхади. ¹⁸Сый ба гэжяди хуа ги дажа жёнли, жыгэ жын щён ги гэжя ба миншын дыйшонни; кэсы сый щён ба миншын

ги ба та дафалэди жын дыйшонни, тасы шыцин-шыйиди жын, тади шинни мэю жя вонщён. ¹⁹Нандый бусы Муса шынжын ба фалү ги ниму гигилима? Кэсы ниму литу сый ду бу зунхү жыгэ фалү. Ниму виса щён ба Вэ дасыни?

²⁰Жынму хуэйдади фэсы:

– Ниди кэлон литу ю гуйни! Сый щён ба Ни дасыни?

²¹Эрса ги таму кэ фэди:

– Вэ шанбэди нэйтян ганли йигэ да сычин, ниму ду чёчидини. ²²Муса шынжын ги ниму гили фынфу, жё ниму зү суннэтини (шыдашы бусы Муса шынжын жё ниму зү суннэтини, кэсы би Муса хан зоди зүзү-быйбый жё ниму зү суннэтини), ниму зу зэ шанбэди нэйтян ги вава зү суннэтидини. ²³Шанбэди нэйтян ги вава зү суннэти еба, жыгэ ба Мусади фалү бу чүдө. Кэсы Вэ шанбэди нэйтян ба йигэ жынди бин йиман ду канхоли, виса ниму гуэ Вэ-дини? ²⁴Ниму бэ жочү вэтуди ёншы кан жынмули, ниму ё жочү гундо кан жынмуни.

Эрсасы Мэсихма?

²⁵Ющезы Иерусалим чынпуниди жынму фэди:

– Нандый жыгэ Жын бусы замуди линшуму щён дасыди нэгэ Жынма? ²⁶Ниму кан, Та миндамин фэхуадини, кэсы сый ду мэ донгуа Та! Нандый замуди линшуму жыншыди жыдоли Тасы Мэсихма? ²⁷Мэсих лэди сыхур, сый ду бу жыдо Та да нани лэни, кэсы вэму ду жыдони, Эрса да нани лэли.

²⁸Нэгэ сыхур Эрса зэ Иерусалимди сыни жётё жынму-дини. Та дашын ханли:

– Ниму ба Вэ жындыйнима? Ниму жыдо Вэ да натар лэлима? Вэ бусы жочү гэжяди вонщён лэли. Кэсы Сый ба Вэ дафалэли, Тасы жыншыди. Ниму ба Та жынбудый, ²⁹кэсы Вэ жындый Тани; йинцысы Вэ да Та мянчян лэли; Та ба Вэ дафалэли.

³⁰Нэхур таму щён ба Эрса жуачүни, кэсы сысый ба Та ду мэ жуа, йинцысы Эрсади сыхур хан мэ дони. ³¹Минжынму литуди хошо жын шинфу Эрсади; таму фэди:

– Нандый Мэсих лэди сыхур, Та хан би жыгэ Жын щянчүлэди кэрамэти дуэма?

**Фарисейжынму лян яхүтиди да ахунму
щён ба Эrsa жуачүни**

³² Фарисейжынму тинжян данлинди жынму толүн Эrsa-ди сычиндини, таму лян яхүтиди да ахунму зу ба хуэжиму дафачи, жё жуа Эрсачили. ³³ Нэхур Эrsa фэди:

– Зэ дыншер бу дади гунфу Вэ хан лян ниму зэ йидар-нини, йиху Вэ йүанхуэй до ба Вэ дафалэди Дада гынчян-ни. ³⁴ Ниму зо Вэни, зобужуэ; йинцысы Вэ чиди дифоншон, ниму бу нын чи.

³⁵ Яхүтиди линшужынму йигэ ба йигэ вынли:

– Та щён вон натар чини, заму ба Та зобужуэ? Нандый Та щён до заму гуйжя вэтуди грекжынму жўди йиче чын-пуни чи, ба грекжынму жётёнима? ³⁶ Та фэди: «Ниму зо Вэни, зобужуэ» зэмусы «Вэ чиди дифоншон, ниму бу нын чи» – жыщезы хуа ю са йисыни?

Хуэфиди хэ

³⁷ Вэпынзы жечиди линйирди нэйитян доли. Жысы дин ёжинди йитян. Жыйитян Эrsa занчелэ, дашын ханди:

– Сый дан конли, до Вэ гынчян лэ куэ хэлэ. ³⁸ Зущён Китабушон щехади йиён:

«Сый щинфу Вэли, хуэфиди хэ да тади кэлонни тончўлэни».

³⁹ Эrsa на жыгэ хуа щён фэ, щинфу Тади жынму вонху ё ба Анлахўди Рух жешухани. Нэхур Анлахўди Рух хан мё долэни, йинцысы Эrsaди гуонлён хан мё жолённи.

Жынму йинви Эrsa фынкэли

⁴⁰ Хошо жынму ба жыщезы хуа тинжян, зу фэди:

– Жыгэ Жын шызэсы Шынжын!

⁴¹ Юди жынму фэди:

– Тасы Мэсих!

Хан юди жынму фэди:

– Нандый Мэсих да Галилея дифоншон лэнима? ⁴² Йин-цысы Китабушон щедини: Мэсихсы Давуди хубый; ба Та зэ Давуди Вифлеем чынпуни сын-ёнхани.

⁴³Зу жымузя, жынму йинви Эrsa фынкэли. ⁴⁴Таму литу юди жынму щён ба Эrsa жуачўни, кэсы сысый ба Та мэ жуачў.

⁴⁵Нэщезы зочян дафачиди хуэжиму хуэйлэ, доли яхўти-ди да ахунму лян фарисейжынму гынчянли. Таму зу вынли хуэжимули:

– Ниму виса ба Эrsa мэ линдо жытар лэ?

⁴⁶Нэщезы хуэжиму хуэйдади фэсы:

– Зущён Та йиён, сый жымузя ду мэ фөгүэ!

⁴⁷Фарисейжынму ги таму кэ фэди:

– Ниму е шонли Тади донлима? ⁴⁸Ниму кан, нандый юди линшуму хуэйжэсы фарисейжынму щинфули Тали-ма? ⁴⁹Жыщезы бу минбый Муса фалүди минжынмусы жухади!

⁵⁰Таму литу ю йигэ жынлэ, минзы жёди Никодим. Та зочян зэ Эrsa гынчян чигүэ. Никодим зу вынли тамули:

– ⁵¹Жочў замуди фалү ба жынди хуа хан мэ тинди зочян, ба та ганхади сычин мэ жыдоди зочян, бу нын ги жыгэ жын дин зуй!

⁵²Таму ги Никодим хуэйдади фэсы:

– Нандый ни есы Галилея дифоншонди жынма? Ни чи, ба Китабу канйихар: ни зу канчўлэни, шынжын да Галилея дифоншон бу нын лэ.

⁵³Дажа ду хуэйли гэжяди жянили.

Хўлонди сыхур жуачўди нўжын

8 Эrsa вон Елеон саншон зули. ²Ди эр тян ганзо йизор Та йуанхуэй доли Иерусалим сынили. Жынму ду доли Та гынчянли. Эrsa зуэха, жётёли тамули. ³Жыгэ сыхур нянжинжынму лян фарисейжынму ба йигэ нўжын линдо жытарли. Ба жыгэ нўжын лян данлинди нанжын хўлонди сыхур жуачўли. Таму жё жыгэ нўжын зандо донжунни, ⁴зу вынли Эрсали:

– Вуста, ба жыгэ нўжын лян данлинди нанжын хўлонди сыхур жуачўли. ⁵Муса шынжын зэ тади фалүшон ги вэму гили фынфу: ба жымужяди нўжын на шыту яндин ё дасыни. Ни фэ, замужя банни?

⁶Таму щён на жыгэ хуа ба Эрса зыяньихарни; зу жыму-
жя зо йигэ йинйир ги Эрса дин зуйни. Кэсы Эрса ба ё гу-
ха, на зыту зэ дишон ще зыдини. ⁷Таму бутынди вын Эр-
сади йимяр, Эрса зу ба ту тэчелэ, ги таму фэди:

– Ниму донжунни сый мэю гўнахар, жё та щянтунни ба
жыгэ нұжын да йи шыту!

⁸Ба жыгэ хуа фэван, Эрса ба ё гуха, зэ дишон кэ щели
зыли. ⁹Таму ба Эрсади хуа тинжян, да ложын дашон йигэ
лян йигэ ду чўчили, нэтар гуон Эрса лян нэгэ нұжын
шынхали. ¹⁰Эрса ба ту тэчелэ, вынли нэгэ нұжынли:

– Нұжын, таму ду зэ нанини? Сый ду ги ни мэ дин зуйма?

¹¹Нұжын ги Эрса фэди:

– Жонгуйди, сый ду мэ дин зуй.

Эрса кэ фэди:

– Хо, Вэ е ги ни бу дин зуй. Ни чи! Вонху зэ бэ ган гў-
нахарли!

Эрсасы дун-яди гуонлён

¹²Эрса ги жынму хан фэди:

– Вэсы дун-яди гуонлён; гыншон Вэ зуди жын зэ хинан
литу бу зу, та ба сынхуэди гуонлён дыйшонни.

¹³Фарисейжынму ги Та фэди:

– Ни ги Ни гэжя дон гўвадини; Ниди хуа бусы жынди.

¹⁴Эрса ги таму кэ фэди:

– Вэ ги Вэ гэжя дон гўвадини еба, Вэди хуасы жынди;
йинцысы Вэ жыдо, Вэ да натар лэди, вон натар чидини.
Кэсы ниму бу жыдо, Вэ да натар лэли, вон натар чидини.

¹⁵Ниму жочў жынмуди канфа кан жынмудини; кэсы Вэ ба
сый жымузя ду бу кан. ¹⁶Вэ дан жочў Вэди канфа кан
сый, Вэди канфасы жынди, йинцысы Вэ бусы йигэр кан
жынмудини, кэсы ба Вэ дафалэди Дада лян Вэ йидарни е
кан жынмудини. ¹⁷Нимуди фалұшон щедисы: лёнгэ жын
йидарни дон гўвади сыхур, таму дан фэ йиёнди хуа, жыгэ
хуасы жынди. ¹⁸Вэ ги Вэ гэжя дон гўвади йимяр, ба Вэ да-
фалэди Дада е ги Вэ дон гўвадини.

¹⁹Таму вынли Эрсали:

– Ниди Дада зэ натарни?

Эрса хуэйдади фэсы:

– Ниму ба Вэ жынбудый, ба Вэди Дада е жынбудый. Ниму дан жындый Вэли, нэхур зу жындый Вэди Дадани.

²⁰ Эрса зэ Иерусалим сыни шу нетиди фонзыни жётө жынмуди сыхур, ба жыщезы хуа фэли. Нэхур сый ду ба Та мэ жуачў, йинцысы Тади сыхур хан мэ дони.

«Вэ чиди дифоншон ниму бу нын чи»

²¹ Эрса ги таму кэ фэди:

– Вэ зунн. Йиху ниму зо Вэни, кэсы ниму лян гэжяди гўнахар йидарни вучонни. Вэ чиди дифоншон, ниму бу нын чи.

²² Яхўтиди линшужынму фэди:

– Та фэди: «Вэ чиди дифоншон, ниму бу нын чи». Нандый Та шён ба гэжя дасынима?

²³ Эрса ги таму кэ фэди:

– Нимусы да дишон лэди, Вэсы да тяншон лэди; нимусы жыгэ дун-яди жынму, Вэ бусы жыгэ дун-яди Жын.

²⁴ Вэ ги ниму кэжя фэгуэ: «Ниму лян гэжяди гўнахар йидарни вучонни». Ниму дан бу шинфу Вэсы Сый, ниму лян гэжяди гўнахар йидарни вучонни.

²⁵ Таму зу вынли Эрсали:

– Ни додисы Сый?

Эрса ги таму хуэйдади фэсы:

– Вэ датур зу ги ниму фэгуэ Вэсы Сый. ²⁶ Вэ ба ниму либянди хошо сычин ё фэни, ба нимуди ганбан фынщёни. Сый ба Вэ дафалэли, Тасы жыншыди. Вэ ба Та фэхади хуа тинжян, ги жыгэ дун-яшонди жынму фэдини.

²⁷ Кэсы таму мэ минбый Эрса ги таму фэли Тади Дадали. ²⁸ Йинви жыгэ Эрса ги таму фэди:

– Ниму ба Аданди Хубый тэчелэди сыхур, цэ жыдони, Вэсы Сый. Ниму хан жыдони Вэ гэжя бу ган са, Вэ зущён Дада ба Вэ жётёди йиён фэ хуадини. ²⁹ Сый ба Вэ дафалэли, Та лян Вэ зэ йидарнини. Та ба Вэ мэ лёха, бу жё Вэ йигэр шынха, йинцысы Та нэ са сычин, Вэ зу йинавар ган жымугэ сычиндини.

³⁰ Хошо жынму ба Эрсади жыщезы хуа тинжян, шинфули Тали.

Юзыюди жын зэмусы нү

³¹ Эrsa ги шинфу Тади яхүти жынму фэди:

– Ниму дан ба Вэди жэшүе зунхү, ниму жыншысы Вэди манламу. ³² Ниму ба жынли ё жыдони; жынли зу ги ниму ги зыюни.

³³ Таму ги Эrsa хуэйдади фэсы:

– Вэмусы Ибрашимэди хубый; вэму йүнзун ги сый ду мэ донгуэ нү, Ни виса фэди: «Ниму чынха юзыюди жынмуни»?

³⁴ Эrsa ги таму кэ фэди:

– Вэ ги ниму фэ шыхуа, мый йигэ ган гўнахарди жынсы гўнахарди нү. ³⁵ Нү бу нын йинавар шындо жяни, эрзы йинавар шындо жянидини. ³⁶ Анлахүди Эрзы дан ги ниму ги зыю, ниму жыншыди чынха юзыюди жынмуни. ³⁷ Вэ жыдо нимусы Ибрашимэди хубый, кэсы ниму щён ба Вэ дасыни, йинцысы ниму бу жешу Вэди хуа. ³⁸ Вэ зэ Вэ Дада гынчян канжян са, Вэ зу фэ садини. Ниму ган нимуди дада фэхади сычиндини.

³⁹ Таму хуэйдади фэсы:

– Вэмуди дадасы Ибрашимэ шынжын.

Эrsa ги таму кэ фэди:

– Ниму дансы Ибрашимэди хубый, ниму ба Ибрашимэ ганхади сычин яндин ё ганни. ⁴⁰ Вэ ба Анлахү ги Вэ фэхади жынди хуа ги ниму фэгуэ, кэсы ниму щён ба Вэ дасыни. Ибрашимэ мэ гангуэ жымужяди сычин! ⁴¹ Ниму ба нимуди дада ганди сычин гандини.

Таму ги Эrsa хуэйдади фэсы:

– Анлахүсы вэмуди луэмур йигэ Дада; вэму бусы туту-мэме сын-ёнхади эрнүму!

⁴² Эrsa ги таму кэ фэди:

– Анлахү дансы нимуди Дадали, ниму яндин ё шинэ Вэни; йинцысы Вэ да Анлахүди мянчян лэли зэмусы кэжя доли жытарли. Вэ бусы жочү Вэ гэжяди вонщён лэди, Анлахү ба Вэ дафалэли. ⁴³ Ниму виса бу дун Вэди хуа? Йинцысы ниму ба Вэди хуа тинбулэ. ⁴⁴ Нимусы иблисди ваму, ниму щён ба ниму дадади вонщён ганни. Иблис

датур зусы хэ жынмуди минди, та мэю жынлиди гынзы, йинцысы тади шинни йидяр жынли ду мэю. Иблис чэ хуонди сыхур, ба гэжя шинниди хуа фэдини; йинцысы тасы хуонлюр; та есы йиче хуонхуади гынзы. ⁴⁵Ниму бу шинфу Вэ, йинцысы Вэ ба шыхуа фэдини. ⁴⁶Ниму литу сый миндамин нын фэ Вэ ю гўнахарни? Вэ фэди хуа дансы жынди, виса ниму бу шинфу Вэ? ⁴⁷Сый да Анлахўди мянчян лэли, та тин Анлахўди хуадини. Ниму бу тин Анлахўди хуа, йинцысы ниму бусы да Анлахў мянчян лэди.

Эрса зэмусы Ибрацимэ

⁴⁸Яхўти жынму вынли Эрсали:

– Вэму фэдини, Нисы Самария дифонди жын, Ниди кэлон литу ю гуйни. Вэму фэди дуйдинима?

⁴⁹Эрса хуэйдади фэсы:

– Вэди кэлон литу мэю гуй; Вэ тэнэ Вэ Дададини, кэсы ниму бу тэнэ Вэ. ⁵⁰Вэ бу щён ги Вэ гэжя дый миншын, кэсы данлинди Йигэ жё Вэ дый миншынни зэмусы ви Вэ вын гуансыни. ⁵¹Вэ ги ниму фэ шыхуа: сый зунхў Вэди хуа, нэгэ жын йўнзун бу вучон.

⁵²Таму ги Эрса кэ фэди:

– Жыхур вэму жыншыди жыдоли, Ниди кэлон литу ю гуйни! Ибрацимэ вучонли, шынжынму е ду вучонли, кэсы Ни фэди: «Сый зунхў Вэди хуа, нэгэ жын йўнзун бу вучон». ⁵³Нандый Ни би вэмуди Ибрацимэ лозы хан видама? Ибрацимэ вучонли, шынжынму е ду вучонли. Ни ба гэжя суанчын сыйни?

⁵⁴Эрса хуэйдади фэсы:

– Вэ дан ба Вэ гэжя куажёнли, Вэди жыгэ куажён са ду бу жы. Кэсы Вэ Дада ба Вэ куажёндени (ниму фэди, Тасы нимуди Анлахў). ⁵⁵Ниму жынбудый Та, кэсы Вэ жындый Тани. Вэ дан фэ, Вэ жынбудый Та, Вэ зу чынха лян ниму йиёнди хуонлюрни. Кэсы Вэ жындый Тани зэмусы зунхў Тади хуадини. ⁵⁶Нимуди Ибрацимэ лозы зочян гошинди панвон ба Вэ лэди жызы канжяни; ба жыгэ сычин канжянли, та гошинзали.

⁵⁷Таму ги Эрса фэди:

– Ни хан мәю вушы суй, Ни замужя нын жангуэ Ибра-
щимэ?

⁵⁸Эрса ги таму хуэйдади фэсы:

– Вэ ги ниму фэ шыхуа: ба Ибращимэ хан мә сын-ёнха-
ди зычян, Вэ кэжя юлэ.

⁵⁹Таму ба шыту начелэ, шён ба Эрса дани, кэсы Та дуэ-
дэли, зу да Иерусалимди сыни чўчили.

Эрса ба йигэ хазы канхоли

9 Эрса зэ лўшон ба йигэ жын пынжанли. Нэгэ жын да
сын-ёнха зусы хазы. ²Эрсади манламу зу вынли Эрсали:

– Вуста! Жыгэ жын да сын-ёнха зусы хазы; жысы йинви
сыйди гўнахар: та гэжяди гўнахарма, хансы та нён-лозыди
гўнахар?

³Эрса хуэйдади фэсы:

– Жыгэ сычин лян та гэжяди гўнахар хуэйжэсы та
нён-лозыди гўнахар ду мәю шёнган. Жыгэ сычинди йин-
йирсы Анлахў шён зэ ташон ган да сычинни. ⁴Быйтян Вэ
ба Вэ дафалэди Дадади сычин ё ганни; тян куэ зу хили,
нэхур сый ду бу нын ган са. ⁵Вэ хан зэ дун-яшонди сыхур,
Вэ зусы дун-яди гуонлён.

⁶Ба жыгэ хуа фэван, Эрса тўдо дишон, ба тўмэ лян ни
хуэли, мәдо нэгэ хазыди нянжиншон, ⁷зу ги та фэди:

– Ни зэ Силоам лобани чи, ба ниди нянжин шийихар!
(«Силоам»ди йисысы „Дафачиди жын“.)

Нэгэ жын зу чи, ба нянжин щилийихар; хуэйлэди сыхур,
та ба са ду канжанли. ⁸Тади линжүму дэ данлинди жынму
зочян жангуэ, тасы ё нетиди, жыхур таму ду фэди:

– Нандый жыгэ жын бусы йинавар зэ жытар зуэди, ё
нетиди нэгэ жынма?

⁹Юди жын фэди:

– Жы зусы та!

Хан юди жын фэди:

– Жы бусы та, жысы шён та йиёнди жын.

Нэгэ жын гэжя фэди:

– Жы зусы вэ.

¹⁰ Жынму вынли тали:

– Ниди нянжин замуҗя зынкэли?

¹¹ Та хуэйдади фэсы:

– Йигэ Жын, минзы жэди Эрса, ба түмэ лян ни хуэли, мэдэ вэди нянжиншон, зу ги вэ фэли: «Ни зэ Силоам лобани чи, ба ниди нянжин шийихар!» Вэ чи, ба нянжин щилийихар, зу ба са ду канжянли.

¹² Таму кэ вынли тали:

– Нэгэ Жын зэ нанини?

Та хуэйдади фэсы:

– Вэ бу жыдо.

Фарисейжынму ба хазыди сычин цали

¹³⁻¹⁴ Эрса ба түмэ лян ни хуэли, мэдэ нэгэ хазыди нянжиншонди нэйтянсы шанбэ. Жынму ба нэгэ зочянди хазы линдо фарисейжынму гынчянли. ¹⁵ Фарисейжынму вынли нэгэ жынли, та замуҗя ба са ду канжянли. Нэгэ жын ги таму фэди:

– Йигэ Жын ба ни мэдэ вэди нянжиншонли, вэ ба нянжин щилийихар, зу ба са ду канжянли.

¹⁶ Юди фарисейжынму фэди:

– Ганха жыгэ сычинди Жын бусы Анлахү дафалэди, йинцысы Та бу зунхү шанбэди фалу.

Данлинди жынму фэди:

– Югүнахарди жын замуҗя нын щян жымуҗяди кэрамэти?

Йинви жыгэ таму фынкэли. ¹⁷ Фарисейжынму кэ вынли нэгэ зочянди хазыли:

– Та ба ниди нянжин канхолиди йимяр, ни фэ: Тасы сый?

Нэгэ жын хуэйдади фэсы:

– Тасы йигэ шынжын.

¹⁸ Яхүтиди линшужынму мэ щинфу, нэгэ жын зочянсы хазылэ, жыхур та ба са ду канжянли. Таму зу ба тади нён-лозы жёлэ, ¹⁹ вынли тамули:

– Жыгэ жынсы нимуди эрзыма? Ниму фэди, та да сын-ёнха зусы хазы. Жыхур та замуҗя ба са ду канжяндини?

²⁰ Тади нён-лозы хуэйдади фэсы:

– Вэму жыдони, тасы вэмуди эрзы, та да сын-ёнхасы хазы. ²¹ Кэсы вэму бу жыдо, жыхур та замужя ба са ду канжяндини; сый ба тади нянжин канхоли. Та кэжя жондали, ниму вын та гэжя чи! Та гэжя ги ниму ги хуэйдани!

²² Тади нён-лозы жымужя фэди, йинцысы таму хэпа яхү-тиди линшужынмуни. Нэхур линшуму кэжя шонлёнхоли: сый дан фэ Эрсасы Мэсих, ба та да синагога литу ганчүчини. ²³ Йинви жыгэ, нэгэ жынди нён-лозы хуэйдади фэсы: «Та кэжя жондали, ниму вын та чи!» ²⁴ Фарисейжынму ба нэгэ зочянди хазы кэ жёлэ, ги та фэди:

– Ни ё куажён Анлахүни! Вэму жыдони, Эрсасы йигэ югүнахарди Жын.

²⁵ Та хуэйдади фэсы:

– Вэ бу жыдо, Тасы югүнахарди жынма, хансы мэю гүнахарди жын. Кэсы вэ жыдо йигэ сычинни: вэ зочянсы хазылэ, жыхур ба са ду канжяндини.

²⁶ Таму кэ вынли нэгэ жынли:

– Та ги ни ганли са сычинли? Та замужя ба ниди нянжин канхоли?

²⁷ Нэгэ жын хуэйдади фэсы:

– Вэ ги ниму кэжя фэгүэ, кэсы ниму бу тин. Ниму хан щён тинжян сани? Нандый ниму е щён дон Тади манланима?

²⁸ Таму зу мали тали:

– Ни гэжясы Тади манла. Вэмусы Муса шынжынди манламу. ²⁹ Вэму жыдони, Анлахү лян Муса шынжын фэгүэ хуа; кэсы вэму бу жыдо, нэгэ Жынсы да нани лэди!

³⁰ Та зу фэди:

– Жысы чигүэ сычин: нэгэ Жын ба вэди нянжин канхоли, кэсы ниму бу жыдо Тасы да нани лэди! ³¹ Вэму жыдони, Анлахү бу тин югүнахарди жынди чито; кэсы сый хэпа Анлахү зэмусы ган Тади фынфу, Анлахү зу тин тади читони. ³² Да зуэзоха дун-яди сыхур дашон, сый ду мэ тингүэ, йигэ жын ба сын-ёнха хазыди нянжин канхоли. ³³ Нэгэ Жын дан бусы Анлахү дафалэди, Та са ду бу нын ган.

³⁴Таму ги нэгэ жын хуэйдади фэсы:
– Нисы зэ гўнахар литу сын-ёнхади, ни замузя нын жё-тё вөмуни?!

Таму зу ба нэгэ жын да синагога литу ганчўчили.

Сыйсы жынышды хазы?

³⁵Эрса тинжян таму ба нэгэ жын да синагога литу ганчўчили, зу ба та зожуэ, фэди:

– Ни шинфу Аданди Хубыйнима?

³⁶Нэгэ жын хуэйдади фэсы:

– Жонгуйди! Ни ги вэ фэ, Тасы сый, жё вэ шинфу Та!

³⁷Эрса ги та кэ фэди:

– Ни ба Та кэжя жанли: хазыр лян ни фэхуади зусы Та.

³⁸Нэгэ жын зу фэди:

– Жонгуйди! Вэ шинфу Ни!

Йиху та зу ги Эрса гуйхали. ³⁹Эрса фэди:

– Вэ до жыгэ дун-яшон лэ, шён фыншэ сыйди ганбан хо хуэйжэсы бу хо, жё хазыму ба са ду канжянни, хан жё канжянди жынму чынха хазыни.

⁴⁰Нэтарди жигэ фарисейжын ба жыщезы хуа тинжян, зу вынли Эрсали:

– Нандый вөму есы хазыма?

⁴¹Эрса ги таму хуэйдади фэсы:

– Ниму дансы хазыли, ниму зу мөю гўнахар. Йинви ниму хазыр фэди: «Вөму канжяндини», ниму зу ю гўнахарни.

Хо фон-ёнжын зэмусы ёнжүанди мын

10 Эрса кэ фэди:

– Вэ ги ниму фэ шыхуа: сый дан вон ёнжүанниди да мынни бу жинчи, кэсы да данлинди вэршон жинчи, тасы зыйвазы зэмусы чёндожын. ²Сый дан вон ёнжүанниди да мынни жинчи, та зусы фон-ёнжын. ³Кан мынди жын ги та ба мын кэкэ, ён е тин тади хуани, та ба гэжяди ён жочў тамуди минзы жёдини, ба таму линчўчини. ⁴Фон-ёнжын ба гэжяди ён линчўчиди сыхур, зу зэ таму туни зудини. Тади ён е гыншон та зудини, йинцысы ён ба тади шынчи жьдони.

⁵ Ён гыншон понжын бу зу, да та гынчян подёни, йинцысы таму бу жыдо понжынди шынчи.

⁶ Эрса ги таму фэли жыгэ бифонли, кэсы таму ба йисы мэ дун.

⁷ Эрса ги таму кэ фэди:

— Вэ ги ниму фэ шыхуа: Вэ зусы ёнжүанди мын. ⁸ Вэди туни лэлиди жынму йиче дусы зыйвазы зэмусы чёндожын. Ён мэ тин тамуди хуа. ⁹ Вэ зусы мын. Сый да жыгэ мынни жинлэ, ба тади мин жүхани, та чўлэ-жинчи, зу ба хо цочонзы зожуэни. ¹⁰ Зыйвазы дан жинлэ, та зу ту дунши, са жын, хэ минни. Вэ лэ, жё жынму хуэни, хан жё таму гүэ фу-жүди гуонийинни. ¹¹ Вэсы хо фон-ёнжын. Хо фон-ёнжын ба гэжяди мин ви ён жүгини. ¹² Гўхади жын бусы фон-ёнжын; ён е бусы та гэжяди. Та йиканса: лон лэдини, зу ба ён эрха подёни; лон ба ён жуачў, ёнчүн зу сандёни. ¹³ Гўхади жын подёни, йинцысы тасы йигэ гўха зўхуэди жын, та хохор бу жокан ёнчүн. ¹⁴⁻¹⁵ Вэсы хо фон-ёнжын. Зушён Вэ Дада жынды Вэ йиён, Вэ е жынды Вэ Дадани. Лян жыгэ йиён, Вэ жынды Вэди ённи, таму е жынды Вэни. Вэ ба Вэди мин ви таму жүгидини. ¹⁶ Вэ хан ю данлинди ённи, мэ зэ жыгэ ёнжүанни. Вэ е ба таму ё линшонни; таму тин Вэди хуани. Зу жымузя, лён чүн ён чынха йичүнни зэмусы ю луэмур йигэ фон-ёнжынни. ¹⁷ Дада щинэ Вэни, йинцысы Вэ ба гэжяди мин жүгидини, йиху Вэ ба Вэди мин йүанхуэй дыйшонни. ¹⁸ Ба Вэди мин сый ду бу дуэдё, Вэ гэжя ба Вэди мин жүдини. Вэ ю нынгу ба гэжяди мин жүгини, е ю нынгу ба та йүанхуэй дыйшонни. Вэ Дада ба жыгэ фынфу ги Вэ гигили.

¹⁹ Йинви жыщезы хуа яхўти жынму йүанхуэй фынкэли.

²⁰ Таму литу хошо жынму фэди:

— Гуй ба Та начўдини! Та шодёли! Виса ниму тин Тадини?

²¹ Данлинди жынму фэди:

— Лян гуй начўди жын бу нын фэ жымужяди хуа! Нандый гуй ба хазыди нянжин нын канхома?

Яхўти жынму ба Эрса мэ жын

²² Дунтян Иерусалим чынпуни ги сыни гуэли ганжинди жечили. ²³ Нэхур Эрса зэ Иерусалим сыниди Сульманэ

хуоншонди гуэдозыни лэ-чи зудини. ²⁴ Яхүти жынму ба Эрса чүанчү, зу ги Та фэди:

– Гуэли дуэшо гунфу Ни хан мэ жё вэму жыдо жыншы-ди сычин? Ни миндамин ги вэму фэ, Нисы Мэсихма?

²⁵ Эрса ги таму хуэйдади фэсы:

– Вэ кэжя ги ниму фэгүэ, кэсы ниму бу щинфу. Вэ ви Вэ Дадади минзы ганди сычин зу зыфэди, Вэсы сый.

²⁶ Кэсы ниму бу щинфу Вэ, йинцысы ниму бусы Вэди ён.

²⁷ Вэди ён тин Вэди хуани. Вэ жындый тамуни, таму е гыншон Вэ зудини. ²⁸ Вэ жё таму йинавар хуэни, таму йүнзун бу вучон. Сый ду бу нын ба таму да Вэди шуни чёндуэдэ. ²⁹ Вэ Дада ба таму ги Вэ гигили. Та би йиче ду вида. Сый ду бу нын да Дадади шуни ба таму чёндуэдэ. ³⁰ Вэ лян Дадасы тунйиди.

³¹ Жыхур яхүти жынму ба шыту начелэ, щён да Эрсани.

³² Эрса ги таму кэ фэди:

– Дада жё Вэ ган хошо сычинни. Вэ зэ ниму мянчян ба жыщезы хо сычин ганли. Ви найигэ сычин ниму щён на шыту да Вэни?

³³ Таму ги Эрса хуэйдади фэсы:

– Вэму бусы ви Ни ганхади хо сычин щён на шыту да Нини, кэсы йинви Ни дэцэли Анлахүли! Нисы Жын, кэсы ба гэжя суанчын Анлахүли!

³⁴ Эрса ги таму фэди:

– Нандый нимуди фалүшон мэю жы йигэ хуама: «Анлахү фэли: „Нимусы хўдаму“»? ³⁵ Вэму жйдони, Китабушонди хуа йинавар бу нын гэбян. Анлахү ба нэщезы тинли Тади хуади жынму жёчын «хўдамули».

³⁶ Дада ба Вэ жянчүлэ, дафадо дун-яшонли. Дан жымужяли, ниму виса фэди, Вэ дэцэли Анлахүли, йинви Вэ фэли: «Вэсы Анлахүди Эрзы»?

³⁷ Вэ дан бу ган Вэ Дадади сычин, ниму зу бэ щинфу Вэли.

³⁸ Вэ дан ган жыщезы сычин, ниму бу щинфу Вэ еба, кэсы ё щинфу Вэ ганди сычинни, жё ниму миндамин жыдоха, Вэди Дада зэ Вэ литуни, Вэ е зэ Дада литуни.

³⁹ Таму йүанхуэй щён ба Эрса жуачүни, кэсы Та да таму донжунни зудёли. ⁴⁰ Эрса йүанхуэй доли Иордан хэ нэбонгэли, доли Йихия зочян ба жынму зэ фи литу ви Анлахү

шилиди дифоншонли, зу шындо нэтарли. ⁴¹Хошо жынму до Та гынчян лэ, фэди:

– Йихия йигэ кэрамэти ду мә шянгуэ, кэсы та фэха жыгэ Жын либянди йиче хуа дусы жынди.

⁴²Нэтар хошо жынму щинфули Эрсали.

Эрсади ляншу Лазарь вучонли

11 Вифания шёнжуонниди йигэ жын, минзы жёди Лазарь бущинхали. Мариам лян та жеже Марфа е зэ жыгэ шёнжуонни жўдини. ²(Вонху Мариам ба Эрса Жонгуйдиди жўэ на шён-ю мэдэ, лян гэжяди туфа ца ганни. Бущинхади Лазарь зусы тади шўнди.) ³Лёнгэ зымый ба жынму дафачи, жё таму ги Эрса фэни:

– Жонгуйди! Ни щинэди ляншу бущинхали.

⁴Эрса ба жыгэ хуа тинжян, зу фэди:

– Лазарь хэди бин жун еба, та бу вучон; жыгэ сычин жё Анлахўди лилён шянчўлэни, жё Анлахўди Эрзы йинви жыгэ сычин ба миншын дыйшонни.

⁵Эрса щинэ Марфа лян тади мыймый, е щинэ Лазарь.

⁶Та тинжян Лазарь бущинхали еба, зэ гэжя занди вёршон хан шынли лёнтян. ⁷Йиху Та ги манламу фэди:

– Заму йўанхуэй до Яхўти дифоншон зу!

⁸Манламу ги Та фэди:

– Вуста! Яхўти жынму жён шён на шыту да Нини, Ни хан шён йўанхуэй вон нэтар чинима?

⁹Эрса фэди:

– Нандый быйтян мёю шы эргэ сышынма? Сый быйтян зу лў, та бу дедо, йинцысы та канжян жыгэ дун-яди гуонлённи. ¹⁰Сый хили зу лў, та зу дедони, йинцысы та мёю гуонлён.

¹¹Ба жыщезы хуа фэван, Эрса хан фэди:

– Замуди ляншу Лазарь фижуэли; Вэ чи ба та ханщинлэ.

¹²Манламу ги Эрса фэди:

– Жонгуйди! Та дан фижуэли, тади бин хони.

¹³Эрса фэха хуади йисы шыдашысы Лазарь кэжя вучонли; кэсы таму сылёнди жыгэ хуади йисысы Лазарь фижуэли. ¹⁴Нэхур Эрса миндамин ги таму фэди:

– Лазарь вучонли. ¹⁵ Вә гошиндини, йинцысы нэхур Вә мә зэ нэтарлэ, жыгә жё ниму щинфуни. Хазыр заму зу Лазарь гынчян!

¹⁶ Фома (ба та хан жёди «Фонфор») ги данлинди манламу фәди:

– Заму лян Вуста йидирни зу, лян Та йидарни вучон!

*«Вә жё жынму кә хуәни,
хан жё таму йинавар хуәни»*

¹⁷ Эrsa доли Вифания щёнжуонниди сыхур, зу жыдоли: ба Лазарьди мәти сы тьян зочян кәжя сундөли. ¹⁸ Вифания щёнжуон ли Иерусалим чынпу бонжер ю сангә километрни. ¹⁹ Хошо яхүти жынму доли Марфа лян Мариамди жянили, йинви таму шүнди вучонли йимяр, чүанфәли тамули. ²⁰ Марфа тинжян Эrsa ләли, зу чүлэ жейинли Тали. Мариам шындө жянили. ²¹ Марфа ги Эrsa фәди:

– Жонгуйди! Ни дан зэ жытарлэ, вәди шүнди зу бу вучон! ²² Кәсы вә жыдони, жыхур Ни дан чито Анлахү ё са, Анлахү зу ги Ни ги сани.

²³ Эrsa ги Марфа фәди:

– Ниди шүнди кә хуәни.

²⁴ Марфа ги Та фәди:

– Вә жыдони, ахыр зэмани нәйитян та кә хуәни.

²⁵ Эrsa ги Марфа кә фәди:

– Вә зусы сынхуә, Вә жё жынму кә хуәни. Щинфу Вәди жын дан вучонли, та кә хуәни. ²⁶ Щинфу Вәди хуә жын йүнзун бу вучон. Ни щинфу жыгәнима?

²⁷ Марфа ги Та хуэйдади:

– Дуйдини, вәди Жонгуйди! Вә щинфуни, Ни зусы вон дун-яшон ё ләди Нэгә Мәсих, Ни зусы Анлахүди Эрзы!

²⁸ Марфа ба жыгә хуа фәван, зу хуэйли жяли, туту-мәмәди ги тади мыймый Мариам фәди:

– Вуста ләли, Та жё нидини.

²⁹ Мариам ба жыгә хуа тинжян, донвәр челэ, зули Эrsa гынчян чили. ³⁰ Нэхур Эrsa хан мә жин щёнжуонни, хан зэ Марфа жейинха Тади вәршон зандини. ³¹ Зә Мариамди жяни чүанфә тади яхүти жынму йиканса, Мариам хуон-

хуон-монмонди челэ, чўчили, таму зу гыншон та зули, сылэнди, данпа Мариам до фынйүанни чи, кўчили. ³²Мариам доли Эрса гынчян зэмусы ба Та канжянлиди йиху, гуйдо Тади жүэ гынчян, фэди:

– Жонгуйди! Ни дан зэ жытарлэ, вэди шүнди зу бу вучон!

³³Эрса канжян Мариам лян та йидарни лэди яхўти жынму ду кўдини, гэжя щинни е нангуэли, хан дали лынжанли. ³⁴Йиху Эрса вынли тамули:

– Ниму ба Лазарьди мэти сундо нанили?

Таму хуэйдади фэсы:

– Жонгуйди! Ни лэ канйихар!

³⁵Эрса тонли нянлуйли. ³⁶Йинви жыгэ яхўти жынму фэди:

– Ниму кан, Та дуэму щинэ жыгэ жын!

³⁷Юшезы жынму фэди:

– Та ба хазыди нянжин канхоли. Нандый Та бу нын жё Лазарь бу вучонма?

Эрса жё Лазарь кэ хуэли

³⁸Эрса щинни нангуэди доли фынйүаннили. Нэгэ фынйүанни ю йигэ ёдунлэ, ёдунди мын чянту динди йигэ шыту. ³⁹Эрса фэди:

– Ба шыту нуэгүэчи!

Вучонлиди Лазарьди жеже Марфа ги Эрса фэди:

– Жонгуйди! Ба тади мэти сундэ кэжя сы тянли, мэти кэжя юли видоли!

⁴⁰Эрса ги та фэди:

– Нандый Вэ ги ни мэ фэгуэма, ни дан щинфули, зу ба Анлахўди лилён канжянни?

⁴¹Таму ба шыту нуэгүэчили. Эрса вончў тяншон канлийихар, зу фэди:

– Вэди тяншонди Ада-я! Вэ ги Ни дощеди, йинцысы Ни ба Вэ тинжянли. ⁴²Вэ жыдони, Ни йинавар ба Вэ тинжяндини. Вэ фэ жыгэ хуади йинцысы, жё жуви занди жынму щинфу: Нисы ба Вэ дафалэди.

⁴³Эрса ба жыгэ хуа фэван, зу дашын ханди:

– Лазарь, чўлэ!

⁴⁴ Вучонлиди Лазарь зу чўлэли. Ба тади шу дэ жўэ ду на бу гуэчўдини, ба тади лян е на гэту бочўдини. Эrsa ги жынму фэди:

– Ба та гэжэ, жё та зу!

***Яхўтиди да ахунму вонщёнди
ба Эrsa дасыни***

(Мф 26:1-5; Мк 14:1-2; Лк 22:1-2)

⁴⁵ Зэ Мариамди жяни лэди хошо яхўти жынму ба Эrsa ганхади сычин канжян, зу шинфули Тали. ⁴⁶ Таму литу ющезы жынму доли фарисейжынму гынчян, ба Эrsa ганхади сычин ги таму ду фэли. ⁴⁷ Йинви жыгэ, фарисейжынму лян яхўтиди да ахунму кэли годын шонлён хуэйли, зу фэди:

– Жыгэ Жын щянчўлэ хошо кэрамэтили. Заму замужя банни? ⁴⁸ Заму дан жё Та зу жымужя ганчи, дажя ду шинфу Тани. Нэхур Рим гуйжяди жынму лэ, зу ба заму гуйжунди сы цыйдёни, ба замуди минзў щёмедёни!

⁴⁹ Таму литу ю йигэ жынлэ, минзы жёди Каиафа. Нэйиняшон та дон яхўтиди да ахундини. Та фэди:

– Ниму са ду бу дун! ⁵⁰ Нандый ниму бу минбыйма, жыгэ ги заму ю хони: жё йигэ жын ти йиче минжынму вучонни, бэ жё ба чўан минзў щёмедё?

⁵¹ Шыдашы фэчи, Каиафа бусы ба гэжяди хуа фэли, йинцысы нэйиня та дон яхўтиди да ахундини, зу жымужя фэли: Эrsa ти йиче яхўти минжынму ё вучонни. ⁵² Эrsa гуон бусы ти таму вучонни, хан ба сыжу-баха сандёди Анлахўди эрнүму ду жёдо йидарнини, жё таму чынха йичүнни. ⁵³ Да нэхур дашон, яхўтиди линшужынму шонлёнхо, щён ба Эrsa дасыни.

⁵⁴ Йинви жыгэ, Эrsa зэ Яхўти дифоншон бу нын миндамин зу. Та доли ли кунтан бу йўан дифоншонди йигэ щёнжуоннили, минзы жёди Ефраим, зэ нэтар лян манламу йидарни шынхали. ⁵⁵ Яхўти жынмуди Пасха жечи куэ зу долэни. Жечиди зочян, хошо жынму да гэжяди щёнжуонни зули Иерусалим чынпунили, йинцысы таму щёнзунхў ганжин куйчынни. ⁵⁶ Таму сыжу-бахани золи Эрсали.

Зэ Иерусалимди сыни шудо йидарниди сыхур, таму йигэ вынли йигэли:

– Ни замужя сылэнди, Та гуэ жечи лэнима, хансы бу лэ?

⁵⁷ Яхүтиди да ахунму лян фарисейжынму зозор зу гилигэ фынфу: сый дан жыдо Эрса зэ нанини, та яндин ё фэни, йинцысы таму щён ба Эрса жуачүни.

Мариам ба Эрса на щён-ю мәли

(Мф 26:6-13; Мк 14:3-9)

12 Гуэ яхүти Пасха жечи лю тян зочян, Эрса доли Вифания щёнжуоннили. Жысы Лазарь жүди дифон. Зочян Эрса зэ жытар жё Лазарь кэ хуэли. ² Нэтарди жынму ги Эрса гуэли янцили. Марфа фусыли Тали, Лазарь лян данлинди кижынму лян Эрса йидарни чыли фанли. ³ Жыгэ сыхур Мариам налэлигэ пинзы, литу гуанди жыншыди, жычянди щён-ю. Та на жыгэ щён-ю ба Эрсади жүэ мәли, лян гэжяди туфа ца ганли. Фонзыни щён видо мандёли. ⁴ Эрсади йигэ манла (та йиху ба Эрса мэчүчили), минзы жёди Жүхүти Искарриот фэди:

– ⁵ Виса ба жыгэ щён-ю бу мэдё санбий йинчян, ба чян ги чүнжынму фынги?

⁶ Та фэли жыгэ хуа, йинцысы шыдашы та бу щён жокан чүнжынму, тасы йигэ зыйвазы, та ба шу чянди щёнщёнзы надини, гэжя ба литуди чян чинчир тудини. ⁷ Кэсы Эрса фэди:

– Ни бэ донгуа жыгэ нүжынли! Та ба жыгэ щён-ю йичыр до ба Вэди мэти сундёди нэйитян бохүчүли. ⁸ Йинцысы чүнжынму йинавар лян ниму зэ йидарнини, кэсы Вэ йинавар лян ниму бу нын зэ йидарни.

Яхүтиди да ахунму вонщёнди ба Лазарь е дасыни

⁹ Хошо яхүти жынму тинжян Эрса зэ Вифания щёнжуонни зандини, зу вон нэтар зули. Таму гуон бусы щёнжян Эрсани, таму е щёнжян Лазарьни, йинцысы зочян Эрса жё та вучонлиди йиху, кэ хуэли. ¹⁰ Йинви жыгэ, яхүтиди да ахунму шонлөнхоли, ба Лазарь е дасыни, ¹¹ йинцысы хошо яхүти жынму ба Лазарьди сычин тинжян, до Эрса гынчян лэ, щинфули Тали.

Эрса жинли Иерусалим чынпули

(Мф 21:1-11; Мк 11:1-11;
Лк 19:28-40)

¹² Ди эр тьян до Иерусалим чынпуни гуэ жечиди хошо жынму тинжянли Эрса вон чынпу жинлэдини. ¹³ Таму ба мизор зунфуди жыжызы нашон, чўчи жейинли Тали, зу гошинди ханди:

– Осанна!* Вэму ба Ни куажёндени!

Ни ви Анлахўди минзы лэдини!

Нисы Исраилди Хуоншон!

¹⁴ Эрса ба йигэ лүвазы зожуэ, чидо ташонли, зуцён Китабу шехади йиён:

¹⁵ «Иерусалимди нүр, ни бэ хэпали!

Кан, ниди Хуоншон чиди лүвазы лэдини!»

¹⁶ Нэхур Эрсади манламу ба жыгэ сычинди йисы хан мэ дун. Эрсади гуонлён жолёнлиди йиху, манламу цэ жичэлэли: Китабушон шехади жыщезы хуа фэ Тадини; таму жыхур ганхади сычин зуцён Китабушон шехади йиён.

¹⁷ Эрса ба вучонлиди Лазарь да ёдунни ханчўлэ, жё та кэ хуэлиди сыхур, лян Эрса зэ йидарниди нэщезы жынму ба таму канжянди сычин ги дажя ду фэли. ¹⁸ Хошо жынму ду чўчи, ба Эрса жейинли, йинцысы таму ба Та щянчўлэди жыгэ кэрамэти тинжянли. ¹⁹ Фарисейжынму йигэ ги йигэ фэди:

– Заму са ду ганбучын! Ниму кан, чўан дун-яди йиче жынму ду гыншон Та зудини!

Грек жынму щён жян Эрсани

²⁰ Ющезы Грек жынму е доли Иерусалим чынпунили. Таму гуэ жечиди сыхур, щён бэвон Анлахўни. ²¹ Таму доли Филипп гынчян (тасы Галилеяди Вифсаида чынпуниди жын), зу читоли тали:

– Жонгўйди! Вэму щён жян Эрсани.

* 12:13 Жыгэ хуади йисы кан Мф 21:9.

²² Филипп чи, ба жыгэ ги Андрей фэли. Таму лёнгэр чи, ба жыгэ ги Эrsa фэли. ²³ Эrsa ги таму фэди:

– Адан Хубыйди гуонлён жолёнди сыхур кэжя доли. ²⁴ Вэ ги ниму фэ шыхуа, йигэ мыйзыди жунзы дан бу де-до ди литу, дан бу сыдэ, та хансы йигэ жунзы. Кэсы йигэ мыйзыди жунзы дан сыдэли, та зу ги хошо шучынни. ²⁵ Сый ба гэжяди мин нэдихын, та ба тади мин хэни. Кэсы сый зэ жыгэ дун-яшон ба гэжяди мин хындини, ба тади мин бохүчүни, хан ба йинаварди мин дыйшонни. ²⁶ Сыйсы Вэди хуэжи, та ё гыншон Вэ зуни. Вэ зэ натарни, Вэди хуэжи е ё зэ нэтарни. Сыйсы Вэди хуэжи, Вэ Дада тэнэ тани.

*Эrsa ба Та гэжя вонху вучонди
зозор фэли*

Эrsa хан фэди:

– ²⁷ Хазыр Вэди щинни пэфандихын. Жё Вэ фэ сани? Жё Вэ фэнима: «Вэди Ада-я! Ни жё Вэ ба жыгэ бэля дуэдэ»? Кэсы Вэ ви жыгэ сычин лэли, жё Вэ шу жыгэ кўнанни. ²⁸ Ада-я! Вэ панвонди жё Ниди гуонлён жолённи!

Нэхур йигэ шынчи да тяншон халэ, фэди:

– Вэди гуонлён кэжя жолёнли, хан йүэщин лённи!

²⁹ Нэтар занди жынму ба жыгэ шынчи тинжян, зу фэди:

– Жысы залуйди щёншын!

Данлинди жынму фэди:

– Тянщян лян Та фэли хуали!

³⁰ Кэсы Эrsa ги таму фэди:

– Жыгэ шынчи бусы ви Вэ халэди, кэсы ви ниму халэди. ³¹ Жыхур ги жыгэ дун-я дин зуйди сыхур доли; жыхур ба жыгэ дун-яшонди вонзы ганчүчини. ³² Дансы ба Вэ да дишон тэчелэ, Вэ ба йиче жынму ладо Вэ гынчянни.

³³ Зу жымужя Эrsa зозор фэли, Та гэжя вонху замужя вучонни.

³⁴ Жынму ги Та фэди:

– Вэмуди фалү ги вэму фэди, Мэсих йинавар хуэни. Ни виса фэди, ба Аданди Хубый ё тэчелэни? Жыгэ Аданди Хубыйсы сый?

³⁵ Эrsa фэди:

– Гуонлён хан бу дади гунфу зэ ниму донжунни лённи. Ю гуонлёнди сыхур жё ниму зу лўни, бө жё хинан ба ниму гэчўли, йинцысы зэ хинан литу зу лўди жын бу жыдо, та вон нани зудини. ³⁶ Ю гуонлёнди сыхур жё ниму шинфу жыгэ гуонлённи, зу жымузя ниму чынха гуонлёнди жынмуни.

«Анлахў жё тамуди нянжин хали»

Эrsa ба жыщезы хуа фэван, зу да таму гынчан зудё, чёнхали. ³⁷⁻³⁸ Та зэ таму мянчан шянли хошо кэрамэтили еба, кэсы таму хан бу шинфу Та, жё Исаяя шынжын фэхади хуа яндин чынхани:

«Жонгуйди! Сый шинфули вэму фэхади хуали?
Жонгуйди лилён ги сый шянчўлэли?»

³⁹ Таму бу нын шинфу, йинцысы Исаяя хан фөгүө:

⁴⁰ «Анлахў жё тамуди нянжин хали,
хан жё тамуди шин ниндөли.

Дан бусы жымузя, тамуди нянжин яндин канжянни,
шин яндин минбыйни.

Йинви жыгэ таму бу нын жочў Анлахў жуангуэлэ,
жё Та ба таму канхони».

⁴¹ Ба Эrsaди гуонлён канжянлиди йимяр, Исаяя шынжын жымузя фэли Эрсали. ⁴² Хошо яхўтиди линшужынму е шинфули Эрсали. Кэсы таму хэпа фарисейжынмуди йимяр, таму ба жыгэ сычин бу ган миндамин жын, бө жё ба таму да синагога литу ганчўчили. ⁴³ Таму ба жынмуди тэнэ би Анлахўди тэнэ нэдидүө.

*Эrsa фэхади хуа ахыр зэмани
ги жынму дин зуйни*

⁴⁴ Эrsa дашын ханди:

– Сый шинфу Вэли, та гуон бусы шинфу Вэни, та е шинфу ба Вэ дафалэди Дадани. ⁴⁵ Сый канжян Вэли, та ба Вэ дафалэди Дада е канжянни. ⁴⁶ Вэсы до дун-яшон лэди гуонлён, жё мый йигэ шинфу Вэди жын зэ хинан литу бу жў. ⁴⁷ Сый ба Вэди хуа тинжан, дан ба жыщезы хуа бу зунхў,

Вә ги та бу дин зуй. Вә до дун-яшон ләли, бусы ги дун-яшонди жынму дин зуйни, кәсы жү тамуди минни. ⁴⁸Сый ба Вә бу жынли, бу жешу Вәди хуали, ги та ю дин зуйди йигәни: Вә фәхади хуа ахыр зәмани нәйитян ги та дин зуйни! ⁴⁹Йинцысы Вә мә фә гэжяди хуа. Ба Вә дафаләди Дада ги Вә гили фынфу, жә Вә фә сани, жән сани. ⁵⁰Вә жыдони, Тади фынфу ба йинаварди сынхуә гидини. Йинви жыгә, жочү Дада ги Вә фәхади хуа, Вә фәдини.

Эрса ба манламуди жүә щили

13 Яхүти Пасха жечиди зочян, Эрса ба Та да жыгә дун-яшон вон Дада гынчян хуэйчи доләди сыхур кәжя жыдоли. Эрса зә дун-яшон ба гэжяди жынму йинавар щинәдини, Та ба таму ванчүан щинәли. ²Хушон Эрса лян Тади манламу чыфанди сыхур, иблис ба Шимәди эрзы, Жүхүти Искарриот чуәсуәди, жә та ба Эрса мәчүчини. ³Эрса жыдони, Та Дада ба йичеди чүанли ги Та кәжя жәгили; хан жыдо Та гэжясы да Анлахү гынчян ләди, жыхур йүанхуэй до Анлахү гынчян чидини. ⁴Эрса зу да коншон халә, ба готуди йишон туәха, ба йигә шужин жидо ёни, ⁵йиху ба фи додо пын литу, ба манламуди жүә щикәли зәмусы на шужин ца ганли. ⁶Та доли Шимә-Пётр гынчянди сыхур, Пётр ги Та фәди:

– Жонгуйди! Ни щи вәди жүәнима?

⁷Эрса ги та хуэйдади фәсы:

– Вә ганди сычин хазыр ни бу дун, жыгәди йиху ни цә минбыйни.

⁸Пётр ги Та фәди:

– Вә йүнзун бу жә Ни щи вәди жүә!

Эрса фәди:

– Вә дан бу щи ниди жүәли, ни лян Вә мәю ләвон.

⁹Шимә-Пётр ги Та фәди:

– Жонгуйди! Дан жымужяли, Ни гуон бусы ба вәди жүә, чин Ни ба вәди шу дә ту е щидә!

¹⁰Эрса фәди:

– Ба сый кәжя щили, тади хуншын ду ганжиндини, гуон ё ги та щи жүәни. Ниму ганжиндини, кәсы ниму литу ю буганжинди жынни.

¹¹ Эrsa кәжя жыдони, сый ба Та мачүчини. Йинви жыгә Та фәди: «Ниму литу ю буганжинди жынни». ¹² Эrsa ба манламуди жүә щиде, зу ба готуди йишон чуаншон, йуанхуэй зуэдо гэжяди вифыншонли. Йиху Та вынли манламули:

– Ниму дунлима, Вә жән ги ниму ганли сали? ¹³⁻¹⁴ Ниму ба Вә жәди «Вуста» зэмусы «Жонгуйди». Ниму фәди дуйдини, йинцысы Вә зусы нимуди Вуста зэмусы Жонгуйди. Нимуди Жонгуйди зэмусы Вуста дан ба нимуди жүә щили, ниму йигә ги йигә е ё щи жүәни. ¹⁵ Вә ги ниму гили йигә ёнзы, жә ниму зушән Вә ги ниму ганхади йиён ганни. ¹⁶ Вә ги ниму фә шыхуа, хуәжи бу нын би тади жүжын го, дафачиди жын бу нын би дафа тади жын да. ¹⁷ Ниму дан минбыйли жыгә сычин, дан жымужя ганли, ниму дуэму гошчин! ¹⁸ Вәди хуа бусы фә ниму йичеди. Вә ба Вә гэжя жанчүлэди жынму ду жындыйни. Кәсы жә Китабушон щехади хуа яндин чынни:

«Нэгә лян Вә йидарни чыфанди жын на жүә ба Вә тили».

¹⁹ Жыгә сычин хан мә йүди зычан Вә ги ниму фәдини, жыгә сычин йүди сыхур жә ниму шинфуни: Вәсы Сый. ²⁰ Вә ги ниму фә шыхуа: сый жешу Вә дафалэди жын, та жешу Вәдини. Сый жешу Вәли, та жешу ба Вә дафалэди Дададини.

***Эrsa зозор фәли:
Жүхүти вонху ба Та мачүчини***

(Мф 26:20-25; Мк 14:17-21; Лк 22:21-23)

²¹ Эrsa ба жыгә хуа фәван, щинни тә пәфанли, зу миндамин фәди:

– Вә ги ниму фә шыхуа: ниму литуди йигә жын ба Вә мачүчини.

²² Манламу йигә ба йигә вонлийхар, бу жыдо Эrsa фә сыйдини. ²³ Таму литу ю йигә манлани, Эrsa ба та щинэдихын. Нэхур та кодо Эрсашон. ²⁴ Щимә-Пётр ги нэгә манла дянту-фәшуди фәли:

– Ни ба Та вынийхар, Та фәди нэгә жынсы сый.

²⁵ Нэгэ манла ба ту кодо Эрсади конзышон, зу вынли Тали:

– Жонгуйди! Нэгэ жынсы сый?

²⁶ Эrsa хуэйдади фэсы:

– Вэ ба йикуэр мэмэ зэ дезыни занййхар, ги сый гиги, та зусы нэгэ жын.

Эrsa ба жыгэ хуа фэван, ба йикуэр мэмэ занлиййхар, зу ги Шимэди эрзы Жүхүти Искарриот гигили. ²⁷ Жүхүти ба мэмэ чышонли, нэхур иблис зу жинли тади шиннили. Эrsa ги та фэди:

– Ни щён ган са сычинни, куэ зу ганчи!

²⁸ Эrsa ги Жүхүти фэхади хуа ю са йисыни, нэтар зуэди жынму ду мэ минбый. ²⁹ Юди манламу сылэнди, йинцысы Жүхүтисы гуанчянди жын, Эrsa жё та ба жечишон сыйүнди дунщи мэшонни хуэйжэсы жё та ба йижер чян ги чүнжынму фынгини. ³⁰ Жүхүти ба нэ йикуэр мэмэ чышон, донвөр зу чүчили. Нэхур тян кэжя хили.

Эрсади щин фынфу

³¹ Жүхүти чүчилиди йиху, Эrsa фэди:

– Жыхур Аданди Хубыйди гуонлён кэжя жолёнли, Анлахүди гуонлён чечү Та е жолёнли. ³² Йинцысы Анлахүди гуонлён чечү Аданди Хубый жолёнли, Анлахү гэжя жё Аданди Хубыйди гуонлён е жолённи, донвөр зу жё Тади гуонлён жолённи. ³³ Вэди ваму! Вэ лян ниму зэ йидарни шынди гунфу шоли. Ниму вонху зо Вэни, кэсы зущён Вэ ги яхүтиди линшужынму зочян фэхади йиён, хазыр Вэ ги ниму е фэдини: «Вэ чиди дифоншон, ниму бу нын чи». ³⁴ Вэ ги ниму ги йигэ щин фынфу: ниму йигэ ё щинэ йигэни. Вэ замужя щинэ нимудини, ниму е ё жымужя йигэ щинэ йигэни. ³⁵ Ниму дан йигэ ба йигэ щинэли, йиче жынму ду жыдони, нимусы Вэди манламу.

Эrsa ба Пётр фанлянди зозор фэли

(Мф 26:31-35; Мк 14:27-31; Лк 22:31-34)

³⁶ Щимэ-Пётр вынли Эрсали:

– Жонгуйди! Ни вон натар чидини?

Эрса ги та хуэйдади фэсы:

– Вэ чиди дифоншон, хазыр ни бу нын гыншон Вэ чи, вонху ни гыншон Вэ чини.

³⁷ Пётр ги Та кэ фэди:

– Жонгуйди! Виса вэ хазыр бу нын гыншон Ни чи? Ви Ни вэ ду щён ба вэди мин жүгини!

³⁸ Эрса хуэйдади фэсы:

– Ни щён ви Вэ ба ниди мин жүгинима? Вэ ги ни фэ шыхуа: ган гунжи жёмин, ни сан бян фэ жынбудый Вэни.

«Вэсы лў, жынли зэмусы сынхуэ»

14 Эрса ги манламу кэ фэди:

– Ниму щинни бэ данщинли. Ниму ё щинфу Анлахўни, е ё щинфу Вэни. ² Вэ Дадади жяни ю хошо жүди фонзыни. Дан бусы жымужяли, Вэ замужя нын фэ: Вэ чи ги ниму ба вифын шэлүхани? ³ Вэ дан чи ги ниму ба вифын шэлүха, йиху Вэ хуэйлэ, зу ба ниму надо Вэ гынчянни, жё ниму лян Вэ шындо йидарнини. ⁴ Вэ вон нани чидини, ниму жыдо вон нэтар зуди лўни.

⁵ Фома ги Эрса фэди:

– Жонгуйди! Вэму бу жыдо Ни вон нани чидини. Вэму замужя нын жыдо вон нэтар зуди лўни?

⁶ Эрса ги та фэди:

– Вэ зусы лў, жынли зэмусы сынхуэ. Жынму да Вэшон цэ нын до Вэ Дада гынчянни. ⁷ Ниму дан жындый Вэли, зу жындый Вэ Дадани. Жыхур ниму ба Та жындыли, ба Та кэжя канжянли.

⁸ Филипп ги Эрса фэди:

– Жонгуйди! Ни жё вэму ба Ни Дада жянийхар, вэму зу разыни.

⁹ Эрса ги та фэди:

– Филипп! Вэ лян ниму зэ йидарни жыму да гунфули, ни хан жынбудый Вэма? Сый канжян Вэли, та зу канжян Вэ Дадали. Виса ни хан фэди: «Ни жё вэму ба Ни Дада жянийхар»? ¹⁰ Нандый ни бу щинфума: Вэ лян Дада тунйидини, Дада е лян Вэ тунйидини? Вэ ги ниму фэди хуа бусы Вэ гэжяди хуа, кэсы лян Вэ тунйиди Дада гэжя ба Тади

сычин гандини. ¹¹Ниму ё шинфу Вәни: Вә лян Дада тун-йидини, Дада е лян Вә тунйидини. Ниму дан бу шинфу жыгә хуали, йинви Вә ганди сычин ниму ё шинфу Вәни. ¹²Вә ги ниму фә шыхуа, шинфу Вәди жын ба Вә ганди сычин е ганни, хан ба йүэщин дади сычин ганни, йинцысы Вә вон Дада гынчян чидини. ¹³Ниму дан ви Вәди минзы чито са, Вә зу ги ниму ган сани, жё Дадади гуонлён зэ Эр-зышон шянчүлэни. ¹⁴Ниму дан ви Вәди минзы чито са, Вә зу ги ниму ган сани.

*Эрса шүхали ба Анлахүди Рух
ги манламу гигини*

¹⁵Ниму дан шинэ Вә, зу ё зунхү Вәди фынфуни. ¹⁶Вә чито Вә Дадани, Та зу ги ниму ги данлинди йигә Бон-банни, жё Та йинавар лян ниму зэ йидарнини. ¹⁷Тасы жынлиди Рух. Жыгә дун-яшонди жынму ба Та бу нын жешу, йинцысы таму ба Та канбужян, е жынбудый. Ниму жындый Тани, йинцысы Та лян ниму зэ йидарнини, е зэ ниму литуни. ¹⁸Вә ба ниму лян етиму йиён бу эрха; йиху Вә йүанхуэй до ниму гынчян лэни. ¹⁹Гуә йихур, жыгә дун-яшонди жынму ба Вә канбужян; кәсы ниму канжян Вәни, йинцысы Вә хуэдини, ниму е хуэни. ²⁰Нэйитян ниму зу жыдони: Вә лян Вә Дада тунйидини, ниму лян Вә тунйидини, Вә лян ниму е тунйидини. ²¹Сый ба Вәди фынфу жешухали зэмусы зунхүли, та шинэ Вәдини. Сый шинэ Вәдини, Вә Дада ба та е шинэни; Вә е ба та шинэни зэмусы жё та ба Вә канжянни.

²²Яхүти (бусы Жүхүти Искарот) вынли Эрсали:

– Жонгуйди! Виса Ни гуон шён жё вәму ба Ни канжянни, бу шён жё дун-яшонди жынму ба Ни канжян?

²³Эрса ги та хуэйдади фәсы:

– Сый шинэ Вәдини, та ба Вәди хуа зунхүни. Вә Дада е шинэ тани, Вә Дада лян Вә йидарни до та гынчян лэ, зу лян та шындо йидарнини. ²⁴Сый бу шинэ Вәли, та ба Вәди хуа бу зунхү. Ниму тинжянди хуа бусы Вә гэжяди хуа, жысы ба Вә дафалэди Дадади хуа. ²⁵Вә лян ниму зэ йидарниди сыхур, ба жыщезы хуа ги ниму фәгуә. ²⁶Вә фәхади

нэгэ Бонбансы Дада ви Вэди минзы дафалэди гуйжунди Рух. Та ба йиче сычин ги ниму жётёни, жё ниму ба Вэ ги ниму фэгуэди йиче хуа жичелэни.

²⁷ Вэ ба пиннан ги ниму люхани, Вэ ба Вэди пиннан ги ниму гидини. Вэ ги ниму гиди пиннан лян жыгэ дун-яшонди жынму гиди бу йиён. Ниму щинни бэ дан-щинли, е бэ хэпали. ²⁸ Ниму тинжян Вэ ги ниму фэгуэди хуа: «Вэ чидини, йиху Вэ йүанхуэй до ниму гынчян лэни». Ниму дан щинэ Вэли, зу гощинни, йинцысы Вэ вон Дада гынчян чидини, йинцысы Дада би Вэ вида. ²⁹ Жыщезы сычин хан мэ йүхади сыхур, Вэ хазыр ги ниму фэдини, жыщезы сычин йүди сыхур жё ниму щинфуни. ³⁰ Хазыр Вэ бу нын лян ниму дуэ фэ хуа, йинцысы жыгэ дун-яди вонзы лэдини. Та до Вэшон мэю чүанли. ³¹ Кэсы жё жыгэ дун-яшонди жынму ду жыдоха: Вэ щинэ Вэ Дадани; Та ги Вэ ги замужяди фынфу, Вэ зу нэмужя гандини. Ниму челэ, заму да жытар зу!

Жыншыди путотёзы

15 Вэсы жыншыди путотёзы. Вэ Дадасы кан путо йүанзыди Йигэ. ² Зэ Вэ литу нагэ жыжызы бу же готян, Дада зу ба жыгэ жыжызы кандёдини. Нагэ жыжызы же готян, Дада зу ба жыгэ жыжызы зў ганжин, жё та дуэ же готянни. ³ Вэ ги ниму фэхади хуа ба ниму кэжя зў ганжинли. ⁴ Жё ниму йинавар шындо Вэшонни, Вэ е йинавар шындо нимушонни. Зущён жыжызы дан бу шындо путотёзышон, та зу бу нын же готянди йиён, ниму дан бу шындо Вэшон, зу бу нын же готян. ⁵ Вэсы путотёзы, нимусы жыжызы. Сый шындо Вэшон, Вэ е шындо ташонни, та зу ги хошо готянни; йинцысы мэю Вэ, ниму са ду бу нын ган. ⁶ Сый бу шындо Вэшон, ба та зущён жыжызы йиён эрдо вэту, та зу гандёни; йиху ба жымужяди жыжызы шушон, эрдо хуэ литу шодёни. ⁷ Ниму дан шындо Вэшон, Вэди хуа е шындо ниму литуни, ниму булүн щён чито са, зу дыйшонни. ⁸ Вэ Дадади гуонлён вонху жолённи, йинцысы ниму же хошо готянни зэмусы чынха Вэди манламуни. ⁹ Зущён Дада щинэ Вэди йиён, Вэ е щинэ нимудини. Жё ниму шындо

Вэди нэчин литуни. ¹⁰ Зущён Вэ ба Вэ Дадади фынфу зунхўли зэмусы шындо Тади нэчин литуди йиён, ниму дан зунхў Вэди фынфули, е шындо Вэди нэчин литуни. ¹¹ Вэ ги ниму фэ жыщезы хуади йинцысы, жё ниму лян Вэ йиён гошинни, хан жё ниму ю йиманди гошинни. ¹² Жысы Вэди фынфу: жё ниму йигэ ба йигэ щинэни, зущён Вэ щинэ нимуди йиён. ¹³ Жын дан ви тади ляншу ба гэжяди мин жүги — зэ жынму литу мёю би жыгэ йүөщин дади нэчин. ¹⁴ Ниму дан зунхў Вэди фынфу, ниму зусы Вэди ляншуму. ¹⁵ Жыхур Вэ ба ниму бу жё хуэжиму, йинцысы хуэжи бу жыдо тади жүжын ган садини. Вэ ба ниму жёди ляншуму, йинцысы ги ниму Вэ ба Дада ги Вэ фэхади йиче сычин ду фэгили. ¹⁶ Бусы ниму ба Вэ жанчўлэли, Вэ гэжя ба ниму жанчўлэли, ба ниму дафачи, жё ниму ги чонйүанди готянни. Ниму ви Вэди минзы зэ Дада гынчян булүн чито са, Та зу ги ниму ги сани. ¹⁷ Жысы Вэ ги ниму гиди фынфу: жё ниму йигэ ба йигэ щинэни.

«Жыгэ дун-яшонди жынму хын нимудини»

¹⁸ Жыгэ дун-яшонди жынму дан хын ниму, ниму жыдоха, таму щянтунни кэжя хынли Вэли. ¹⁹ Ниму дансы жыгэ дун-яшонди жынмули, дун-яшонди жынму ба ниму, зущён гэжя йиён, щинэни. Кэсы Вэ да жыгэ дун-яшон ба ниму жанчўлэли, ниму бусы жыгэ дун-яшонди жынму; йинви жыгэ дун-яшонди жынму хын нимудини. ²⁰ Ниму ба Вэ ги ниму фэхади хуа жиха: хуэжи бу нын би тади жүжын го. Таму дан ба Вэ жуйли, йиху ба ниму е жуйни. Таму дан ба Вэди хуа зунхўли, йиху ба нимуди хуа е зунхўни. ²¹ Таму ви Вэди минзы ги ниму ган жыщезы йиче сычинни, йинцысы таму ба Вэ дафалэди Дада жынбудый. ²² Вэ дан мэлэ, ги таму мэлэ фэ хуа, таму зу мёю гўнахар, кэсы жыхур тамуди гўнахар шындо тамушонни. ²³ Сый хын Вэдини, та е хын Вэ Дададини. ²⁴ Вэ зэ таму литу ганли сый ду мэлэ ганхади сычинли; дан бусы жымужяли, таму зу мёю гўнахар. Жыхур таму ба Вэ ганхади сычин кэжя канжанли, кэсы ба Вэ хындини, ба Вэ Дада е хындини. ²⁵ Жё тамуди фалүшон щехади хуа чынхани: «Таму быйкэр хынли Вэли!»

²⁶Нимуди Бонбан куэ зу лэни. Тасы жынлиди Рух, Тасы да Вэ Дадашон чүлэди. Вэ ба Та да Вэ Дадашон дафалэди сыхур, Та ги Вэ дон гүвани. ²⁷Ниму е ги Вэ дон гүвамуни, йинцысы ниму датуршон лян Вэ зэ йидарнилэ.

16 Вэ ба жыщезы сычин ги ниму фэли, бэ жё ниму ба щинфу дюдэли. ²Вонху жынму ба ниму да синагога литу ганчүчини. Жызы куэ зу долэни, нэхур мый йигэ ба ниму дасыди жын сылэнни, та жымужя ганди бэвон Анлахүдини. ³Жынму жымужя ганни, йинцысы таму жынбудый Вэ Дада, е жынбудый Вэ. ⁴Вэ ба жыщезы хуа ги ниму фэли, нэщезы жызы долэди сыхур, жё ниму ба Вэ ги ниму фэхади хуа ду жичелэни.

Анлахүди Рух ганди сычин

Вэ датур ба жыщезы хуа ги ниму мэ фэгүэ, йинцысы Вэ лян ниму зэ йидарнилэ. ⁵Жыхур Вэ хуэй ба Вэ дафалэди Дада гынчяндени. Ниму литу сый ду бу вын Вэ: «Ни вон нани чидини?» ⁶Йинцысы Вэ ба жыщезы хуа ги ниму фэли, нимуди щин пэфанхали. ⁷Вэ ги ниму фэ шы-хуа: Вэ дан чили, жыгэ ги ниму ю хони; йинцысы Вэ дан бу чи, Нэгэ Бонбан зу вон ниму гынчян бу лэ. Вэ дан чили, Вэ зу ба Нэгэ Бонбан дафадо ниму гынчяни. ⁸Та лэ, жё жыгэ дун-яшонди жынмуди нянжин жочү гүнахар, гундо зэмусы Анлахү динди зуй зынкэни. ⁹Гүнахар — жы зусы таму бу щинфу Вэ. ¹⁰Гундо — жы зусы Вэ вон Вэ Дада гынчян хуэйчидини, ниму зу ба Вэ зэ канбужян. ¹¹Анлахү динди зуй — жы зусы ги жыгэ дун-яди вонзы кэжя динди зуй.

¹²Вэ хан ба хошо хуа щён ги ниму фэни, кэсы хазыр ниму бу нын минбый. ¹³Нэгэ жынлиди Рух лэди сыхур, Та ба йичеди жынли ги ниму ду жётэни. Та бусы фэ гэжяди хуа, Та тинжян са, зу ги ниму фэ сани, хан ба вонху йүди сычин ги ниму е фэни. ¹⁴Та жё Вэди гуонлён жолённи, йинцысы Та ба Вэди хуа тинжян ги ниму ду фэни. ¹⁵Вэди Дада ю сани, Вэ е ю сани, йинви жыгэ Вэ фэли, Анлахүди Рух ба Вэди хуа тинжян, ги ниму ду фэни.

«Нимуди пәфан вонху бянчын гощинни»

¹⁶ Гуә йихур, ниму зу ба Вә канбужяни; зә гуә йихур, ниму кә ба Вә канжяни.

¹⁷ Манламу литу ющезы жынму йигә ги йигә фәди:

– Та ги заму фәди: «Гуә йихур, ниму зу ба Вә канбужяни; зә гуә йихур, ниму кә ба Вә канжяни»; зәмусы «Йинцысы Вә вон Вә Дада гынчян чидини». Жыщезы хуа ю са йисыни?

¹⁸ Хан ющезы жынму фәди:

– Та фәди: «Гуә йихур», жыгә хуа ю са йисыни? Вәму бу минбый Та фә сadini!

¹⁹ Эрса жыдоха манламу щән вын Тани, зу ги таму фәди:

– Вә фәди: «Гуә йихур, ниму зу ба Вә канбужяни; зә гуә йихур, ниму кә ба Вә канжяни». Ниму ба жыщезы хуа йигә лян йигә толүндинима? ²⁰ Вә ги ниму фә шыхуа, ниму да кў-луанхуни, кәсы жыгә дун-яшонди жынму ду гощинни; ниму пәфанни, кәсы нимуди пәфан вонху бянчын гощинни. ²¹ Нүжын сын-ён вавади сыхур пәфандини, йинцысы шу тынди сыхур доли; кәсы ба вава сын-ёнхади йиху, та ба жыгә кўнан вондәни, йинцысы та гощинни: дун-яшон кә ба йигә жын сын-ёнхали. ²² Ниму есы жымужяди: хазыр ниму пәфандини, кәсы Вә ба ниму йүанхуэй канжянди йиху, нимуди щин зу гощинни; ба нимуди жыгә гощин сысый ду дуәбудә. ²³ Нәйитян ниму да Вә гынчян бу чито са. Вә ги ниму фә шыхуа, ниму ви Вәди минзы да Вәди Дада гынчян булүн чито са, Та ба са ги ниму ду гигини. ²⁴ Йичыр до жиргә ниму ви Вәди минзы мә читогуә са; кәсы вонху ниму дан читоли, зу дыйшонни, жә нимуди гощин манни.

«Вә ба жыгә дун-якәжя дабәли»

²⁵ Вә на бифон ба жыщезы сычин ги ниму фәли. Кәсы жызы куә зу доләни, нэхур Вә бусы на бифон ги ниму фәни, кәсы миндамин фә Вә Дадани. ²⁶ Нәйитян ниму ви Вәди минзы чито Дадани. Вә бу фә: Вә ти ниму чито Дадани, ²⁷ йинцысы Дада гэжя щинә нимудини. Та щинә нимудини, йинцысы ниму щинә Вәдини, е щинфули Анлаху ба

Вә дафалэли. ²⁸ Вә да Вә Дада гынчян до жыгә дун-яшон лэли; жыхур Вә да жыгә дун-яшон зудини, вон Вә Дада гынчян хуэйчидини.

²⁹ Манламу ги Эрса фәди:

– Ни кан, Ни бусы на бифон фәдини, хазыр Ни миндамин фәдини. ³⁰ Жыхур вәму минбыйли, Ни са ду жыдони, е бу ё сый ги Ни ги вынти. Йинви жыгә вәму шинфу Анлахү ба Ни дафалэли.

³¹ Эрса вынли тамули:

– Жыхур ниму шинфунима? ³² Сыхур куэ зу долэни зәмусы кәжя доли, жыхур ниму ду сандәни, мый йигә жын хуэй гэжяди жянини, ба Вә йигәр шынхани. Кәсы Вә бусы йигәр, йинцысы Вәди Дада лян Вә зә йидарнини. ³³ Вә ба жыщезы хуа ги ниму фәли, жё ниму лян Вә йидарни ю пиннанни. Зә жыгә дун-яшон ниму шу кунанни, кәсы ниму ба данзы фонда: Вә ба жыгә дун-я кәжя дабәли!

Эрса ви манламу читоли Анлахүли

17 Эрса ба жыщезы хуа фөван, ба ту тәчелә вончү тяншон канлийихар, зу фәди:

– Вәди тяншонди Ада-я! Сыхур доли, чито Ни жё Ни Эрзыди гуонлән жолән, Эрзы е жё Ниди гуонлән жоләнни. ² Ни ба гуан йиче жынмуди чүанли ги Вә гигили, зу жымужя Ни ба сый ги Вә жёгили, Вә ги та ба йинаварди сынхуә гигини. ³ Жы зусы йинаварди сынхуә: жё жынму жындый Нисы луәмур йигә жыншыди Анлахү, хан жё таму жындый Вә зусы Ни дафаләди Эрса Мәсих. ⁴ Вә зә дшон жё Ни гуонлән кәжя жоләнли, йинцысы Вә ба Ни жё Вә ганди сичин кәжя ганванли. ⁵ Ада-я! Ни зуэзоха дун-яди зочян, Вә зә Ни гынчян кәжя ю гуонләнлэ. Жыхур Вә читоди жё Ни ги Вә кә ба жыгә гуонлән гиги!

⁶ Ни зә дун-яшон ба сый жянчүлэ ги Вә жёгили, Вә ба Ниди минзы ги таму кәжя шянчүлэли. Зочян тамусы Ниди жынмулэ, Ни ба таму ги Вә жёгили, таму зу ба Ниди хуа зунхүли. ⁷ Жыхур таму ду жыдоли, Ни ги Вә гихади йиче дусы да Ни гынчян ләди. ⁸ Вә ба Ни ги Вә фәхади хуа ги таму ду фәли. Таму ба жыщезы хуа жешуха, зу жыншыди

жыдоли Вэсы да Ни гынчян лэди, е шинфули Ни ба Вэ дафалэли.

⁹ Вэ ви таму читодини; Вэ бусы ви жыгэ дун-яди жынму читодини, кэсы ви Ни ги Вэ жёгиди жынму читодини, йинцысы тамусы Ниди жынму. ¹⁰ Вэ юди йиче дусы Ниди; Ни юди йиче дусы Вэди. Зэ таму литу Вэди гуонлён жолёнли. ¹¹ Жыхур Вэ вон Ни гынчян хуэйчидини, Вэ кэжя мэ зэ жыгэ дун-яшон, кэсы таму зэ жыгэ дун-яшонни.

Вэди гуйжун Ада-я! Вэ читоди жё Ни ви Ниди минзы (жы зусы Ни ги Вэ фэхади минзы) ба таму бохүчүни, жё таму тунйини, зущён Ни лян Вэ тунйиди йиён. ¹² Лян таму зэ йидарниди сыхур, Вэ ви Ниди минзы (жы зусы Ни ги Вэ фэхади минзы) ба таму бохүчүли. Вэ ба таму бохүчүли, йинви жыгэ таму литу чүгуэ ё шэдэди нэгэ жын, сый ду мэ шэдэ, жё Китабушон шехади хуа чынхани. ¹³ Жыхур Вэ вон Ни гынчян хуэйчидини. Вэ хан зэ дун-яшонни фэ жышезы хуадини, жё таму лян Вэ йидарни ю йиманди гошинни. ¹⁴ Вэ ба Ниди хуа ги таму фэли, кэсы жыгэ дун-яди жынму хынли тамули, йинцысы таму бусы жыгэ дун-яди жынму, зущён Вэ е бусы жыгэ дун-яди Жын йиён. ¹⁵ Вэ бу читоди жё Ни ба таму да жыгэ дун-яшон надэчи, Вэ читоди жё Ни ба таму да иблисди шуни хўшанха. ¹⁶ Таму бусы жыгэ дун-яди жынму, зущён Вэ е бусы жыгэ дун-яди Жын йиён. ¹⁷ Ниди хуасы жыншыди. Панвон Ни жё таму жыншыди чынха Ни жанчүлэди жынмучи! ¹⁸ Зущён Ни ба Вэ дафадо дун-яшонди йиён, Вэ е ба таму дафадо дун-яшонли. ¹⁹ Вэ ба Вэ гэжя ги Ни жёгидини, жё таму ба гэжя е ги Ни жыншыди жёгини.

²⁰ Вэ гуон бусы ви таму читодини, хан ви нэшезы вонху ба тамуди хуа тинжян зу шинфу Вэди жынму читодини. ²¹ Панвонди жё таму ду тунйини. Ада-я! Панвонди жё таму лян Заму лёнгэр тунйини. Зущён Ни лян Вэ тунйиди йиён, Вэ е лян Ни тунйиди йиён, жё таму ду лян Заму лёнгэр тунйини, зу жымужя, жё дун-яшонди жынму ду шинфу Ни ба Вэ дафалэли. ²² Вэ ба Ни ги Вэ гихади

гуонлён ги таму е гигили, жё таму тунйини, зущён Заму тунйиди йиён. ²³Вэ лян таму тунйидини, Ни лян Вэ тунйидини, жё таму йиман ду тунйини, зу жымузя жё дун-яшонди жынму ду жыдоха Ни ба Вэ дафалэли, хан жыдоха Ни щинэ тамудини, зущён Ни щинэ Вэди йиён.

²⁴Ада-я! Ни ба таму ги Вэ кэжя жёгили. Вэ зэ натарни, Вэ щён жё таму лян Вэ йидарни е зэ нэтарни, жё таму ба Ни ги Вэ гихади гуонлён канжян, йинцысы зуэзоха дун-яди зочян Ни ба Вэ кэжя щинэли. ²⁵Гундоди Ада-я! Жыгэ дун-яди жынму жынбудый Ни, кэсы Вэ жындый Нини. Жыщезы щинфу Вэди жынму е жыдоли Ни ба Вэ дафалэли. ²⁶Вэ ба Ниди минзы ги таму кэжя щянчүлэли, вонху хан щянчүлэни, жё таму йигэ ба йигэ щинэни, зущён Ни ба Вэ щинэди йиён, зу жымузя Вэ лян таму тунйини.

Ба Эrsa жуачүли

(Мф 26:47-56; Мк 14:43-50; Лк 22:47-53)

18 Эrsa ба жыщезы хуа фэван, зу лян манламу йидарни чүчи, гуэли Кедрон фичүли. Нэтар ю йигэ готян йүанзылэ, Эrsa лян манламу йидарни жинли жыгэ йүанзынили. ²Щён ба Эrsa мэчүчиди Жүхүти е жыдо нэгэ дифонни, йинцысы Эrsa лян Тади манламу зэ нэтар чинчир шудо йидарнидини. ³Зу жыгэ сыхур Жүхүти ба йи дуйву Римди донбинжын лян хуэжиму йидарни линдо жыгэ йүанзынили (ба жыщезы хуэжиму яхүтиди да ахунму лян фарисейжынму дафалэли). Таму шуни ду нади хуэба, дынзан лян жүнчи. ⁴Эrsa ба лян Та йү жыщезы сычин жыдоди йимяр, зу вон чян чи, вынли тамули:

– Ниму зо сыйдини?

⁵Таму хуэйдади фэсы:

– Зо Назарет чынпуниди Эrsaдини.

Эrsa ги таму кэ фэди:

– Жысы Вэ.

Ба Эrsa мэчүчиди Жүхүти е лян жыщезы жынму йидарни зандилэ. ⁶Эrsa ба «Жысы Вэ» жыгэ хуа фэба, таму ду вон хуу тунли жи бу, зу падо дишонли. ⁷Эrsa ба таму кэ вынди:

– Ниму зо сыйдини?

Таму хуэйдади фэсы:

– Назарет чынпуниди Эrsa.

⁸ Эrsa кә фәди:

– Вә кәжя ги ниму фәли, жысы Вә. Ниму дан зо Вә, зу ба жыщезы жынму фонкә!

⁹ Эrsa жымужя фәди, жё Та зочян фәхади хуа чынхани: «Вә Ада, Ни ба сый ги Вә жёгили, таму литу сый ду мә шәдә». ¹⁰ Шимә-Пётр ю йигә дони; та ба жыгә до точүлэ, ба яхүти да ахунди хуәжи канлийихар, зу ба тади ю эрдуэ кандәли. Жыгә хуәжиди минзы жёди Малх. ¹¹ Эrsa ги Пётр фәди:

– Ни ба до щядо дощёзы литу! Нандый ни сыләнди, Вә бу хә Вә Дада ги Вә гихади жы йиван күфима?

¹² Нәщезы донбинжынму, тамуди жүнгуан зэмусы яхүти да ахунмуди хуәжиму ба Эrsa жуачү, бонха, ¹³ шянтуни ба Та линдо Ханна мянчянли. Ханнасы Каиафади вәфу. Нэйиняншон Каиафа дон яхүтиди да ахундини. ¹⁴ Зочян Каиафа лян яхүтиди линшужынму йидарни шонләнхо, жё йигә жын ти йиче минжынму вучонни – жыгә ю хони.

Пётр фанлян мә жын Эrsa

(Мф 26:69-70; Мк 14:66-68;

Лк 22:55-57)

¹⁵ Зу нэйихур Шимә-Пётр лян данлинди йигә манла гыншон Эrsa зудини. Ба нэгә манла яхүтиди да ахун жындыйни, йинви жыгә та гыншон Эrsa жинли яхүтиди да ахунди йүанзынили. ¹⁶ Пётр зә гэмын вәту зандини. Лян яхүтиди да ахун жындыйди нэгә манла чүлэ, ги канмынди нү хуәжи фәли йигә хуа, йиху ба Пётр линдо йүанзы литули. ¹⁷ Канмынди нү хуәжи ги Пётр фәди:

– Ни есы Эrsaди манлама?

Пётр фәди:

– Вә бусы Тади манла!

¹⁸ Нэгә сыхур тянчи лынли, нэтар занди нүму лян хуәжиму дянди хуәдуй, коли хуәли. Пётр е лян хуәжиму йидарни занди коли хуәли.

Эрса зэ Ханна мянчяни

(Мф 26:59-66; Мк 14:55-64; Лк 22:66-71)

¹⁹ Ханна (та зочян донгуэ да ахун) вынли Эрсали: Тади манламусы сый зэмусы Тади жёщүэсы са. ²⁰ Эрса ги та хуэйдади фэсы:

– Вэ йинавар миндамин ги дажя фэгуэ хуа. Вэ чинчир зэ синагога дэ Иерусалимди сыни жётёли жынмули, нэтар йиче яхүти жынму ду шудо йидарнидини. Вэ туту-мәмэди йүнзун мә фэгуэ са. ²¹ Ни виса вын Вэдини? Ни чи, вын нэщезы ба Вэди хуа тингуэди жынмучи! Таму жыдони, Вэ фэгуэ са хуа.

²² Эрса ба жыщезы хуа фэванди йиху, гынчян занди йигэ хуэжи ба Эрсади ляншон шанли йи бажон, зу фэди:

– Ни хан ган ги да ахун ги жымужяди хуэйдама?

²³ Эрса ги нэгэ жын фэди:

– Вэ дан цуэли, ни ба Вэди цуэ ги дажя фэги. Вэ дан мөю цуэ, ни виса да Вэдини?

²⁴ Ханна ба Эрса йүанхуэй бончү, дафадо яхүтиди да ахун Каиафа гынчяни.

Пётр ди эрбян фанлян мә жын Эрса

(Мф 26:71-75; Мк 14:69-72; Лк 22:58-62)

²⁵ Жыгэ сыхур Шимэ-Пётр хан занди ко хуэдини. Жынму вынли тали:

– Ни есы Эрсади манлама?

Кэсы Пётр ба жыгэ мә жын, зу фэди:

– Вэ бусы Тади манла!

²⁶ Нэтар ю яхүти да ахунди йигэ хуэжилэ, жысы Пётр ба эрдуэ кандёлиди нэгэ жынди чинчин. Та фэди:

– Вэ ба ни лян Эрса йидарни зэ готян йүанзыни жангуэ!

²⁷ Пётр ба жыгэ е мә жын. Зу жыгэ сыхур гунжи жёли минли.

Эрса зэ Пилат мянчяни

(Мф 27:1-2, 11-14; Мк 15:1-5; Лк 23:1-5)

²⁸ Жынму да Каиафа гынчян ба Эрса линдо Рим жынфуди йүанзынили. Нэхур тян кэжя лёнли. Яхүтиди линшужынму мә жин жынфуди фонзы, йинцысы до тамушон

жысы харам, таму гуэ Пасха жечиди сыхур дан ганли харамли, зу бу нын чы Пасха жечиди хушонди фан.

²⁹ Пилат чўлэ, вынли тамули:

– Ниму виса ги жыгэ Жын дин зуйдини? Та ю са цуэни?

³⁰ Таму ги Пилат хуэйдади фэсы:

– Та дан мэ ган ха сычин, нандый вэму нын ба Та вон ни гынчян линшонлэма?

³¹ Пилат ги таму фэди:

– Ниму гэжя ба Та линшончи, жочў нимуди фалу ги Та дин зуйчи!

Таму ги Пилат кэ фэди:

– Вэму мэю ги сысый дин сызуйди чүанли.

³² Жыхур Эрса зочян фэхади хуа чынли, жы зусы Та замужя вучонниди нэгэ хуа.

³³ Пилат йүанхуэй жинли жынфуди фонзы, ба Эрса жёлэ, вынли Тали:

– Нисы яхўти жынмуди Хуоншонма?

³⁴ Эрса хуэйдади:

– Жыгэсы ни гэжяди вынтима, хансы ни тинжян данлинди жынму ги ни фэли Вэли?

³⁵ Пилат фэди:

– Ни сылэнди вэсы яхўти жынма? Ниди минжын лян да ахунму ба Ни ги вэ жёгили. Ни ганли са сычинли?

³⁶ Эрса хуэйдади:

– Вэди Гуйжя бусы жыгэ дун-яшонди. Вэди Гуйжя дансы жыгэ дун-яшонди, Вэди хуэжиму яндин ви Вэ жынжанни, бу жё ба Вэ ги яхўти линшужынмуди шуни жёги. Кэсы Вэди Гуйжя бусы жыгэ дун-яшонди!

³⁷ Пилат ба Эрса кэ вынли:

– Жымужя фэчи, Нисы Хуоншонма?

Эрса хуэйдади фэсы:

– «Вэсы Хуоншон» – жысы ни фэхади хуа. Вэ ё ба жынли ги дажя фэни, ви жыгэ ба Вэ сын-ёнхали, ви жыгэ Вэ до жыгэ дун-яшон лэли. Сый дансы жынлиди жын, та тин Вэди хуани.

³⁸ Пилат вынли Эрсали:

– Жынлисы са?

Ги Эрса динли сызуйли

(Мф 27:15-31; Мк 15:6-20;

Лк 23:13-25)

Пилат ба жыгә хуа фөван, йүанхуэй чүлэ, ги яхүти жынму фәди:

– Вә канбучүлэ жыгә Жын ю са цуэни. ³⁹Ниму ю йигә куйчынни, гүә Пасха жечиди сыхур, жё вә ги ниму ба йигә зуйжын фонкэни. Хазыр ниму щён жё вә ги ниму ба яхүти жынмуди Хуоншон фонкэнима?

⁴⁰Таму йүанхуэй дашын ханли:

– Ни ба Та бә фонкэли! Ни ба Варавва фонкэ!

(Вараввасы йигә зыйку.)

19 Нэхур Пилат гилигә фынфу, жё донбинжынму ба Эрса лингуэчи, на бянзы дали. ²Таму на цыязыди тэзы бянли йигә чүанчүанзы, ги Эрса дэдо тушонли, хан ба йигә хун янсыйди позы ги Та чуаншонли. ³Йиху таму зандо Эрса мянчян, ги Та фәди:

– Яхүти жынмуди Хуоншон, Ни хома!

Таму хан ба Эрсади ляншон шанли жи бажон. ⁴Пилат йүанхуэй чүлэ, ги жынму фәди:

– Ниму кан! Вә ба жыгә Жын ги ниму линчүлэли, жё ниму жыдоха, вә канбучүлэ Та ю са цуэни.

⁵Эрса чүлэ, тушон дэди цыязы чүанчүанзы, чуанди хун янсыйди позы. Пилат ги таму фәди:

– Ниму ба жыгә Жын канйихар!

⁶Нэщезы яхүтиди да ахунму лян тамуди хуәжиму канжян Эрса, зу дашын хантуэли:

– Ни ба Та диндо муту шызышон! Ни ба Та диндо муту шызышон!

Пилат ги таму фәди:

– Ниму гэжя ба Та нашончи, диндо муту шызышон! Вә канбучүлэ Та ю са цуэни.

⁷Яхүти жынму ги Пилат кә фәди:

– Вәму ю фалүни, жочү жыгә фалү Та ё вучонни, йинцысы Та ба гэжя жёчын Анлахүди Эрзыли.

⁸Пилат ба жыгэ хуа тинжян, йүэщин хэли пали. ⁹Та йуанхуэй жинли жынфуди фонзы, зу вынли Эрсали:

– Ни додисы да нани лэди?

Эрса ги та мэ ги хуэйда. ¹⁰Пилат ги Эрса кэ фэди:

– Ни ган ги вэ бу ги хуэйдама? Нандый Ни бу жыдома, вэ ю чүанли ба Ни фонкэни, е ю чүанли ба Ни диндо муту шызышонни?

¹¹Эрса ги Пилат фэди:

– Йинцысы Анлахү ги ни гили жыгэ чүанли, ни цэ нын ги Вэ ган жыгэни. Йинви жыгэ, сый ба Вэ ги ни жёгили, тади гүнахар йүэщин жунни.

¹²Пилат ба жыгэ хуа тинжян, йүэщин щён ба Эрса фонкэни. Кэсы яхүти жынму кэ ханди:

– Ни дан ба Та фонкэ, ни зу бусы Рим хуоншонди ляншу! Сый ба гэжя жёчын хуоншонли, та зусы Рим хуоншонди дүшман.

¹³Пилат ба тамуди хуа тинжян, зу ба Эрса линчүлэ, гэжя зуэдо вынгуансыди вифыншонли (ба жыгэ вифын на яхүти хуа жёди «Гаввафа», йисысы «На шыту пухади вифын»).

¹⁴Нэйитянсы жўма (зусы ги яхүтиди Пасха жечи шөлүди йитян), бонжер шонвули. Пилат ги яхүти жынму фэди:

– Ниму кан! Жысы нимуди Хуоншон!

¹⁵Таму зу ханди:

– Ни ба Та дасычи! Ни ба Та дасычи! Ба Та диндо муту шызышон!

Пилат вынли тамули:

– Ниму жё вэ ба нимуди Хуоншон диндо муту шызышоннима?

Яхүтиди да ахунму хуэйдади фэсы:

– Вөмуди хуоншон гуонсы Римди хуоншон!

¹⁶Жыхур Пилат цэ ба Эрса ги таму жёгили, жё ба Та диндо муту шызышонни.

Ба Эрса диндо муту шызышонли

(Мф 27:32-44; Мк 15:21-32; Лк 23:26-43)

Таму ба Эрса нашон зули. ¹⁷Эрса чүлэ, быйди гэжяди муту шызы, доли «Тукэлон» дифоншонли (ба жыгэ дифон

на яхўти хуа жёди «Голгофа»). ¹⁸ Нэтар таму зу ба Эrsa диндо муту шызышонли. Таму хан ба лёнгэ жын е диндо данлинди лёнгэ муту шызышонли, йигэ зэ жыбонгэ, йигэ зэ нэбонгэ, Эrsa зэ тамуди донжунни. ¹⁹ Пилат хан щели йигэ банбанзы, жё жынму ба жыгэ банбанзы диндо муту шызыди готушонли. Банбанзышон жымужя щедини: «Назарет чынпуниди Эrsa, яхўти жынмуди Хуоншон». ²⁰ Хошо жынму ба жыгэ банбанзышон щехади хуа нянли, йинцысы ба Эrsa диндо муту шызышонди дифонли Иерусалим чынпу бу йуан; жыгэ банбанзысы на яхўтиди, римди дэ грекди йуан щехади. ²¹ Яхўтиди да ахунму ги Пилат фэди:

– Ни бэ ще: «Яхўти жынмуди Хуоншон», ни ще: «Жыгэ Жын ба гэжя жёчын яхўти жынмуди Хуоншонли».

²² Кэсы Пилат хуэйдади:

– Вэ щехади са зусы вэ щехади!

²³ Донбинжынму ба Эrsa диндо муту шызышонди йиху, ба Та готуди йишон фынчын сы жезыли, мый йигэ жын нали йи жезы. Таму ба Эrsaди хансанзы е нашонли. Жыгэ хансанзы бусы фынхади, тасы на жынжырди йикуэ бупи жыхади. ²⁴ Йинви жыгэ, донбинжынму йигэ лян йигэ шонлэнди:

– Заму ба жыгэ хансанзы бэ чэлан. Заму жуа йигэ чир, канйихар, сый ба та нашонни.

Зу жымужя Китабушон щехади хуа чынли: «Таму ба Вэ готуди йишон фынкэли, ви Вэди хансанзы е жуали чирли». Донбинжынму зу ганли жымужяди сычинли.

²⁵ Эrsaди муту шызы гынчян хан занди Та мама, Та мамади мыймый, Клеопади пэе Мариам зэмусы Магдала дифоншонди Мариам. ²⁶ Эrsa ба Та мама лян Та щинэди манла зэ гынчян занди канжян, зу ги мама фэди:

– Ама, ни кан, тасы ниди эрзы!

²⁷ Йиху Эrsa ги нэгэ манла е фэди:

– Ни кан, тасы ниди мама!

Да нэгэ сыхур дашон, нэгэ манла ба Эrsaди мама линдо гэжяди жянили, жё та жўдо нэтарли.

Эрсади вучон

(Мф 27:45-56; Мк 15:33-41; Лк 23:44-49)

²⁸ Эрса жыдоли йиче сычин кәжя доли йиршонли (жә Китабушон шехади хуа чынхани), Та зу фәди:

– Вә конли.

²⁹ Нэтар гәди йигә хў, литу гуанди цў. Жынму зу ба йигә бубузы на цў сынли, бондо иссоп цоди ганзышон, надо Эрсади зуй гынчанли. ³⁰ Эрса чонлийихар, зу фәди:

– Йиче сычин ду чынли!

Та ба ту диха, зу дуанли чили.

³¹ Нэйтянсы жўма, шанбэ куэ зу долэни. Жыгә шанбэсы йигә да жечи. Йинви жыгә яхўтиди линшужынму бу щён жё мэти шанбэ жыйитян шындо муту шызышон, таму зу читоди жё Пилат гигә фынфу, ба шузуйжынмуди туйганзы дадуанни, ба тамуди мэти нахалэни. ³² Донбинжынму чи, ба Эрса йидарни диндо муту шызышонди ту йигә жынди туйганзы лян ди эргә жынди туйганзы ду дадуанли. ³³ Таму доли Эрса гынчанди сыхур, йиканса: Та кәжя вучонли, зу ба Тади туйганзы мө дадуан. ³⁴ Кәсы йигә донбинжын на чон ганзы ба Эрсади лыйба нонлийихар; ще лян фи донвәр тончўлэли. ³⁵ Нэхур на гәжяди нянжин ба жыгә сычин канжянлиди жын ги жыгә сычин донли кочўди гўвали; та жыдо тади хуасы шыхуа, жё ниму е шинфуни. ³⁶ Жыгә сычин жё Китабушон шехади хуа чынхани: «Ба Тади йигә гўдў ду бу жә хуэ». ³⁷ Хан ю йигә хуани: «Таму ба Сый на чон ганзы нонли, ба Та канйихарни».

Ба Эрсади мэти сундөли

(Мф 27:57-61; Мк 15:42-47; Лк 23:50-56)

³⁸ Жыщезы сычин гуэлиди йиху, Аримафея щёнжуонниди йигә жын, минзы жёди Юсуф читоли Пилатли, жё та ба Эрсади мэти нахалэни. Юсуф есы Эрсади йигә манла, кәсы та хәпа яхўтиди линшужынмудини, зу мө ган миндамин жын жыгә сычин. Пилат жё та ба Эрсади мэти нашонли; Юсуф чи, зу ба мэти нашон зули. ³⁹ Никодим

е лян Юсуф йидарни чили. Зочян та хили зэ Эрса гынчян е лэгүэ. Жыхур та ба лян мирра дэ алое хуэхади шён-ю налэли. Жыгэ шён-ю бонжер ю саншыгэ килони. ⁴⁰Таму лёнгэр жочү яхүти жынму сун мэтиди куйчын, на шён-ю сынхади мабу ба Эрсади мэти гуэчүли. ⁴¹Ба Эрса диндо муту шызышонди дифоншон ю йигэ готян йүанзылэ. Нэ-тар ю йигэ шин ёдунлэ; вон жыгэ ёдунни ба сыйди мэти хан мө сунгүэ. ⁴²Таму зу ба Эрсади мэти сундо нэтарли, йинцысы нэйтянсы яхүти жынмуди жўма, нэгэ ёдун е бу йүан.

Кун ёдун

(Мф 28:1-8; Мк 16:1-8; Лк 24:1-12)

20 Екшанбэди нэйтян ганзо йизор, тян хан мө лёнди сыхур, Магдала дифоншонди Мариам доли ёдун гынчян йиканса: дыйдо сый ба шыту да ёдун гынчян кэ-жя гунгуэчили. ²Та подо Шимэ-Пётр лян Эрса шинэди данлинди йигэ манла гынчян, зу ги таму фэди:

— Дыйдо сый ба Жонгуйди мэти да ёдун литу нашон зу-ли, вөму бу жыдо ба Та гэдо нанили!

³Пётр лян нэгэ манла зэ ёдунни чили. ⁴Таму лёнгэр йи-дарни подини, кэсы нэгэ манла би Пётр поди куэ, ту йигэ зу доли ёдуннили. ⁵Нэгэ манла мө жин ёдунничи, та ба ё гуха вон ёдунни йиканса: мабу хан зэ нэтар гэдини. ⁶Ши-мэ-Пётр гыншон нэгэ манла е доли нэтарли. Та жинли ёдун, ба нэтар гэди мабу е канжянли, ⁷хан канжянли зо-чян ба Эрсади ту гуэчүди нэгэ гэтули. Нэгэ гэту лян мабу мө зэ йидарни гэ, та зэ данлинди вэршон жүандини. ⁸Жы-гэ сыхур ту йигэ доли ёдунниди нэгэ манла е жинли ёдун литули; та ба жыгэ канжян, зу шинфули. ⁹Таму хан мө жыдо Китабушон шехади хуа: Эрса вучонлиди йиху яндин ё кэ хуэни. ¹⁰Лёнгэ манла зу хуэйчили.

Магдала дифоншонди Мариам ба Эрса канжянли

(Мф 28:9-10; Мк 16:9-11)

¹¹Мариам хан зэ ёдун вэту занха кўдини. Та кўди сыхур, ба ту диха вон ёдун литу канлийихар, ¹²зу ба лёнгэ чуан

бый йишонди Тянщянму зэ зочян гәха Эрсади мэтиди вәршон зуэди канжянли. Йигә Тянщян зэ гә туди вәршон зуэдини, ди эргә Тянщян зэ гә жүэди вәршон зуэдини.

¹³Таму вынли Мариамли:

– Нүжын, ни виса кўдини?

Мариам ги таму хуэйдади фәсы:

– Дыйдо сый ба вә Жонгуйди мэти нашон зудёли, вә бу жыдо ба Та гәдо нанили!

¹⁴Ба жыгә хуа фэван, Мариам жуангуэлә, йиканса: Эрса зэ тади хуту зандини, кәсы та хан мә канлә жысы Эрса.

¹⁵Эрса вынли тали:

– Нүжын, ни виса кўдини? Ни зо сыйдини?

Мариам сылёнди жысы канйүанзыди жын, зу ги Та фәди:

– Жонгуйди, дансы Ни ба Та нашонли, чито Ни ги вә фәйихар, Ни ба Та гәдо нанили, жё вә ба Та нашон зу!

¹⁶Эрса ги та фәди:

– Мариам!

Мариам жуангуэлә, на яхўтиди хуа ги Та фәди:

– Раббуни!

(Жыгә хуади йисысы «Вәди Вуста».)

¹⁷Эрса ги та фәди:

– Ни ба Вә бә ду, йинцысы Вә хан мә до Вә Дада гынчянчи. Ни зэ Вәди дишүнму гынчян чи, ги таму фәйихар: Вә вон Вә Дада лян нимуди Дада гынчян чидини; Вә вон Вәди Анлахў лян нимуди Анлахў гынчян чидини.

¹⁸Магдала дифоншонди Мариам хуэйчи, ги манламу фәди: «Вә жянли Жонгуйдили!», зу ба Жонгуйди ги та фәхадди хуа ги манламу е фәли.

Эрса доли манламу гынчянли

(Мф 28:16-20; Мк 16:14-18;

Лк 24:36-49)

¹⁹Екшанбәди хушон Эрсади манламу шудо йидарни, ба мын суэчўли, йинцысы таму хәпа яхўтиди линшужынмудини. Нәхур Эрса лә, зандо таму донжунни, зу фәди:

– Вә ги ниму панвон пиннан!

²⁰ Ба жыгә хуа фэван, Та ба гэжяди шу лян лыйба ги таму зыгили. Манламу ба Жонгуйди канжян, гошинзали.

²¹ Эрса ги таму кә фәди:

– Вә ги ниму панвон пиннан! Зушён Вә Дада ба Вә дафалэли йиён, Вә е ба ниму дафачидини.

²² Ба жыгә хуа фэван, Эрса дуйчү таму чуйли йи ку чи, зу фәди:

– Ниму ба Анлахүди Рух жешуха! ²³ Ниму ба сыйди гүнахар дан фоншәли, ба тамуди гүнахар зу фоншәни; ниму ба сыйди гүнахар дан бу фоншә, ба тамуди гүнахар зу бу фоншә.

Эрса зэмусы буцинфуди Фома

²⁴ Эрса ләди сыхур шыэргә Апостолму литуди йигә, тади минзы жәди Фома (ба та хан жәди «Фонфор»), лян таму мә зә йидарнилә. ²⁵ Данлинди манламу ги Фома фәди:

– Вәму ба Жонгуйди жянли!

Кәсы Фома ги таму фәди:

– Вә дан на гэжяди нянжин ба Эрса шушонди динзы шон бу жян, дан на гэжяди зыту ба Та шушонди динзы шон бу дуйихар, дан на гэжяди шу ба Та лыйбашонди шон бу дуйихар, вә бу щинфу!

²⁶ Гуәли батян, манламу зә фонзыни йүанхуэй шудо йидарнили; жыхур Фома е лян таму зә йидарнини. Фонмын суэчүдини, мынмынди Эрса лә, зандо таму донжунни, зу фәди:

– Вә ги ниму панвон пиннан!

²⁷ Йиху Та ги Фома фәди:

– Ба ниди зыту чынкә, гәдо жытар! Жы зусы Вәди шу! Ба ниди шу чынкә, ба Вә лыйбашонди шон дуйихар! Ни бә шанкили, гуон щинфу!

²⁸ Фома ги Эрса фәди:

– Нисы вәди Жонгуйди! Нисы вәди Анлахү!

²⁹ Эрса ги та кә фәди:

– Ни канжян Вәли, йинви жыгә ни цә щинфулима? Сый мә канжян щинфули, та дуәму гошин!

³⁰ Эрса зә Тади манламу мянчян хан щянли хошо данлинди кэрамәтили, ба жыщезы кэрамәти мә щедо жы

йибын фушон. ³¹Ба жы йибын фу шехади вонщёнсы жё ниму ду шинфуни: Эрсасы Мэсих, Эрсасы Анлахүди Эрзы. Ниму дан шинфули, ниму зу лян Та йидарни хуэни.

*Чигэ манла йуанхуэй жянли
Эрсали*

21 Жыгэди йиху, манламу зэ Тивериада хэянзышон йуанхуэй ба Эрса жянли. Жы йихуэй Эрса жымужя лэли. ²Шимэ-Пётр, Фома (ба та хан жёди «Фонфор»), Галилеяди Кана чынпуниди Нафанаил, Зеведейди лёнгэ эрзы лян данлинди лёнгэ манла ду шудо йидарнили. ³Шимэ-Пётр ги таму фэди:

– Вэ чи, дэ йүчини.

Дажя ги Пётр фэди:

– Вөму е лян ни йидарни чини.

Таму зу чи, шонли чуан, кэсы нэйивэщи са ду мэ жуашон. ⁴Ганзо йизор, Эрса зэ хэянзышон зандини, кэсы манламу мэ жыдо жысы Эрса. ⁵Эрса ги таму фэди:

– Вэди ваму, ниму ба йү жуашонлимэ?

Таму хуэйдади фэсы:

– Са ду мэ жуашон.

⁶Эрса ги таму кэ фэди:

– Ниму ба вон щядо чуанди юбонгэ, нэтар ю йүни.

Таму зу ба вон щяли, йуанхуэй ба та лабучүлэ, йинцысы вон литу жуали хошо йүли. ⁷Эрса щинэди нэгэ манла ги Пётр фэди:

– Жысы Жонгуйди!

Шимэ-Пётр ба жыгэ хуа тинжан, донвэр ба йишон жидо ёни (нэхур та са йишон ду мэ чуан), тёдо хэзынили.

⁸Данлинди манламу ба чуан бэдо хэянзышонли, ба вон литуди йү е лашон лэли. Нэхур таму ли хэянзы бу йуанлэ, бонжер ю йибый метрди лүни. ⁹Таму доли хэянзышон, зу ба йигэ хуэдуи канжанли, хуэдуишон гэди йү лян мэмэ.

¹⁰Эрса ги таму фэди:

– Ниму ба жуачүлэди йү налэ жигэ.

¹¹Шимэ-Пётр шонли чуан, ба вон ладо хэянзышонли. Лачүлэди вон литу ю хошо да йүни, йиман ю йибый вушы

сангэ йүни. Йү жымудуэ еба, ба вон мэ чэлан. ¹² Эrsa ги таму фэди:

– Ниму лэ чыйидяр!

Манламу литу сый ду мэ ган вын Эrsa: «Нисы сый?», йинцысы таму ду жыдони: жысы Жонгуйди. ¹³ Эrsa вон чян чи, ба мэмэ дэ йү налэ, ги таму ду фынгили. ¹⁴ Жысы Эrsa вучонли зэмусы кэ хуэлиди йиху, Та ди сан бян доли манламу гынчянли.

¹⁵ Таму чыван, Эrsa зу вынли Шимэ-Пётрли:

– Йихияди эрзы Шимэ, ни ба Вэ би жыщезы жынму щинэди дуэма?

Пётр ги Та хуэйдади фэсы:

– Дуйдини, Жонгуйди! Ни жыдони, вэ щинэ Нини.

Эrsa зу ги Пётр фэди:

– Ни фон Вэди ёнчи.

¹⁶ Йиху Эrsa ди эрбян вынли Пётрли:

– Йихияди эрзы Шимэ, ни щинэ Вэнима, бу щинэ?

Пётр хуэйдади фэсы:

– Дуйдини, Жонгуйди! Ни жыдони, вэ щинэ Нини.

Эrsa ги та кэ фэди:

– Ни фон Вэди ёнчи.

¹⁷ Линху Эrsa ди санбян вынли Пётрли:

– Йихияди эрзы Шимэ, ни щинэ Вэнима, бу щинэ?

Пётр пэфанхали, йинцысы Эrsa сан бян вынли тали:

«Ни щинэ Вэнима, бу щинэ?» Та зу ги Эrsa фэди:

– Жонгуйди! Ни са ду жыдони, Ни жыдони, вэ щинэ Нини.

Эrsa ги та кэ фэди:

– Ни фон Вэди ёнчи. ¹⁸ Вэ ги ни фэ шыхуа, нянчинди сыхур, ни гэжя ба ниди ё жигуэ, шён вон нани чи, зу вон нэни чигуэ. Кэсы лолиди сыхур, ни ба шу чынкэ, данлинди жын ба ниди ё жичү, линдо ни бу шён чиди дифоншонни.

¹⁹ Эrsa на жыщезы хуа шён зозор фэ, Пётр вонху замужя вучонни, та замужя жё Анлахүди гуонлён жолённи. Йиху Эrsa ги Пётр кэ фэди:

– Ни гыншон Вэ зу!

Эрса зэмусы Та щинэди йигэ манла

²⁰ Пётр жуангуэлэ, канжян Эрса щинэди нэгэ манла е гыншон Эрса зудини (зочян Эрса лян манламу хушон чы фанди сыхур, нэгэ манла ба ту кодо Эрсади конзышон, вынли Тали: «Жонгуйди! Сый щён ба Ни мэчүчини?»).

²¹ Пётр ба жыгэ манла канжян, зу вынли Эрсали:

– Жонгуйди! Жыгэ жын вонху йү са сычинни?

²² Эрса ги та хуэйдади:

– Вэ дан щён жё жыгэ жын йичыр до Вэ ди эрбян лэди сыхур хуэни, жыгэ лян ни мэю са щёнган! Ни гэжя гыншон Вэ зу!

²³ Эрсади жыгэ хуа зу сандо Тади манламуди донжунни-ли, зусы нэгэ манла бу вучон. Шыдашы Эрса мө фэгүэ та бу вучон, кэсы Та фэли: «Вэ дан щён жё жыгэ жын йичыр до Вэ ди эрбян лэди сыхур хуэни, жыгэ лян ни мэю са щёнган!» ²⁴ Жыгэ жын зусы канжянли жыщезы сычинди нэгэ манла. Та ба жыщезы сычин ду щели. Вэму жыдони, тади хуасы жинди.

²⁵ Эрса хан ганли хошо данлинди сычин, ба таму дан йигэ йигэжя щечи, вэ сылэнди, зэ чүан дун-яшон ду чынбуха жыщезы фубынзы.





АПОСТОЛМУ ГАНХАДИ СЫЧИН

Хуатур

1 ¹⁻²Хома, гуйжунди Феофил!
Зэ вэ шехади ту йибын фушон вэ ба Эрса ганхади йиче сычин лян Тади жёшүэ ду щели (да Та ганкэ Тади гунсыди сыхур дашон йичыр до Та шонли тянди нэйитян). Эрса на Анлахү Рухди лилён ги гэжя жянчүлэди Апостолму гили хошо фынфу, йиху шонли тянли. ³Эрса шули кўнанди йиху, сышы тян литу хын жихуэй до Апостолму мянчан лэ, на заёнди лүфу жё таму ба Та хуэди жыдо, жё таму канжян Тани, хан ба Анлахү Гуйжяди сычин лян таму танли. ⁴⁻⁵Йихуэй таму шудо йидарниди сыхур, Эрса ги таму гиди фынфу:

– Ниму вон Иерусалим чынпу бэ зу, дынди Вэ Дада ба Та шүхади сычин ги ниму гигини, нэсы зочян Вэ ги ниму фэхади сычин: Йихия шынжын ви Анлахү на фи ба жынму щили, кэсы гуэ житянди йиху Анлахү ба ниму на Тади Рух щини.

Эрса шонли тянли

(Мк 16:19-20; Лк 24:50-53)

⁶Апостолму лян Эрса шудо йидарниди сыхур, вынли Тали:
– Жонгуйди! Ни зу жыгэ сыхур ба Исраил гуйжя да япыйшон жefonчүлэнима?

⁷Эрса ги таму фэди:

– Ба нэгэ жызы дэ сыхур Вэди Дада на Та гэжяди чүанли динхали, бу жё ниму ба нэгэ сыхур жыдо. ⁸Анлахүди

Рух до нимушон халэди сыхур, ниму ба Тади лилён жешуни. Жыгэди йиху, зэ Иерусалим чынпуни, зэ йиче Яхүти лян Самария дифоншон йичыр до дун-яди йиршон, ниму ги Вэ дон гўвамунни.

⁹Эрса ба жыгэ хуа фэван, зу зэ Апостолму мянчян шонли тянли; йикуэр йүнцэ ба Та жешушонли, Эрса бужянли. ¹⁰⁻¹¹Эрса шонли тянли. Таму хан лян нянжин динди вон тяншон кандини. Мынмынди лёнгэ чуан бый йишонди жын зандо таму мянчян, фэди:

– Галилея дифоншонди жынму! Ниму виса зэ жытар занди вон тяншон кандини? Эрса да ниму гынчян зудё, шонли тянли. Ниму канжян Та замузя шонли тянли, Та зу нэмузя халэни.

Ба ди шыэргэ Апостол жянчүлэли

¹²Апостолму да Елеон саншон хуэйли Иерусалим чынпунили (Елеон сан ли чынпу бонжер ю йигэ километрни). ¹³Таму жинли чынпуни, шонли таму зэ йидарни шу-ди луфоншонли. Нэтар ю Пётр, Йихия, Ягүбэ, Андрей, Филипп, Фома, Варфоломей, Матфей, Алфейди эрзы Ягүбэ, Шимэ-Зилот дэ Ягүбэди эрзы Яхүтини. ¹⁴Таму сыдуэхур зэ йидарни йишин-йижиди чито Анлахүдини; таму литу хан ю жигэ нүжын лян Эрсади мама Мариам дэ Эрсади дишүнмуни. ¹⁵Гуэли житян, шинфу Эрсади жынму кэли йигэ хуэйи; бонжер йибый эршыгэ жын шудо йидарнили. Нэхур Пётр занчелэ фэди:

– ¹⁶Шинэди дишүнму! Анлахүди Рух чечү Даву шынжын зэ Китабушон зозор фэхади Жүхүтиди сычин яндин ё чынхали. Жүхүтисы ба Эрса жуачүди жынмуди тузы. ¹⁷Зочян Жүхүтисы заму литуди йигэ жын; Эрса ба та лян заму йидарни жянчүлэли, жё та е дон Апостолни. ¹⁸Кэсы йиху Жүхүти на та зынхади буганжинди чян мэли йичү дифон. Зу зэ нэтар та дехалэ, тади дўзы лан-дёли, кэлон литуди чончон-дүдү ду чүлэли, та зу вучонли. ¹⁹Зэ Иерусалим чынпуни жўди йиче жынму ба жыгэ сычин ду тинжянли. Зу жымузя, ба нэ йичү дифон на тамуди хуа жёди «Акелдама» (жыгэ хуади йисысы

«Тонли щеди вэр»). ²⁰ Зущён Зэбур Китабушон щехадии ийён:

«Жё тади фонзы бянчын йигэ кунтан,
зэ нэтар жё сый ду бэ жў».

Хан ю йигэ хуани:

«Жё данлинди жын ти та ган тади гунсыни».

²¹⁻²² Йиху Пётр кэ фэди:

– Йинви жыгэ, заму ё жянчүлэ данлинди йигэ жын лян заму йидарни жё дон гўва, миндамин фэ: Эрса Жонгуйди кэ хуэли. Эрса Жонгуйди зэ заму донжунни жўди сыхур (да Йихия шынжын ви Анлахү зэ фи литу ба жынму щилиди сыхур йичыр до Эрса шонли тянди нэйтян), жыгэ жын йинавар лян заму зэ йидарнилэ.

²³ Дажа ба лёнгэ жын жянчүлэли: йигэсы Юсуф (тади данлинди минзысы Варсавва, ба та хан жёди Иуст), ди эргэсы Матфий. ²⁴ Дажа чито Анлахүди фэди:

– Жонгуйди! Ни ба мый йигэ жынди щин ду жыдони; чито Ни ги вэму фэйихар, жы лёнгэ жын литу Ни ба нэйигэ жын жянчүлэ, ²⁵ жё та ти Жўхүти ган Апостолди гунсыни. Жўхүти ба жыгэ гунсы туйдэ, зули та ё чиди вэршонли.

²⁶ Йиху нэ лёнгэ жын жуали чирли. Матфий ба чир жуачүли, лян шыйигэ Апостолму йидарни донли Апостолли.

Анлахүди Рух доли Апостолмушонли

2 Пасха жечи гуэлиди йиху, ди вушы тян доли*. Щинфу Эрсади жынму шудо йигэ вэршонли. ² Мынмынди йигэ шынчи да тяншон халэ, зущён да фын гуачелэли ийён; жыгэ шынчи ба таму зуэди фонзы гуанманли. ³ Таму йиканса: зущён шэту ийёнди хуэян сакэли, дедо таму литуди мый йигэ жыншонли. ⁴ Таму зу ба Анлахүди Рух жешуха, жочү Анлахүди Рух ги таму гиди бынсы на данлинди йүян фэкэ хуали. ⁵ Нэгэ сыхур да чүан дун-яди мый йигэ гуйжяшон яхүти жынму доли Иерусалим чынпунили. Таму дусы хэпа Анлахүди жынму. ⁶ Хошо жынму ба жыгэ шынчи

* ^{2:1} Жы иитян яхүти жынму гуэ шу мыйзыди жечидини.

тинжян, шудо йидарнили. Таму ду чёчихали, йинцысы мый йигэ жын тинжянли, шинфу Эрседи жынму замужя на та зўгуйди хуа фёдини. ⁷Таму щинни тэ чёчихади йимяр, зу фёди:

– Ниму кан, нандый жымужя фэхуади жынму бусы Галилея дифоншонди жынмума? ⁸Виса заму литуди мый йигэ жын тинжян жыщезы жынму на замуди зўгуйди йюян фэхуадини? ⁹⁻¹¹Заму литу ю Парфияди жын, Мидияди жынму, Еламди жынмуни; хан ю да Месопотамия, Яхўти, Каппадокия, Понт, Асия, Фригия, Памфилия, Египет зэмусы ли Кириная чынпу бу йүнди Ливия дифоншон лэди жынмуни; хан ю да Рим чынпу лэди яхўти жынму зэмусы щинфу яхўти жёмьнди данлин минзўди жынмуни; хан ю Критди жынму зэмусы Араб жынмуни. Заму ду тинжянли, замужя таму на замуди хуа куажён Анлахў ганхади вида сычиндини!

¹²Таму чёчиха, бусўщинди йигэ вын йигэдини:

– Жысы са сычин?

¹³Данлинди йибазы жынму цыщёли щинфу Эрседи жынмули. Таму фёди:

– Жыщезы жынму ду хэзуйли!

*Пётр зэ жечешон
чуанжёли*

¹⁴Жыхур Пётр лян данлинди шыйигэ Апостолму занчелэ, ги дажя дашын фёди:

– Яхўти жынму лян йиче зэ Иерусалим чынпуни жўди жынму! Ниму ба вэди хуа люшынди тинйихар, вэ ги ниму пэщё жыгэ сычинни. ¹⁵Ниму сылёнди жыщезы жынму хэзуйлима? Мэди, йинцысы хазырсы ганзор жүгэ сышын.

¹⁶Ба жыгэ сычин Йоиль шынжын зозор фёли:

¹⁷«Анлахў фёди: „Линйирди жызыни Вэ ба жымужяди сычин ганни:

Вэ ба Вэди Рух ги мый йигэ жын гигини.

Нимуди эрнү ба Вэди хуа чуанжёни;

нимуди щёхуэрму ба кэрамэти канжянни;

нимуди ложынму зў ю йисыди фимынни.

¹⁸Зу нэщезыди жызыни Вә ба Вәди Рух
ги Вәди нан-нүди нўму гигини,
таму ба Вәди хуа чуанжәни.

¹⁹Вә зә тьяшон ба кэрамәти щянгини,
зә дишон ба чәчи сычин ганни;
жы зусы ще, хуә зэмусы ян;

²⁰нэхур жәту чынха хидини;
йүөлән, зушән ще йиән, чынха хундини.

Жисы жыщезы сычин ду йүни,
Жонгуйдиди вида, гуонләнди жызы зу доләни.

²¹Нэхур сый дан чито жә Жонгуйди ги та бонмон,
ба тади мин зу жүохани“».

²²Йиху Пётр хан фәди:

– Шинәди Израил жынму! Ниму ба вәди хуа тинйихар!
Анлахұ чечұ Назарет чынпуниди Жын, минзы жәди Эrsa,
зә ниму донжунни ба хошо кэрамәти щянчўләли, ба чәчи
сычин ганли. Жыщезы сычин ги ниму щянщярди зыгили:
Анлахұ ги Эrsa гили Тади чуанлили. Ниму гәжя е жыдо
жыгәни, йинцысы жыщезы сычинсы зә ниму донжунни
йүхади. ²³Анлахұ жочұ Та дазо динхади воншән ба Эrsa ги
ниму гигини. Ниму на вәдожынмуди шу ба Та диндо муту
шызышон, дасыли. ²⁴Кәсы Та вучонли йиху, Анлахұ жә Та
кә хуәли, ба Тади вучонди тынкұ чүдәли, йинцысы вучон
ба Та жуабучұ. ²⁵Даву шынжын зочян фәли Эрсали:

«Вә ба Жонгуйди зә вәди мянчян канжянли;
Та зә вәди юбонгәни, бу жә вә дедо.

²⁶Йинви жыгә, вәди щин гошинзали,
вәди хуа юли щихуанли,
вәди шынзы е ю зывонни;

²⁷йинцысы Ни бу жә вә шындо дуәзэхә литу,
е бу жә Ниди шыщинди хуәжиди мәти ладо.

²⁸Ни жә вә ба вон сынхуә литу зуди лў жыдохани;
жә вә зә Ниди мянчян ю йичеди гошинни».

²⁹Йиху Пётр кә фәди:

– Шинәди дишүнму! Жә вә ги ниму фә замуди Даву ло-
зы: заму ду жыдонни, йичян нян зычян та вучонли, ба тади
мәти е сундәли; тади фын до жиргә хан зә заму жытарни.

³⁰ Давусы йигэ шынжын, та жыдо Анлахұ ги та зочян дұ жуди фәгуә: Анлахұ жё Давуди йигэ хубый дон хуоншонни, зуәдо Даву хуоншонди вифыншонни. ³¹ Даву дазо жыдо Анлахұди воншённи, йинви жыгә та ба Мәсих кә хуелиди сычин жымужя фәли: «Ба Та мә шындо дуэзэхә литу; Тади мәги е мә ладо». ³² Анлахұ жё Эрса кә хуәли; вәму дусы канжян жыгә сычинди гұваму. ³³ Эрса шонли тян, зуәдо Анлахұди юбонгәли. Та да Тади Дада гынчян ба зочян шұхәди Анлахұди Рух жешуха, ба жыгә Рух ги жынму гигили. Жыгә сычин ниму гәжя канжяндини, е тинжяндини. ³⁴ Даву шынжын мә шонгуә тян; кәсы та фәгуә:

«Анлахұ Жонгуйди ги вәди Жонгуйди фәли:

„Ни зуәдо Вәди юбонгә,

³⁵ дынди Вә ба Ниди дұшманму

эрдо Ниди жүә дихани“».

³⁶ Исраилди йиче жынму! Ниму ду хоходи жыдоха: ниму ба Эрса диндо муту шызышонли, кәсы Анлахұ жё Та чынха Жонгуйди зәмусы Мәсихли!

³⁷ Дажя ба жыщезы хуа тинжян, тамуди щин зущён залиди йиён тынли. Таму зу ги Пётр зәмусы данлинди Апостолму фәди:

– Дищүнму! Жё вәму зұ сани?

³⁸ Пётр ги таму фәди:

– Ниму донжунни мый йигә жын ду ё шущин, ба тади гұнахар жынни, йиху ба та ви Эрса Мәсихди минзы зә фи литу щини. Жымужя Анлахұ ба нимуди гұнахар фоншәни, ниму зу ба Анлахұ гихәди Рух жешухани. ³⁹ Йинцысы замуди Жонгуйди Анлахұ ба жыгә ги Та жанчұләди жынму шұхали, жы зусы ги ниму, нимуди вәму дә йиче зә йүан дифоншон жұди жынму шұхәди.

⁴⁰ Пётр на хошо данлинди хуа ги таму жёнли, зу чүанли тамули:

– Ниму ё ба гәжяди мин жүохани, бә жё ниму лян жыщезы ха жынму йиён шу зуй!

⁴¹ Хошо жынму щинфули Пётр фәхәди хуали; ба таму зу ви Эрсади минзы зә фи литу щили. Нәйитян щинфу

Эрсади жынмуди фур литу бонжер хан тянли сан чян жын. ⁴²Таму люшын тинли Апостолму жёнди жётёли, йигэ лян йигэ лэвонли, йидарни ба мэмэ быйли зэмусы чито Анлахули.

Щинфу Эрсади жынмуди гуонийин

⁴³Апостолму щянли хошо кэрамэтили, ганли хошо чёчи сычинли. Жыщезы сычин ба жынму ду хажинли. ⁴⁴Щинфу Эрсади жынму йидарни жўдини, ба йиче дунци ду йидарни сыйўндини. ⁴⁵Таму ба гэжяди тандо дэ жяниди цэбый ду мэдэ, ба чян ги дажя фынгили; сый ё дуэшо, ги та зу фын дуэшо. ⁴⁶⁻⁴⁷Таму мый йитян йищин-йижиди шындо Иерусалим сы литу, хан зэ тамуди жяни йидарни ба мэмэ быйдини, гошинди, шыщин-шыйиди чы фандини, куажён Анлахўдини, лян йиче минжынму щёнхо лэвондини. Жонгуйди мый йитян ги таму донжунни ба мин жюхади жынмуди фур тяндини.

Пётр лян Йихия ба йигэ чўэзы канхоли

ЗЙихуэй шонву сангэ сышыншон чито Анлахўди сыхур доли. Пётр лян Йихия доли Иерусалимди сынили. ²Нэтар йигэ жын зэ сыди йигэ гэмын чянту тондини (ба жыгэ мын жёди «Жўнмый гэмын»). Жыгэ жын да сын-ёнха зусы чўэзы. Мый йитян жынму ба жыгэ жын тэдо гэмын чянту, жё та вон сыни лэди жынму гынчян ё нетини. ³Жыгэ жын йиканса, Пётр лян Йихия щён жин сыни, зу да таму гынчян е ёли нетили. ⁴Пётр лян Йихия ба та вонлийихар; Пётр зу фэди:

– Ни ба вэму канйихар!

⁵Нэгэ жын зу люшынди ба таму канлихар, зывонди дый жигэ чянни. ⁶Пётр ги та фэди:

– Жинзы дэ йинзы вэ мэю. Вэ ю са, зу ги ни ги са. Вэ ви Назарет чынпуниди Жын Эrsa Мэсихди минзы ги ни ги фынфу: ни челэ, зу зу!

⁷Йиху Пётр ба нэгэ жынди юшу жуачў, бонди жё та челэли. Нэгэ жынди жўэжон лян жўэбый донвэр юли

жинли, ⁸та зу төчелэ, дуандуар занха, зукэли. Йиху та лян Пётр дэ Йихия йидарни жинли сынили, лян зу дэ тэди куажёнли Анлахўли. ⁹Жынму канжян та йихани зудини, йихани куажён Анлахўдини, ¹⁰зу ба та жындыли: та зусы зэ сыди «Жүнмый гэмын» чянту зуэди ё нетиди нэгэ жын. Ба та йўхади жыгэ сычин канжян, жынму тэ чёчили.

*Пётр зэ Иерусалимди
сыни чуанжёли*

¹¹Нэгэ жын ба Пётр лян Йихия жинжинди жуачў, гыншон таму зудини. Зэ Сульманэ хуоншонди гуэдозыни занди йиче жынму ду чёчиди подо таму гынчанли. ¹²Пётр ба жышезы жынму канжян, зу ги таму фэди:

– Шинэди Исраил жынму! Виса ниму ба жыгэ сычин канжян ду чёчихали? Виса ниму лян нянжин дин вэмудини? Ниму сылэнди, вэму гэжя ю жымужяди бынсы хуэйжэсы вэму бэвон Анлахўди йимяр, жё жыгэ жын зукэлима? ¹³Ибрашимэди, Исхарди, Ягўбэди Анлахў (жы зусы заму зўзў-быйбыйди Анлахў), ги Тади Хуэжи Эрса гили видади миншынли. Ниму ба Жыгэ Эрса ги жыгуанжын гигили. Пилат ба Та шынвынли, щён ба Та фонкэни, кэсы ниму зэ Пилат мянчян бу ё Тали. ¹⁴Эрсасы Анлахў жанчўлэди Гундожын, кэсы ниму бу ё Тали, йиху ниму читоди жё Пилат ба дасы жинди йигэ фанзуйди жын ги ниму фонкэни. ¹⁵Ниму ба ги минди Жонгуйди дасыли; мэгуэсы Та вучонли йиху, Анлахў жё Та кэ хуэли. Вэмусы канжян жыгэ сычинди гўваму.

¹⁶Шинэди дищўнму! Ниму ду канжян зэмусы жындый жыгэ чўэзыни. Та шинфу Эрсади минзы йимяр, Эрсади лилён зу ги та гили жинли; жыгэ чўэзыди шинфу зэ ниму мянчян зу ба тади бин йиман канхоли. ¹⁷Шинэди дищўнму! Жыхур вэ жыдоли, ниму лян нимуди линшуму мэ жыдоди йимяр, цэ ги Эрса ганли жыгэ ха сычинли. ¹⁸Анлахў чечў йиче шынжынму зозор фэли: Тади Мэсих ё шу кўнанни. Анлахў замужя фэли, зу нэмужя йўли. ¹⁹Йинви жыгэ, ниму ё шущин, ба гэжяди гўнахар жынни, жочў

Анлахұ жуангуэлэни, Анлахұ зу ба нимуди гўнахар фоншәни. ²⁰Дан жымужяли, Анлахұ ги ниму ги пиннан-вусыди гуонйинни. Нәхур Та ба Эрса йуанхуэй дафаләни; Эрса зусы Анлахұ ги ниму жанчўләди Нәгә Мәсих. ²¹Эрса ё шындо тяншонни, дындо жё Анлахұ жанчўләди шынжынму зозор фәхади йиче сычин чынхани. ²²Муса шынжын фәгуә:

«Нимуди Жонгуйди Анлахұ да нимуди дишүнму литу ба йигә, зушән вә йиәнди, Шынжын ги ниму гини.

Ниму ба Та ги ниму фәхади йиче хуа ду ё тинни.

²³Сый дан бу тин жыгә Шынжынди хуали,

ба тади минзы да Анлахұди минжын литу чүдәни».

²⁴Да Самуил шынжын дашон йиче шынжынму ду ба жыщезы жызышон йүди сычин зозор фәгуә. ²⁵Нимусы шынжынмуди хубый, Анлахұ лян нимуди зўзў-быйбый динли хәтунли. Ниму ба жыгә хәтун жешухали. Анлахұ ги Ибрацимә шынжын фәли:

«Чечў ниди Хубый Вә ги дишонди йиче жынму ду ги Вәди берекетини».

²⁶Йинви жыгә, Анлахұ ба Тади Хуәжи жанчўләли, щянтуни ба Та вон ниму жытар дафаләли, жё Та ги ниму ги берекетини, жё ниму литуди мый йигә жын ду щущин, да тади цуә лўшон жуангуэләни.

Ба Пётр лян Йихия

зә годын шонлән хуэйишон шынвынли

4 Пётр лян Йихия ги жынму фәхуади сыхур, мынмынди жигә яхўтиди ахунму, бохў сыди йигә жүнгуан лян саддукейжынму ләли. ²Жыщезы жынму чишонләли, йинцысы Пётр лян Йихия ги жынму жётәди фәди: Эрса кә хуәли, данлиндиди жынму вучонли йиху, е зу жымужя кә хуәни. ³Жыщезы жынму ба Пётр лян Йихия жуачў, ядо банфонзынили, дынди ди эр тянни, йинцысы нәгә сыхур тян кәжя хили. ⁴Хошо жынму ба Пётр лян Йихия фәхади хуа тинжян, зу щинфули. Таму литу нанжынмуди фур бонжер ю вучян жынни. ⁵Ди эр тян яхўтиди линшужынму, ложынму лян нянжинжынму зә Иерусалим чынпуни шудо

йидарнили. ⁶Нэтар ю яхүтиди да ахунму Ханна лян Каиафа, хан ю Йихия, Искандер зэмусы данлинди да ахунди чинчинни. ⁷Таму жё Пётр лян Йихия зандо таму мянчян, зу вынли тамули:

– Ниму на са лилён хуэйжэсы ви сыйди минзы ганли жыгэ сычинли?

⁸Пётр ба Анлахүди Рух жешуха, ги таму хуэйдади фэсы:

– Шинэди минжынди линшуму дэ ложынму! ⁹⁻¹⁰Жиргэ ниму дан ви жыгэ чүэзы канхолиди жыгэ хо сычин шынвын вөму, жё ниму лян йиче Исраилди жынму ду жыдоха: Назарет чынпуниди Жын, Эрса Мэсихди минзы ба ниму мянчянни занди жыгэ жынди бин канхоли. Ниму ба Эрса диндо муту шызышонли, кэсы Та вучонли йиху, Анлахү жё Та кэ хуэли. ¹¹Китабушон жымужя щели Эрсали:

«Гэ фонзыди жёнжынму!

Ниму мэ каншонди нэйикуэзы шыту чынли фон гынзыди шытули».

¹²Чүгүэ Та, сысый ба жынмуди мин ду жүбуха, йинцысы Анлахү ги дун-яшонди жынму мэ ги жү заму минди данлинди Минзы.

¹³Хуэйийиди йүанму ба Пётр дэ Йихия лян жыму дади данзы фэ хуади канжян, тэ чёчихали, йинцысы таму жыдони, жы лёнгэ жынсы мэ шон шүэди жын, зу минбыйли таму зочянсы лян Эрса зэ йидарниди жынму. ¹⁴Мэгуэсы таму са е бу нын фэ, йинцысы таму канжян бин холиди нэгэ жын лян Пётр дэ Йихия йидарни зандини. ¹⁵⁻¹⁶Хуэйийиди йүанму жё жы лёнгэ жын да годын шонлён хуэйийишон чүчи, йиху йигэ ги йигэ фэди:

– Заму ги таму ган сани? Зэ Иерусалим чынпуни жүди жынму ду жыдо таму щянли жыгэ кэрамэтили, заму бу нын ба жыгэ сычин бу жын. ¹⁷Заму ги таму гигэ ниннинди фынфу, зэ бэ жё таму йиху ви Эрсади минзы ги сысый фэ са; зу жымужя, бэ жё жыгэ сычин йүэщин садо жынму донжуннили.

¹⁸Таму зу ба Пётр лян Йихия жёгуэлэ, ги таму лёнгэр гиди ниннинди фынфу, бу жё таму ви Эрсади минзы фэ са

хуа хуэйжэсы жётё жынму. ¹⁹Кэсы Пётр лян Йихия ги таму хуэйдади фэсы:

– Ниму гэжя сылёнйихар: жё вэму зэ Анлахүди мянчян ба нимуди хуа хансы Анлахүди хуа ё тинни? ²⁰Вэму ба йиче канжянха зэмусы тинжянхади сычин яндин ё фэни!

²¹Хуэййиди йүанму ги таму кэ гилигэ ниннинди фынфу, зу ба таму фонкэли. Таму бу жыдо замужя ба Пётр лян Йихия зуйни, йинцысы йиче жынму ба йүхади жыгэ чёчи сычин канжян ду куажёнли Анлахүли; ²²бин холиди жыгэ жын е кэжя сышы дуэ суйли.

Щинфу Эрседи жынму чито Анлахүли

²³Ба Пётр лян Йихия фонкэлиди йиху, таму донвөр доли гэжяди ляншуму гынчянли, ба яхүтиди да ахунму лян ложынму фэхади хуа ги дажя ду фэли. ²⁴Ляншуму тинжян, зу йищин-йижиди читоли Анлахү, дашын фэди:

– Хүда-я! Ни ба тьян, ди, хэ зэмусы таму литу йичеди дунци ду зуэзохали! ²⁵Ни зочян жё Ниди Рух чечү Ниди хуэжи, вэмуди Даву лозы фэли:

«Вэдожынму виса чишонлэли?

Минжын виса быйкэр сыли жанчэли?

²⁶Дун-яшонди хуоншонму ду шэлүди дажонни;

линшужынму е ду шудо йидарнили,

щён фандуй Анлахү Жонгуйди лян Тади Мэсихни».

²⁷Ирод, Понтий Пилат, вэдожынму зэмусы Израилди жынму зэ жыгэ чынпуни жыншы шудо йидарнили, щён фандуй Ни жанчүлэди Хуэжи Эрсани (Та зусы Ни на щён-ю мэхадиди Мэсих). ²⁸Ни на Ниди чүанли дазо зу динхали: таму щён ган са сычин, жё жыгэ сычин йүха. ²⁹Жонгуйди! Вэму хазыр чито Ни ба таму хахү вэмуди хуа тинйихар! Ни зу ги вэму, ги Ниди нүму бонйихар, жё вэму данзы фонда чуанжё Ниди хуа. ³⁰Вэму читоди жё Ни ба Ниди шу чынкэ, ба жынмуди бин канхо, жё вэму ви Ни жанчүлэди Хуэжи, Эрседи минзы щян кэрамэти, ган чёчи сычин.

³¹Таму чито Анлахүди сыхур, таму йидарни занди нэгэ вөр мынмынди дунтанкэли. Таму зу ба Анлахүди Рух жешуха, данзы фонда чуанжэли Анлахүди хуали.

*Шинфу Эрседи жынму йищин-йижиди
гуэли жызыли*

³² Жыщезы шинфу Эрседи жынму ду йищин-йижиди гуэ жызыдини, сый ду бу фэ нагэ цэбыйсы тади; дажэ ба йиче дунши ду йидарни сыйүнди. ³³ Апостолму на да нынгу жёнли Эрса Жонгуйди кэ хуэлиди сычинли; Анлахүди щин до тамушон вандихын. ³⁴ Таму литу сый ду бу чүө са. Сый ю тандо хуэйжэсы фонзы, таму ду ба жыщезы цэбый мэдэ, ³⁵ ба чян ги Апостолму гигили; сый ё дуэшо, ги та зу фынли дуэшо. ³⁶ Таму литу ю йигэ жынлэ. Тасы зэ Кипр сын-ёнхади, тасы Левийди хубый, минзы жёди Юсуф (Апостолму ба та хан жёди Варнава, жыгэди йисысы «Чуанфэ жынмуди жын»). ³⁷ Та ба гэжяди йигэ тандо мэдэ, ба чян нашон, ги Апостолму гигили.

Анания лян Сапфира

5 Ю йигэ жынлэ, минзы жёди Анания. Та лян тади пэе Сапфира ба тамуди тандо мэдэли. ² Анания ба чянди йилэзы ги гэжэ люха, ба шынхади ги Апостолму жёгили. Тади пэе лян жыгэ сычин е дайинхали. ³ Пётр ги Анания фэди:

— Анания! Виса ни жё иблис жинли ниди щиннили, ни ги Анлахүди Рух чэли хуонли? Виса ни ба мэли тандо йилэзы чян ги ни гэжэ люхали? ⁴ Ни ба тандо хан мэ мэдэди сыхур, тасы нидилэ, мэдэди йиху, чян хансы нидилэ. Виса ни щён ган жымужяди сычинни? Ни бусы ги жынму чэли хуонли, ни ги Анлахү чэли хуонли!

⁵ Анания ба жыщезы хуа тинжян, донвэр дедо дишон, зу мэю чили. Тинжян жыгэ сычинди жынму ду хэли пали. ⁶ Жигэ шёхуэр жинлэ, ба Ананияди мэти на бу гуэчү, тэчүчи, зу сундэли.

⁷ Гуэли бонжер сангэ сышын, Ананияди пэе е жинлэли. Та хан бу жыдо йүли са сычинли. ⁸ Пётр ги та фэди:

— Ни ги вэ фэйихар, ниму мэха тандоди чян ду зэ жытарнима?

Та хуэйдади фэсы:

— Дуйдини, ду зэ жытарни.

⁹ Пётр ги та кә фәди:

– Виса ниму лёнгәр шонләнхо ба Жонгуйди Рух зыяни? Ни кан, ба ни нанжынди мәти сундәди жынму зә мын вәту зандини. Таму ба ниди мәти е тәчүчини!

¹⁰ Сапфира донвәр дедо Пётрди жүә гынчян, зу мәю чили. Нә жигә шәхуәр жинлэ, канжян та кәжя вучонли, ба та е тәчүчили, ба тади мәти мэдә нанжынди гынчянли.

¹¹ Щинфу Эрсади йиче жынму лян тинжян жыгә сычин данлинди жынму ду хәли пали.

Апостолму щянчүләди кэрамәти

¹² Апостолму зә минжынди донжунни ба хошо кэрамәти щянчүләли, ба хошо чәчи сычин ганли. Йиче щинфу Эрсади жынму ду йишин-йижиди зә Сульманә хуоншонди гуәдозыни шудо йидарнилә. ¹³ Данлинди жынму ба таму тәнә еба, кәсы чүгуә щинфу Эрсади жынму, сый ду бу ган лян таму шудо йидарни. ¹⁴ Нәхур щинфу Эрса Жонгуйди жынму йүә лә йүә дуәли, нан-нү ду юни. ¹⁵ Апостолму щянчүлә хошо кэрамәтиди йимяр, жынму ба тамуди бинжын тәдо хонзыни, гәдо чуоншон, вузышон, зывонди Пётр зугуәди сыхур, напа жә тади йинйинзы жодо жигә бинжыншонни. ¹⁶ Хошо жынму ба бинжынму зэмусы кәлон литу ю зонгуйди жынму нашон, да Иерусалим жувиди чынпуни зэмусы щәнжунни е вон Иерусалим ләли. Апостолму ба жыщезы бинжын ду канхоли.

Апостолму шули зүйли

¹⁷⁻¹⁸ Жыгәди йиху, яхүтиди да ахун лян та гынчянди жынму (тамусы саддукейжынмуди йибазы жын) нянжә Апостолмуди йимяр, зу ба таму жуачү, зә жынмуди мянчян ядо банфонзынили. ¹⁹ Кәсы хили Анлахүди Тянщян ба банфонзыди мын кәкә, ба Апостолму линчүлә, зу ги таму фәди:

– ²⁰ Ниму зә сыни чи, зандо нәтар, ги жынму ду фә, ниму замужя гуә щин гуонйиндини!

²¹ Апостолму тинли Тянщянди хуа, зу чили. Тян лёндыли, таму жинли Иерусалимди сыни, жәтәли жынмули. Нәгә сыхур яхүтиди да ахун лян та гынчянди жынму кәли годын

шонлѐн хуэйли. Таму ба йиче яхўтиди ложынму жѐлэли, йиху гиди фынфу, жѐ хуэжиму ба Апостолму да банфонзыни линчўлэни. ²²⁻²³Хуэжиму доли нэтар, ба Апостолму зэ банфонзыни мѐ зожуѐ, йўанхуэй доли годын шонлѐн хуэйишон, зу фѐди:

– Вѐму доли банфонзыни, зу канжянли: банфонзыди мын суэжиндини, бамынди жынму ду зэ мын чянту зандини. Вѐму ба мын кѐкѐ йиканса: литу сый ду мѐю!

²⁴Бохў Иерусалим сыди жўнгуан лян яхўтиди да ахунму ба жыщезы хуа тинжян, чѐчихали, ба Апостолму йўли са сычинди е мѐ минбый. ²⁵Зу жыгѐ сыхур йигѐ жын жинлѐ, зу ги таму фѐди:

– Ниму ядо банфонзыниди жынму зэ сыни занди жѐтѐ жынмудини!

²⁶Нѐгѐ жўнгуан лян хуэжиму йидарни чи, ба Апостолму линлэли. Таму ба Апостолму бусы нингўди линлэли, йинцысы таму хѐпа жынму на шыту да тамуни.

²⁷⁻²⁸Таму ба Апостолму линлѐ, жѐ зандо годын шонлѐн хуэйийиди донжунни. Яхўтиди да ахун вынли Апостолмули:

– Вѐму ги ниму гигуѐ ниннинди фынфу, бу жѐ ниму ви Жыгѐ Жынди минзы жѐтѐ жынму, кѐсы ниму ба нимуди жыгѐ жѐщўѐ садо чўан Иерусалим чынпунили, хан щѐн ба хѐли Жыгѐ Жынди минди зуй ги вѐму динни!

²⁹Пѐтр лян данлинди Апостолму хуэйдади фѐсы:

– Нандый вѐму ѐ тин жынмуди хуани, кѐсы бу тин Анлахўди хуама? ³⁰Ниму ба Эrsa диндо муту шызышон дасыли, кѐсы заму зўзў-быйбыйди Анлахў жѐ Та кѐ хуѐли. ³¹Анлахў ба Та вон гони тѐшончи, жѐ Та зуѐдо Анлахўди юбонгѐли, жѐ Та дон замуди Линшуни зѐмусы Жюминжяни, жѐ Израилди жынму ду шуцинни, ба тамуди гўнахар жынни, Анлахў зу ба тамуди гўнахар фоншѐни. ³²Вѐму ги жыщезы сычин дон гўвадини. Анлахў ги тин Та хуади жынму гихади Тади гуйжун Рух лян вѐму йидарни е дон гўвадини.

³³Годын шонлѐн хуэйийиди йўанму ба жыщезы хуа тинжян, чишонлѐли, щѐн ба Апостолму дасыни. ³⁴Кѐсы таму литу ю йигѐ фарисейжынлѐ, минзы жѐди Гамалиил, тасы

Йигэ жёмын фалүди вуста; йиче жынму ду ба та тэнэдини. Та зэ хуэйшон занчелэ, гиди фынфу, жё жынму ба Апостолму линчүчини. ³⁵Йиху та ги хуэййиди йүанму фэди:

– Шинэди Исраилди жынму! Ниму ё шёщинни, ниму щён ги жыщезы жынму ган сани! ³⁶Зочян Февда лэли, ба гэжя куади фэсы, тасы йигэ вида жын; бонжер сыбый жын гыншон та зули. Линйирни ба та дасыли, гыншон та зуди жынму ду санкэли, ба таму ду бу жанли. ³⁷Йиху ба жынмуди фур суанчүлэди сыхур, Галилея дифоншонди йигэ жын, минзы жёди Яхүти, лэли, ба хошо жынму е линшон, зудёли. Линйирни ба та е дасыли, гыншон та зулиди жынму е санкэли. ³⁸⁻³⁹Жыхур вэ ги ниму фэ жиргэ йүхади сычин: бэ фандуй жыщезы жынмули, ба таму фонкэ! Таму шинни сылёнхади зэмусы ганди сычин дансы да жынмушон лэди, жыгэ сычин яндин бу чын; дансы да Анлахүшон лэди, ниму ба жыщезы жынму дабубэ. Ниму ё щёщинни, ги Анлахү бэ дон дүшманли!

Годын шонлён хуэййиди йүанму тинжян Гамалиилди хуа, ду дайинхали, ⁴⁰ба Апостолму жёгүэлэ, на бянзы дали тамули, ги таму кэ гиди фынфу, зэ бу жё тифэ Эрседи минзы, йиху ба таму фонкэли. ⁴¹Апостолму да годын шонлён хуэййишон зудёли, шинни тэ гошинли, йинцысы таму ви Эрседи минзы шули зуйли. ⁴²Таму мый йитян зэ Иерусалимди сыни зэмусы зэ жынмуди жяни бутынди жётёли жынмули, ба Эрса Мэсихди Хо Шинвын чуанжэли.

*Апостолму ба чигэ диаконму
жянчүлэли*

6 Жыщезы жызы литу манламуди фур дуэхали. Таму литу фэ грек хуади яхүти жынму лян фэ яхүти хуади яхүти жынму зынжонкэли. Фэ грек хуади яхүти жынму гүннунди фэди, мый йитян фын чыдиди сыхур, Апостолму ба тамуди гуафуму мэ кандо нянжинни. ²Нэхур шыэргэ Апостолму ба йиче манламу жёлэ, ги таму фэди:

– Вөму бу нын ба чуанжэ Анлахүди Хо Шинвынди гунсы эрдё, зэ жуэзы гынчан фусы жынму. ³Шинэди дищүнму! Йинви жыгэ, ниму да ниму донжунни ба чигэ кочүди,

ю Анлахұди Рух дэ эргилиди жын жанчўлэ, жё таму ган жыгэ гунсычи. ⁴Дан фэ вэмучи, вэму вонху люшынди чито Анлахұни зэмусы чуанжё Тади Хо Шинвынни.

⁵Дажа ду ба Апостолмуди хуа каншонли. Таму зу ба Стефан жанчўлэли; тасы йигэ шинфу дади, шинни жешуха Анлахұ Рухди жын. Таму хан ба Филипп, Прохор, Никанор, Тимон, Пармен, Николай жанчўлэли (Николай зочянсы Антиохия чынпуниди вэдожын, та йиху жинли яхўтиди жёмынли). ⁶Дажа жё жыщезы жанчўлэди жынму зандо Апостолмуди мянчанли. Апостолму чито Анлахўли, зу ба шу гэдо тамушонли.

⁷Анлахўди Хо Шинвын зэ мангэчўр йўэшин санкэли. Зэ Иерусалим чынпуни манламуди фур дуэхали. Хошо яхўтиди ахунму е шинфули Эрсали.

Ба Стефан жуачўли

⁸Стефан ю Анлахўди нэчин дэ лилённи; та зэ жынму донжунни ганли да чёчи сычинли, шянли да кэрамэтили. ⁹Кэсы ющезы жынму фандуйли тали. Тамусы йигэ синагогади жынму (ба жыгэ синагога жёди «Зыюжынмуди синагога»), таму литу ю да Кирена дэ Александрия чынпуни, Киликия дэ Асия дифоншон лэди яхўти жынмуни. Жыщезы жынму лян Стефан зынжонкэли. ¹⁰Кэсы Анлахўди Рух ги Стефан гили эргилили, зу жымузя таму мэдый фандуй Стефанди хуа. ¹¹Нэхур таму ги жигэ жын гилищер чян, жё таму фэни: «Вэму тинжанли жыгэ жын дэцэли Муса шынжын дэ Анлахўли!» ¹²Таму на жымужяди хуа чүанди жё яхўтиди минжынму, ложынму лян нянжинжынму ду челэ, ба Стефан жуачў, линдо годын шонлён хуэййишонли. ¹³⁻¹⁴Таму жё жигэ ज्या гўва чўлэ, фэди:

– Вэму тинжан жыгэ жын дэцэ замуди сы дэ Муса шынжынди фалүни. Та фэгуэ: Назарет чынпуниди Жын Эrsa ба Иерусалимди сы цыйдёни, ба Муса шынжын ги заму гихади куйчын гэбяндёни!

¹⁵Зэ годын шонлён хуэййишон зуэди йиче жынму ду на нянжин ба Стефан динди, канжанли тади лян, зушён Тянщянди лян йиён, лёндини.

*Стефан зэ годын шонлён хуэйишон
фэли хуали*

7 Яхүтиди да ахун вынли Стефанли:
– Ю жымужяди сычиннима?

² Стефан хуэйдади фэсы:

– Шинэди жонгуйдиму дэ дишүнму, ниму тинйихар! За-муди лозы Ибрацимэ шынжын зэ Месопотамия жўди сы-хур, хан мө бандо Харран дифоншонди сыхур, куажёнди Анлахў до та гынчян лэ, ³зу ги та фэди: «Ни да ниди зўгуй зэмусы да ниди чинчин-лўжян донжунни зудёчи. Вэ ба на-гэ дифон ги ни зыги, ни зу зэ нэгэ дифоншон чи». ⁴Ибра-цимэ шынжын зу да Халдейжынмуди дифоншон зудё, бандо Харран дифоншон, жўдо нэтарли. Та дада вучонли-ди йиху, Анлахў жё та бандо ниму жыхур жўди дифоншон-ли. ⁵Нэгэ сыхур Анлахў ги Ибрацимэ шынжын зэ нэтар са цэбый ду мө йилоха, зан жүэди вэр ду мө ги. Ибрацимэ шынжын мөү эрзы еба, кэсы Анлахў ба жыгэ дифон ги та лян тади хубый шўхали, жё таму жанхани. ⁶Анлахў ги та жымужя фэли:

«Ниди хубый бандо вэгуи, зэ нэтар дон нўмуни, сы-бый нян шу япыйни.

⁷Кэсы таму ги нагэ минзў дон нўмуни, Вэ ги нэгэ минзў дин зуйни.

Йиху таму да нэгэ дифоншон зудё, зэ жытар бэвон Вэни».

⁸Анлахў лян Ибрацимэ хан динли хэтунли; суннэтисы жыгэ хэтунди йигэ жихо. Йинви жыгэ, Ибрацимэ шын-жынди эрзы Исхар сын-ёнхади йиху, ди ба тьян Ибрацимэ ги та зўли суннэтили. Лян жыгэ йиён, Исхар шынжын ги тади эрзы Ягўбэ е зўли суннэтили, Ягўбэ шынжын ги тади шыэргэ эрзыму е зўли суннэтили (таму зусы яхўти жынму-ди шыэргэ зўди жонгуйдиму).

⁹Дагэму нянжэли тамуди шўнди Юсуфли, зу ба та мэдэ Египетли. Кэсы Анлахў нэтар ба Юсуф йигэр мө лёха, ¹⁰ба тади йиче кўнан дуэдэли. Юсуф шынжын зандо Египетди хуоншон фараон мянчянди сыхур, Анлахў ги та гиди

эргили, хан жё фараон до ташон юли нэчинли. Фараон жё Юсуф гуан тади йиман гуйжя дэ тади йиман цэбыйни. ¹¹ Гуэли жинян, зэ Египет лян Ханаан йиче дифоншон йүли вэнянли, жынму шули да кунанли. Замуди зүзү-быйбый е мэю чыдилэ. ¹² Ягүбэ шынжын тинжян Египет ю лёншыни, зу туйибян ба тади эрзыму (жы зусы замуди зүзү-быйбый) вон нэтар дафачили. ¹³ Ди эрбян таму чиди сыхур, Юсуфди дишүнму ба Юсуф жындыйли. Да жыгэшон фараон жыдоли Юсуфсы нагэ зүди жын. ¹⁴ Юсуф ба жынму дафадо та дада Ягүбэ шынжын гынчянли, чинди жё та лян чүан жящя до Египет лэни. Долэди чинчин йиман ю чишы вугэ жынлэ. ¹⁵ Зу жымужя, Ягүбэ шынжын доли Египетли. Зэ нэтар та лян заму данлинди зүзү-быйбый вучонли. ¹⁶ Ба тамуди мэти сундо Сихем дифоншон, мэдо ёдуннили (зочян жыгэ ёдунсы Ибращимэ шынжын на йинчян да Еммор эрзымуди шунимэхади).

¹⁷ Анлахү ги Ибращимэ ба щүхади хуа ганванди сыхур долэдыйли. Зэ Египет Израилди жынмуди фур дуэхали. ¹⁸ Нэхур Египет хуоншонди вифыншон йигэ щин хуоншон жаншонли; та жынбудый Юсуф шынжын. ¹⁹ Жыгэ хуоншон сыжанчөди ба заму минзүди жынму япыйли, нингүди жё замуди зүзү-быйбый ба гэжяди йүэвазыму эрдо вэту, бу жё таму хуэ. ²⁰⁻²¹ Зу жыгэ сыхур ба Муса шынжын сын-ёнхали. Та хокандихын. Ба та зэ жяни нэли сангэ йүэди йиху, е эрдо вэтули. Нэхур фараонди нүр ба Муса нашон ёнхуэли, ба та суанчын та гэжяди эрзыли. ²² Муса шынжын ба египетжынмуди йиче эргили щичүэли; лян фэхуа дэ ган сычинди бынсы та ду юли.

²³ Муса шынжын сышы суйди сыхур, щён жянйихар тади дишүнму, Израилди жынмуни. ²⁴ Йихуэй та жянли йигэ египетжын ба йигэ Израилди жын чифудини. Муса шынжын зу ба Израилди жын бохүчүли, ви та боли чу, ба нэгэ египетжынди мин хэли. ²⁵ Муса шынжын сылөнди тади дишүнму нын канлэ: Анлахү чечү та щён ба тамуди мин жүохани, кэсы таму мэ минбый. ²⁶ Ди эр тян, Муса шынжын канжян лёнгэ Израилди жын йигэ да йигэдини. Та щён ба таму чүанфэйихарни, жё таму хохани, зу фэди: «Э-ё, нимусы

дишүнму! Виса ниму йигэ чифу йигэдини?»²⁷ Кэсы чифу та дишүнди нэгэ жын ба Муса сонгуэчи, зу фэди: «Сый жё ни ги вэму дон линшу зэмусы вын гуансыди жынни?»²⁸ Зушён зуэргэ ни ба нэгэ египетжын дасыли йиён, ни е шён ба вэ дасынима?»²⁹ Муса ба жыгэ хуа тинжян, зу да Египет подё, доли Мадиам дифоншон, жўдо нэтарли. Нэтар ба тади лёнгэ эрзы сын-ёнхали.

³⁰ Гуэли сышы нян, зэ Синай сан жувиди савэни, Муса шынжын зэ хуэ жуэди цыязы литу ба йигэ Тянщян канжянли. ³¹ Муса шынжын ба жыгэ сычин канжян, чёчиха, зу вон чян чи, шён канйихар, жыгэ додисы са сычин. Зу нэхур та ба Анлахўди шынчи тинжянли: ³² «Вэсы ни зў-зў-быйбыйди Анлахў, зусы Ибрашимэ, Исхар дэ Ягўбэди Анлахў». Муса шынжын хэли па, бу ган кан. ³³ Анлахў ги та кэ фэди: «Ба ниди хэ туэдё! Йинцысы ни занди жыгэ вэрсы Вэ жанчўлэди гуйжунди вэр. ³⁴ Вэ ба Вэди минжын зэ Египет шу зуйди ду шянщярди канжянли, ба тамуди кўшын е тинжянли. Вэ зу да тяншон халэ, шён ба таму жефончўлэни. Жыхур Вэ ба ни дафадо Египет чини».

³⁵ Кэсы Израилди жынму ба Муса мэ жын, ги та фэгуэ: «Сый жё ни ги вэму дон линшу зэмусы вын гуансыди жынни?» Кэсы Анлахў чечў цыязы фу литу лэди нэгэ Тянщян ба Муса шынжын дафачи, жё та дон линшу зэмусы жефонжынли. ³⁶ Муса шынжын ба Израилди жынму да Египет линчўлэли. Та зэ Египет, зэ Хун Хэзыни, зэ савэни сышы нян щянли хошо кэрамэти, ганли хошо чёчи сычин. ³⁷ Та ги Израилди жынму фэгуэ: «Вонху нимуди Жонгуйди Анлахў жё йигэ зушён вэ йиёнди Шынжын зэ нимуди дишүнму литу сын-ёнхани». ³⁸ Муса шынжын лян Израилди жынму зэ савэни шудо йидарнили. Зэ Синай саншон Тянщян лян та фэгуэ хуа; нэхур та лян замуди зўзў-быйбый зэ йидарнилэ. Муса шынжын ба Анлахўди ги минди хуа жешуха, шён ба жыщезы хуа ги заму фэни.

³⁹ Кэсы замуди зўзў-быйбый мэ шён тин тади хуа. Таму ба Муса шынжын мэ кандо нянжинни, щинни шён вон Египет хуэйчини. ⁴⁰ Таму ги Харунэ шынжын фэли: «Ни ги вэму зў жигэ хўдаму, жё таму зэ вэмуди туни зу. Вэму бу

жыдо, ба вәму да Египет линчүлэди Муса йүли са сычинли». ⁴¹Таму зу на жинзы зүли йигә нювазы, ги та жүли гүрбанили. Канжян на гәжяди шу зуэзохади дунщи таму гошцинали. ⁴²Кәсы Анлахү ба Тади лянмян да таму гынчян жуангуәчили, мә вон таму, жә таму бэвон таму щән бэвонди тяншонди щинщюни, зущән шынжынмуди фушон щехади йиён:

«Исраилди жынму! Нандый ниму зә савәни сышы
нян литу ги Вә жүгүә гүрбанима?

⁴³Мәю, ниму мә жүгүә. Ниму ба Молох хұдади
жонфон,
зэмусы Рефан хұдади щинщю тәшонли,
Ба жыщезы на шу зұхади ёнзы ниму щән бэвонни!
Йинви жыгә Вә ба ниму бандо Вавилон дифонди
вәтуни».

⁴⁴Замуди зүзү-быйбый зә савәни ю Анлахүди жонфонлэ. Анлахү ги Муса шынжын гиди фынфу, жә та жочү та канжянди ёнзы ба жыгә жонфон зұхани. ⁴⁵Йиху замуди зүзү-быйбый ба жыгә жонфон да тамуди лозымушон жешухали. Анлахү зә таму туни ба данлин минзүди жынму ганчүчили. Таму лян Навинди эрзы Иса йидарни жан нэгә дифонди сыхур, ба жонфон е нуәдо нэтарли. Йичыр до Даву хуоншонди сыхур жыгә жонфон хан зә нэтарлэ. ⁴⁶Даву хуоншон юли Анлахүди нэчинли, зу вынли Анлахүди кухуан, жә та ги Исраил жынмуди Анлахү щюгә йигә сыни. ⁴⁷Ба жыгә сы Сульманэ хуоншон цэ ги Анлахү щюгәли. ⁴⁸Шыдашы вида Анлахү мә зә жынму щюгәхади сыни жүди, зущән шынжын фәхади йиён:

⁴⁹«Анлахү фәди:

„Тянсы Вә зуәди вифын;

дисы Вә гә жүәди вифын.

Ниму ба нагә сы ги Вә щюгәни?

Вә зә нагә вифын нын зуәни?

⁵⁰Нандый ба жы йиче ду бусы Вә гәжя
зуэзохадима?“»

⁵¹Нимуди щинчон ниндихын! Ги нимуди щин зэмусы эрдүә ду мә зүгүә «суннәти»! Ниму, зущән нимуди зүзү-быйбый

йиён, йинавар фандуй Анлахұди Рухдини! ⁵² Нагә шынжын мә шугуә ниму зўзў-быйбыйди япый? Шынжынму зозор фәгуә: йигә Гундожын ләни. Кәсы нимуди зўзў-быйбый ба жыщезы шынжын ду дасыли. Жыхур ниму ба Нәгә Гундожын е мәчўчи, ба Та дасыли. ⁵³ Ниму ба Анлахұди фалү жешухали. Жыгә фалүсы чечў Тянщянму гихади, кәсы ниму мә зунхў жыгә фалү!

Ба Стефан на шыту дасыли

⁵⁴ Годын шонлән хуэййиди йўанму ба Стефанди хуа тинжян, щинни тә чишонлэли, ба я нәди ду щёндини. ⁵⁵ Стефан ба Анлахұди Рух жешуха, вончў тяншон канлихар, зу ба Анлахұди гуонлән канжянли, ба Эрса зә Анлахұди юбонгә занди е канжянли. ⁵⁶ Та зу фәди:

– Вә канжяндини: тян кәкэли, Аданди Хубый зә Анлахұди юбонгә зандини!

⁵⁷ Таму дашын ханди, на шу ба гәжяди эрдуә сыйчў, вон чян пуди, зу ба Стефан жуачўли. ⁵⁸ Йиху ба та линдо чынпу вәту, на шыту ба та датуэли. Ги Стефан динха зуйди жынму ба гәжяди готу йишон ги йигә щёхуэр гиги, жё та жоқанни (жыгә щёхуәрди минзы жёди Савл). ⁵⁹ Таму ба Стефан на шыту дади сыхур, Стефан чито Жонгуйди фәди:

– Эрса Жонгуйди! Ни ба вәди луэхур жешуха!

⁶⁰ Йиху Стефан гуйха, дашын ханди:

– Жонгуйди! Ни ба жыгә гўнахар ги таму фоншә!

Ба жыгә хуа фәван, та вучонли.

8 Савл е гили чинйўан, жё ба Стефан дасыни.

Эрсади жёхуэй шули да япыйли

Нәйитян зә Иерусалим чынпуни Эрсади жёхуэй шули да япыйли. Чўгуә Апостолму йиче щинфу Эрсади жынму ду подо Яхўтиди лян Самарияди заёнди дифоншонли. ² Ющезы хәпа Анлахұди жынму дакў-луанхўди ба Стефанди мәти сундәли. ³ Жыгә сыхур Савл ба Эрсади жёхуэй далансанли. Та жин нагә фонзы, зу зә нэтар ба щинфу Эрсади нанжын дә нўжын ду жуачў, ядо банфонзынили.

*Ба Анлахүди Хо Шинвын
зэ Самария дифоншон чуанжэлли*

⁴Шинфу Эрасди жынму сандёди йиху, таму гуэли хошо дифонли, зэ нэтар ба Анлахүди Хо Шинвын чуанжэлли. ⁵Филипп доли Самария дифоншонди йигэ чынпуни, та ги нэтар жўди жынму ба Мэсих чуанжэлли. ⁶Жынму ба Филипп фэди хуа ду люшынди тинли. Таму йимян тин, йимян кан та щянчўлэди кэрамэтили. ⁷Нэхур зонгуйму да хошо жынму кэлон литу дашын ханди чўлэли. Филипп ба хошо хэ тантанзы бинди жынму дэ чўэзыму канхоли. ⁸Нэгэ чынпуниди жынму ду гошинзали.

⁹Нэтар ю йигэ жынлэ, минзы жёди Шимэ. Та на фачи зочян жё Самария дифоншон минжын ду чёчихали. Та гэжя е сылёнди тасы йигэ вида жын. ¹⁰Нэгэ чынпуниди жан го дэ ди фынбырди жынму ду люшынди тин тадини. Дажа фэди:

– Жыгэ жынсы Анлахүди да лилён.

¹¹Жыгэ жын на фачи ба жынму михунли нэму дади гунфу, йинви жыгэ таму ду люшынди тинли тади хуали.

¹²Филипп ба Анлахүди Гуйжя зэмусы Эрас Мэсихди минзы чуанжэди сыхур, жынму ду шинфули. Йиху Филипп ба таму нан-нү ви Эрасди минзы ду зэ фи литу щили. ¹³Нэгэ Шимэ е шинфули. Ба та зэ фи литу щилиди йиху, та йинавар лян Филипп йидарни зудини. Та ба Филипп щянчўлэди вида кэрамэти зэмусы чёчи сычин канжян, тэ чёчихали.

¹⁴Апостолму зэ Иерусалим чынпуни тинжян Самария дифоншонди жынму ба Анлахүди Хо Шинвын жешухали, зу ба Пётр лян Йихия дафадо таму гынчянли. ¹⁵Пётр лян Йихия доли нэтар, зу ви шинфулиди жынму чито Анлахүли, жё таму ба Анлахүди Рух жешухани, ¹⁶йинцысы нэхур Анлахүди Рух хан мэ до тамушон, ба таму гуон ви Эрас Жонгуйди минзы зэ фи литу щили. ¹⁷Пётр лян Йихия ба шу гэдо тамушон, таму зу ба Анлахүди Рух жешухали. ¹⁸⁻¹⁹Зочян фэхади нэгэ Шимэ канжян: Апостолму ба шу гэдо сыйшон, нэгэ жын зу ба Анлахүди Рух жешухадини. Шимэ зу ги Апостолму ба чян налэ, фэди:

– Ниму ба жыгә бынсы е ги вә гиги, жё вә ба шу гәдо сыйшон, жё нэгә жын зу ба Анлахұди Рух жешушон.

²⁰ Кәсы Пётр ги та фәди:

– Жё ни лян ниди йинчян йидарни шәдәчи, йинцысы ни сыләнди ба Анлахұди лицин на чян нын мәшонма! ²¹ Зә вәму ганди сычиншон ни мәю сыса шёнган, йинцысы зә Анлахұ мянчян нисы бу шыщинди. ²² Ни шушин, ба ниди жыгә гўнахар жын, читоди жё Жонгуйди ба ни шинниди жыгә ха сылән фоншәни. ²³ Вә канчүләли, ни нянжәди-хын; гўнахар ба ни чанчүли.

²⁴ Шимә ги Пётр лян Йихия фәди:

– Ниму ви вә чито Жонгуйди, бә жё ниму фәхади жыщезы сычин лян вә йұха.

²⁵ Пётр лян Йихия зә нэтар ба Жонгуйди хуа миндамин фәли, йиху вон Иерусалим чынпуни хуэйчили. Лўшон таму зә Самарияди хошо шёнжуонни е чуанжәли Анлахұди Хо Шинвынли.

*Филипп зәмусы Эфиопия нұхуоншонди
йигә гуанжын*

²⁶ Анлахұ Жонгуйди Тянцян ги Филипп фәди:

– Ни челә, вон нанбонгә зу, до нэгә да Иерусалим вон Газа чынпуни зуди лўшон чи.

(Жысы йигә мәжын-янди лў.)

²⁷⁻²⁸ Филипп зу чили. Лўшон та ба йигә Эфиопияди жын пынжянли. Жыгә жынсы Эфиопияди Кандака нұхуоншонди йигә годын гуанжын, та гуан йиче гуйжәди чянди-ни. Жыгә гуанжын зочян зә Иерусалим чынпуни чигуә, зә нэтар бәвонли Анлахұли. Хазыр та зуәди мачә хуэйчиди-ни, нян Исаяя шынжынди фудини. ²⁹ Анлахұди Рух ги Филипп фәди:

– Ни до нэгә мачә гынчян чи.

³⁰ Филипп погуәчи, зу тинжянли, жыгә гуанжын нян Исаяя шынжынди фудини. Филипп зу вынли тали:

– Ни минбыйнима, ни нян садини?

³¹ Гуанжын хуэйдади фәсы:

– Дан сысый ги вә бу пәщәли, вә замужә нын минбыйни?

Та чинди жё Филипп шон тади мачэшон, лян та йидарни зуэхани. ³²Та зэ Китабушон нянди хуасы жымужяди:

«Ба Та, зушён йигэ ён йиён, линдо зээнди жын гынчянли,

Та зушён йигэ зэ жё-ёнможын шуниди ёнгозы бу чў шынчиди йиён, йишын ду мэ чў.

³³Ба Та дижанди сыхур, сый ду ба Та мэ бохў.

Сый нын фэ Тади хубый?

Йинцысы Тади гуонийн зэ дун-яшон кэжа доли йиршонли».

³⁴Гуанжын зу вынли Филиппли:

– Ни ги вэ пэщёйихар, шынжын фэхади жыщезы хуа фэ сыйдини? Фэ та гэжядинима, хансы фэ данлинди жындини?

³⁵Филипп зу да жыщезы Китабушонди хуа дашон, ба Эрсади Хо Шинвын ги та чуанжёли. ³⁶⁻³⁷Лўшон таму гуэли йигэ дифон, нэтар ю фини. Гуанжын зу фэди:

– Жытар ю фини, ни ба вэ ви Эрсади минзы зэ жыгэ фи литу ши, нынчынма?

³⁸Гуанжын зу гиди фынфу, жё ба мачэ занхани. Филипп лян та йидарни хали фили, зу ба гуанжын зэ фи литу ши-ли. ³⁹Таму да фи литу чўлэди сыхур, Анлахўди Рух ба Филипп нашон зудёли; ба та бужянли. Гуанжын гого-щин-щинди зули тади лўли. ⁴⁰Нэхур жынму зэ Азот чынпуни ба Филипп пынжянли. Йиху та вон Кесария чынпуни зудёли, зу луди сыхур гуэли хошоди щёнжуонли, зэ нэтар чуанжё-ли Анлахўди Хо Шинвынли.

Савл щинфули Эрсади

(An 22:6-16; 26:12-18)

9¹⁻² Савл хан ба Эрса Жонгуйди манламу хахўди, щён хэ тамуди минни. Та до яхўтиди да ахун гынчян, читоди жё да ахун ги та ба ги Дамаск чынпуниди синагога щехади щин гигини, жё та ба щинфу Эрса Жонгуйди жынму жуачў, ба нан-нў ду бончў линдо Иерусалим чынпуни-ни. ³Савл зэ лўшон зуди до Дамаск чынпу гынчяндый-ли, мынмынди да тяншон щянчўлэди гуонлён ба та да

сыжу-баха жолёнли. ⁴Та падо дишон, зу тинжянли йигэ шынчи ги та фэди:

– Савл, Савл! Ни виса жуй Вэдини?

⁵Савл вынди:

– Жонгуйди! Нисы Сый?

Нэгэ шынчи хуэйдади фэсы:

– Вэсы ни жуйди Эrsa. ⁶Челэ, жин чынпуни чи, нэтар жынму ги ни фэни, ни ё ган сани.

⁷Лян Савл йидарни зуди жынму ду занхали, са хуа ду фэбучўлэли. Таму ба нэгэ шынчи тинжянли, кэсы ба сый ду канбужян. ⁸Савл да дишон челэ, ба нянжин зынкэли, кэсы сыса ду канбужян. Лян та йидарни зуди жынму ба та линдо Дамаск чынпунили. ⁹Савл сан тян сыса ду канбужян, сыса ду мэ чы, е мэ хэ.

¹⁰Дамаск чынпуни ю йигэ манлани, минзы жёди Анания. Йихуэй Эrsa Жонгуйди на чёчиди фонфа ги та фэди:

– Анания!

Та хуэйдади фэсы:

– Жонгуйди! Вэ тиндини.

¹¹⁻¹²Эrsa Жонгуйди ги та фэди:

– Ни челэ, до Дуандуарди хонзыни чи, нэтар зэ Яхўтиди ज्याни ба йигэ жын зожуэ. Тади минзы жёди Савл, тасы Тарс чынпуниди жын. Хазыр та чито Анлахўдини. Та канжянли йигэ чигуэ сычин: йигэ жын, минзы жёди Анания, жинлэ ба шу гэдо ташонли, жё та йўанхуэй ба са ду канжянни.

¹³Кэсы Анания фэди:

– Жонгуйди! Хошо жынму ги вэ фэгуэ, жыгэ жын зэ Иерусалим чынпуни ги шинфу Ниди жынму гангуэ хошо ха сычин! ¹⁴Жыхур та доли Дамаск чынпунили, на яхўтиди да ахун ги та гихади чўанли щён ба йиче шинфу Ниди жынму жуачўни.

¹⁵Эrsa Жонгуйди ги Анания кэ фэди:

– Ни чи! Вэ ба жыгэ жын жанчўлэли, жё та ги вэдожынму лян тамуди хуоншонму зэмусы Израилди жынму ба Вэди минзы чуанжёни. ¹⁶Вэ гэжя ги та фэни, та ви Вэди минзы ё шу замужяди кўнанни.

¹⁷Анания донвэр зудёли. Та жинли нэгэ фонзы, ба шу гæдо Савлшон, зу фæди:

– Вæди Савл дишүн! Ни вон жытар лæди сыхур, зэ лүшон жянли Эрса Жонгуйдили. Та ба вэ вон жытар дафалэли, жё ни йуанхуэй ба са ду канжянни, хан ба Анлахүди Рух жешухани.

¹⁸Зу нэгэ сыхур да Савлди нянжиншон зушён йүжя йиён дехалэли, та донвэр ба са ду канжянли. Савл челэ, Анания зу ба та ви Эрсади минзы зэ фи литу щили. ¹⁹Йиху Савл чыли йидяр чыди, тади шынзы е юли жинли.

*Савл зэ Дамаск чынпуни
чуанжёли Эрсали*

Савл зэ Дамаск чынпуни лян манламу йидарни жўли жи тян. ²⁰Нэхур та зэ нэтарди жигэ синагога литу чуанжёли Эрсали, фæли Эрсасы Анлахүди Эрзы. ²¹Йиче жынму тинжян, ду чёчиха, зу фæди:

– Жыгэ жын зэ Иерусалим чынпуни ба щинфу Эрсади жынмуди мин хэли! Та доли жытар, е щён ба щинфу Эрсади жынму жуачў, ги яхўтиди да ахунму жёгини!

²²Кэсы Савлди хуа йуэцин юли жинли. Та на щянщярди хуа пæщёли Эрсасы Мэсих, йинви жыгэ Дамаск чынпуниди яхўти жынму бу нын лян та зынжон. ²³Гуэли хошо жызы, яхўти жынму шонлёнхо, щён ба Савл дасыни. ²⁴Кэсы Савл ба тамуди жанчё жыдоли. Таму йитян йивэщи зэ чынпуниди гэмын гынчян дынди, щён ба Савл дасыни. ²⁵Йихуэй хили Савлди манламу ба та гæдо да куонзыни да чынпуниди чёншон фонхачили.

Савл доли Иерусалим чынпунили

²⁶Савл доли Иерусалим чынпуни, лян Эрсади манламу щён лэвонни. Кэсы таму бу щинфу Савл чынха Эрсади манлали; дажя ду хэпа тадини. ²⁷Гуон йигэ Варнава ги та бонли мон, ба та линдо Апостолму мянчян, ги дажя жёнли, замужя Савл зэ лүшон жянли Эрса Жонгуйдили, Жонгуйди замужя ги Савл фæли хуали. Варнава хан ги таму фæли, Савл замужя зэ Дамаск чынпуни ви Эрсади минзы

данзы фонда жёнли хуали. ²⁸Зу жымузя Савл лян Апостолму юли лэвонли, зэ Иерусалим чынпуни ви Эrsa Жонгуйди минзы е данзы фонда чуанжэли. ²⁹Савл ги фэ грек хуади яхүти жынму е чуанжэли, хан лян таму зынжонли, кэсы таму щён ба Савл сы жянчэди дасыни. ³⁰Шинфу Эrsaди жынму ба жыгэ жянчэ жыдоли, зу ба Савл линдо Кесария чынпунили, йиху ба та дафадо Тарс чынпунили. ³¹Нэгэ сыхур зэ Яхүти, Галилея дэ Самария дифоншонди Эrsaди жэхуэй пиннан-вусыди гуэли жызыли. Жэхуэйди жынму хэпа Жонгуйдини, Анлахүди Рух ги таму бонмондини. Жэхуэй юли фажонли, жынмуди фур е дуэхали.

*Пётр зэ Лидда зэмусы Иоппия чынпуни
ганхади сычин*

³²Нэгэ сыхур Пётр сыжу-баха зужуангуэлэли. Йихуэй та доли Лидда чынпуни жүди шинфу Эrsaди жынму гынчянли. ³³Нэтар та пынжянли йигэ жын, минзы жэди Эней. Жыгэ жын хэ тантанзы биндини, та зэ чуоншон кэжя тонли ба нянли. ³⁴Пётр ги та фэди:

– Эней! Эrsa Мэсих ба ниди бин канхоли. Челэ, ба ниди вузы нашон!

Эней донвэр челэли. ³⁵Зэ Лидда зэмусы Сарон чынпуни жүди йиче жынму ду ба та канжян, зу шинфули Эrsa Жонгуйдили.

³⁶Иоппия чынпуни ю йигэ нуманлани, минзы жэди Та-вифа (на грек йүян жэди Доркада, жыгэди йисысы «Лин-ён»). Та ганли хошо хо сычин, жэшинди ги чүнжынму бонмондини. ³⁷Йихуэй та хэли бин, вучонли. Жынму ба тади мэти щили, гэдо эр цынзы лушонди фонзынили. ³⁸Иоппия чынпу ли Лидда чынпу бу йүан. Зэ Иоппия жүди манламу тинжян Пётр зэ Лидда чынпунини, зу ба лёнгэ жын дафадо та гынчян, читоди ги Пётр фэди:

– Чин ни куэ до вэму жытар лэ!

³⁹Пётр донвэр челэ, лян таму йидарни чили. Пётр доли нэтарли, жынму ба та линдо готуди нэгэ фонзынили. Йиче гуафуму зэ Пётр гынчян күдини, ба Доркада хан мэ вучонди сыхур фынхади хансанзы дэ данлинди йишон ду ги

Пётр зыгили. ⁴⁰Пётр жё дажя ду чўчи, зу гуйха читоли Анлахўли, йиху жочў мэти жуангуэлэ, фэди:

– Тавифа, ни челэ!

Тавифа донвэр ба нянжин зынкэ, ба Пётр канжян, зу челэли. ⁴¹Пётр ба шу чынкэ, бонди жё та челэли. Йиху Пётр жё шинфу Эрсади жынму лян гуафуму ду жинлэ, ба кэ хуэлиди Доркада ги таму жёгили. ⁴²Иоппияди жынму ду ба жыгэ сычин жыдоли. Хошо жынму шинфули Эрса Жонгуйдили. ⁴³Пётр зэ Иоппия чынпуниди йигэ зў пизы жёнжынди жяни жўли хошо жызы. Жыгэ жёнжынди минзы жёди Шимэ.

Пётр дэ Корнилий

10 Кесария чынпуни ю йигэ жынлэ, минзы жёди Корнилий. Тасы йигэ жүндуйди жүнгуан (ба жыгэ жүндуй жёди «Италияди жүндуй»). ²Корнилий лян та жяниди жынму ду хэпа Анлахўни, ба Анлахўди фынфу зунхўдини. Та ги яхўтиди чүнжынму чинчир сан нетидини, йинавар жэшинди чито Анлахўдини. ³Йихуэй шонву гуэли бонжер сангэ сышышли, Корнилий шянщярди канжянли йигэ чигуэ сычин: Анлахўди Тянщян доли та гынчан, зу ги та фэди:

– Корнилий!

⁴Корнилий ба нэгэ Тянщян динди, хэли па, зу фэди:

– Жонгуйди! Ни шён ги вэ фэ сани?

Тянщян ги та фэди:

– Анлахў кэжя ба ниди чито тинжянли, ба ни санхади нети е канжянли. ⁵Жыхур ни ба жынму дафадо Иоппия чынпуничи, чинди жё йигэ жын, минзы жёди Шимэ (тади ёзысы Пётр), вон жытар лэ. ⁶Та зэ зў пизыди йигэ жёнжын Шимэди жяни дон кидини; жыгэ жя зэ хэзы бонгёрнини.

⁷Лян Корнилий фэлихуади Тянщян зудэли. Корнилий зу ба та жяниди лёнгэ хуэжи зэмусы йинавар фусы тади хэпа Анлахўди йигэ бохўжын жёлэ, ⁸ба жыгэ йўхади сычин ги таму ду фэли, йиху ба таму дафадо Иоппия чынпунили.

⁹Ди эр тьян, таму доли Иоппия чынпу гынчяндыйли. Бонжер шонвуди сыхур, Пётр шонли фондинзышон, чито Анлахұ чили. ¹⁰Тади дўзы вэли, щён чыни. Нэгэ жяниди жынму ба шонву чыди фан шэлүди сыхур, Пётр канжянли йигэ чигуэ сычин: ¹¹тян кэкэли, зущён дакуэ бу йиёнди дунщи халэли. Сыгэ гуэзы бончўди жы куэ бу луэдо дишонли; ¹²литу ю дишонди заён хуэвэр, чёр дэ пачунни. ¹³Хан йигэ шынчи ги та фэди:

– Пётр! Челэ, ба жыщезы хуэвэр зэдэ, зу чы!

¹⁴Кэсы Пётр фэди:

– Жонгуйди, будыйчын! Вэ йүнзун мэ чыгуэ са зонди хуэйжэсы буганжинди дунщи, жысы харам!

¹⁵Нэгэ шынчи ги Пётр кэ фэди:

– Ба Анлахұ зўчын ганжинди дунщи ни бэ суан зонди!

¹⁶Жыгэ сычин йўли сан бян, йиху ба жыгэ чигуэ дунщи йуанхуэй надо тьяншонли. ¹⁷Пётр бусўщинхали, бу жыдо та канжянди жыгэ чигуэ сычин ю са йисыни. Жыгэ сыхур, Корнилий дафалэди жынму ба Щимэди жя кэжя зожуэли, зэ фонмын вэту занди, ¹⁸дашын вынди:

– Йигэ жын, минзы жэди Щимэ (тади ёзысы Пётр) зэ жытар дон кидинима?

¹⁹Пётр хан ба нэгэ чигуэ сычин сылёнди сыхур, Анлахұди Рух ги та фэди:

– Сангэ жын зо нидини! ²⁰Ни челэ, хачи, лян таму йидарни чи, бэ шанкили, йинцысы Вэ ба таму дафалэли.

²¹Пётр хачи, ги нэ сангэ жын фэди:

– Вэ зусы ниму зоди жын. Ниму виса лэли?

²²Таму хуэйдади фэсы:

– Вэмуди жүнгуан Корнилий ба вэму дафалэли. Тасы йигэ хэпа Анлахұди гундожын, йиче яхўти жынму ба та тэнедини. Анлахұди йигэ Тянщян ги та фэли, жё та чин ни до та жяни чи, та щён ба ниди хуа тинйихарни.

²³Пётр зу чинди жё таму жин фонзыни; таму зэ нэтар занли йивэщи. Ди эр тьян Пётр лян таму йидарни зули; да Иоппия чынпуни лэди жигэ щинфу Эрседи жынму е лян та йидарни зули. ²⁴Гуэли йитян таму доли Кесария чынпунили. Корнилий ба тади чинчин зэмусы йўнди ляншуму

кәжя жёдо тади жянили. ²⁵ Пётр жинлэди сыхур, Корнилий вон чян чи, гуйдо тади жүә дихали. ²⁶ Пётр бонди жё Корнилий челэ, зу ги та фэди:

– Ни челэ! Вә есы жын.

²⁷ Пётр лян Корнилий фәхуади сыхур, жинли фонзыни-ли. Пётр канжян фонзыни хошо жынму шудо йидарниди, ²⁸ зу ги таму фэди:

– Ниму ду жydони, жочў вәмуди куйчын, яхўти жын бунын лян данлинди минзўди жынму лэвон хуэйжәсы зә тамуди жяни дон ки, йинцысы жысы харам. Кәсы Анлахў ги вә кәжя зыгили: ба сый ду бу нын суанчын зонди хуэйжәсы буганжинди. ²⁹ Йинви жыгә, ниму ба жынму дафалэли; таму жё вә лэди сыхур, вә мә ги дуанжүәхуа, зу лэли. Жыхур вә вын нимудини, виса ниму ба вә жёлэли?

³⁰⁻³¹ Корнилий фэди:

– Сы тян зочян, шонву гуэли бонжер сангә сышынди сыхур, вә зә жяни читоли Анлахўли. Мынмынди йигә чуангуонлән йишонди жын зандо вәди мянчян, зу фэди: «Корнилий! Анлахў кәжя ба ниди чито тинжянли, ба ни санхадиди нети е канжянли. ³² Жыхур ни ба жынму дафадо Иоппия чынпуни чи, чинди жё йигә жын, минзы жёди Шимэ (тади ёзысы Пётр) зә жытар ләни. Та зә зў пизыди йигә жёнжын Шимэди жяни дон кидини; жыгә жя зә хэзы бонгәрнини». ³³ Йинви жыгә вә донвәр ба жынму дафадо ни гынчянли. Ни лэли, жысы йигә хо сычин. Жыхур вәму ду зә Анлахўди мянчян щён тинйихар, Жонгуйди ги ни ги са фынфуну, жё ни фә са хуани.

*Пётр зә Корнилийди жяни
чуанжёлли*

³⁴ Пётр зу фәкә хуали:

– Жыхур вә жыншы жыдоли, Анлахў ба йиче жынму ду йимур-йиёнди жешудини. ³⁵ Булүн нагә минзўди жын дан хәпа Та, е ган гундо сычин, Анлахў зу до ташон ю нэчинни. ³⁶ Ниму ду жydони, Анлахў чечў Эрса Мәсих (жы зусы йиче жынмуди Жонгуйди) ги Исраилди жынму фәли хуали, ба пиннан щинвын фәгили. ³⁷⁻³⁸ Йихия шынжын ги

жынму чуанжэли, хан ба таму ви Анлахүди минзы зэ фи литу щили. Ниму е жydони, жыгэди йиху зэ Галилея зэ-мусы Яхүти чүан дифоншон йүли са сычинли: Анлахү ба Тади Рух дэ лилён ги Назарет чынпуниди Эрса гигили. Ниму е жydони, замужя Эрса ба заёнди дифон зужуангуэ-лэ, ганли хо сычинли; иблис ба сый начүли, Эрса ба таму канхоли, йинцысы Анлахү лян Эрса зэ йидарнилэ. ³⁹Эрса зэ Иерусалим чынпуни зэмусы яхүти жынму жүди данлин дифоншон ганли хошо сычин. Вэму ги жыщезы йиче сычин дон гүвамудини. Яхүти жынму ба Эрса диндо муту шызышон, дасыли. ⁴⁰Кэсы ди сан тьян Анлахү жё Та кэ хуэли, хан жё жынму ба Та щянщярди канжянли. ⁴¹Бусы йиче минжын ба Эрса канжянли, гуон вэму канжянли, йинцысы Анлахү ба вэму жанчүлэли, жё вэму дон гүвамунни. Эрса вучонли зэмусы кэ хуэли йиху, вэму лян Та йидарни лян чы дэ хэли. ⁴²Эрса ги вэму гиди фынфу, жё вэму ба Анлахүди Хо Щинвын ги минжын чуанжэни, ги да-жя миндамин фэни, Анлахү ба Эрса жанчүлэ, жё Та ги хуэ жынму зэмусы вучонлиди жынму дон вын гуансыдини. ⁴³Йиче шынжынму ду миндамин фэли Тали: сый щинфу Эрса, ба нэгэ жынди гүнахар ви Тади минзы фоншэни.

*Данлин минзүди жынму
ба Анлахүди Рух жешухали*

⁴⁴Пётр хан фэхуади сыхур, Анлахүди Рух халэ, луэдо йиче тин жыщезы хуади жынмушонли. ⁴⁵Лян Пётр йидарни лэди щинфу Эрсади яхүти жынму канжян, Анлахү замужя ба Тади Рухди лищин ги данлин минзүди жынму гигили, тэ чёчихали, ⁴⁶йинцысы таму тинжян жыщезы жынму на жынбудыйди йүян фэ хуадини зэмусы куажён Анлахүдини. Нэхур Пётр фэди:

— ⁴⁷Жыщезы жынму лян вэму йиён ба Анлахүди Рух кэ-жя жешухали, сый ду бу нын донгуа ба таму ви Эрса Мэсихди минзы зэ фи литу щини!

⁴⁸Пётр зу гиди фынфу, жё ба таму ви Эрса Мэсихди минзы зэ фи литу щили. Йиху жыщезы жынму читоди жё Пётр лян таму йидарни зэ зан житяни.

*Пётр зэ Иерусалим чынпуниди жёхуэйшон
жёнли хуали*

11 Апостолму лян Яхүти дифоншон шинфу Эрсади жынму тинжянли: ющезы данлин минзүди жынму е ба Анлахүди Шинвын жешухали. ²Йинви жыгэ, Пётр доли Иерусалимди сыхур, шинфу Эрсади зүгүэ суннэтиди жынму пипин тали, зу фэди:

– ³Ни жинли мэ зүгүэ суннэти данлин минзүди жынмуди жянили, хан лян таму йидарни чыли фанли!

⁴Пётр зу ба жыгэ сычин йибу-йибуди ги таму пэшэли:

– ⁵Вэ зэ Иоппия чынпуни чито Анлахүди сыхур, канжянли йигэ чигуэ сычин: зушён йи дакуэ бу йиёнди дунши да тяншон халэли. Да сыгэ гуэзы бончүди жы куэ бу луэдо вэ гынчянли. ⁶Вэ люшынди канлихар, литу ю дишонди заён хуэвэр, чёр дэ пачунни. ⁷Йиху вэ хан тинжянли йигэ шынчи ги вэ фэди: «Пётр! Челэ, ба жыщезы хуэвэр зэдэ, зу чы!» ⁸Кэсы вэ фэди: «Жонгуйди, будыйчын! Вэ йүнзун мэ чыгуэ са зонди хуэйжэсы буганжинди дунши, жысы харам!» ⁹Жыгэ шынчи ди эрбян да тяншон лэ кэ фэди: «Ба Анлахү зүчын ганжинди дунши ни бэ суан зонди!» ¹⁰Жыгэ сычин йүли сан бян, йиху ба жыгэ чигуэ дунши йүанхуэй надо тяншонли. ¹¹Зу жыгэ сыхур, да Кесария чынпуни дафалэди сангэ жын зандо вэ жүди фонзы мынчян, зо вэдини. ¹²Анлахүди Рух жё вэ бу шанкиди лян таму йидарни чили. Жытар занди жы люгэ дишүн е лян вэ йидарни чили. Вэму доли Корнилийди жянили. ¹³Корнилий ги вэму фэли, та замужя канжянли йигэ Тянщян до тади фонзынили, зу ги та фэди: «Ни ба жынму дафодо Иоппия чынпуничи, чинди жё йигэ жын, минзы жёди Шимэ (тади ёзысы Пётр), вон жытар лэ. ¹⁴Та шён ги ни фэ хуа, жё ба ни лян ни жяниди йиче жынмуди мин жюхани». ¹⁵Вэ фэ хуади сыхур, Анлахүди Рух халэ, луэдо тамушонли, зушён Та зочян луэдо замушонди йиён. ¹⁶Вэ зу ба Эрса Жонгуйди зочян фэхади хуа жичелэли: «Йихия шынжын ви Анлахү на фи ба жынму щили. Анлахү ба ниму на Тади Рух щини». ¹⁷Анлахү ги жыщезы данлин минзүди

жынму гихади личин зущён ги заму – щинфу Эрса Мэсих Жонгуйди жынму гихади йиён. Дан жымужя, вэсы сый, вэ замужя нын донгуа Анлаху ганди сычиннима?

¹⁸ Дажя ба жыщезы хуа тинжян, йишын ду мэ чў. Йиху таму куажён Анлахуди фэди:

– Анлаху е жё данлин минзуди жынму шущин, жын тамуди гўнахарни, е жё таму йинавар хуэни!

*Антиохия чынпуни
Эрсади жёхуэй*

¹⁹ Дасы Стефанди сыхур, щинфу Эрсади жынму шули да япыйди йимяр, сандо сыжу-бахали. Ющезы жынму доли Финикия, Кипр зэмусы Антиохия чынпунили. Нэхур таму гуон ги яхўти жынму чуанжэли Хо Щинвынли. ²⁰ Таму литу юди Кипр зэмусы Кирена чынпуниди жынму доли Антиохия чынпуни, ба Эрса Жонгуйди Хо Щинвын ги грекжынму чуанжэли. ²¹ Жонгуйди лилён лян таму зэ йидарнилэ. Хошо жынму щинфули, жочў Жонгуйди жуангуэлэли. ²² Иерусалим чынпуниди жёхуэй ба жыгэ сычин е тинжянли. Таму зу ба Варнава дафадо Антиохия чили. ²³ Варнава доли нэтар, зу канжян Анлахуди щин до нэтарди жынмушон вандихын. Варнава гошинзали, зу чуанфэди жё дажя щинжэжэди щинфу Эрса Жонгуйдини. ²⁴ Варнаваасы йигэ хожын, Анлаху ба Тади Рух ги та гигили, тади щинфу дадихын. Нэтар хошо жынму щинфули Эрса Жонгуйдили. ²⁵ Йиху Варнава вон Тарс чынпуни чили, щён зойихар Савлни. ²⁶ Ба Савл зожуэ, Варнава зу ба та линдо Антиохия чынпунили. Таму лёнгэр жынжыр йинян лян жёхуэйди жынму шудо йидарни, жётёли хошо жынмули. Зэ Антиохия чынпуни ба Эрсади манламу туйбян жёчын «Христианжынму»ли*.

²⁷ Жыгэ сыхур жигэ шынжын да Иерусалим чынпуни чўлэ доли Антиохияли. ²⁸ Таму литу ю йигэ жынлэ, минзы жёди Агав. Та ба Анлахуди Рух жешуха, занчелэ зу миндамин

* 11:26 «Христианжынму»сы Эрса Мэсихди жынму. «Мэсих» на грек йуян фэди «Христос».

фэди, вонху дун-яшон йү да вэнянни. (Жыгэ сычинсы Клавдий дон Рим хуоншонди сыхур йүхади.) ²⁹Манламу шонлөнхо, мый йигэ жын жочү гэжяди нынгу ги Яхүтиди дифоншон жүди дишүнму бонмонли, ба чян ги таму сунгини. ³⁰Таму зу жымужя ганли, ба Варнава лян Савл дафачи, жё таму ба чян ги пресвитерму дэгини.

Ба Пётр ядо банфонзынили

12 Жыгэ сыхур Ирод хуоншон ба Эрса жёхуэйди жигэ жын жуйкэли. ²Та гиди фынфу, жё ба Ягүбэ Йихияди гэгэ на до садёли. ³Ирод жьдони, та жымужя ганлиди йимяр, яхүти жынму разыли. Йинви жыгэ та ба Пётр е жуачүли. (Жыгэ сычинсы мэю жёмянди мэмэ жечиди сыхур йүхади.) ⁴Ирод ба Пётр жуачү, ядо банфонзынили, хан жё сы базы бамынди жын ба та бохүни (мый йибазы ю сыгэ донбинжынни). Ирод дынди яхүтиди Пасха жечи гуэли йиху, щён ба Пётр линчүлэ, зэ жынмуди мянчян ги та дин зуйни. ⁵Йинви жыгэ, ба Пётр зэ банфонзыни хохорди бохүдини. Эрса жёхуэйшонди жынму ду ви цошин Пётр читоли Анлахүли.

Пётр да банфонзыни чүлэли

⁶Ирод щён ба Пётр линчүлэ зэ жынмуди мянчян ги та дин зуйди нэйтянди зычян, Пётр хили зэ лёнгэ бохүжын донжунни фидини, ба та на лёнгэ тешын суэчүдини, банфонзыди мын чянту хан ю бамынди жынни, бохү Пётрдини. ⁷Мынмынди Жонгуйди йигэ Тянщян зандо нэтарли; гуонлён ба банфонзы жолёнли. Нэгэ Тянщян ба Пётрди жыгуэзы пыйлихар, жё та шинлэ, зу фэди:

– Куэ челэ!

Лёнгэ тешын донвөр да Пётрди шушон дехалэли. ⁸Тянщян ги та кэ фэди:

– Ба дэзы жишон, ба хэ чуаншон!

Пётр зу жочү тади хуа ганли. Тянщян хан фэди:

– Ба готуди йишон чуаншон, гыншон вэ зу!

⁹Пётр гыншон Тянщян да банфонзыни чүлэ еба, кэсы бу жыдо Тянщян ганди сычинсы жындыма, хансы жяди.

Пётр сылэнди, та зүли фимынли. ¹⁰Таму гуэли ту йибазы лян ди эр базыди бамынди жынму, йиху доли вон чынпуни зуди темын гынчянли. Жыгэ мын гэжя кэкэли. Таму чүлэ, зу гуэли йигэ хонзыли. Мынмынди нэгэ Тянщян да Пётр гынчян зудё, ба та бужянли. ¹¹Жыхур Пётр цэ минбыйгуэлэ, фэди:

– Жыхур вэ жыдони жысы жыншыди сычин. Жонгуйди ба Тади Тянщян дафалэли, та ба вэ да Иродди шуни жefonчүлэли, бу жё вэ шу яхүти минжын зывонди ги вэ гиди кўнан.

¹²Пётр ба жыгэ минбый, зу вон Йихияди мама Мариамди жяни чили (ба жыгэ Йихия хан жёди Марк). Хошо жынму шудо нэтар читоли Анлахүли. ¹³Пётр ко гэмынди сыхур, йигэ нү хуэжи, минзы жёди Рода лэли, шён канйихар сый лэли. ¹⁴Та ба Пётрди шынчи жынды, гошинзали, йинви жыгэ та ба кэ мынди кэкэ вондэли, похуэйчи зу ги дажя фэди:

– Пётр зэ гэмын вэту зандини!

¹⁵Таму ги нү хуэжи фэди:

– Ни шодёли!

Нү хуэжи ниннинди фэди, жысы шызэди сычин. Таму кэ фэди:

– Жысы Пётрди Тянщян.

¹⁶Нэхур Пётр бу тынди ко мындини. Таму ба мын кэкэ, зу канжян жыгэ шызэсы Пётр. Таму чёчихали. ¹⁷Пётр ба шу жоди жё таму нанвынхани, зу ги таму фэли, Жонгуйди замужя ба та да банфонзыни линчүлэли. Пётр хан жё таму ба жыгэ шинвын ги Ягүбэ зэмусы данлинди дишүнму фэ-йихарни, йиху да жыгэ фонзыни чүлэ, зули данлинди дифоншонли.

¹⁸Жэту чүлэди сыхур, бамынди жынму шинни тэ бу нанвынли, хуонхуон-луанлуанди, бу жыдо лян Пётр йүли са сычинли. ¹⁹Ирод гиди фынфу, жё ба Пётр зожуэни, кэсы мэ зожуэ. Та ба бамынди жынму шинвынли, зу гиди фынфу, жё ба таму садёни. Жыгэди йиху, Ирод да Яхүти дифонни зудё, доли Кесария чынпуни, жўдо нэтарли.

Иродди вучон

²⁰ Нэхур Тир лян Сидон чынпуниди жынму ги Ирод чишонлэли, зу йинви жыгэ тамуди дэбёму доли Ирод гынчянли. Таму щянтуни ба йигэ каншу хуоншон жяди гуанжын (минзы жёди Власт) чүанфэхо, йиху та читоди жё Ирод лян таму хони, йинцысы таму жўди дифон да хуоншонди дифоншон дый лёншыдини. ²¹ Динхади нэйитян, Ирод ба хуоншонди йишон чуаншон, зуэдо хуоншонди вифыншон, ги минжын фэли хуали. ²² Жынму ханди:

– Жыгэ бусы жынди шынчи, жысы Анлахўди шынчи!

²³ Анлахўди Тянщян донвэр пудо Иродшонли, йинцысы та мэ куажён Анлахў. Йиху чун ба Ирод чыдэ, та вучонли.

²⁴ Анлахўди Хо Шинвын зэ мангэчўр йўэшин санкэли; щинфу Эрсади жынмуди фур е дуэхали. ²⁵ Варнава лян Савл ба ги таму йитуэхади сычин ганван, зу да Иерусалим чынпуни зудэ, хуэйчили. Йихия (ба та хан жёди Марк) е лян таму йидарни зудэли.

Ба Варнава лян Савл жянчўлэли

13 Антиохия чынпуни Эрсади жёхуэйшон ю жигэ шынжын лян вустани, таму зусы Варнава, Шимэ (ба та хан жёди Нигер), Лукий (тасы Кирена чынпуниди йигэ жын), Манан (тасы лян Ирод хуоншон йидарни жондади) зэмусы Савл. ² Таму фынзэди зэмусы бэвон Жонгуйди сыхур, Анлахўди Рух ги таму фэли:

– Ниму ги Вэ ба Варнава лян Савл жянчўлэ, Вэ ги таму йитуэхади сычин жё таму ганчи.

³ Таму фынзэди зэмусы чито Анлахўди, зу ба шу гэдо Варнава лян Савлшон, ба таму дафачили.

*Варнава лян Савл
доли Кипрди хэдонили*

⁴ Анлахўди Рух ба Варнава лян Савл дафачили. Таму доли Селевкия чынпуни, зэ нэтар шонли йигэ чуан, доли Кипр хэдонили. ⁵ Йиху таму доли Саламин чынпуни, нэтар зэ яхўти жынмуди жигэ синагога литу жёнли Анлахўди Хо

Шинвынли. Йихия-Марк е ги таму бонли монли. ⁶Таму ба чүан хэдо зужуангуэлэ, доли Пафос чынпунили. Нэтар таму жянли йигэ яхүти жын, минзы жёди Вар-Иса; тасы йигэ хуэйжадүди жын, ба гэжя суандисы йигэ шынжын. ⁷Вар-Исасы жыгэ хэдоди жыгуанжынди ляншу. Жыгэ жыгуанжын минзы жёди Сергей-Павел, тасы йигэ ю эргилиди жын; та чинди жё Варнава лян Савл лэ, шён ба Анлахүди Хо Шинвын тинйихарни. ⁸Кэсы нэгэ хуэйжадүди жын (ба та хан жёди Элима, жыгэди йисысы «Хуэйжадүди жын») фандуйли тамули; та шён донгуа жыгуанжынни, бу жё та щинфу. ⁹⁻¹⁰Жыхур Савл (тади данлинди минзысы Павел) ба Анлахүди Рух жешуха, на нянжин дин нэгэ хуэйжадүди жын, зу фэди:

– Нисы иблисди эрзы! Нисы йиче гундо сычинди дүшман! Са гуйжи ни ду юни, ни йинавар ба Жонгуйди жыншыди лү зүфандини! ¹¹Жыхур Жонгуйди зуй нидини: жё ни чынха хазыни, канбужян жэтуди гуонлённи!

Вучи дэ хинан донвөр ба Элимади нянжин зонянли; та зэ сыжу-баха зужуангуэлэ, читоди жё жынму ба тади шу жуачү, ги та лин лүни. ¹²Жыгуанжын ба жыгэ сычин канжян, зу щинфули; ба Жонгуйди жёшүэ тинжян та чөчихали.

Павел лян Варнава

доли Писидия дифоншонди Антиохия чынпунили

¹³Йиху Павел лян тади ляншуму шонли йигэ чуан, да Пафос чынпуни чүлэ, доли Памфилия дифонди Перга чынпунили. Нэтар Йихия-Марк да таму гынчян зудё, хуэйли Иерусалим чынпунили. ¹⁴Таму е да Перга чынпуни зудё, доли Писидия дифонди Антиохия чынпунили. Шанбэди нэйитян таму жинли синагога, зуэхали. ¹⁵Ба Торати Китабу лян шынжынмуди фу нянван, синагогади йимаму ба жынму дафадо таму гынчян, ги таму фэди:

– Дишүнму! Ниму дан ю шён чүанфэ дажяди са хуани, ниму фэ!

¹⁶Павел занчелэ, ба шу золихар, зу фэди:

– Шинэди Израил жынму лян йиче хэпа Анлахүди жынму, ниму тинйихар! ¹⁷Израил жынмуди Анлахү ба

замуди зүзү-быйбый төжянхали. Таму зэ Египет жүди сы-
хур, Анлахү жё таму чынха йигэ видади минзүли. Йиху
Анлахү на Тади да лилён ба таму да Египет линчүлэли.
¹⁸ Анлахү бонжер сышы нян зэ савэни жыннэли тамули.
¹⁹ Йиху Та ба Ханаан дифоншонди чигэ минзү щёмедёли,
ба тамуди дифон ги Тади минжын гигили. ²⁰ Жыгэди йиху,
Анлахү бонжер сыбый вушы нян йичыр до Самуил шын-
жынди сыхур жё вынгуансыди жынму ба минжын гуанли.
²¹ Йиху таму читоди жё Анлахү ги таму ги йигэ хуоншон-
ни, Анлахү зу ба Вениамин зүди Кисди эрзы Саул жанчү-
лэ, жё та сышы нян литу донли тамуди хуоншонли. ²² Йиху
Анлахү ба Саул да хуоншонди вифыншон туйдэ, жё Даву
дон тамуди хуоншонни. Анлахү жымузя фэли Давули: «Вэ
ба Иессейди эрзы Даву кэжя зожуэли; Вэди шин до ташон
разы, та ба Вэ йичеди вонщён ду ганни». ²³ Зыху Анлахү
жочү Та гэжя щүхади хуа зэ Давуди хубый литу ги Израил-
ди жынму гили йигэ Жюминжя, Тади минзы жёди Эрса.
²⁴ Эрса ба Тади гунсы хан мө ганди сыхур, Йихия шынжын
ги йиче Израилди минжын чуанжёди, жё таму шущинни,
жын тамуди гүнахарни зэмусы ба таму ви Анлахү зэ фи ли-
ту щини. ²⁵ Йихия шынжын ба тади гунсы ганвандыйли,
нэхур та ги Израилди жынму фэли: «Ниму сылэнди вэсы
сый? Вэ бусы ниму дынди Нэгэ Жын. Кэсы вэ хуту лэ йи-
гэ Жынни, вэ бу жыгү гэ Тади хэдэзычи».

²⁶ Щинэди дищүнму! Ибращимэ шынжынди хубыйму лян
йиче хэпа Анлахүди жынму! Жыгэ жюминди Щинвынсы ги
заму гигиди! ²⁷ Зэ Иерусалим чынпуни жүди жынму лян та-
муди линшуму ба Эрса мө жын, ба мый йигэ шанбэ зэ си-
нагога литу нянди шынжынмуди хуа е мө минбый. Таму ги
Эрса динли зуйли, зу жымузя ба шынжынмуди жыщезы
хуа ду ганчынли. ²⁸ Таму ги Эрса ба йигэ дин сызуйди йин-
йир ду мө зожуэ, кэсы читоди жё Пилат гиди фынфу, жё ба
Эрса дасыни. ²⁹ Таму ба Китабушон щеха фэ Эрсади йиче
сычин ганван, зу ба Эрсади мэти да муту шызышон чүхалэ,
сундо ёдуннили. ³⁰ Кэсы Эрса вучонли йиху, Анлахү жё Та
кэ хуэли. ³¹ Йиху, сый зочян лян Эрса йидарни да Галилея
дифоншон доли Иерусалим чынпунили, таму хын жихуэй

ба Эрса канжянли. Жыщезы жынму зэ Исраил жынмуди мянчян йичыр до жыхур ги Эрса дон гүвадини. ³²⁻³³ Вәму е ба жыгә Хо Шинвын ги ниму фәдини: Анлахұ жә Эрса кә хуәли, зу жымужа Анлахұ ба Та гәжя зочян ги замуди зү-зү-быйбый шұхад ийче сычин ги заму кәжя ганчынли. Зу-щән Зәбур Китабушонди ди эргә сура фәхади йиён:

«Нисы Вәди Эрзы;

Вә, Анлахұ, жиргә ба Ни сын-ёнхали».

³⁴ Эрса вучонли йиху, Анлахұ жә Та кә хуәли, вонху Та йүнзун бу вучон. Анлахұ жымужа фәли жыгә сычинли:

«Вә ги Даву шынжын ба гуйжунди, кочұди берекети шұхали.

Ба жыгә берекети Вә ги ниму гигини».

³⁵ Зәбур Китабушон данлинди йигә сура хан фәди:

«Ни бу жә Ни шыщинди Хуәжиди мәти ладо».

³⁶ Даву шынжын зә жыгә дун-яшон хуәди сыхур, ба Анлахұди вонщән ганван, вучонли; ба тади мәти мәдо тади зүзү-быйбый гынчян, тади мәти ладоли. ³⁷ Кәсы Анлахұ жә Сый кә хуәли, Тади мәти мә ладо.

³⁸⁻³⁹ Шинәди дишүнму! Жә ниму ду жыдо: Эрса ба фоншә гүнахарди цинвын ги ниму гигили. Хан жә ниму жыдони, жочұ Муса шынжынди фәлу ба нимуди йиче гүнахар будый фоншә. Кәсы сый шинфу Эрса, ба тади йиче гүнахар фоншәни. ⁴⁰ Йинви жыгә ниму ё щәщинни, бә жә шынжынму фәхади сычин лян ниму йүли:

⁴¹ «Канбуче Анлахұди жынму-я!

Ниму кан! Жә ниму чәчини, йиху жә ниму вучонни!

Йинцысы Вә зә ниму жұди жызыни ганди сычин жыму вида,

сый дан ги ниму пәщә, нәхур ниму ду бу шинфу!»

⁴² Павел лян Варнава да синагога зудәди сыхур, дажя чинди жә таму зә йигә шанбә хан ләни, ги таму ба жыщезы сычин дуэйү жәнйихарни. ⁴³ Синагогади хуэйи сандә, хошо яхұти жынму лян жинли яхұти жәмынди данлин минзүди жынму гыншон Павел лян Варнава зули. Лёнгә Апостолму чүанфәди жә таму йишин-йижиди шинә Анлахұни. ⁴⁴ Зә йигә шанбә, жыгә чынпуди бонжер йиче жынму

ду лэ, щён ба Жонгуйди Хо Шинвын тинйихарни. ⁴⁵ Яхүти жынму ба жыщезы жынму канжянди йимяр, щинни тэ нянжэли, зу фандуйли Павелди хуали, хан хэщүэ тали. ⁴⁶ Кэсы Павел лян Варнава данзы фонда фэди:

– Ба Анлахүди хуа щянтуни ги ниму ё фэни. Кэсы ниму ба жыгэ хуа мэ жешуха, ниму сылэнди, ниму гэжя бу жыгү йинавар хуэни. Йинви жыгэ, вэму да ниму гынчян зудё, до вэдожынму гынчян чини, ⁴⁷ йинцысы Жонгуйди ги вэму кэжя гили жымужяди фынфули:

«Вэ кэжя жё Ни чынха вэдожынмуди гуонлэнли, зу жымужя Ни ба чүан дун-яшон жынмуди мин жюхани».

⁴⁸ Вэдожынму ба жыщезы хуа тинжян, гошцинзали, хан ба Жонгуйди Хо Шинвын куажёнли. Анлахү ба сый жанчүлэли, жё таму йинавар хуэни, таму ду щинфули. ⁴⁹ Жонгуйди Хо Шинвын сандо нэгэ чүан дифоншонли. ⁵⁰ Кэсы яхүти жынму сы жанчёди жё нэгэ чынпуниди линшужынму зэмусы хэпа Анлахүди, жан годын фынбырди нүжынму фанчелэ, жуйли Павел лян Варнавали, ба таму да нэгэ дифоншон ганчүчили. ⁵¹ Павел лян Варнава лёнгэр ба жүэшонди тў ги таму туги, вон Икония чынпуни зудёли. ⁵² Зэ Антиохия чынпуни жүди манламу гуэли гого-щинщинди жызыли; Анлахүди Рух лян таму зэ йидарнилэ.

*Павел лян Варнава
зэ Икония чынпунини*

14 Зэ Икония чынпуни е йүли лян жыгэ йимур-ийёнди сычинли. Павел лян Варнава жинли яхүти жынмуди синагогали; нэтар хошо яхүти жынму лян данлин минзүди жынму ба тамуди хуа тинли, зу щинфули. ² Кэсы мэ щинфуди яхүти жынму ба вэдожынму ханчелэ, жё таму фандуй щинфу Эрсади дищүнмули. ³ Павел лян Варнава лёнгэр зэ нэтар жүли хошо жызы; таму данзы фонда ба Эрса Жонгуйди чуанжэли. Эрса Жонгуйди чечү таму щянли кэрамэтили, ганли чёчи сычинли, зу жымужя жё жынму жыдо, Павел лян Варнава фэ Тади нэчинди хуасы жынди. ⁴ Нэгэ чынпуниди жынму йинви жыгэ фынкэли,

ющезы пянщёнли яхўти жынмули, ющезы пянщёнли Апостолмули. ⁵Кэсы яхўти жынму, вэдожынму лян тамуди линшуму йидарни щён ба Апостолму чифуни, на шыту ба таму дасыни. ⁶Апостолму ба жыгэ сычин жыдо, зу подо Ликаония дифоншонди Листра лян Дервия чынпунили зэмусы жувиди дифоншонли, ⁷зэ нэтар таму е чуанжёли Анлахўди Хо Шинвынли.

***Павел лян Варнава зэ Листра
дэ Дервия чынпунини***

⁸Листра чынпуни ю йигэ баннянхан, та да сын-ёнха зу-сы чүэзы, на гэжяди жүэ йүнзун мә зугуэ. ⁹Нэгэ жын тинли Павелди чуанжёли. Павел канчўлэли та ю шинфуни зэмусы щён жё Павел ба тади бин канхони. Павел зу лян нянжин ба та динди, ¹⁰ги та дашын фэли:

– Челэ, жё ниди лёнгэ туй жыжыр занха!

Нэгэ жын тэчелэ, зу зукэли. ¹¹Жынму ба Павел ганхади сычин канжян, зу на Ликаония дифонди хуа дашын ханди:

– Хўдаму на жынди ёнзы доли заму гынчянли!

¹²Таму ба Варнава жёди Зевс, ба Павел жёди Гермес*, йинцысы тасы йигэ фэжызы. ¹³Нэгэ чынпуни ю йигэ жынлэ, тасы ги Зевс жү гўрбаниди жын. Жыхур та ба ню лашон, ба хуар чўанчўанзы нашон, доли чынпуниди гэмын гынчян, щён лян жынму йидарни ги Апостолму жү гўрбанини. ¹⁴Варнава лян Павел тинжян таму щён ган жымугэ сычинни, зу ба гэжяди йишон чэлан, подо жынму донжунни, дашын хантуэли:

– ¹⁵Ляншуму! Ниму виси ган жымугэ сычиндини? Вэму лян нимусы йиёнди жынму! Вэму доли жытар, щён ба Анлахўди Хо Шинвын чуанжёни, жё ниму ба жыщезы са ду бу жыди данлинди хўдаму лёха, шущин, жочў йинавар хуэди Анлахў жуангуэлэни (Та ба тьян, ди, хэ лян таму литу йиче дунши ду зохали). ¹⁶Зочян Анлахў жё йиче минзўди жынму зу таму гэжяди лўни. ¹⁷Кэсы Та йинавар на заёнди

* ^{14:12} Грекжынмуди гўдэ жёмын литу Зевссы дин дади хўда, Гермессы тади сун шинди хўда.

хо сычин жё жынму ду жыдони, Та гэжя зэни, билүн: Та ба йу да тяншон ги ниму гидини, жё ди зэ йүнди сыхур ги шучынни. Та ги ниму ба чыди гидини, жё нимуди шин го-
щинни.

¹⁸ Апостолму на жыщезы хуа шищир донгуали жынму-
ли, бу жё ги таму жү гүрбани. ¹⁹ Кэсы да Антиохия лян
Икония чынпуни лэли жигэ яхүти жын; таму жё жынму
на шыту ба Павел дали, сылэнди та кэжя вучонли, зу ба
та ладо чынпу вэту эрхали. ²⁰ Кэсы манламу зандо Павел
жувиди сыхур, Павел занчелэ, хуэйли чынпунили. Ди эр
тян та лян Варнава зули Дервия чынпунили.

Павел лян Варнава
хуэйли Антиохия чынпунили

²¹ Павел лян Варнава зэ Дервия чынпуни ба Анлахүди
Хо Шинвын чуанжёли; йинви жыгэ хошо жынму чынха
Эрсади манламули. Йиху таму лёнгэр хуэйли Листра лян
Икония чынпунили, линху доли Писидия дифоншонди
Антиохия чынпунили. ²² Павел лян Варнава зэ мый йигэ
дифоншон ги манламуди шинни гили жинли, жё таму
йинавар ю шинфуни, хан ги таму фэди:

– Заму дан бу шу хошо кўнан, зу бу нын чын Тяншон
Гуйжяди жынму!

²³ Павел лян Варнава хан зэ мый йигэ жёхуэйшон ба шу
гэдо пресвитермушон, фын зэ зэмусы читоли Анлахүли,
йиху ба таму ги Эрса Жонгуйди жёгили, йинцысы таму
шинфули Тали.

²⁴ Йиху Павел лян Варнава гуэли Писидия дифон, доли
Памфилия дифоншонли. ²⁵ Таму зэ Перга чынпуни чуан-
жёли Хо Шинвынли, йиху доли Атталей чынпунили, ²⁶ зэ
нэтар шонли йигэ чуан, хуэйли Сирия дифоншонди Ан-
тиохия чынпунили. Зочян зэ жыгэ чынпуни Анлахү ба
таму жанчүлэ, ги таму гили бонцу, жё таму ган ги таму
йитуэхади сычинни. Жыхур таму ба жыгэ сычин кэжя
ганванли. ²⁷ Павел лян Варнава йүанхуэй доли Антиохия
чынпуни, зу ба Эрса жёхуэйди жынму жёлэ, ги таму
жёнли Анлахү чечү таму ганли са сычинли, Та замужя ги

вэдожынму ба щинфуди мын кэкэли. ²⁸ Нэтар таму лён-гэр лян манламу йидарни жўли хошо жызы.

Апостолму зэ Иерусалим чынпуни кэли да хуэйли

15 Ющезы жынму да Яхўти дифоншон доли Антиохия чынпунили, ба щинфу Эрседи жынму жётёкэли:

– Ги ниму дан жочў Мусади фалү бу зў суннэти, ба нимуди мин жюбуха!

² Кэсы Павел лян Варнава фанчелэ, лян таму чихынхын-ди зынжонли жыгэ вынтели. Йинви жыгэ, дажя шонлён-хо, ба Павел, Варнава лян нэгэ дифоншон Эрседи жёхуэй-ди жигэ жын йидарни дафадэ Иерусалим чынпунили, жё ги Апостолму дэ пресвитерму ги жыгэ вынтини. ³ Жёхуэй ба таму дафачили. Лўшон таму гуэли Финикия лян Самария дифонли, сыжу-баха ги щинфу Эрседи жынму жёнли вэдожынму замужя шущинли, жочў Анлахў жуангуэлэли. Йиче щинфуди жынму ба жыгэ щинвын тинжян, гошин-зали. ⁴ Таму доли Иерусалим чынпуниди йиху, Эрседи жёхуэй, Апостолму лян пресвитерму ду ба таму жейинли. Таму ги дажя жёнли Анлахў чечў таму ганхади сычинли. ⁵ Кэсы щинфу Эрседи жигэ фарисейжын занчелэ, зу фэди:

– Ги данлин минзўди жынму яндин ё зў суннэтини; таму е яндин ё зунхў Мусади фалүни!

⁶ Апостолму лян пресвитерму кэли йигэ да хуэй, щён ба жыгэ вынти толүнни. ⁷ Таму зынжонли хошо гунфу, йиху Пётр занчелэ, ги дажя фэди:

– Щинэди дищүнму! Ниму жыдони, Анлахў датур зэ ниму литу ба вэ жянчўлэ, жё вэ ба Анлахўди Хо Щинвын ги данлин минзўди жынму чуанжёни, жё таму тинжян зу щинфуни. ⁸ Анлахў ба мый йигэ жынди щин ду жыдони. Та ба Тади Рух ги данлин минзўди жынму гигили, зуцён Та ги заму гигиди йиён, зу жымужя жё дажя ду жыдо, Та ба данлин минзўди жын е жешухали. ⁹ Анлахў ба заму лян таму бу фынщё. Таму щинфулиди йимяр, Анлахў зу ба тамуди щин зў ганжинли. ¹⁰ Дан жымужя, хазыр ниму виса щён зыян Анлахўни? Заму лян замуди зўзў-быйбый ба зунхў фалүди данзы ду данбуче. Виса ниму щён ба жыгэ

данбучеди данзы гәдо данлин минзүди манламуди банжиншонни? ¹¹Жыгә мә дуйди! Заму щинфудини: Эрса Жонгуйдиди нэчин ба замуди мин лян тамуди йиён дажюхали.

¹²Дажа йишын ду мә чў, йиху хан тинли Варнава лян Павел фәхади хуали: Анлахў чечў жы лёнгә Апостолму зә вэдожынмуди мянчян щянчўли са кәрамэтили, ганли са чёчи сычинли. ¹³Таму фөван, Ягўбә кә фәди:

– Щинэди дищүнму! Ниму ба вә тинйихар! ¹⁴Щимэ жён фәли Анлахў замужя цощин данлин минзүди жынмули, зә таму литу ба жынму жанчўлэ, жё таму чынха Та гәжяди минжынни. ¹⁵Шынжынму фәхади хуа лян жыгә е дуйдо йидарнили. Китабушон жымужя щедини:

¹⁶Жонгуйди фәди: «Жыгәди йиху, Вә хуэйлэни, ба Давуди тадёлиди фонзы йүанхуэй щюгечелэни. Вә ба тади лансандёди фонзы щюгечелэни, жё та йүанхуэй занхани.

¹⁷Зу жымужя, вонху данлинди йиче жынму зэмусы ю Вәди минзыди йиче минзүди жынму ба Вә, тамуди Жонгуйди, ду зони».

Ган жыщезы сычинди Жонгуйди жымужя фәли.

¹⁸Анлахў да шонвонняншон ба Та ганди йиче сычин ду жыдони.

¹⁹Ягўбә кә фәди:

– Йинви жыгә, вә сылёнди, заму бә зуэнан данлин минзүди жынму, жё таму жочў Анлахў жуангуэлэ. ²⁰Заму ще йигә щин, ги таму ба фынфу гиги: бә жё таму чы ги данлин хўдаму жүгиди буганжинди гўрбани, бә хўлон, бә чы жүсы сынлинди жу зэмусы щезу. ²¹Йинцысы да шонвонняншон, мый йигә шанбә зә гәчўрди синагога литу ду ю нян Муса фалүди жынмуни, мый йигә чынпуни ду ю жён тади жётёди жынни.

Ги щинфу Эрсади данлин минзүди жынму щехади щин

²²Нэхур Апостолму, пресвитерму зэмусы чүан жёхуэйди жынму шонлёнхо, щён ба дэбёму жанчўлэ, лян Павел дә Варнава йидарни дафадо Антиохия чынпуни чини. Таму зу ба Яхўти (та данлинди минзы жёди Варсавва) лян Сила

жянчўлэли. Таму лёнгəрсы дищўнмуди линшу. ²³Ги таму гихади щин литу жымужя щедини:

«Вəму, Апостолму, пресвитерму дэ дищўнму ги Антиохия чынпуни зэмусы Сирия лян Киликия дифоншон жўди данлин минзўди дищўнму дэ сэлямудини!

²⁴Вəму тинжянли, ющезы жынму да вəму гынчян чўчи, на таму гэжяди хуа жё ниму бунавынли. Шыдашы вəму ги таму мə ги фə нэщезы хуади фынфу. ²⁵Йинви жыгə вəму йидарни шонлєнхо, ба лёнгə дэбё жянчўлэ, дафадо ниму гынчянни. Таму лян вəмуди щинэ ляншуму, Варнава дэ Павел, зэ йидарни чидини. ²⁶Варнава дэ Павел зочян ви заму-ди Эрсa Мэсих Жонгуйди мə щитын гэжяди мин, шули данщўанли. ²⁷Зу жымужя, вəму ба Яхўти лян Сила дафачили. Таму гэжя ги ниму ба жыгə щин литу щеди хуа фəни. ²⁸⁻²⁹Йинцысы вəму лян Анлахўди Рух йидарни шонлєнхо, чўгуэ жигə яндин ё зунхўди фынфу ба данлинди жун данзы бу гəдо нимуди банжиншон: ниму бə чы ги данлин хўдаму жўгиди буганжинди гўрбани, бə хўлон, бə чы жўсы сынлинди жу зэмусы щезу. Ниму дан бу ган жыщезы сычин, зу ходихын. Ги ниму панвон пиннан!»

³⁰Дэбёму жочў фынфу доли Антиохия чынпуни, зэ нэтар ба йиче щинфу Эрсади жынму жёлэ, ба щин ги таму гигили. ³¹Таму ба щин няли, йинви щиншон щехади гиди нанвынди хуа гощинзали. ³²Яхўти лян Силасы шынжынмуди йимяр, таму зу ги щинфуди дищўнму фəли хошо нанвынди хуа, зу жымужя ги тамуди щинфу гили жинли. ³³⁻³⁴Таму зэ нэтар занли житянди йиху, дищўнму ба таму суншон зули, ги таму панвонли пиннанли, таму зу хуэйли ба таму дафалэди жынму гынчянли. ³⁵Павел лян Варнава шындо Антиохия чынпунили; таму лян данлинди хошо жынму йидарни жётёли зэмусы чуанжёли Жонгуйди Хо Щинвынли.

Павел лян Варнава фынкэли

³⁶Гуэли йищезы сыхур, Павел ги Варнава фəди:

– Заму зочян ба Жонгуйди Хо Щинвын зэ заёнди чынпуни чуанжёли. Жыхур заму йўанхуэй вон жыщезы чынпуни зу, канйихар, дищўнму замугə.

³⁷ Варнава щён жё Йихия-Марк лян таму йидарни чини, ³⁸ Кэсы Павел мэ дайин, йинцысы Йихия-Марк зочян бу щён лян таму йидарни чи ган сычин; зочян та зэ Памфилия дифоншон да таму гынчян зудёли. ³⁹ Таму лёнгөр ви жыгэ сычин зынли жонли, линейрни фынкэли. Варнава лян Марк йидарни шонли чуан, вон Кипр хэдони фушон зудёли, ⁴⁰ Павел ба Сила жянчүлэ, лян та йидарни зудёли. Дишүнму читоди жё Жонгуйди ба таму хохор жоканни. ⁴¹ Павел ба Сирия лян Киликия дифон зужуангуэлэ, зэ нэтарди Эrsa жёхуэйшон ги дишүнмуди щинфу гили жинли.

*Тимофей ба Павел дэ Сила
е гыншонли*

16 Павел доли Дервия лян Листра чынпунили. Нэтар ю йигэ манлани, минзы жёди Тимофей; тади мамасы щинфу Эrsaди яхүти нүжын, тади дадасы грекжын. ² Зэ Листра лян Икония чынпуни жўди щинфу Эrsaди жынму ду ба Тимофей тэнэдини. ³ Павел щён жё Тимофей лян та йидарни чини, зу ги та зўли суннэтили, йинцысы жыгэ дифоншонди яхүти жынму ду жыдони, та дадасы грекжын. ⁴ Таму ба нэгэ дифонди заён чынпу зужуангуэлэ, ба Иерусалим чынпуниди Апостолму лян пресвитерму гихади фынфу ги жынму пэщёли, жё таму зунхўни. ⁵ Йинви жыгэ нэтар Эrsa жёхуэйди жынмуди щинфу юли жинли, тамуди фур йитян би йитян е дуэли.

Павелди фимын

⁶ Таму гуэли Фригия лян Галатия дифонли, йинцысы Анлахўди Рух бу жё таму зэ Асия дифоншон ба Хо Щинвын чуанжэ. ⁷ Таму доли Мисия дифон бонгэрниди сыхур, щён вон Вифиния дифон чини, кэсы Эrsaди Рух бу жё таму чи. ⁸ Таму гуэли Мисия дифон, доли Троада дифоншонли. ⁹ Нэйитян хушон, Павел зўлигэ фимын: Македония дифонди йигэ жын зандо та мянчян, читоди ги та фэди:

– Ни до Македония дифоншон лэ, ги вэму бонмон!

¹⁰ Павел ба жыгэ фимын канжян йиху, вэму донвэр шөлүха вон Македония дифоншон чини, йинцысы вэму мин-

быйли, Анлаху щён жё вэму ба Тади Хо Шинвын ги нэгэ дифоншонди жынму чуанжэни.

Лидия щинфули Эрсали

¹¹Вэму шонли йигэ чуан, да Троада дифоншон зудё, дуандуар доли Самофракия дифоншонли, ди эр тьян доли Неаполь чынпунили. ¹²Да нэтар вэму доли Филиппы чынпунили (жыгэ чынпусы Македонияди нэгэ дифонди жинчын, есы Рим гуйжя жаншонди дифон). Вэму зэ нэтар занли житян. ¹³Шанбэди нэйтян, вэму да чынпуни чўчи, доли хэ бонгэрнили, сылэнди нэтар ю яхўти жынму чито Анлахўди вэрни. Вэму зуэха, лян шудо нэтарди нўжынму танли хуали. ¹⁴Нўжынму литу ю да Фиатиры чынпу лэди йигэ нўжынни, минзы жёди Лидия; тасы хэпа Анлахўди, мэ хо бупиди мэмэжын. Эрса Жонгуйди ба нэгэ нўжынди щин кэкэ, жё та люшынди тин Павел фэди хуани. ¹⁵Зу жымужя ба нэгэ нўжын лян та жяниди йиче жынму ду ви Эрсади минзы зэ фи литу щили. Йиху Лидия читоди ги вэму фэди:

– Ниму дан сылэнди вэ чуанщин-чуанйиди щинфу Эрса Жонгуйдини, чин ниму зэ вэ жяни жўйихар.

Та ниннинди чуанфэди жё вэму шынхани.

*Ба Павел лян Сила
ядо банфонзынили*

¹⁶Йихуэй, вэму вон чито Анлахўди нэгэ вэршон чиди сыхур, ба йигэ нўхуэжи пынжанли. Жыгэ нўхуэжиди кэлон литу ю зонгуйни, та хуэй суан гуани, зозор нын фэ вонху йўди сычин, йинви жыгэ та ги тади жўжынму зынли хошоди чян. ¹⁷Та гыншон Павел дэ вэму зудини, дашын ханди:

– Жыщезы жынмусы вида Анлахўди нўму, таму ги ниму чуанжэдини, ба нимуди мин замужя жюхани!

¹⁸Нэгэ нўжын жымужя ханли хошо гунфули. Павел жўемуди та ханди янфандихын, зу жуангуэлэ, ги нэгэ зонгуй фэди:

– Вэ ви Эрса Мэсихди минзы ги ни ги фынфу: да тади кэлон литу чўлэ!

Зонгуй донвэр чүлэли. ¹⁹ Нэгэ нү хуэжиди жўжынму жы-
доха таму зэ мөю зын чянди зывонли, зу ба Павел лян Си-
ла жуачў, ладо чонзыни, зо жыгуанжынму чили. ²⁰ Таму ба
Павел лян Сила линдо жыгуанжынмуди мянчян, ги таму
динзуйди фэди:

– Жыщезы жынмусы яхўти жынму, таму жё заму чын-
пуниди жынму щинни бунавынли. ²¹ Таму ба щин куй-
чын чуанжёдини. Замусы Рим гуйжяди жынму, жочў заму-
ди фалў ба жыщезы куйчын бу нын жешу, бу нын зунхў!

²² Минжын е фандуйли Павел лян Силали. Жыгуанжын-
му зу гиди фынфу, жё ба тамуди йишон чуадё, на бянзы
да тамуни. ²³ Донбинжынму зу ба Павел лян Сила хын-
хынди дали, ба таму ядо банфонзынили, хан ги бамынди
жын гиди фынфу, жё ниннинди бохўчўни. ²⁴ Бамынди
жын жочў фынфу ба Павел лян Сила ядо банфонзыниди
дин литуди фонзынили, хан ба тамуди жўэ на мабан жин-
жинди суэчўли.

²⁵ Бонжер бан-ени, Павел лян Сила чито Анлахўди сы-
хур, чонли куажён Анлахўди чўзыли; данлинди зуйжынму
ду тинжянли. ²⁶ Мынмынди, ди хынхынди дунли, банфон-
зыди фонгынзы е дунтанли; банфонзыди йиче мын ду кэ-
кэли, зуйжынмуди тешын е ду дёхалэли. ²⁷ Бамынди жын
щинлэ, канжян банфонзыди мын ду кэкэдини, сылёнди
йиче зуйжынму ду подёли, зу ба до начўлэ, щён ба гэжя
чуэсыни. ²⁸ Кэсы Павел канжян жыгэ, дашын ханли:

– Занха! Бэ хэ гэжяди минли! Вөму ду зэ жытарни!

²⁹ Бамынди жын жё жынму ба дынзан налэ, пожинчи,
жанди гуйдо Павел лян Силади жўэ гынчянли. ³⁰ Йиху ба
таму линчўлэ, вынли:

– Вёди жонгуйдиму! Вэ ё зў сани, жё ба вёди мин жюха?

³¹ Таму фэди:

– Ни дан щинфу Эрса Жонгуйди, ба ни лян ни жяни
йиче жынмуди мин жюхани.

³² Таму лёнгэр кэ ги бамынди жын лян та жяниди йиче
жынму ба Жонгуйди Хо Щинвын чуанжёли. ³³ Нэйивэщи
бамынди жын ба Павел дэ Сила линшон, ба тамуди шон
щили. Йиху ба та гэжя лян та жяниди йиче жынму ви

Эрсади минзы зэ фи литу е щили. ³⁴ Бамынди жын хан чин Павел лян Сила зэ тади жяни чы фанчини. Та лян та жяниди йиче жынму ду гошинзали, йинцысы таму ду шинфули Анлахули.

³⁵ Ди эр тян ганзо йизор, жыгэ чынпуди жыгуанжынму ба ямынди донбинжын дафачи, ги бамынди жын фэди:

– Ба нэ лёнгэ жын фонкэ!

³⁶ Бамынди жын зу ги Павел фэди:

– Жыгуанжынму гили фынфу жё ба ни лян Сила фонкэни. Жыхур ниму нын да банфонзыни чүлэ, пиннан-вусыди чи!

³⁷ Кэсы Павел ги ямынди донбинжын фэди:

– Вэмусы Рим гуйжяди жынму, са зуй ду мэю, кэсы таму зэ жынмуди мянчян на бянзы ба вэму дали, хан ба вэму ядо банфонзынили. Жыхур таму шён ба вэму туту-мэмэди суншон зуни; жымужя будыйчын! Жё жыгуанжынму гэжя лэ, ба вэму линчүлэ!

³⁸ Донбинжын ба жыщезы хуа ги жыгуанжынму фэли. Таму тинжян Павел лян Силасы Рим гуйжяди жынму, хэли пали, ³⁹ зу гэжя доли банфонзынили, ги Павел лян Сила жынли цуэли, ба таму линчүлэ, чинди жё таму да нэгэ чынпуни зудёни. ⁴⁰ Павел лян Сила да банфонзыни чүлэ, зу зэ Лидияди жяни чили, зэ нэтар ба шинфу Эрсади дишчүнму канжян, ги тамуди шинни гили жинли, йиху зудёли.

*Павел лян Сила
зэ Фессалоники чынпуни*

17 Павел лян Сила шонли лү, гуэли Амфиполь дэ Аполлония чынпу, доли Фессалоники чынпунили. Нэтар ю яхүти жынмуди йигэ синагогани. ² Павел жочү куйчын жинли синагога, сангэ шанбэни жочү Китабу лян жынму танли хуали, ³ ги таму пещёли, замужя Мэсих ё шу кунанни, вучонни зэмусы кэ хуэни. Та хан фэди:

– Вэ ги ниму чуанжэди Эrsa зусы Мэсих.

⁴ Таму литу юди жынму шинфули тамуди хуали, лян Павел дэ Сила доли йидарнили; хошо хэпа Анлахүди грекжынму зэмусы жан годын фынбырди нүжынму е шинфули. ⁵ Кэсы нэгэ чынпуниди яхүти жынму шинни нянжэли

Апостолмули, ба жигэ ха ланганшу жёлэ, лян таму хуэчын йичүн, ба чынпу зў луанхуонли. Таму доли Иасон жяди мын чянту, щён ба Павел лян Сила зэ нэтар зожуэни, йиху щён ба таму линчўлэ ги минжын жёгини. ⁶Кэсы таму ба Павел лян Сила мэ зожуэ, зу ба Иасон лян данлинди жигэ дищүн ладо нэгэ чынпуди жыгуанжынму гынчян, ги таму динзуйди фэди:

– Жыщезы жынму ба чўан дун-я зў луанхуонли, жыхур доли жыгэ чынпунили! ⁷Иасон ба таму зэ тади жяни жейинхали. Таму ба Рим хуоншонди фынфу бу зунхў, фэди ю данлинди йигэ хуоншонни, минзы жёди Эрса.

⁸Таму на жымужяди хуа жё минжынму лян жыгуанжынму шызэ бу нанвынхали. ⁹Жыгуанжынму жё Иасон лян данлинди жынму пыйли хошо чян, нэхур цэ ба таму фонкэли.

***Павел лян Сила
зэ Вероя чынпунини***

¹⁰Хушон дищүнму ба Павел лян Сила сундо Вероя чынпуни чили. Таму доли нэтар, зу жинли яхўти жынмуди си-нагогали. ¹¹Нэтарди жынму бу щён Фессалоникиди жынму йиён, тамуди щин кэдихын: таму ба Хо Шинвын жэщинди тинли, мый йитян ца Китабудини, щён жыдо Павел фэхади хуасы жындыма, хансы жяди. ¹²Таму литу хошо жынму щинфули; хошо жан годин фынбырди грек нўжынму лян нанжынму е щинфули. ¹³Кэсы Фессалоники чынпуниди яхўти жынму тинжян, Павел зэ Вероя чынпуни ба Анлахўди Хо Шинвын е чуанжёли, зу доли нэтар, чуэсуэди жё жынму луанхуонли. ¹⁴Дищүнму донвэр ба Павел сундо хэянзышонли. Сила лян Тимофей шындо Вероя чынпунили. ¹⁵Сун Павелди жынму ба та сундо Афины чынпунили, гэжя хуэйли Вероя чынпуни, щён ба Павел гихади фынфу ги Сила лян Тимофей фэги, жё таму лёнгэр куэ до Павел гынчян чини.

Павел зэ Афины чынпунини

¹⁶Павел зэ Афины чынпуни дын Сила лян Тимофейди сыхур, канжянли жыгэ чынпуни сыжу-баха дусы данлин

хўдамуди ёнзы; та шинни тэ пэфанхали. ¹⁷Павел зэ нэтар-ди синагогани лян яхўти жынму зэмусы хэпа Анлахўди данлин минзўди жынму танли хуали, мый йитян зэ чонзы-ни лян пынжянди жынму е танли хуали. ¹⁸Эпикурейди лян Стояди жигэ күэшүэжын е лян Павел зынжонкэли. Юди жын фэди:

– Жыгэ хуатунзы щён фэ сани?

Хан юди жын фэди:

– Та хаба ба данлинди хўдаму чуанжёдини.

Таму жымужя фэди, йинцысы Павел ба Эрасади зэмусы кэ хуэди Хо Шинвын чуанжёли. ¹⁹Таму зу ба Павел линдо Ареопаг годын шонлён хуэййишон, ги та фэди:

– Жё вэму ба ни жёнди шин жёшүэ тинйихар, нын-чынма? ²⁰Вэму ба ни фэхади ющезы сычин тинжян, жүэмуди жыгэ гуэдихын; вэму щён жыдо, жыщезы сычин ю са йисыни.

²¹Афины чынпуниди йиче жынму лян нэтар жўди вэгуй-жынму ба тин дэ тан шинвынди би са ду нэ зў. ²²Павел зан-до Ареопаг годын шонлён хуэййиди донжунни, зу фэди:

– Афины чынпуниди жынму-я! Вэ кан, ниму ба жёмын жыдо шындыхын. ²³Вэ зэ нимуди чынпуни сыжу-баха зуди, ба бэвон ниму хўдамуди вэр канди сыхур, ба жү гўр-баниди йигэ вэр канжянли. Жыгэ вэршон щеди: «Ги жыбудоди хўда жүгиди». Ниму бу жыдо Тади еба, кэсы ба Та бэвондини. Жыхур Вэ щён ба жыбудоди Анлахў ги ниму чуанжёни. ²⁴Анлахў ба чўан дун-я лян дун-яшонди йиче дунши ду зохали. Тасы чўан дун-яди Жонгуйди. Та зэ жынму щюгэхади фонзыни бу жў. ²⁵Та бу ё жынму фусы Та, е бу ё жё жынму ги Та ги са дунши, йинцысы Та гэжя ба сынхуэ, щиди чи лян йиче дунши ду ги жынму гидини. ²⁶Анлахў да йигэ жыншон ба йиче минзўди жынму зохали, жё таму зэ чўан дун-яшон жўни, ги таму дазор ба сынхуэди жызы зэмусы жўди дифон динхали. ²⁷Анлахў жымужя ганли, йинцысы Та щён жё жынму зо Тани, таму хаба нын ба Анлахў жүэлэни зэмусы зожуэни. Шыдашы Анлахў ли заму, ли мый йигэ жын, бу йўан. ²⁸Юди жын фэли:

«Заму ду зэ Тади кәлонни хуәдини, зудини, юни».

Ниму литуди йигә сывынжя е фәли:

«Замусы Тади эрнүму».

²⁹ Замусы Анлахүди эрнүму йимяр, заму бу ё сылән Анлахү щән жынму жочү гәжяди вонщән дэ шуйи на жинзы, йинзы хуэйжәсы шыту зуэзохади ёнзы йиён. ³⁰ Жынму мә жыдо Анлахүди сыхур, Та шянтуни ба жыгә мә гуанщян. Кәсы жыхур Та гиди фынфу, жё чүан дун-яшонди йиче жынму шущин, жын тамуди гүнахарни. ³¹ Йинцысы Анлахү ба жызы кәжя динхали, нәйитян Та лян Та жянчүлэди йигә Жын ги чүан дун-яшонди йиче жынму дин гундоди зуйни. Жыгә Жын вучонли йиху, Анлахү жё Та кә хуәли, зу жымужя Анлахү жё йиче жынму щинфу жыгә сычинсы жынди.

³² Таму тинжян Павел фә вучонди жын кә хуәлиди сычин, юди жынму цыщәли тали; данлинди жынму фәди:

— Хо, хо, вәму ба ни фәди жыгә сычин зэ йихуэй тинйихар.

³³ Павел зу да годын шонлән хуэййишон зудәли. ³⁴ Жигә жын лян Павел доли йидарни, зу щинфу Эрсали. Таму литу ю Ареопаг хуэййиди йигә жынни, минзы жәди Дионисий, хан ю йигә нүжынни, минзы жәди Дамарь, лян данлинди жынмуни.

Павел зэ Коринф чынпунини

18 Жыгә сычин гуәлиди йиху, Павел да Афины чынпунни зудә, доли Коринф чынпунили. ² Нэтар та жянли йигә яхүти жын, минзы жәди Акила, тасы зэ Понт дифоншон сын-ёнхади. Акила лян тади пәе Прискилла жән да Италия ләли, йинцысы Римди хуоншон Клавдий гили фынфу, жё йиче яхүти жынму да Рим чынпунни зудәни. Павел доли Акила лян Прискиллади жяни, ³ лян таму шындө йидарнили, хан зүли хуәли, йинцысы Павелди шуйи лян тамуди йиён, та хуэй зү жонфонни. ⁴ Мый йигә шанбә Павел зэ синагога лян жынму тан хуадини, ба яхүти жынму лян грекжынму чүанфәди, жё таму ду щинфу Эрса Жонгуйдини.

⁵Сила лян Тимофей да Македония дифон лэлиди йиху, Павел ба йиче гунфу фишон, ба Хо Шинвын чуанжэли, ги яхүти жынму миндамин фэли, Эрсасы Мэсих. ⁶Кэсы таму фандуйли Павелли, хан хэщүэли тали. Павел зу ба гэжя йишон готуди тў тудё, ги таму фэди:

– Ба нимуди мин дан шэдэли, жыгэди зуй зэ нимушонни, мө зэ вэшон! Да жиргэ дашон, вэ вон вэдожынму гынчян чини.

⁷Павел зу да таму гынчян зудё, жўдо йигэ хэпа Анлахүди жынди жянили. Жыгэ жынди минзы жёди Тит Иуст; тади жя ли синагога бу йүан. ⁸Нэгэ синагогади йимаму, минзы жёди Крисп, лян та жяниди йиче жынму ду щинфули Эрса Жонгуйдили. Коринф чынпуниди хошо жынму ба Хо Шинвын тинли, е щинфули, ба таму ви Эрсади минзы зэ фи литу щили.

⁹Йихуэй Павел зўлигэ фимын: хили Жонгуйди зэ Павел гынчян лэ, ги та фэди:

– Ни бэ хэпа, бу тынди фэ хуа, ¹⁰йинцысы Вэ лян ни зэ йидарнини; сый ду бу нын хэ ни. Жыгэ чынпуну ю хошо Вэди жынмуни.

¹¹Павел зу зэ нэтар жўли йинян бан, ба Анлахүди Шинвын ги таму жётёли.

¹²Галлион гуан Ахайя чынпуди сыхур, яхүти жынму йидарни фанчелэ, пудо Павел гынчян, ба та ладо вынгуансыди вэршон, ¹³зу фэди:

– Жыгэ жын чүанди, жё жынму бу жочў фалү бэвон Анлахү!

¹⁴Павел шэлүди фэхуани, кэсы Галлион ги яхүти жынму фэди:

– Та дан ганли са зуйли хуэйжэсы са бухо сычинли, нэхур вэ ю йинйир тин нимуни. ¹⁵Кэсы ниму дан ви ниму фалүшонди са хуа хуэйжэсы минзы зынжондини, ниму гэжя канчи! Вэ бу щён вын жымужяди гуансы!

¹⁶Галлион зу ба таму да вынгуансыди вэршон ганчўчили.

¹⁷Дажя зу ба синагогади йимаму, минзы жёди Сосфен, линшон, зэ вынгуансыди вифын гынчян дали тали. Галлион ба жыгэ сычин е мө гуанщян.

Павел хуэйли Антиохия чынпунили

¹⁸ Павел зэ Коринф чынпуни лян дишүнму кэ жўли хошо жызы, йиху да таму гынчян зудё, лян Прискилла дэ Акила йидарни шонли йигэ чуан, вон Сирия дифоншон зудёли. Жыгэди туни, Павел зэ Кенхреи чынпуни ба гэжяди туфа жёдёли, йинцысы та зочян ги Анлахў гили вардэли. ¹⁹ Таму доли Ефес чынпунили, нэтар Павел лян Прискилла дэ Акила фынкэли. Павел жинли синагога, лян яхўти жынму танли хуали. ²⁰ Дажа жё та шынхани, зэ нэтар хан жё жў йищезы жызыни, кэсы Павел мэ дайин. ²¹ Павел зуди сыхур ги таму фэди:

– Анлахў дан ги кухуан, вэ хан до ниму жытар лэни.

Павел зу да Ефес чынпуни зуэ чуан зудёли. ²² Та доли Кесария чынпунили, да нэтар доли Иерусалим чынпунили, ба нэтарди жёхуэй вынхули, йиху доли Антиохия чынпунили, ²³ зэ нэтар жўли йищезы жызы. Йиху Павел да нэтар чўчи, ба Галатия лян Фригия дифон зужуангуэлэли, зэ нэтар ги манламу гили жинли.

Аполлос зэ Ефес чынпуни чуанжэли

²⁴ Йихуэй йигэ яхўти жын, минзы жёди Аполлос (тасы Александрия чынпуни сын-ёнхади), доли Ефес чынпунили. Тасы йигэ фэжызы, ба Китабу жыдоди ходихын. ²⁵ Та ба Эрса Жонгуйди жёшүө кэжя шишүэгуэ, ги жынму ба Эрсади йиче сычин жэщинди жётёли. Кэсы та гуон жыдо Йихия замужя ба жынму ви Анлахў зэ фи литу шигуэ. ²⁶ Аполлос зэ синагога данзы фонда жёнди сыхур, Прискилла лян Акила ба тади хуа тинлиди йиху, ба Аполлос чиндо тамуди ज्याни, ба Анлахўди жёшүө йүэшин дуйдурди ги та пэшёли. ²⁷ Йиху Аполлос щён вон Ахайя чынпуни чини, Ефес чынпуниди дишүнму зу ги та бонли мон, ги Ахайя чынпуниди манламу щели йигэ щин, жё таму ба Аполлос жешухани. Аполлос доли нэтарли, ги Анлахў щинэди щинфуди жынму бонли да монли. ²⁸ Аполлос зэ дажа мянчян лян яхўти жынму хынхынди зынжонли, ба таму фэдо, йиху жочў Китабу ги таму пэшёли: Эрса зусы Мэсих.

*Павел зэ Ефес
чынпунини*

19 Аполлос хан зэ Коринф чынпуниди сыхур, Павел ба ли хэзы йүанди дифон* гуэли, линйирни доли Ефес чынпунили. Нэтар та жянли жигэ манла, ²зу вынли тамули:

– Ниму щинфули Жонгуйди сыхур, ба Анлахүди Рух жешухалимэ?

Таму хуэйдади фэсы:

– Вэму йүнзун мэ тингуэ ю Анлахүди Рухди.

³Павел кэ вынли:

– Дан жымузя, ба ниму замузя зэ фи литу щили?

Таму хуэйдади фэсы:

– Йихия шынжын замузя ба жынму зэ фи литу щили, юди жынму ба вэму е зу нэмузя щили.

⁴Нэхур Павел фэди:

– Йихия ба жынму зэ фи литу щили, жё таму шуцинни, жын тамуди гүнахарни; та ги Израилди минжын фөгүэ, жё таму шинфу тади хуту лэди йигэ Жынни, жы зусы Эрса.

⁵Таму тинжян жыгэ хуа, зу жё ба таму ви Эрса Жонгуйди минзы зэ фи литу щили. ⁶Павел ба шу гэдо тамушонди сыхур, Анлахүди Рух донвэр халэ, луэдо тамушонли, таму зу на данлинди йүян фэкэ хуали, чуанжэ Анлахүди хуали.

⁷Таму бонжер ю шыэргэ жынлэ.

⁸Павел сангэ йүэ литу зэ синагога чигуэ, нэтар та данзы фонда лян жынму танли Анлахүди Гуйжяли, жё жынму ду щинфуни. ⁹Таму литу жигэ жынди щинчон ниндихын, бу щён щинфу, хан ба Эрса Жонгуйди жёшүэ зэ да-жя мянчян хэщүэли. Нэхур Павел ба манламу линшон, да таму гынчян зудё, мый йитян зэ Тиранди щүэтонни танли хуали. ¹⁰Павел зу жымузя жёнли лён нян; йинви жыгэ зэ Асия дифоншон жүди йиче жынму, лян яхүти жынму дэ данлин минзүди жынму ду тинжянли Эрса Жонгуйди Хо Щинвынли.

* 19:1 Нэщезы дифонсы Галатия дэ Фригия. Кан Ап 18:23.

Скевади эрзыму

¹¹ Анлаху чечу Павел шянчүлэли хошо чигуэ кэрамэти.
¹² Жынму ба Павел сыйунхади шужинзы хуэйжэсы вичунзы нашон, гедо бинжынмушон, тамуди бин донвэр зу холи; зонгуйму да жынмуди кэлон литу е донвэр чүлэли.
¹³ Нэтар ю жигэ яхүти жынмуни, таму зэ сыжу-баха зуди, ба зонгуй да жынмуди кэлон литу гандилэ. Таму е щён на Эрса Жонгуйди минзы ган жымужяди сычинни, зу ги зонгуйму фэди:

– Вэму нан Эрсади минзы ги ниму ги фынфудини (ба жыгэ Эрса Павел чуанжэдини): ниму чүлэ!

¹⁴ Яхүтиди да ахун Скевади чигэ эрзы ган жымужяди сычиндини. ¹⁵ Кэсы йигэ зонгуй ги таму хуэйдади фэсы:

– Вэ жынды Эрсани, е жынды Павелни. Нимусы сый?

¹⁶ Кэлон литу ю зонгуйди нэгэ жын зу хынхынди пудо Скевади эрзымушон, ба таму дабэли. Таму ду дэли шонли, ба тамуди йишон чэланли, йиху таму да нэгэ фонзыни ду подёли. ¹⁷ Зэ Ефес чынпуни жуди йиче яхүти жынму дэ вэдожынму ба жыгэ сычин тинжян, ду хэли пали. Йинви жыгэ Эрса Жонгуйди минзы йүэцин дыйли го тэнэли.
¹⁸ Хошо шинфу Эрсади дишунму лэ, шушинли, ба таму зончян ганхади ха сычин жынли, е ги дажя миндамин фэли.
¹⁹ Хошо сы фади дэ суангуади жынму ба тамуди фу налэ, гэли йидадуй, зэ дажяди мянчян ба жышезы фу шодёли. Таму ба фуди жячян е суанхалэли: йиман жыди вушы чян йинчянни. ²⁰ Зу жымужя, Эрса Жонгуйди Хо Шинвын йүэцин сакэли, е йүэцин юли жинли.

Ефес чынпуниди фанлуан

²¹ Жышезы сычин гуэли йиху, Павел шинни динли дян, щён гуэ Македония лян Ахайя дифонни, йиху вон Иерусалим чынпуни чини. Та фэди:

– Доли нэтар йиху, вэ хан ё вон Рим чынпуни чини.

²² Та ба тади лёнгэ бонбан Тимофей лян Эраст дафадо Македониячи, гэжя шындо Асия дифоншонли. ²³ Зу нэгэ сыхур Ефес чынпуни ви Жонгуйди жёщүэ йүли йигэ да

фанлуан. ²⁴Нэтар ю йигэ йинжённи, минзы жёди Димитрий; та на йинзы жочў Артемида нүхўдади да мё зў мёди суй ёнзыдини. Йинви жыгэ, жёнжынму ду ю хошо хуэни. ²⁵Йихуэй Димитрий ба жыщезы жёнжынму лян та ю йиён шуйиди жынму жёлэ, ги таму фэди:

— Ляншуму! Ниму жыдони, заму да жыгэ хуэшон дый хошо гунчяндени. ²⁶Кэсы ниму гэжя тинжянли, е канжянли жыгэ Павел зў садени. Та фэди: «На жынди шу зуэзохади хўдаму ду бусы жыншыди Анлахў». Зу жымужя, та жё Ефес чынпуниди лян Асия дифоншонди бонжер йиче жынму ду шинфули тади хуали. ²⁷Вэ хэпадини, жынму вонху ба замуди жыгэ шуйи канбуче. Чўгуэ жыгэ, Асия дифоншонди лян чўан дун-яшонди жынму до жыхур ба вида Артемида нүхўда ду бэвондини; кэсы вонху жынму хаба ба Артемидади мё канбучели, ба та видади минзы е бу тэнэли!

²⁸Жынму ба жыщезы хуа тинжян, тэ чишонлэ, зу дашын ханди:

— Ефес чынпуниди Артемида нүхўда видадихын!

²⁹Йинви жыгэ Ефес чынпуниди жынму ду луанхуонли. Таму ба Павелди лёнгэ ляншу (тамусы Македония дифонди жынму, йигэ жёди Гаий, ди эргэ жёди Аристарх) жуачў, ду подо щийўаннили. ³⁰Нэхур Павел е щён до жынму донжунни чини, кэсы манламу мэ жё та чи. ³¹Нэтар ю Асия дифонди жигэ линшужынмуни, тамусы Павелди ляншуму; таму ба жын дафачи, ба Павел е чўанфэди, бу жё та жин щийўанничичи. ³²Шудо йидарниди жынму ду луандундунди, юди хан жыгэдини, юди хан нэгэдини, дуэйиди жынму бу жыдо таму шудо нэтар ган садени. ³³Юди жынму сылёнди Александр ё ги жыгэ сычин ги хуэйдани, йинцысы яхўти жынму ба та сондо чянтули. Александр ба шу жоди, жё жынму нанвынхани, щён зэ дажя мянчян ба гэжя щибыйни. ³⁴Кэсы дажя жыдо тасы йигэ яхўти жын, йиху йиче ду дашын хантуэли:

— Ефес чынпуниди Артемида нүхўда видадихын!

Таму жымужя ханли лёнгэ сышын. ³⁵Линйирни нэгэ чынпуниди гуанжын жё жынму нанвынха, зу фэди:

– Ефес чынпуниди жынму-я! Дажя ду жыдони, Ефес чынпу ба вида Артемида нүхүдади мё зэмусы да тяншон дехалэди йи дакуэ шыту жокандини. ³⁶Дажя ду жын жыгәни, йинви жыгә, вә щён жё ниму ду нанвынха, бә хўганли. ³⁷Ниму ба жы жигә жын линдо жытарли, таму ба мё литуди сыса дунши ду мә ту, ба замуди нүхүда е мә дэцэгүә. ³⁸Димитрий зэмусы лян та йидарниди жёнжынму дан щён лян сый вын гуансы, заму ю вынгуансыди вифынни зэмусы гуанжынмунни, жё таму зэ нэтар вын гуансычини. ³⁹Ниму хан дан ю данлинди вынтили, ба жыгә вынти е нын зэ хэфалүди хуэйшон вон гундони толүнни. ⁴⁰Вә хэпади, ви жиргә йүхади жыгә сычин ги заму дин фанлуанди зуйни. Заму гэжя е бу нын фә, жиргә виса йүли жыгә фанлуанли. ⁴¹Та ба жыщезы хуа фөван, зу ба жынмуди хуэйи сандёли.

*Павел доли Македония
лял Греция дифоншонли*

20 Жыгә фанлуан нанвынхади йиху, Павел ба манламу жёлә, ги тамуди щин гили жинли, йиху ги таму фәлигә «хөзэди», зу да нэтар зули Македония дифоншонли. ²Та доли нэтар, ба нэщезы дифон зужуангуэлә, ги дищүнму фәли хошо ги жинди хуа, йиху доли Греция дифоннили, ³зэ нэтар жўли сангә йүә. Павел вонщёнди шон йигә чуан вон Сирия дифоншон чиди сыхур, яхўти жынму сы жанчөди, щён ба та дасыни. Йинви жыгә Павел динли дян, щён жочў данлинди лў зунни, ба Македония дифон гуэдә, хуэйчини. ⁴Пиррди эрзы Сопатр (тасы Вероя чынпуниди жын), Аристарх дэ Секунд (таму лёнгәрсы Фессалоники чынпуниди жын), Гаий (тасы Дервия чынпуниди жын), Тимофей зэмусы Асия дифоншонди лёнгә жын Тихик дэ Трофим ду лян Павел йидарни зули. ⁵Таму туни зудә, зэ Трояда дифоншон дынли вәмули. ⁶Чы мәю жёмян мәмәди жечи гуэдә, зэ Филиппы чынпунни вәму шонли йигә чуан, да нэтар зудёли. Ву тян йиху вәму доли Трояда дифоннили, лян таму доли йидарни, зэ нэтар жўли чи тян.

Павел жё Евтих кэ хуали

⁷Екшанбэди нэйтян хушон вэму шудо йидарни, быйли мэмэли. Павел лян дажя танли хуали, йинцысы та щён ди эр тьян зуни. Та ба хуа тандо бан-ели. ⁸Вэму шудо луфонди нэгэ фонзыни ю хошо дынзанни. ⁹Йигэ щёхуэр, минзы жёди Евтих, зэ чуонкуонни зуэдини. Павел хан фэхуади сыхур, та фижуэ, да луфонди сан цынзышон дехачили. Дажя ба та тэчелэ, йиканса та кэжя вучонли. ¹⁰Павел да лушон халэ, тондо тади шыншон, ба та бочў, зу фэди:

– Бу зади, ниму бэ данщинли, та хан хуэдини!

¹¹Йиху Павел шонли луфон, ба мэмэ быйкэ, чыли. Та хан лян жынму танли хошо гунфули, жэту чўлэди сыхур, цэ да нэтар зудёли. ¹²Таму ба нэгэ щёхуэр хуэхуэрди сундо жянили; дажя ду гошчинзали.

Павел доли Милет чынпунили

¹³Вэму щянтунни шонли чуан, вон Асс чынпуни фушон зудё, щён ба Павел зэ нэтар жешухани. Жыгэсы Павел гэжя динхади дян, йинцысы та гэжя щён бушин чини. ¹⁴Та зэ Асс чынпуни лян вэму доли йидарни, вэму зу ба та зэ чуаншон жешухали, йиху вон Митилена чынпуни зудёли. ¹⁵Вэму доли нэтар, йиху да нэтар е зудё, ди эр тьян доли Хиос хэдоди дуймянди дифонли. Ди сантян вэму доли Самосди хэдонили, ди сы тьян доли Милет чынпунили. ¹⁶Павел зозор динли дян бу щён жин Ефес чынпуничи. Та бу щён дуэйүди гунфу зэ Асия дифоншон шынха, йинцысы та зывонди ба Пасха жечи гуэлиди йиху, ди вушы тьян до Иерусалим чынпунини*.

Павел лян жёхуэйдиди пресвитерму танли хуали

¹⁷Павел да Милет чынпуни ба жын дафадо Ефес чынпуни чи, чинди жё нэтар жёхуэйдиди пресвитерму до та гынчян лэни. ¹⁸Таму лэ, Павел ги таму фэди:

– Ниму ду жыдони, да вэ до Асия дифоншон лэди туйитян дашон, вэ замужя йинавар лян ниму зэ йидарни

* ^{20:16} Жы йитян яхўти жынму гуэ йигэ да жечидини. Кан Ап 2:1.

жўли. ¹⁹ Вэ шинни мяншанди зэмусы тон нянлуйди ганли Жонгуйди ги вэ йитуэхади гунсыли, хан ви яхўти жынмуди жанчө шули хошо кўнан. ²⁰ Ниму е жыдони, вэ зэ дажяди мянчян зэмусы зэ мый йигэ жяни ба са ю хочўди сычин ду ги ниму чуанжөли зэмусы жөтөли. ²¹ Ги яхўти жынму зэмусы данлин минзўди жынму вэ ду миндамин фэгуэ, жө таму шушин, жын тамуди гўнахарни, зу шинфу вэмуди Эрса Жонгуйдини. ²² Жыхур вэ жочў Анлахўди Рух ги вэ гихади фынфу ө вон Иерусалим чынпу чини. Вэ бу жыдо вэ зэ нэтар йү са сычинни. ²³ Вэ гуон жыдо, зэ мый йигэ чынпуни Анлахўди Рух ги вэ миндамин фэдини, вонху ба вэ ядо банфонзыни, е шу хошо кўнанни. ²⁴ Кэсы вэ ба гэжяди мин йидяр ду бу шитын, йинцысы вэ ө ба вөди жынву ванчынни, ба Эрса Жонгуйди ги вэ йитуэхади гунсы ганванни, жы зусы миндамин фэ Анлахў нэчинди Хо Шинвын. ²⁵ Вэ зэ ниму донжунниди сыхур, ги ниму чуанжөли Анлахўди Гуйжяли. Жыхур вэ жыдони, да жиргэ дашон ниму ба вэ зэ бужянли. ²⁶ Йинви жыгэ, жиргэ вэ ги ниму фэ шыхуа, ниму литу ба сый дан шөдө, жыгэди зуй мө зэ вөшон, ²⁷ йинцысы вэ ба Анлахўди йиче вонщөн ги ниму ду миндамин фөли. ²⁸ Ниму ө цошин ниму гэжяни, е ө жокан Анлахўди Рух ги ниму жөгиди йиче жынмуни. Ниму ө ба Анлахўди жөхуэй зущөн ёнчүн йиён фонни; Та на гэжя Эрзыди Ше ба жыгэ жөхуэй мэхуэйлэли. ²⁹ Вэ жыдони, вэ зудөди йиху, данлинди жынму, зущөн лодо е-лон йиён, до ниму донжунни лэ, ба ёнчүн хэдөни. ³⁰ Вонху ниму литу е ю жынмуни, таму чөхуонни, щөн михунди жө манламу гыншон таму зуни. ³¹ Йинви жыгэ, ниму бө дюдунли, нэхур ниму ө жичелэни, вэ замужя сан нянди жызыни йитян йивэшиди ба ниму литуди мый йигэ жын на нянлуй жөтөли. ³² Жыхур вэ ба ниму ги Анлахў жөгидини, жө ниму шындо Тади нэчинди Хо Шинвын литуни; Та нын ги нимуди шинфу ги жин, хан ба Та ги жанчўлэди жынму шөлүхади берекети ги ниму гигини. ³³ Вэ йүнзун мәшин ба сысыйди жинзы, йинзы хуэйжэсы йишон нашон. ³⁴ Ниму гэжя е жыдони, вэ на гэжяди шу ганли хуэли, щөн ба йиче

Йүнди дунши ги вә гэжя зэмусы лян вә йидарниди жынму дыйшонни. ³⁵Вә зә заёнди сычиншон ба хо ёнзы ги ниму гигили, жё ниму лян вә йиён е нэмужя ганни, зу жымужя ги мэхарлиди жынму бонмонни. Ниму ё ба Эрса Жонгуйди фэхади хуа жичелэни: «Ги данлинди жынму ги са — жыгә би да жынмушон жешу сади йүэщин хо».

³⁶Павел ба жыщезы хуа фэван, зу лян таму йидарни гуйха, читоли Анлахўли. ³⁷Дажя ду кўли, ба та бочў шинтын тали. ³⁸Таму пэфанхали, йинцысы Павел фэли, жыгәди йиху таму зә бу жян мянли. Таму зу ба Павел сундо чуаншонли.

Павел доли Иерусалим чынпунили

21 Вәму да таму гынчян зудёди йиху, шонли чуан, доли Кос хэдонили. Ди эр тян доли Родос хэдошонли, да нэтар зудё, доли Патара чынпунили. ²Нэтар вәму ба йигә чуан зожуэли; жыгә чуан ё вон Финикия дифоншон чини. Вәму зу зуә жыгә чуан зудёли. ³Вәму ба Кипр хэдо лойүанни канжян, вәмуди чуан зу ба жыгә хэдо да нанбонгә вангуэлә, жочў Сирия дифоншон зудёли. Линйирни вәму доли Тир чынпунили, йинцысы чуан зә нэтар ё ба хуә жехалэни. ⁴Нэтар вәму ба жигә манла зожуэли, лян таму йидарни занли чи тян. Таму жочў Анлахўди Рух гиди фынфу ба Павел чүанфәди, бу жё та вон Иерусалим чынпуни чи. ⁵Йиху вәму зә нэтар занди сыхур гуэли, вәму шонли лў, зудёли. Дишүнму лян тамуди нүжынму дә ваму ду ба вәму сундо чынпу вәтули. Дажя ду зә хэянзышон гуйха, читоли Анлахўли; ⁶йиху йигә ги йигә фэлигә «хозэди», вәму шонли чуан, таму хуэйчили. ⁷Вәму да Тир чынпу фудо Птолемаида чынпунили, ба нэгә дифонди дишүнму вынхули, лян таму йидарни занли йитян. ⁸Ди эр тян вәму да нэтар зудё, доли Кесария чынпунили, зу жинли Филиппди жяни, занхали. Филиппсы зә Иерусалим чынпуни Апостолму жанчўлэди чигә диакон литуди йигә; та ба Хо Шинвын чуанжәдилә. ⁹Та ю сыгә мә чўжяди нүрни; таму ду ю фә Анлахўди хуади бынсыни. ¹⁰Вәму зә нэтар занли житянди йиху, йигә шынжын,

минзы жёди Агав, да Яхўти дифоншон лэли. ¹¹Та до вәму гынчян, ба Павелди дэзы нашон, на жыгә дэзы ба гәжяди шу дә жүә бончў, зу фәди:

– Анлахўди Рух жымужя фәдини: «Зә Иерусалим чынпуни яхўти жынму ба жыгә дэзыди жўжын е зу жымужя бончўни, йиху ба та ги вәдожынму жёгини».

¹²Вәму ба жыгә хуа тинжян, зу лян нәгә дифоншонди жынму йидарни жәщинди чүанфә Павелли, бу жё та зә Иерусалим чынпуни чи. ¹³Кәсы та фәди:

– Ниму виса жымужя кўди, жё вәди щин тынни? Вә зә Иерусалим чынпуни ви Эрса Жонгуйди гуон бусы щән жё ба вә бончўни, хан шәлүди зә нәтар вучонни.

¹⁴Вәму ба та чүанбухади йимяр, зә мә тифә жыгә, гуон фәли:

– Вәму панвонди жё Жонгуйдиди вонщән чынни.

¹⁵Гуәли житян, вәму зу шәлүди вон Иерусалим чынпуни чини. ¹⁶Да Кесария чынпуни ләди жигә манла лян вәму йидарни зули, ба вәму линдо йигә жынди жянили. Тасы Кипр хэдониди жын, минзы жёди Мнасон, та датур зусы манла. Вәму щән зандо тади жянини.

Павел жяли Ягўбәли

¹⁷Вәму доли Иерусалим чынпуниди сыхур, дишүнму жәщинди ба вәму жейинли. ¹⁸Ди эр тян Павел лян вәму йидарни доли Ягўбә гынчянли; Эрса жёхуәйди йиче пресвитерму е шудо нәтарли. ¹⁹Павел ба таму вынхули, йиху ги таму фәли, Анлахў чечў та зә данлин минзўди жынму донжунни ганли са сьчинли. ²⁰Таму ба жыгә тинжян, зу куажёнли Анлахўли, йиху ги Павел фәди:

– Вәмуди дишүн! Ни кан, зә яхўти жынмуди литу ю мәфурди щинфу Эрсади жынмуни, таму ду ба Муса шынжынди фалү зунхўдини. ²¹Таму ду тинжянли: ни жетё вәгуй жўди яхўти жынмудини, бу жё таму зунхў Муса шынжынди фалү, бу жё таму ги гәжяди эрзыму зў суннәти, е бу жё таму зунхў яхўтиди данлинди куйчын. ²²Таму ба ни кәжя ләлиди яндин тинжян, нәхур жё вәму замужя банни? ²³Жыхур читоди жё ни жочў вәмуди хуа ганни. Жытар ю

сыгә жынни; таму ги Анлахұ гилигә вардә. ²⁴Ни ба таму линшон, лян таму йидарни ба ганжинди куйчын зунхұчи, хан ти таму ба чян жёги, жё таму ба ту тидё. Ни дан жыму-жя ганли, дажя зу жьдони: таму тинжян ниди сычин бусы жьнди, хан жьдони, ни гэжя е ба Муса шынжынди фалу зунхұдини. ²⁵Ги щинфу Эрсади данлин минзұди жынму вәму зочян щегуә йигә щин, гиди фынфу, жё таму бә чы ги данлин хұдаму жүгиди гўрбани, бә хўлон, бә чы жүсы сынлинди жу зәмусы щезу.

²⁶Ди эр тян Павел ба нә сыгә жын линшон, лян таму йидарни ба ганжинди куйчын зунхұли. Та хан жинли Иерусалимди сыни, ги дажя фәли, гуә дуәшо гунфу йиху ганжинди жызы ванни, нәхур жё яхўтиди ахун ви таму литуди мый йигә жын ги Анлахұ ба гўрбани жүшонни.

Ба Павел жуачўли

²⁷Нә чи тян куә гуәди сыхур, да Асия дифоншон ләди жигә яхўти жын ба Павел зә Иерусалимди сыни канжянли. Таму зу ба данлинди йиче жынму ханчелә, ба Павел жуачўли. ²⁸Таму ханди:

— Щинәди Исраил жынму-я! Ниму лә ги вәму бонйихар! Жыгә жын сыжу-баха жётёдини, фандуй Исраилди минжын дә Муса шынжынди фалүдини, е фандуй жыгә сыдини. Жыхур та ба данлин минзұди жынму линдо замуди сынили, жымужя ба жыгә гуйжунди вәр зўди буганжинли!

²⁹Таму жымужя фәди, йинцысы таму ба Ефес чынпуниди жын Трофим лян Павел йидарни зә чынпуни канжянли, сылёнди Павел зочян ба та линдо Иерусалимди сынили. ³⁰Жыхур чынпуниди йиче жынму ду луандундунли; таму ду погуәлә, ба Павел жуачў, да сыни лачўчили; ба сыди мын донвәр зу гуанчўли. ³¹Жынму щён ба Павел дасыди сыхур, ющезы жын ги Рим жүндуйди дажунгуан фәли: Иерусалим чынпуниди йиче жынму ду луандундундини. ³²Дажунгуан монмонди ба донбинжынму лян жигә щёжунгуан линшон, подо жынму гынчянли. Таму йиканса: дажунгуан лян донбинжынму ләдини, зу тынха, ба Павел зә бу дали. ³³Дажунгуан до Павел гынчян, ба Павел жуачў,

хан гиди фынфу, жё ба та на лёнгэ тешын бончўни. Йиху дажўнгуан вынли:

– Жыгэ жынсы сый? Та ганли са сычинли?

³⁴ Жынму литу ющезы ханди фэ жыгэдини, ющезы ханди фэ нэгэдини, ду луандундунди, бу жё дажўнгуан жыдо жыншыди сычин. Дажўнгуан зу гиди фынфу жё ба Павел линдо йинпанни чини. ³⁵ Павел шон титэзышонди сыхур, жынму ду чишонлэ, пудо та гынчянли. Йинви жыгэ донбинжынму ба Павел тэчелэ, нашон зудёли. ³⁶ Жынму ду гыншон таму зуди, дашын хантуэли:

– Ба та садё!

*Павел ги яхўти жынму
фэли хуали*

³⁷ Ба Павел линдо йинпан гынчяндыйли, та ги дажўнгуан фэди:

– Вэ ги ни фэ йигэ хуа, нынчынма?

Дажўнгуан вынли:

– Ни дун грекди хуанима?! ³⁸ Нандый ни бусы зочян ганли зофанди нэгэ египетжынма? Ни бусы ба сычан зофанжын линчўлэ, вон кунтанни подёлиди нэгэ жынма?

³⁹ Павел хуэйдади фэсы:

– Вэсы яхўти жын, вэ зэ Киликия дифоншонди Тарс чынпуни сын-ёнхади (жысы йигэ ю миншынди чынпу). Вэ читоди жё ни ги вэ ги кухуан, жё вэ ги жынму фэшер хуа.

⁴⁰ Дажўнгуан зу гили кухуанли. Павел шонли титэзышон, ба шу жоди жё жынму нанвынни. Дажя ду нанвынхали; Павел зу на яхўтиди йўян ги таму фэкэ хуали.

22 Павел фэди:

– Вэди жонгуйдиму дэ дишўнму! Ниму тинйихар, вэ зэ нимуди мянчян щён ба гэжя щибыйни.

² Таму ба Павел на яхўти йўян ги таму фэхуади тинжян, ду йўэшин нанвынхали. Нэхур Павел фэди:

– ³ Вэсы яхўти жын, зэ Киликия дифоншонди Тарс чынпуни сын-ёнхади, зэ Иерусалим чынпуни жондади. Вэ зэ Гамалиил гынчян ба заму зўзў-быйбыйди йиче фалу

ду люшынди шишүөгүә, зушён жиргә ниму йиён, нэхур вә е жәшинди бэвон Анлахўли. ⁴Зочян вә ба жыгә жёшүәди жынму е жуйгүә; ба нанжынму дә нүжынму ду жуачў, ядо банфонзыни, ба тамуди мин хэли. ⁵Да ахун лян годын шонлён хуэййиди йиче йүанму ду нын жын вә фәхади хуасы жыншыди. Таму ба ги Дамаск чынпуниди яхўти жынму щехади щин ги вә гигили; йинви жыгә, вә щён зә нэтар ба щинфу Эрседи жынму жуачў, бончў, йиху линдо Иерусалим чынпуни, жё таму шу зуйни.

***Павел фәли та замужя
щинфули Эrsa Жонгуйдили***

(An 9:1-19; 26:12-18)

– ⁶Вә зә лўшон зуди до Дамаск чынпу гынчяндыйли, мынмынди да тяншон щянчўлэди да гуонлён ба вә да сыжу-бахани жолёнли. ⁷Вә падо дишон, зу тинжянли йигә шынчи ги вә фәди: «Савл, Савл! Ни виса жуй Вәдини?» ⁸Вә вынли: «Жонгуйди, Нисы Сый?» Нэгә шынчи хуэйдади фәсы: «Вәсы ни жуйди Назарет чынпуниди Эrsa». ⁹Лян вә йидарни зуди жынму ба нэгә гуонлён е канжянли, кәсы мә тинжян лян вә фәхуади шынчи. ¹⁰Йиху вә кә вынли: «Жонгуйди, жё вә ган сани?» Жонгуйди зу ги вә фәди: «Челә, жин Дамаск чынпуничи, нэтар жынму ги ни фәни, ни ё ган сани». ¹¹Зу ви нэгә да гуонлён вәди нянжин хали, сыса ду канбужянли; лян вә йидарни зуди жынму ба вә линдо Дамаск чынпунили. ¹²Нэтар ю йигә жынлэ, минзы жёди Анания. Тасы хәпа Анлахўди жын, ба Мусади фалү зунхўдини, зә Дамаск чынпуни жўди йиче яхўти жынму ду ба та тәнэдини. ¹³Та долә, зандо вә мянчян, зу фәли: «Савл дищүн, вә панвонди жё ни йүанхуэй ба са ду нын канжянни!» Зу нэгә сыхур вәди нянжин йүанхуэй нын канжянли, вә зу ба Анания канжянли. ¹⁴Та кә фәли: «Заму зўзў-быйбыйди Анлахў ба ни кәжя жанчўлэли, жё ни ба Тади вонщён жыдони, ба Тади гундо Хуәжи канжянли зэмусы ба жыгә гундо Хуәжиди шынчи е тинжянли. ¹⁵Йинцысы ни ё ви Та дон гўвани,

ба ни канжянхади зэмусы тинжянхади сычин ги йиче жынму ду фэни. ¹⁶ Жымужя, ни хан дын садини? Челэ, жё ба ни ви Тади минзы зэ фи литу ши, ба ниди гўнахар щидё!»

*Павел фэли Эrsa Жонгуйди замужя жё та
ги данлин минзўди жынму чуанжёни*

¹⁷ Йиху вэ хуэйли Иерусалим чынпули. Йихуэй вэ зэ Иерусалимди сыни чито Анлахўди сыхур, жянли йигэ чигуэ сычин. ¹⁸ Вэ канжанли Эrsa ги вэ фэди: «Ни куэкуэди да Иерусалим чынпуни зудё, йинцысы жытарди жынму бу тин ни фэ Вэди хуа». ¹⁹ Вэ фэли: «Жонгуйди! Таму ду жыдо, вэ зочян зэ заёнди синагога литу чигуэ, ба щинфу Ниди жынму жуачў, ядо банфонзынили, ба таму хан дали. ²⁰ Ба Ниди гўва Стефан дасыди сыхур, вэ е зэ нэтар занди ги нэгэ сычин гили чинйўанли, хан ба дасы Стефан жынмуди йишон жоканли». ²¹ Кэсы Жонгуйди ги вэ фэли: «Ни чи! Вэ ба ни дафадо йўан дифоншонни, до вэдожынму жўди нэтарни».

²² Жынму ба Павел жёнхади хуа йичыр тиндо жыгэ сыхуршонли; кэсы таму тинжян жыгэ хуа, зу дашын хантуэли:

– Ба та ё дасыни! Жымугэ жын ё сьдёни!

²³ Таму жымужя ханди, ба гэжяди йишон чэлан, ба дшонди тў садо тяншонли. ²⁴ Нэхур дажўнгуан гиди фынфу, жё ба Павел линдо йинпанни чи, хан жё донбинжынму на бянзы ба та дади, шынвын тани, йинцысы дажўнгуан щён жыдо, виси жынму жымужя ханди фандуйли Павелли. ²⁵ Донбинжынму ба Павел бончў, щён да тани. Нэгэ сыхур Павел ги гынчян занди йигэ щёжўнгуан фэди:

– Нандый ниму жочў Римди фалў ба Рим гуйжяди мэзуйди жын на бянзы нын данима?

²⁶ Нэгэ щёжўнгуан тинжян жыгэ хуа зу до дажўнгуан гынчян чи, ги та фэди:

– Ни щён замужя банни? Нэгэ жынсы Рим гуйжяди жын!

²⁷ Дажунгуан доли Павел гынчян, вынли тали:

– Ни ги вә фәйхар, нисы Рим гуйжяди жынма?

Павел хуэйдади фәсы:

– Зусы.

²⁸ Дажунгуан кә фәди:

– Вә хуали хошо чян цэ чынха Рим гуйжяди жынли!

Павел фәди:

– Вә да сын-ёнха зусы Рим гуйжяди жын.

²⁹ Щён шынвын Павелди нэщезы жынму донвәр да та гынчян зудёли. Дажунгуан е дали лынжанли, йинцысы та туни ба Павел бончўли, кәсы жыхур та жыдоли Павелсы Рим гуйжяди жын.

*Павел зә яхўтиди годын шонлён
хуэйишон жёнли хуали*

³⁰ Нэгә дажунгуан щён жыншыди жыдо, яхўти жынму ги Павел дин са зуйни. Йинви жыгә ди эр тян, та ба Павелди тешын гәкә, гиди фынфу, жё яхўтиди да ахунму лян годын шонлён хуэййиди йиче йўанму ду шудо йидарниди йиху, ба Павел линчўлэ, жё та зандо тамуди мянчяни.

23 Павел ба хуэййиди йўанму люшынди вонлийхар, зу фәди:

– Щинәди дищунму! Вә йичыр до жиргә ви Анлахў гуәли ю лёнщинди жызыли.

² Жыхур яхўтиди да ахун Анания ги гынчян занди жынму гиди фынфу, жё таму ба Павелди зуй дани. ³ Павел ги Анания фәди:

– Нисы фабыйлиди чён! Анлахў да нини! Ни зә нэтар зуәди, щён жочў фалү шынвын вәни, кәсы ни гәжя бу зунхў фалүди ги жынму гиди фынфу жё да вәни!

⁴ Гынчян занди жынму фәди:

– Ни хан ган хәщүә Анлахўди да ахуннима?!

⁵ Павел фәди:

– Дищунму, вә мә жыдо тасы да ахун. Китабушон щеди: «Бә хәщүә ниди минжынди линшули».

⁶Павел канчүлэ жыщезы жынму литу юдисы саддукейжынму, юдисы фарисейжынму. Та зу зэ годын шонлён хуэйишон хантуэли:

– Шинэди дишүнму! Вэсы фарисейжын, есы фарисейжынди эрзы. Вэ зывонди вучонлиди жынму кэ хуэни, жиргэ зэ жытар зу ви жыгэ шынвын вэдини!

⁷Та ба жыгэ хуа фэван, фарисейжынму лян саддукейжынму донвэр зынжонкэли; дажя ду фынчын лён базыли. ⁸Йинцысы саддукейжынму бу шинфу вучонлиди жынму кэ хуэди, е бу шинфу ю Тянщян лян данлинди рухни, кэсы фарисейжынму ба жы сангэ сычинди ду шинфуни. ⁹Дажя ду дашын ханди сыхур, фарисейжынму литуди жигэ нянжинжын занчелэ, фандуйди фэли:

– Вэму канбучүлэ жыгэ жын ю са цуэни! Тянщян хуэйжэсы рух лян та хаба фэли хуалима?

¹⁰Жынму ду йүэшин зынжонкэли; дажунгуан хэпа тамунын ба Павел на жүэ тасы, зу ги донбинжынму гиди фынфу жё таму хачи, ба Павел да жынму донжунни лачүлэ, линдо йинпанни чини. ¹¹Хили Эрса Жонгуйди зандо Павелди мянчян, фэди:

– Ни ба данзы фон да! Ни зэ Иерусалим чынпуни ги Вэ кэжя донли гүвали, лян жыгэ йиён, ни зэ Рим чынпуни е ё ги Вэ дон гүвани.

Ба Павел дасыди жянчө

¹²Ди эр тян ганзо, яхүти жынму йидарни шонлёнхо, юди жын хан дүли жули: таму дан ба Павел бу дасы, са ду бу чы, е бу хэ. ¹³Дүли жуди жынму йиман ю сышыдуэ жынни. ¹⁴Таму доли да ахунму лян ложынму гынчян, зу фэди:

– Вэму кэжя дүли жули: вэму дан ба Павел бу дасы, са ду бу чы! ¹⁵Жыхур ниму лян годын шонлён хуэйиди йүанму читоди жё дажунгуан гигэ фынфу, жё ба Павел линдо жытар. Ниму жуонди зушён вонщёнди йүанхуэй ба та шынвынйихарни. Нэхур вэму шэлүхо, Павел хан зэ лүшон зуди сыхур, вэму зу ба та дасыни.

¹⁶Павелди вэсын ба жыгэ жанчө тинжан, зу подо йинпаннили, ги Павел ба жыгэ ду фэгили. ¹⁷Павел ба йигэ щөжунгуан жёлэ, ги та фэди:

– Вэ читоди жё ни ба жыгэ щөхуэр линдо дажунгуан гынчяни; жыгэ щөхуэр щён ги та фэ йигэ хуани.

¹⁸Нэгэ щөжунгуан зу ба жыгэ щөхуэр линдо дажунгуан гынчян, фэди:

– Ядо банфонзыниди Павел ба вэ жёлэ, читоди жё вэ ба жыгэ щөхуэр линдо ни гынчяни, та щён ги ни фэ йигэ хуани.

¹⁹Дажунгуан ба щөхуэрди шу жуачү, лингуэчи, зу вынли:

– Ни щён ги вэ фэ сани?

²⁰Та хуэйдади:

– Яхүти жынму кэжя шонлөнхо, читоди жё ни миргэ ба Павел линдо годин шонлөн хуэйишонни, таму жуонди зушён вонщёнди йуанхуэй ба та шынвынйихарни. ²¹Вэ читоди жё ни ги таму бэ ги чинйуанли, йинцысы таму литу сышыдуэ жын цонха, дын Павелдини. Таму ду дүли жу, дан ба Павел бу дасы, са ду бу чы, бу хэ. Жыхур таму ду шөлүхоли, гуон дын ниди чинйуандини.

²²Дажунгуан ги щөхуэр гиди фынфу:

– Ни ги сысый ду бэ фэ: ни ба жыгэ сычин ги вэ фэли!
Йиху дажунгуан ба та фонкэли.

Ба Павел дафодо

Феликс жыгуанжын гынчяни

²³Дажунгуан ба лёнгэ щөжунгуан жёлэ, ги таму гиди фынфу:

– Ниму ба эрбый бушин зуди донбинжын шөлүха, хан ба чишыгэ чимади донбинжын зэмусы эрбый на чонганзыди донбинжын шөлүха, жиргэ хушонди жүгэ сышыншон вон Кесария чынпуни чини. ²⁴Хан ги Павел ба ма шөлүха, пиннан-вусыди ба та сундо Феликс жыгуанжын гынчяни.

²⁵Дажунгуан хан щели йигэ щин:

²⁶«Гуйжунди Феликс жыгуанжын, ни хома!

²⁷Яхүти жынму ба жыгэ жын жуачү, щён ба та дасыди сыхур, вэ жыдо тасы Рим гуйжяди жын йимяр, зу лян

жүндүй йидарни чи, ба та да яхўти жынмуди шуни дуэчў-лэли. ²⁸Йиху вэ щён жыдо таму ги жыгэ жын дин са зуй-ни, йинви жыгэ зу ба та линдо тамуди годын шонлён хуэйишонли. ²⁹Вэ канчўлэ та са зуй ду мэю, бу жыгў ги та дин сызуй хуэйжэсы ядо банфонзыни. Таму ги жыгэ жын динди зуй лян тамуди жёмын фалушонди вынти ю щёнганни. ³⁰Йиху вэ жыдохали, яхўти жынму сы жанчёди, щён ба жыгэ жын дасыни. Вэ донвэр ба та дафадо ни гынчян, хан жё ги та динзуйди жынму е до ниди мянчян да гуансыни. Вэ ги ни панвон пиннан!

Ще щинди жынсы Клавдий Лисий».

³¹Хили донбинжынму жочў фынфу ба Павел линдо Ан-типатрида чынпунили. ³²Ди эр тьян бушин зуди донбинжынму хуэйли йинпаннили, жё чимади донбинжынму лян Павел йидарни чили. ³³Таму доли Кесария чынпуни, ба щин ги Феликс жыгуанжын гигили, ба Павел е жёги тади шунили. ³⁴⁻³⁵Жыгуанжын ба щин нянван, зу вынли Павелли, тасы нагэ дифоншонди жын. Жыгуанжын жыдоха Павелсы Киликия дифонди жын, зу фэди:

— Ги ни динзуйди жынму лэди сыхур, вэ тин ниди сычинни.

Та зу гиди фынфу, жё ба Павел ядо Ирод щюгэхади жынфуди банфонзынили.

*Яхўти жынму ги Павел
динли зуйли*

24 Гуэли ву тьян, яхўтиди да ахун Анания лян жигэ ложын зэмусы йигэ фэжязы, минзы жёди Тертулл, йидарни доли Кесария чынпунили. Таму зэ Феликс жыгуанжынди мянчян ги Павел динли зуйли. ²Жыгуанжын ба Павел жёлэли йиху, Тертулл ги Павел динзуйди ги жыгуанжын фэди:

— Гуйжунди Феликс дажын! Ни ю эргили гуан вэму гуйжяди йимяр, вэму гуэ пиннан-вусыди жызыдини; ни ба минжынди гуонийин е вон хони гэбянли. ³Ни зэ сыжу-бахани ганхади сычин вэму тьянтянмир канчи ходихын, ви жыщезы сычин вэму ги ни е дощедини. ⁴Вэ бу щён жыму

да гунфу мафан ни. Хазыр вэ гуон читоди жё ни ба вэмуди жы йидяндяр хуа жыннэди тинйихарни. ⁵Вэму канчүлэли, жыгэ жын гэжя зушёнсы вынбин йиён; та зэ чун дун-яшон жё яхүти жынму фанчелэни, та хансы назорей-жынму жёхуэйди тузы. ⁶⁻⁷Та шён ба Иерусалимди сы вон буганжинни зүди сыхур, вэму ба та жуачүли. ⁸Ни гэжя ба жыгэ жын шынвынйихар, ни зу жйдони вэму ги та дин са зуйдини.

⁹Нэтар занди яхүти жынму ба Тертулл фэди хуа е жын-чынли.

Павел ба гэжя щибыйли

¹⁰Жыгэ сыхур жыгуанжын ги Павел дянтуди жё та фэ хуани. Павел зу фэкэ хуали:

– Гуйжунди Феликс дажын! Вэ жыдо ни зэ жыгэ гуйжя хын жинян дон вынгуансыди жындини. Йинви жыгэ вэ гого-шинщинди зэ ниди мянчян ба гэжя щибыйни. ¹¹Жё ни жыдоха, шыэр тянди зочян вэ доли Иерусалим чынпуни, шён бэвон Анлахүли. ¹²Жыщезы жынму гэжя жанли вэ зэ Иерусалимди сыни лян сый ду мэ тан хуа, зэ синагога хуэйжэсы чынпуди данлинди дифоншон е мэ жё жынму фанчелэ. ¹³Таму е бу нын ги ни миндамин фэчүлэ, таму ю са ги вэ динзуйди йинйирни. ¹⁴Кэсы вэ ё жын йигэ сичинни: вэ ба вэму зүзү-быйбыйди Анлахү бэвонди еба, таму сылэнди вэ жымужя бэвон Анлахүди лүфусы ज्याди. Вэ е щинфу Муса шынжынди фалүшон лян шынжынмуди фушон шехади йиче хуасы жынди. ¹⁵Вэ лян таму йиён зывон Анлахүдини, зывонди хо жынму дэ ха жынму вучонли йиху ду кэ хуэни. ¹⁶Йинви жыгэ, вэ гэжя зэ Анлахү зэмусы жынмуди мянчян йинавар шыканди ю ганжинди лёнщинни. ¹⁷Вэ да Иерусалим чынпуни зудё кэжя хошо нянли. Жыйихуэй вэ нади йищезы чян доли Иерусалим, шён ги вэди минзүди жынму бонйихар монни, хан шён ба гүрбани жүгини. ¹⁸Таму зэ Иерусалимди сыни зожуэ вэди сыхур, вэ ба ганжин куйчын кэжя зунхүли; вэ мэ жё жынму шудо йидачүнни, е мэ гангуэ са фанлуан. ¹⁹Кэсы нэхур да Асия дифоншон лэди жигэ яхүти жын е зэ нэтар зандилэ;

таму дан щён ги вэ дин са зуйли, жё таму е до ниди мянчян лэ, дин зуйлэ. ²⁰Хуэйжэсы жё жытар занди жыщезы жынму фэ, ба вэ зэ яхўтиди годыи шонлён хуэйишон шынвынлиди сыхур, таму зожуэ вэ ганли сади зуйлима. ²¹Нэхур вэ зэ тамуди мянчян занди гуон ханли йигэ хуа: «Вэ щинфу вучонлиди жынму кэ хуэни, жиргэ зэ жытар зу ви жыгэ шынвын вэдини!»

²²Феликс ба Эрсади жёщүэ кэжя жыдо бу шоди йимяр, зэ мэ тин жыщезы яхўти жынму, зу ги таму фэди:

– Лисий дажунгуан лэли, нэхур вэ ба нимуди гуансы вындо йиршонни.

²³Та ги щёжунгуан гиди фынфу жё ба Павел бохўчўни еба, кэсы ба та фонсунли йидяр, жё Павелди чинчин-ляншуму фусы тани.

*Павел зэ Феликс лян
Друзиллади мянчянни*

²⁴Гуэли житян, Феликс лян тади яхўти пэе, минзы жёди Друзилла, йидарни лэли. Та ба Павел жёлэ, тинлийихар Павел жёнди щинфу Эрса Мэсихди хуали. ²⁵Павел жёнли, замужя ё ган Анлахўди фынфуни, замужя ба гэжя ё дэчўни, Анлахў замужя вонху ги жынму дин зуйни. Жыхур Феликс хэли па, зу ги Павел фэди:

– Хазыр ни чи! Вэ дан ю гунфули, вэ йўанхуэй ба ни жёлэни.

²⁶Феликс хан зывонди Павел ги та гищер чянни, йинви жыгэ та чинчир ба Павел жёлэ, лян та танли хуали. ²⁷Гуэли эр няи, Порций Фест ти Феликс чынли жыгуанжынли. Феликс щён жё яхўти жынму разыди йимяр, ба Павел хан зэ банфонзыни ядини.

*Павел читоди жё Римди хуоншон
вын тади гуансыни*

25 Фест доли та гуанди дифоннили; сан тян йиху та да Кесария чынпу зудё, доли Иерусалим чынпунили. ²⁻³Яхўтиди да ахунму лян линшуму ги та фэли, таму ги Павел дин зуйни, хан читоди жё Фест ба Павел сундо

Иерусалим чынпунини, йинцысы таму сы жянчөди, щён зэ лўшон ба Павел дасыни. ⁴Фест ги таму хуэйдади фэсы:

– Хазыр жё Павел шындо Кесария чынпуни, вә гэжя е щён куэкуэди вон нэни хуэйчини. ⁵Нимуди линшуму е нын лян вә йидарни чи. Нэгэ жын дан ганли са буходи сычинли, жё таму зэ нэтар ги та дин зуйчи.

⁶Фест зэ таму нэтар хан жўли ба тян хуэйжэсы шы тян, йиху хуэйли Кесария чынпунили. Ди эр тян, та зуэдо вынгуансыди вифыншон, гиди фынфу, жё ба Павел линлэни. ⁷Павел лэли, да Иерусалим чынпуни лэди нэщезы яхўти жынму зандо Павелди жуви, ги та золи хошо цуэ, динли хошо зуй, кэсы ба са йинйир ду миндамин фэбучўлэ. ⁸Павел ба гэжя щибый, фэди:

– Вә ги яхўти жынмуди фалү, Иерусалимди сы дэ Римди хуоншон са гўнахар ду мө гангуэ.

⁹Кэсы Фест щён жё яхўти жынму разыди йимяр, зу вынли Павелли:

– Ни щён зэ Иерусалим чынпуни чи, жё вә зэ нэтар вын ниди гуансынима?

¹⁰Павел хуэйдади:

– Хазыр вә ё зандо Рим хуоншонди судшонни; нэтар зусы ё шынвын вэди вифын. Ни гэжя е жыдони, вә ги яхўти жынму са зуй ду мө гангуэ. ¹¹Вә дан ганли са зуйли хуэйжэсы ганли са жыгў ги вә дин сызуйди сычинли, нэхур вә бу па ги вә дин сызуйни. Таму дан ги вә динди зуй ду бусы жыншыди зуй, сысый бу нын ба вә ги таму жёги. Вә читоди жё Римди хуоншон гэжя вын вэди гуансыни!

¹²Фест лян шонлён хуэййиди йўанму шонлёнлийихар, зу фэди:

– Ни читоди жё Римди хуоншон гэжя вын ниди гуансынима? Ни зу до Римди хуоншон гынчян чи!

***Фест лян Агриппа танли
Павелди сычинли***

¹³Гуэли житян, яхўтиди хуоншон Агриппа лян Вереника доли Кесария чынпуни, вынхули Фестли. ¹⁴Таму зэ нэтар

жўли житянди йиху, Фест ба Павелди сычин ги Агриппа хуоншон фэли:

– Жытар ю йигэ жынни, нэсы Феликс жыгуанжын жуачўди зуйжын. ¹⁵Зочян вэ доли Иерусалим чынпуниди сыхур, нэтар яхўтиди да ахунму лян ложынму ду читоди жё вэ ги нэгэ жын дин зуйни. ¹⁶Вэ ги таму фэли, жочў Рим гуйжяди куйчын, ги сый дан дин зуй, ги та дин зуйди жын е ё лэ зандо нэгэ жынди мянчянни; нэгэ жын хан нын ба ги та динди зуй шидёни. ¹⁷Нэщезы жынму ду доли жытарди йиху, ди эр тян вэ ганжин зуэдо вынгуансыди вифыншон, гилигэ фынфу жё ба Павел линлэни. ¹⁸Таму ду занчелэ ги Павел дин зуйни, кэсы вэ сылёнди таму фэхади йиче зуй ду бусы жыншыди зуй. ¹⁹Таму лян Павел зынжон таму жёмынди вынтили, хан тифэ йигэ Жынли. Жыгэ Жынди минзы жёди Эрса, Та вучонли, кэсы Павел фэди Та хан хуэдини. ²⁰Фэдо жыгэ сычиншон, вэ шызэ бу жыдо ё замужя банни. Вэ вынли Павелли, та щён зэ Иерусалим чынпуни чини, жё вэ зэ нэтар ба та шынвынма? ²¹Кэсы Павел читоди жё ба та люха, жё Римди хуоншон гэжя вын тади гуансыни. Йинви жыгэ вэ гилигэ фынфу, жё та шындо банфонзыни, йичыр дындо вэ ба та дафадо Римди хуоншон гынчянни.

²²Агриппа ги Фест фэди:

– Вэ е щён тинйихар жыгэ жынди хуани.

Фест зу фэди:

– Миргэ ни тин тани.

²³Ди эр тян, Агриппа лян Вереника чуанди гуйжунди, хоканди йишон жинли вынгуансыди фоннили; жигэ дажунгуан зэмусы жыгэ чынпуди жан годын фынбырди жынму лян таму йидарни лэли. Фест гилигэ фынфу, жё ба Павел линлэни. ²⁴Йиху Фест фэди:

– Агриппа хуоншон лян жытар зуэди йиче жынму! Ни му ба жыгэ жын канйихар, йиче яхўти жынму зэ Иерусалим чынпуни зэмусы зэ жытар ги вэ фэгуэ, ё ги жыгэ жын дин сызуйни. ²⁵Кэсы вэ канбучўлэ та ганли са зуй, бу жыгў ги та дин сызуй. Та жё Римди хуоншон гэжя вын тади гуансыди йимяр, вэ динли дян, щён ба та дафадо Римди

хуоншон гынчяни. ²⁶Вэ бу жыдо фэ жыгэ жын ги хуоншон ше сани, йинви жыгэ вэ ба та линдо дажыди мянчян, тэбесы линдо ни, Агриппа хуоншон, мянчяни. Ни ба та шынвынди сыхур, жё вэ жыдоха, вэ нын ше сани. ²⁷Йинцысы вэ сылэнди, ба йигэ зуйжын дан дафадо Рим хуоншонди мянчян, яндин ё ба тади зуй шегини.

Павел зэ Агриппа хуоншонди мянчян ба гэжя щибыйли

26 Агриппа хуоншон ги Павел фэди:
– Жыхур ни нын ба гэжя щибыйни.

Павел зу ба шу тэчелэ, ба гэжя вон быйни шиди фэди:

– ²Гуйжунди Агриппа хуоншон! Вэ гошиндыхын, йинцысы жиргэ зэ ниди мянчян вэ нын ба яхүти жынму ги вэ динхади йиче зуй шидёни. ³Вэ хан гошинди, йинцысы ни ба яхүти жынмуди куйчын лян жёмынди вынти жыдоди ходихын. Йинви жыгэ, вэ читоди жё ни жыннэди ба вэ тинйихарни. ⁴Яхүти жынму ду жыдони, вэ да суйди сыхур йичыр до жиргэсы замужяди йигэ жын. Вэ да сын-ёнха зу зэ жыгэ гуйжяди минжынди донжунни гуэли жызыли, зэ Иерусалим чынпуни жўдилэ. ⁵Таму дан ю вонщёнли, зу нын миндамин жын, вэ датур зусы йигэ фарисейжын (фарисейжынму ба замуди жёмын жуади жиндыхын). ⁶Жыхур зэ жытар ба вэ шынвынди, йинцысы вэ зывонди, Анлахў ги замуди зўзў-быйбый зочян щўхади сычин кэжя чынхали. ⁷Заму шыэргэ зўди жынму йитян йивэщи бэвон Анлахўдини, зывонди ба жыгэ щўхади сычин йўжяни. Вэди хуоншон! Яхүти жынму ги вэ дин зуйди, йинцысы вэ зывонди жыгэ щўхади сычин кэжя чынли. ⁸Виса жынму бу щинфу Анлахў нын жё вучонлиди жынму кэ хуэни? ⁹Зочян вэ сылэнди, вэ яндин ё на заёнди лўфу фандуй Назарет чынпуниди Эрсани. ¹⁰Вэ зэ Иерусалим чынпуни зу жымужя гангуэ. Яхүтиди да ахунму ги вэ гили чўанли, жё вэ ба хошо щинфу Эрсади дищўнму жуачў, ядо банфонзынили. Ги таму дин сызуйди сыхур, вэ е гили чинйўанли. ¹¹Чўгуэ жыгэ, вэ зэ мый йигэ синагогани чинчир ба таму зотагуэ, нингўди жё таму дэцэ Эрсани. Вэ жыму хын тамуди йимяр, хан зэ вэгуиди чынпуни чи, ба таму жуйгуэ.

***Павел жёнли та замуҗя
щинфули Эрса Жонгуйдили***

(Ап 9:1-19; 22:6-16)

¹² Йихуэй яхўтиди да ахунму ги вэ гили чўанли дэ фынфу, жё вэ зэ Дамаск чынпуни чини. ¹³ Вэди хуоншон! Бонжер шонвуди сыхур, мынмынди вэ зэ лўшон канжянли би жэту хан дади гуонлёнли; жыгэ гуонлён ба вэ зэмусы лян вэ йидарни зуди жынму да тяншон жолёнли. ¹⁴ Вэму ду падо дишонли. Вэ зу тинжянли йигэ шынчи, на яхўти хуа ги вэ фэди: «Савл, Савл! Ни виси жуй Вэдини? Ни зущён йигэ ню ба фоннювади жян бонбонзы на туйзы тидини, зу жымуҗя ню гэжя е дэли шонли». ¹⁵ Вэ зу вынли: «Жонгуйди, Нисы сый?» Жонгуйди фэди: «Вэсы ни жуйди Эрса. ¹⁶ Ни челэ, занха. Вэ доли ниди мянчян, щён жё ни дон Вэди хуэжини зэмусы гўвани. Вэ жё ни ба жиргэ канжянхади сычин дэ вонху Вэ ги ни зыгиди сычин ги даҗя миндамин фэни. ¹⁷ Вэ ба ни дафадо вэдожынмуди донжунни чини, ба ни да Израилди жынму лян вэдожынмуди шуни жефончўлэни. ¹⁸ Ни ё ба тамуди нянжин зынкэни, жё таму да хинаншон жуандо гуонлённи, да иблисди чўанлишон хуэйдо Анлахў гынчян. Таму дан щинфу Вэли, ба тамуди гўнахар зу фоншэни, таму зэ Анлахў жянчўлэди минжын донжунни жан гэжяди вэрни».

***Павел фэли та замуҗя
ги жынму чуанжэли***

¹⁹ Гуйжунди Агриппа хуоншон! Йинви жыгэ вэ ба тяншон халэди жыщезы хуа зунхўли. ²⁰ Щянтуни вэ зэ Дамаск зэмусы Иерусалим чынпуни, йиху хан зэ чўан Яхўти дифоншон зэмусы вэдожынму литу чуанжэли, жё таму шуцин, жочў Анлахў жуангуэлэ, жын тамуди гўнахар. Жё таму зущён таму шушинди йигэ жихо йиён ган хо сычинни. ²¹ Вэ зэ Иерусалим сыниди сыхур, йинви жыщезы сычин яхўти жынму ба вэ жуачў, щён дасыни. ²²⁻²³ Кэсы Анлахў йичыр до жиргэ ги вэ бонмонди йимяр, вэ зандо жытар ги да-щёжынму ду миндамин фэдини. Вэ фэди сычин зущён

Муса лян данлинди шынжынму фәхади йиён: Мәсих яндин ё шу кўнанни, вучонлиди йиху, Та ту йигә кә хуәни, ги яхўти жынму лян данлин минзўди жынму чуанжәни: жүминди гуонлән кәжя ба таму жоләнли!

²⁴ Павел жымужя ба гәжя щибыйди сыхур, Фест дашын ханди:

– Павел, ни шодёли! Ниди да эрлин жё ни шодёли!

²⁵ Кәсы Павел фәди:

– Фест дажын! Вә мә шодё; вә фәди хуа дусы жынди, йидяр е бусы жяди. ²⁶ Агриппа хуоншон е жыдо жыщезы сычинни, йинви жыгә вә ба данзы фон дади ги та фәдини. Вә щинфуни, хуоншон ба са ду канчўлэли, йинцысы жыщезы сычин дусы зә дажяди мянчян йўхади. ²⁷ Гуйжунди Агриппа хуоншон! Ни щинфу шынжынму фәхади хуанима, хансы бущинфу? Вә жыдони, ни щинфудини!

²⁸ Агриппа ги Павел фәди:

– Ни щён на жижү хуа жё вә чынха христианжыннима?

²⁹ Павел хуэйдади фәсы:

– Булүн на дуәшо хуа еба, вә чито Анлахўди, жё ни зәмусы жиргә зә жытар тин вәди хуади йиче жынму, чўгуә вә шыншонди тешын, ду чынха зущён вә йиёнди жынни!

³⁰ Жыхур Агриппа хуоншон, Фест жыгуанжын, Вереника лян данлинди жынму ду занчелэли. ³¹ Таму чўчи, йигә ги йигә фәди:

– Жыгә жын са зуй ду мәю, бу жыгў ги та дин сызуй хуэйжәсы ядо банфонзыни.

³² Агриппа ги Фест хан фәди:

– Жыгә жын дан мә читоди жё Римди хуоншон гәжя вын тади гуансыли, ба та зозор нын фонкә.

Павел вон Рим чынпуни фушон зудёли

27 Фест жыгуанжын динли дян, жё вәму вон Италия фушон чини. Йиху та ба Павел лян данлинди жигә фанзуйди жын ги Юлий жүнгуан жёгили (Тасы Рим хуоншон жүндуйди жүнгуан). ² Вәму шонли да Адрамиттий чынпуни ләди йигә чуаншонли. Жыгә чуан ё фудо Асия дифоншонди жигә чынпунини. Йигә жын, минзы жёди

Аристарх (тасы Македония дифоншонди Фессалоники чынпуниди жын) е лян вәму йидарни фули. ³Ди эр тян вәму доли Сидон чынпунили. Нэтар Юлий жүнгуан щин-ванди ба Павел фонсунлихар, ги та гиди кухуан, жё та зо тади ляншуму чини, жё таму ба Павел цощинйихарни. ⁴Йиху вәму да нэтар фушон зудёли. Вәму ба дуймянди фын жянди йимяр, зу зэ Кипр хэдоди нэбонгө фудини. ⁵Вәму гуэли Киликия лян Памфилия дифон дуймянди хэзы, доли Ликия дифоншонди Мира чынпунили. ⁶Нэтар Юлий жүнгуан зожуэли да Александрия чынпуни лэди йигэ чуан (жыгэ чуан ё вон Италия чини), зу жё вәму ду шонли жыгэ чуанли. ⁷Чуан манмар фудини; гуэли хошо сыхур, вәму зуэли хошо нан цэ доли Книд чынпу жуви-ди дифоншонли. Дуймянди фын бу жё вәму лян зочян йиён вон чян фу; чуан зу зэ Крит хэдоди нэбонгәрни да Салмон дифонди гуэзы фугуэчили. ⁸Вәму фын хэянзы вон чян фудини, зуэли хошо нан цэ фудо йигэ дифон-шонли, минзы жёди «Хо Хэван»; жыгэ дифон ли Ласея чынпу бу йуан.

⁹⁻¹⁰Гуэли хошо сыхурли, вон быйни щи гўнахарди жызы* е гуэли, чуан бу нын пиннан-вусыди вон чян фули. Павел ги дажя гили йигэ шонлён:

– Ляншуму! Вэ канди, заму дан да жытар хан вон чян фу, жыгэ данщүандихын. Гуон бусы чуан зэму-сы чуаншонди хуэ ду шу хэни, ба замуди мин е бохўчи тэ нанли.

¹¹Кэсы жүнгуан тинли чуанди тузы лян чуанжўрди хуа, мэ тин Павелди хуа. ¹²Жыгэ хэван е бусы вэдунди хо дифон; йинви жыгэ дуэйибанзы чуаншонди жынму сылёнди чуан ё вон чян фуни, куэкуэди фудо Финик чынпуничи, зэ нэтар вэдунни. Финиксы Крит хэдошонди йигэ чынпу, жочў щин-нанбонгэди зэмусы щин-быйбонгэдини.

* 27:9 «Вон быйни щин гўнахарди жызы» – яхўти жынму ба жыгэ жечи чютян гуэдилэ. Жыгэ сыхуршон гуа дафындини, щя да йүдини, чуан фубукэ.

Хэниди хуонфын-бойу

¹³ Нэхур нанфын манмар гуачелэли, дажя сылэнди таму нын фудо таму шён фуди дифоншончи, зу ба чуанди темо начелэ, зэ Крит хэдоди бонгэрни футуэли. ¹⁴ Кэсы гуэли будади гунфу, да фын, минзы жёди Эвраквилон**, да хэдони гуачелэли. ¹⁵ Фын зу ба чуан жуачўли; вэму бу нын жочў йинмянди фын вон чян фуди йимяр, жё фын ба чуан гуашон зули. ¹⁶ Чуан жочў Клавда щё хэдониди нанбонгэ фуди сыхур, вэму ба вихўзы щипшир бохўбучўли. ¹⁷ Ёчуанди жынму ба вихўзы ладо чуаншон йиху, ба чуан на шынзы бончўли. Таму хэпа чуан фудо Сиртди савэшонни, зу ба бынбу нахалэ, зу жымужя фудини. ¹⁸⁻¹⁹ Дафын кэ гуади йимяр, таму ди эр тьян ба чуаншонди хуэ эрдо хэнили, ди сан тьян ба чуаншон йўнди дунши е ду эрдёли. ²⁰ Хошо жызы вэму ба жэту лян щинщю ду канбужян; фын лян филон йўэщин дали; лийирни вэму жюминди зывон ду мёюли. ²¹ Чуаншонди жынму хын житьян са ду мё чы; нэхур Павел зандо дажяди мянчян зу фёди:

— Ляншуму! Ниму зочян дан тин вёди хуаса, да Крит хэдони дан бу зуса, заму зу бу шу жыщезы нан, бу дый жыгэ шэбын. ²² Жыхур вэ чўанфёди жё ниму фонщинни, йинцысы ба ниму литу йигэ жынди мин ду бу хэ, гуон жыгэ чуан далансандёни. ²³ Зуэргэ хили, Анлахўди Тянщян (вэ ба жыгэ Анлахў бэвондини) зэ вёди мянчян лэ, ги вё фёли: ²⁴ «Павел, ни бэ хэпали! Ни ё зандо Рим хуоншонди мянчянни. Анлахўди щин ванди йимяр, Та ба чуаншонди лян ни йидарни йиче жынмуди мин бохўчўни». ²⁵ Йинви жыгэ ниму бэ хэпали! Вэ щинфу Анлахўни, Та замужя ги вё фёли, зу нэмужя чынни. ²⁶ Заму вонху яндин фудо йигэ хэдонини.

²⁷ Ди шысы тьянди хили вэмуди чуан хан зэ Адриатика хэни фудилэ. Бан-ени ёчуанди жынму сылэнди вэму кэжя до димян гынчяндыйли. ²⁸ Таму зу ба йигэ шынзы эрдо фи литу, щён канйихар фи дуэму шын, йиканса ю сышыгэ метр шынни. Чуан вон чян щўэви фулихар, таму йўанхуэй

** 27:14 «Эвраквилон» — жыгэ хуади йисысы «Дун-бый фын».

ба шынзы эрдо фи литу, кә йиканса ю саншыгә метр шынни. ²⁹Таму хәпа чуан пындо хәянзышонди шытушон, зу да чуанди йиршон ба сыгә темо эрдо фи литули, зывонди жәту куэ чүлэни. ³⁰Нәхур ёчуанди жынму шён да чуаншон подёни, зу ба вихұзы фондо фи литули, жуонди зу шён таму шён да чуанди тушон ба темо эрдёни. ³¹Нәхур Павел ги жүнгуан лян донбинжынму фәди:

– Жыщезы жынму дан бу шыndo чуаншон, ба нимуди мин жүбуха!

³²Донбинжынму донвәр ба вихұзыди шынзы кандёли, вихұзы зу дедо фи литули. ³³Тян лёндыйлиди сыхур, Павел чуанфәди жё дажя чы йидяр чыдини. Та фәди:

– Ниму дынли шысы тянли, са ду мә чы. ³⁴Йинви жыгә вә чуанфә ниму, чы йидяр чыди, жё ниму ю жинни, йинцысы ниму тушонди йигә туфа ду бу шәдә.

³⁵Ба жыгә хуа фәван, Павел зу ба мәмә нашон, зә дажяди мянчян ги Анлахұ долигә ше, йиху быйкә зу чыли. ³⁶Дажя ду фонщинли, е чыли. ³⁷Вәмуди чуаншон йиман ю эрбый чишы люгә жынлә. ³⁸Дажя чыбоди йиху, зу ба чуаншонди мыйзы эрдо хәнили, жё чуан чинхани.

Ба дажяди мин ду жәюхали

³⁹Жәту чүлэли, ёчуанди жынму жынбудый жыгә дифон, кәсы ба йигә хэван лян ю сазыди хәянзы канжян, зу шён зо йигә лұфу жё чуан фудо жыгә хәянзышонни. ⁴⁰Таму сянтунни ба темоди шынзы кандё, жё темо дедо фи литу, хан ба чуаншон дуәди* шынзы гәкэли, ба чуан тушонди бынбу тәчелә, жё фын ба чуан гуадо хәянзышонли. ⁴¹Кәсы чуан фудо чянчүрли, чуанди ту зандо сазышонли, жуанбудунди йимяр, да филон зу ба чуанди йиба даланли. ⁴²Донбинжынму шён ба фанзуйди жынму ду дасыни, бә жё таму фушон подёли. ⁴³Кәсы жүнгуан шён ба Павелди мин жүюхани, зу донгуали тамули. Та хан гили фынфу, жё нын фуфиди жынму сянтунни да чуаншон тәхачи, фудо хәянзышонни. ⁴⁴Данлинди

* 27:40 «Дуә» – жысы гуан чуанди йигә дунши. Ба жыгә дуә на шынзы бончүдини.

жынму зуэдо муту банзышон зэмусы ба чуаншонди данлин дунци нашон, е фудо хэанзышонли. Зу жымужа, дажа ду доли хэанзышонли, ба сысыйди мин ду мө шөдө.

Зэ Мальта хэдони

28 Ба вәмуди мин жүхалиди йиху, вөму цэ жыдо нэгэ хэдоди минзы жёди Мальта. ²Хэдошонди жынму шянхуэйдихын, таму ба вөму ду жэщинди жейинли. Йү щяди, тянчи лынди йимяр, таму дянди хуэ, зу жешу вөмули. ³Павел шули хошо цэхуэ, е эрдо хуэ литули. Нэхур йигэ ю дўди чончун бу нын шу жэди йимяр, да цэхуэ литу пачўлэ, ба Павелди шу чанчўли. ⁴Хэдониди жынму канжян нэгэ чончун чандо Павелди шушонли, йигэ ги йигэ фэди:

– Жыгэ жын яндинсы йигэ хэ минди жын; ба тади мин да хэзыни жүхали еба, Тяншонди Гундо бу жё та хуэ.

⁵Кэсы Павел ба нэгэ чончун эрдо хуэ литу, гэжя йидяр ду мө шу хэ. ⁶Дажа дынди, щён канйихар Павелди шу жунчелэнима хуэйжэсы та мынмынди дедо дишон зу вучонни. Кэсы таму дынли хошо гунфули, канбучўлэ Павел шули са хэли, жыхур таму данлин сылөнди:

– Жысы хўда!

⁷Жыгэ хэдоди жыгуанжын, минзы жёди Публий, ли нэгэ дифон бу йүан та ю йигэ жўди вөрни. Та ба вөму жэщинди жейинли, жё вөму зэ тади фонзыни жўли сан тян. ⁸Нэхур Публийди дада хэ бинди йимяр, фашоди зэмусы подўди, зэ чуоншон фидилэ. Павел жинли фонзы, доли нэгэ жын гынчян, читоли Анлахўли, ба шу гэдо нэгэ жынди шыншон, зу ба тади бин канхоли. ⁹Йинви жыгэ, хэдошон данлинди бинжынму ду лэ, ба тамуди бин е канхоли. ¹⁰Таму ги вөму дуанли хошо личин. Вөму шонли чуанди сыхур, таму хан ги вөму ба лўшон йўнди дунци гигили.

Павел вон Рим чынпуни зудини

¹¹Гуэли сангэ йүэ, вөму шонли да Александрия лэди йигэ чуаншонли. Жыгэ чуанди минзы жёди «Диоскурму»*.

* 28:11 «Диоскурму» – жысы зочян грекжынму бэвонлиди лөнгэ хўда.

Чуан зэ нэгэ хэдошон занли йидун. ¹²⁻¹³Чуан фудо Сиракузы чынпунили, вэму зэ нэтар занли сан тьян, йиху йуанхуэй шонли чуан, доли Ригия чынпунили. Ди эр тьян нанфын гуачелэлиди йимяр, ди сан тьян вэму доли ПUTEОЛЫ чынпунили. ¹⁴Нэтар вэму жанли жигэ щинфу ЭРСАДИ дищүнму; таму чинди жё вэму зэ нэтар зан чи тьянни. Зу жы-мужя вэму линейрни доли Рим чынпунили. ¹⁵Римди дищүнму ба вэму долэди тинжян, зу доли «Аппийди чонзы» лян «Сангэ Кифонзы»ди дифоншон, жейин вэмули. Павел ба таму канжян зу ги Анлаху долигэ ще, ба данзы фон дали.

Павел зэ Рим чынпуни

¹⁶Вэму доли Рим чынпуниди йиху, Римди жыгуанжынму ги Павел гили кухуан, жё та лян боху тади донбинжын йидарни жудо данлинди йигэ фонзыни. ¹⁷Гуэли сан тьян, Павел ба нэгэ дифонди яхүтиди линшужынму жёдо та гынчян лэли. Таму долэ, Павел ги таму фэди:

– Щинэди дищүнму! Вэ мэ гангуэ са фандуй заму минжынди сычин, ба заму зүзү-быйбыйди куйчын е мэ пэлан. Кэсы зэ Иерусалим чынпуни ба вэ ядо банфонзынили, хан ги Рим гуйжяди жыгуанжынму жёгили. ¹⁸Таму ба вэ шынвынли, кэсы ги вэ дин сызуйди йигэ йинйир ду мэ зожуэ. Таму зу щён ба вэ фонкэни. ¹⁹Яхүти жынму фандуй вэди йимяр, вэ читоди жё Римди хуоншон гэжя вын вэди гуансыни. Вэ бу щён ги замуди минжын дин са зуй. ²⁰Зу ви жыгэ вэ чинди жё ниму лэ, щён лян ниму тан хуани. Зу ви Израилди жынмуди зывон, жыхур ба вэ на жыгэ тешын бончүдини.

²¹Таму ги Павел фэди:

– Вэму да Яхүти дифоншон тифэ ниди са щин ду мэ жегуэ, сысый да нэтар ба са щинвын ду мэ налэгуэ, е мэ фэгуэ ни либян са бу ходи хуа. ²²Кэсы вэму щён ба ни тинйихарни, йинцысы вэму жыдони, жынму ба ниди жыгэ жёхуэй сыжу-баха фандуйдини.

²³Таму лян Павел ба йүмянди жызы динхали. Нэйтян хошо жынму шудо Павел жүди дифоншонли; Павел да ганзо до хили ги таму жёнли Анлаху Гуйжяди Хо Щинвынли.

Та чечү Муса шынжынди фалү лян данлин шынжынмуди фу чүанли тамули, жё таму щинфу Эрсани. ²⁴Юди жын щинфули Павел фәхади хуали, юди мә щинфу. ²⁵⁻²⁶Таму йигә лян йигә зынжонлиди йиху, зуди сыхур, Павел лин-йирни фәли йижү хуа:

– Анлахүди Рух чечү Исаяя шынжын ги нимуди зү-зү-быйбый фәхади хуасы жынди: Анлахү фәди: «Ни чи ги жыгә минжын фә:

„Ниму тинни, кәсы бу минбый;
лян нянжин канни, кәсы канбужян,
²⁷йинцысы жыгә минжынди щин ниндәли.

Таму ба эрдуә сыйчүли,
ба нянжин бичүли,
дан бусы жымузя, тамуди нянжин яндин канжянни,
эрдуә яндин тинжянни,
щин яндин дунни, йиху таму жуангуэләни,
Вә, Анлахү, зу ба таму канхони“».

²⁸⁻²⁹Павел кә фәди:

– Йинви жыгә, жё ниму ду жыдоха: ги вэдожынму ба Анлахүди жү минди Щинвын кәжя фәли. Таму тинни!

³⁰Павел зә дахади фонзыни жүли эр нян. Сый дан до та гынчян лә, Павел ба таму ду жешудини. ³¹Павел ба данзы фонда чуанжәли Анлахү Гуйжяди Хо Щинвынли, жетәли Эрса Мәсих Жонгуйди сычинли; сый е мә донгуа та.



**Китабушон сыхуанхади дин
ёжинди хуа**

Хуэйзү-вурус хуадян

Китабушон сыхуанхади дин ёжинди хуа

АДАН – Анлахұ зуэзохади туйигә жын, йиче жынмуди зўщян.
АДАНДИ ХУБЫЙ – зэ Торати зэмусы Зэбур Китабушон «Аданди Хубый» жыгә хуади йисысы «жын», йинцысы йиче жынму дусы Адан шынжынди хубый; зэ Инжил Китабушон Эрса Мэсих ба гэжя жёди «Аданди Хубый», йинцысы Тасы Анлахұ дафалэди дажю жынмуди Жын; Та гуон бусы жынди хубый, Та хансы Анлахұ щинэди Эрзы (кан «Давуди Хубый», «Мэсих»).

АНЛАХЎДИ ГУЙЖЯ – жыгә хуади йисысы: Анлахұ ю чүанли дэ нынгу ба чүан шыже зущён йигә гуйжя гуанни.

АНЛАХЎДИ РУХ – *Рохалхұдұс (араб йүян)*, зусы Анлахұ йинавар юди Лилён, хан нын фә жысы Анлахұди Жиншын.

АНЛАХЎДИ ХО ЩИНВЫН – *Инжил (араб йүян, Евангелион – грек йүян)*, жыгә щинвын (хуа) литу фэдисы Анлахұди Эрзы, Эрса Мэсих замужя до дижешон лэли, ба йиче жынмуди мин жүохали (кан «Инжил»).

АНЛАХЎДИ ЭРЗЫ – Анлахұди Хуа чынли жынли, Эрса Мэсихли, зэ заму донжунни гуэли жызыли.

АПОСТОЛМУ (*грек йүян*) – жыгә хуади йисысы «дафачиди жынму»; зэ Инжил Китабушон жыгә минзы зыфэдисы Эрса Мэсихди шыэргә манламу; Эрса ба таму дафади чи, жё таму ба Анлахұди Хо Щинвын чуанжёли.

АХЫР ЗЭМАНИ (*араб йүян*) – жыгә хуа зыфэдисы дун-я до йиршонди сыхур, Анлахұди Эрзы, Эрса Мэсих ди эрбян до дижешон лэ, ги жынму дин зуйни.

БИФОН – ю шын йисыди дуандуарди йигэ шёфэ.

БЫЙ МЭМЭ – шинфу Эрса Мэсихди жынму шудо йидарни чы чыдили. Таму бый мэмэ зэмусы чыли, жымужа зүди ба Эрса Мэсихди вучон жичелэдини.

ВЕЕЛЬЗЕВУЛ (яхүти йүян) – иблисди йигэ минзы (кан «иблис»).

ВЭДОЖЫН – данлинди жёмынди жын.

ВУСТА – рабби (яхүти йүян), зусы «жёмьнди сыфу»; зэ Инжил Китабушонсы Эрса Мэсихди йигэ минзы.

ГАЛИЛЕЯ – Палестинади быйбонгэ дифон. Жиргэ жыгэ дифон зэ Израил гуйжяни.

ГОДЫН ШОНЛЁН ХУЭЙЙИ – *Синедрион (грек йүян)*, жыгэсы яхүти жынмуди дин годи хуэййи. 70-гэ яхүтиди ахунму, да ахунму дэ данлинди яхүти жёмьнди жынму цанжя жыгэ хуэйидини. Синедрион толүн жёмьн лян жынжы вынтидини, е нын ги жынму дин зуйни. Эрса Мэсих зэ дижешонди сыхур, Римди хуоншонди дэбё ба жыгэ хуэййиди динжүэ дан бу жынли, жыгэ динжүэ бу нын чын. Кэсы Римди жынму ба яхүтиди синедрионди хуа ду зунхүли.

ГРЕКЖЫНМУ – Эрса Мэсихди сыхур зэ Да хэди (Дижунхэди) дунбогэди хэянзы гынчян жүди йиче жынму, есы зэ Греция жүди жынму. Нэхур минзү жунжянни на грек йүян фэ хуадини. Китабушон ба «бусы яхүти жынму» е жёди «грекжынму».

ГҮНАХАР – жысы бу тин Анлахүди минлинди, бу воншён жочү Анлахүди фынфу ганди.

ГҮРБАНИ – жысы ги Анлахү жүхади сынлин, фичин дэ дунши.

ДАВУ – шынжын, Израилди ди эргэ хуоншон (та гуан гуйжяди сыхур бонжерсы замуди шыдэ зочянди 1010-970 няншон). Давусы щеха Зэбур Китабуди шынжынму литуди йигэ. Тасы Эрса Мэсихди зүщян.

ДАВДИ ХУБЫЙ – Мэсихди йигэ минзы (кан «Мэсих»), йинцысы яхүти жынму сылэнди, Мэсихсы Даву шынжынди хубый.

ДИАКОН (грек йүян) – зэ жёхуэйни ган гунсыди жын; апостолму дэ пресвитермуди бонбан.

ДИНАРИЙ – Рим гуйжя сыйүнгүэди йигэ йинзы чян. Нэгэ сыхур йигэ гунжын зў йитян хуэ нын зын йигэ динарий.

ДУЭЗЭХЭ (араб йүян) – жыгэ хуа зыфэдисы Анлахұ ги ю гўнахарди жынму динли зуйди йиху, таму шу кўнанди дифон.

ДЭЦЭ АНЛАХҰ – фэ буходи, ма Анлахұди хуа.

ЁДУН – яхұти жынму жочұ тамуди куйчын ба мэти зэ саниди ёдун литу мэдини.

ЖЁХУЭЙ (ЭРСАДИ ЖЁХУЭЙ) – шинфу Эрса Мэсихди йиче жынму, есы таму шудо йидарниди хуэйи.

ЖИНШЫН – жынди дин ёжинди йигэ буфын; ба жыгэ лян араб хуа хан жёди «рух». Жиншын бу щён шынти йиён, ба та лян нянжин канбужян; жиншын бу нын вучон, та йинавар хуэдини.

ЖҰХҰТИ – данлинди минзы: Яхұти Искарриот. Искарриот дифоншонди йигэ яхұти жын, Жұхұти зочян лян данлинди шыйигэ манламу тинли Эрса Мэсихди жётёли. Йиху та ба Эрса Мэсих мэхұчили.

ЖЫГЭ ДУН-ЯШОНДИ ВОНЗЫ – иблис.

ЗИЛОТ – жыгэ минзыди йисысы «Шинэ зўгуйди жын». Нэгэ сыхур яхұти жынму литу ю жымужяди йибазы жынлэ. Нэщезы жынму шинэ тамуди жёмын дэ зўгуйни, вонщёнди да Рим хуоншонди япыйшон жефончўлэни.

ЗОНГУЙ – хахуэди гуй (девузы), та нын жин жынди кэлон литу, нын ба жын начұ; тасы иблисди хуэжи.

ЗЭБУР – Китабу литуди йибын фу (кан «Китабу»).

ЗЭКАТИ (араб йүян) – зынха чянди шы тир; ба жыщезы чян ё ги Анлахұ жүгини.

ЗЭ ФИ ЛИТУ ШИ – Йихия шынжын зэмусы Эрса Мэсихди манламу ба жынму зэ фи литу вон ганжинни щили, зыфэдисы жыщезы жынму шущин, ба тамуди гўнахар жынни, вончұ Анлахұ жуангүэлэни, ба Эрса Жонгуйди жынчынни, зу жымужя Анлахұ ба тамуди гўнахар фоншэни, ба тамуди мин жүохани.

ИБЛИС (араб йүян) – фандуй Анлахұди зонгуй, йиче данлинди зонгуйди вонзы.

ИБРАЦИМЭ — шынжын (бонжерсы замуди шыдэ зочянди 3850 няншон), яхўти жынмуди зэмусы йиче семит жынмуди зўщян.

ИЛИЯС — видади шынжын (бонжерсы замуди шыдэ зочянди 2900 няншон). Анлахў ба та надо тяншонли. Яхўти жынму сылёнди, Мэсих до дижешон лэди йичян, Илияс шынжын щянтунни ё лэни.

ИНЖИЛ (*грек, араб йўян*) — жыгэ хуади йисысы «хо щинвын». Инжилсы Китабуди йигэ буфын. Ба Инжил кэфынди сыбын фу: йибынсы Эrsa Мэсихди манла Матфей щехади, йибынсы Марк щехади, йибынсы Лука щехади зэмусы йибынсы Эrsa Мэсихди манла Йихия щехади фу. Жыщезы фушон ду щедисы Эrsa Мэсих гуэхади сынхуэ, Тади жёмын ганбан, Тади жёщүэ, Та щянхади кэрамэти, Та замужя вучонли зэмусы йўанхуэй замужя хуэли (кан «Китабу», «Анлахўди Хо Щинвын»).

ИРОД — зэ «Инжил» дэ «Апостолму ганхади сычин» фу литу вугэ жын нанди жыгэ минзы, таму зусы:

1. Видади Ирод, замуди шыдэ зочянди да 40 нян до 4 няншон тасы Палестинади хуоншон. Видади Ирод вучонли йиху, тади сангэ эрзы ба тади гуйжя фынкэ-лэли: — ба Иудея лян Самария ги Ирод Архелай фынгили (та гуан жыщезы дифонди сыхурсы замуди шыдэ зочянди 4 нян — замуди шыдэшонди 6 нян); — ба Галилея лян Перея ги Ирод Антипа фынгили (та гуан жыщезы дифонди сыхурсы замуди шыдэ зочянди 4 нян — замуди шыдэшонди 39 нян); — ба дун-быйбонгэди дифон ги Филипп фынгили (та гуан жыщезы дифонди сыхурсы замуди шыдэ зочянди 4 нян — замуди шыдэшонди 33-34 нян).

2. Йиче Иродму литу Ирод Архелайсы дин дэди хуоншон. Ба тади минзы зэ Матфей щехади Инжил литу (2:22) тифэдини.

3. Ирод Антипа (хуэйжэсы Ирод Тертрарх), йинви щён ба Иродиада (кан «Иродиада») чўшон, та лян гэжяди пэе линганли. Йихия шынжын ба Ирод ви жыгэ ганбан шушыли, Ирод ба шынжын ядо банфонзыни,

йиху садёли. Зусы жыгэ Ирод ба Эрса Мэсих ги Пилат дафачи, жё дин зуйни.

4. Ирод Агриппа I – жысы Вида Иродди йигэ сунзы. Зэ замуди шыдэшонди 37-44 няншон та ба Палестинади заёнди дифон жыгуанли. Та замузя вандёли зэ «Апостолму ганхади сычин» фу литу тифэдини (12:20-23).

5. Ирод Агриппа II – жысы Ирод Агриппа I-ди эрзы. Та ба дадади вэр зэ замуди шыдэшонди 48 няншон жаншонли. Вын апостол Павелди гуансыди сыхур, жыгэ Агриппа зэ гэжяди хуоншон вэршон зуэди тинли (кан «Апостолму ганхади сычин» 25:13 – 26:32) Павелли.

ИРОДДИ ЖЫНМУ – гыншон яхүтиди хуоншон Ирод Ан-типа зуди йибазы жын, щёнчү тади йибазы жын.

ИРОДИАДА – Филиппди пэе (Филиппсы Вида Ирод хуоншонди эрзы). Та ю йигэ нүрни, минзы жёди Саломия. Тади нанжын Филипп хан мэ вучонди сыхур, Вида Ирод хуоншонди данлинди эрзы, минзы жёди Ирод Ан-типа, ба Иродиада чүшонли.

ИСРАИЛ – 1. Ягүбэ шынжынди данлинди минзы. 2. Шы-эргэ Ягүбэ шынжынди эрзы зэмусы тамуди хубый; 3. зыфэдисы йиче яхүти жынму.

ИСХАР – шынжын, Ибрацимэ шынжынди эрзы.

ЙИХИЯ – 1. Шынжын, Закария яхүти ахунди эрзы. Анлахү жё та зэ Эрса Мэсихди туни лэ, ба жынмуди щин шөлүхани. Йихия ба жынму лян фи щили, жё таму шущин, ба гэжяди гўнахар жынли, зу жымузя ба Эрса Жонгуйди жешули, Анлахү ба тамуди гўнахар фоншэли. 2. Эрса Мэсихди йигэ манла, Зеведейди щё эрзы, Ягүбэди щүнди.

КАНАНИТ – кан «Зилот».

КЭВУ-СЫНЗА ДУНЩИ – жыгэ хуа ту йихуэй зэ Даниил шынжынди фушон тифэдини (9:27), йисысы жымугэ:

1. Йигэ жя-хўдади ёнзы. Ба жыгэ жя-хўда Селевкидди хуоншон Антиох Епифан зэ замуди шыдэ зочянди 167 няншон гэдо Анлахүди Иерусалим сы литули;

2. Римди жүндуй; таму зэ замуди шыдэшонди 70 няншон ба дуэйибанзы Иудея дифон зэмусы Иерусалим эрлансандёли;

3. Мэсихди дүшман, Антихрист. Ахыр зэмани лэди зычян, та жочү Анлахү зэмусы Анлахүди минжынму фанчелэни.

КИТАБУ (араб йүян) – ба Анлахү жё Тади шынжынму ги жынму шехади фу йиман жёди Китабу (Китабу Мукадас). Жышезы фусы Торати, Зэбур, Инжил зэмусы данлинди. Зэ Инжил фушон «Китабу» жыгэ хуа сүчон зыфэдисы Торати дэ Зэбур.

КОДРАНТ – Рим гуйжя сыйүнгүэди йигэ тунчян; йигэ кодрант бонжерсы динарийди 1/64 (кан «динарий»).

КЭРАМЭТИ – Анлахү гэжя ганхади хуэйжэсы Тади шынжын ганхади чёчи сычин.

ЛЕВИТЖЫНМУ – Ягүбэ шынжынди эрзы Левийди хубыйму. Зэ Иерусалим сы литу ги Анлахү ган гунсыди сыхур таму ги ахунму бонмонлэ.

ЛЕПТА – Рим гуйжя сыйүнгүэди йигэ суй тунчян; йигэ лепта бонжерсы кодрантди 1/2 зэмусы динарийди 1/128 (кан «кодрант» дэ «динарий»).

ЛУТ ШЫНЖЫНДИ ПӘЕ – Лут шынжынди пәе ба Анлахүди фынфу мэ зунхү, зу бянчынли янжүзыли.

МАНЛА – гыншон Эрса Мэсих йинавар зуди жын зэмусы жочү Тади минлин ганди жын; е нын фә: «шүөсын».

МАРИАМ – 1. Эрса Мэсихди мама. 2. Магдала дифоншонди нүжын; Эрса Мэсихди нүманламу литуди йигэ. 3. Шё Ягүбэ лян Иосияди мама; Эрса Мэсихди нүманламу литуди йигэ.

МЭСИХ (яхүтиди йүян, грек йүян фәди «Христос») – жыгэ хуади йисысы «лян шён-ю мэхади жын». Анлахү ба яхүтиди хуоншон, ахун дэ шынжын жанчүлэди сыхур, Та жё шынжынму ги жанчүлэди жынди тушон мәли шён-юли. Жы зусы ги жанчүлэди жынмуди йигэ жихо. Яхүти жынму дынли йигэ Мэсихли, воншёнди жё нэгэ Мэсих ба таму да Рим хуоншонди япыйшон жефончүлэни, жё таму дый гэжяди гуйжяни. Шинфу Эрса Мэсихди жынму

сылёнди, Та зусы Мэсих, йинцысы таму жыдони, Анлахұ ба Та жанчўлэли, жё Та ба йиче жынму да гўнахарди япыйшон жефончўлэни, жё таму йинавар ю минни.

МЭЮ МЯНЖЁДИ МЭМЭ ЖЕЧИ – жысы яхўти жынмуди жёмын жечи. Ба яхўтиди Пасха жечи гуэли йихў лянчў читян гуэ жыгэ жечидини. Гуэ жыгэ жечиди сыхур, яхўти жынму бу нын чы ю жёмынди мэмэ.

МЭХУЭЙЛЭ – жыгэ хуа зыфэдисы Анлахўди Эрзы, Эrsa Мэсих ба йиче жынмуди гўнахар зэ Анлахўди мянчан мэхуэйлэли зэмусы ба жынму, лян гуэгуэчиди жын йиён, да иблисди япыйшон жефончўлэли.

МУНАФИК – жуонди хожын.

МУСА – видади шынжын (замуди шыдэ зочянди 3400 няншон); Анлахў жё та ба яхўти минжын да Египетди япыйшон жефончўлэли. Зэ Синай госаншон Анлахў ги Муса ба Тади шыгэ фынфу зэмусы йиче данлинди минлин ду гигили.

МУСАДИ ФЫНФУ (ФАЛУ) – жысы зэ Торати Китабу литу шехади йиче фынфу дэ минлин. Ба жыщезы фынфу Анлахў пинди Муса шынжын ги яхўти жынму дигили, жё таму зунхўни.

МУТУ ШЫЗЫ – ю шызы (†) ёнзыди муту жуонзы. Зэ жы-мугэ муту шызышон Римжынму ба фанжын диндо готу, ги таму динли сызуйли.

НЯНЖИНЖЫН – шищүэ Китабуди жын. Эrsa Мэсих зэ дижешонди сыхур, яхўти жынму ба нянжинжынму ду зунхўдини.

ПАСХА ЖЕЧИ (яхўтиди йүан) – яхўти жынмуди туйигэ жечи, зыфэдисы бонжер замуди шыдэ зочянди 3400 няншон Анлахў замузя ба яхўти жынму да Египетди япыйшон жефончўлэли. Жыгэ жечишон яхўти жынму ба йигэ ёнгозы зэди ё чышонни. Ба жыгэ жечи зэ сыйүэни гуэдини.

ПИЛАТ – ба Яхўтиди гуйжя гуанлиди Римди гуанжын (замуди шыдэшонди 26-36 няншон).

ПРЕСВИТЕР (грек йуян) – зэ жёхуэйни жысы: ложын, линшужын.

САДДУКЕЙЖЫН (*яхүтиди йүян*) — Эрса Мэсих зэ дижешонди сыхур, жыгэсы яхүти жёмын жынму литуди йи-базы жын. Хошо саддукейжынсы яхүти жынмуди го-дын шонлөн хуэйи йүанму, юшезысы да ахунму. Таму лян фарисейжынму йиён, ниннинди зунхү Мусади фынфудини, кэсы таму гуон жын Торати Китабуни, ба данлинди Китабу мө жынди. Саддукейжын мө шинфу вучонлиди жын ахыр зэманиди сыхур нын йүанхуэй хуэни, йинавар ю минни, е мө шинфу ю Тянщян дэ зонгуйни.

САМАРИЯДИ ЖЫНМУ — яхүти жынму лян Палестинади данлин минзүди жынму хуэдо йидарни йиху чынзохади йигэ минзү. Самарияди жынму гуон шинфу Торати Ки-табулэ, таму е лян яхүти жынму мө лэвон.

СИНАГОГА (*грек йүян*) — яхүти жынму мый йигэ шанбэ лэ бэвон Анлахү зэмусы тин Китабуди фонзы. Эрса Мэсих зэ дижешонди сыхур, яхүти жынму жүди мый йигэ чын-пуни ду ю синагогани. Мый йигэ синагога ю тади яхү-тиди йимамуни.

СУЛЬМАНЭ — Даву шынжынди эрзы, Израилди ди сангэ хуоншон (замуди шыдэ зочянди 3000 няншон).

СЫ — Иерусалим чынпуниди яхүтиди сы. Яхүтиди ахун гуон зэ жыгэ сыни ба ню, ён, чёр, мэмэ, чин-ю ги Анла-хү жүгидини. Яхүти жынму гуэ жёмын жечиди сыхур, таму зэ нэтар шудо йидарнини. Замуди шыдэ зочянди 2900 няншон миншындади яхүтиди Сульманэ хуоншон зэ Иерусалим чынпуни ба туйигэ сы щюгэчелэли. Йиху зэ замуди шыдэ зочянди 587 няншон Вавилон жынму ба жыгэ сы цыйли йибян. Кэсы зэ замуди шыдэ зочянди 520-515 няншон ба жыгэ сы йүанхуэй щюгэчелэли. Яхү-тиди Вида Ирод хуоншон гуан яхүти гуйжяди сыхур (зэ заму шыдэ 37-4 нянди йичян) ба Иерусалимди сы кэ шыдуэли йибян. Кэсы зущён Эрса Мэсих фэхэди йиён, Римди жүндуй зэ замуди шыдэшонди 70 няншон ба жы-гэ сы кэ цыйдэли, до жиргэди жызы ба жыгэ сы зэ мө дый щюгэчелэ.

ТЯНШОДИ ГУЙЖЯ — кан «Анлахүди гуйжя».

ТЯНЦЯН – Анлахү зуэзохади мәю шынтиди, ю эргилиди хуэвэр. Тянцян зэ тяншон жүдини, кэсы таму жочү Анлахүди фынфу нын до дижешон, зу ба Анлахү жё таму ганди сычин ганни.

ФАРИСЕЙЖЫН (*яхүтиди йүян*) – Эрса Мэсих зэ дижешонди сыхур, жыгэсы яхүти жёмын жынму литуди йи-базы жын. Таму ба Мусади фынфу дэ зүзү-быйбыйди куйчын зунхүди жиндихын, чинчир фынзэ зэмусы бэ-вон Анлахүдини. Лян саддукейжын бу тун, таму шинфу вучонлиди жын ахыр земаниди сыхур нын йүанхуэй хуэни, йинавар ю минни, е щинфу ю Тянцян дэ зон-гуйни.

ХАРАМ – жочү Анлахүди фынфу жынму бу нын ганди гә-ёнди сычин, билүн: чы жүжуди.

ХУЭКЫН – кан «Дуэзэхэ».

ЧУАНЖЁ – ба Анлахүди хуа ги жынму жёнди фёди.

ШАНБЭ – *шаббат* (*яхүти йүян*), жыгэ хуади йисысы «нанвын», «хуанха». Жочү Анлахү гихади фалү жысы йигэ гуйжун йитян. Жысы «Шыгэ фалү» литуди ди сыгэ фалү. Шанбэ жыйитян яхүти жынму бу нын ган хуэ (да жүмади хушон до шанбэди хушон), таму ё до синагогани чи бэвон Анлахүни зэмусы тин нян Китабудини. Йиху нянжинжынму лян фарисейжынму динли хошо куйчын, шанбэ йитян ба са сычин нын ган, ба са сычин бу нын ган.

ШУЦИН – хухуэй, жын гэжяди гүнахар зэмусы вонщён гэбян гэжяди ганбан, вончян шэлү зэ бу ган гүнахарли.

ШУФИДИ ЖЫН – ги Римди гуйжя шули чянди яхүти жын. Данлинди яхүти жынму ба шуфиди жынму ду хынхэдилэ, йинцысы таму ги Римди хуоншон ган гунсыдини, ди эр йилэзы таму ба шухади чянди йигэ буфын ги гэжя шынха, зу жымужя чынха ючянханли.

ШЫНЖЫН – *наби* (*араб йүян*), жыгэ хуа зыфэдисы, ба Анлахүди хуа тинли йиху ба жыгэ хуа ги жынму нын фёди жын. Шынжын жё жынму ба Анлахү хэпани, ба Тади фынфу ганни зэмусы бу жё ган гүнахар. Шынжын нын жыдо жёнлэ ё йүди сычинди.

ЩИ ЖЫНМУ (ЗЭ ФИ ЛИТУ) – жысы жёмынди йигэ куйчын. Зочян яхүти жынму ба вэдожынму зэ фи литу щили, жё таму жешули яхүтиди жёмынли. Эрса Мэсих лэди зычян, Йихия шынжын е ба жынму зэ фи литу щили, жё таму шущин, ба гэжяди гўнахар жынли. Лян жыгэ йиён, Эрса Мэсихди манламу е ба щинфу Тади жынму лян фи щили, жё таму шущин, ба гэжяди гўнахар жынли, ба Эрса Жонгуйди жешули, Анлахү зу ба тамуди гўнахар фоншэли.

ЩИН ХЭТУН – жысы Эрса Мэсих на гэжяди ще лян йиче жынму динхади хэтун. Та зэ муту шызышон динди сыхур, ви шыжешон мый йигэ жын тонли щели, дажо жынмуди мин.

ЮБОНГЭ – зуэдо хуэйжэсы зандо булүн сыйди юбонгэ – жыгэ зэ яхүти жынму жунжянни тэнэдихын.

ЯГЎБЭ – 1. Шынжын, Исхар шынжынди эрзы. Тасы яхүти жынмуди шыэргэ зўди зўщян. 2. Эрса Мэсихди йигэ манла, Зеведейди эрзы, Йихияди гэгэ. 3. Эрса Мэсихди йигэ манла, Алфейди эрзы.

ЯХЎТИ (Иуда) – 1. Ягўбэ шынжынди эрзы. 2. Тади йиче хубый, зусы яхүти жынму.

ЯХЎТИ ДИФОН (Иудея) – 1. Яхүтиди гуйжя, зэ Палестина дифонди нанбонгэ; яхүти жынмуди зўгуй. Тади дин дади чынпусы Иерусалим. 2. Яхүти гуйжя гынчянди дифон, нэтар жўди хошо яхүти жынмулэ.

ЯХЎТИ ЖЫНМУ (Иудеи) – Яхүти шынжынди йиче хубый.

ЯХЎТИДИ АХУНМУ – зэ Иерусалимди сыни ган гунсыди жынму. Зэ нэтар таму ба гёнди гўрбани (ню, ён, чёр, мэмэ, чин-ю зэмусы данлинди) ги Анлахү жүгили.

ЯХЎТИДИ ДА АХУН – 1. Яхүтиди ахунмуди тузы зэмусы годын шонлён хуэйиди жўщи. Жочў Мусади фынфу, та зэ Анлахү гынчян ба данлинди ахунму бу нын ганди гунсы нын ган. Мый йинян та йихуэй нын жин Иерусалим сыниди дин гуйжунди вэрни; нэтар та ба ги Анлахү жүгиди ню, ёнди ще садо Анлахү лян жынму динха дянди щёнщёнзышон, зу жымужя Анлахү ба та гэжяди дэ йиче яхүти жынмуди гўнахар нын фоншэни.

2. Годын шонлён хуэййиди йүанму; таму жунжянни юдисы зочян донха да ахунди, юдисы да ахун йизў-йи-жяди жынму, юдисы данлинди ю да миншын ахунмуди йизў-йижяди жынму.

Хуэйзǔ-вурус хуадян

БА ГЭЖЯ ШИБЫЙ – оправдаться

БАНЖИН – спина

БИМИДИ СЫЧИН – тайное дело

БӘХӘ – мята

БОХЎ – защищать, охранять

БОХЎЖЫН – защитник

БУНАНВЫН – беспокойный, беспокоиться

БЫНБУ – парус

БЯНЖИЖЫН – редактор

ВАНЧУАН – полностью, без остатка

ВИХЎЗЫ – лодка

ВОНЗЫ – князь; здесь тоже: главарь, предводитель

ВЫН ГУАНСЫ – судить, разбирать дело в суде

ВЫНГУАНСЫДИ ЖЫН – судья

ГОНДО – осуждать

ГУАНЖЫН – представитель власти, правитель

ГУӘДОЗЫ – коридор

ГУЙЖУНДИ ВӘР – святилище Иерусалимского храма

ГУОНЛЁН – свет, сияние

ГУНБЭЗЫ – гробница

ГУНДО – справедливость, праведность

ГҮВА (ГҮВАЖЫН) – свидетель

ДАЖУНГУАН – генерал

ДАНЗЫ – кладь, бремя

ДАНЦУАН – опасный, опасно

ДИАКОН – служитель (в церкви)

ДИЖАН – унижать, униженный

ДИН ГУЙЖУНДИ ВЭР – Святое Святых Иерусалимского храма

ДИН ХЭТУН – заключать завет, договор

ДИНЖҮЭ – заключение, вывод, решение

ДИНХАДИ ЧЯН – установленная (законом), положенная (по закону) плата, назначенная плата

ДОЗЭЗЫ – наоборот

ДУЭМУ КЭЛЯН – горе, скорбь, несчастье

ДЭБЁ – представитель, посланник

ЁНВОН – медлить, мешкать

ЁНГОРФЫН – эпилепсия, припадок, падучая болезнь

ЙИНАВАР – всегда, вечно

ЙИНПАН – лагерь, стан

ЙҮНЗУН – никогда

ЙИТУЭХАДИ СЫЧИН – порученное кому-либо дело, вопрос

ЖЕГУЭ – результат

ЖЕМЭЗЫ – горчица

ЖЕФОНЧҮЛЭ – освобождать

ЖЕФОНЖА – освободитель

ЖЁНЖЫН – мастер

ЖИНЧЫН – столица

ЖИНЯНЦЁН – памятник

ЖОНФОН – палатка, скиния

ЖУВИДИ ДИФОН – окрестность; то, что находится вокруг

ЖУЩИ – председатель

ЖУЭЛЭ – ощутить, почувствовать

ЖУНВУ ТУЗЫ – тысяченачальник

ЖУНГУАН – офицер, сотник

ЖУНДУЙ – полк

ЖУНЧИ – оружие

ЖЫГУДИХЫН – очень достойный

ЖЫГУАНЖЫН – начальник, правитель

ЖЫНВУ – задача

ЖЫНЛИ-ДОДЭ – мораль, нравственность

ЖЫНФУДИ БАНФОНЗЫ – правительственная тюрьма

ЖЮМИНЖА – Спаситель

ЖЯБАН – ярмо

ЗАМУДИ ШЫДЭ ... НЯН ЗОЧЯНДИ – ... год до нашей эры

ЗАМУДИ ШЫДЭ ТУ ЙИГЭ БЫЙНЯНДИ – 1 век нашей эры

ЗАНЧЫН – соглашаться, быть «за»; одобрять, одобрение

ЗОНГУЙ – злой дух

ЗОФАН – восстание

ЗОФАНЖЫН – мятежник, бунтовщик

ЗЎЗЎ-БЫЙБЫЙ – предки

ЗЎТУЙ – родина

ЗЎЩЯН – прародитель, предок

ЗЫНЖОН – спорить, доказывать своё, скандалить

ЗЫЮ – свобода

ЙИНХО – банк

ЙИТУЭ – поручать, поручить

КЭВУ-СЫНЗА ДУНЦИ – мерзость

КУАЖЁН – славить, прославлять (Бога)

КУЙЖЯ – панцирь

КУЙЧЫН – обычай, обряд

КУЭЦУЭЖЫН – учёный, философ

КЭРАМЭТИ – чудо

ЛАНСАН – рассыпаться, рассеиваться

ЛАНСАНДЁ – разрушаться; разрушенный

ЛИСЫ – исторический

ЛИЦЁНЖЫН – переселенец, приезжий издалека

ЛУЭХУР – душа

ЛУНХУОН – сера

МАБАН – пути, оковы, колоды

МАНЧЁНХАДИ ХУА – сокровенное, сокровенное

МАФЫНБИН – проказа

МЭПАНШЫН – жернов

МИНЩЯН – ясно, понятно

МУНАФИК – лицемеры

НАНВИ – обижать

НАНВЫН – мир, покой

НЭЧИН – благоволение, благодать, милость, любовь

ПИПИН – критика, критиковать, обличать

ПРЕСВИТЕР – старейшина, руководитель церковной общины

РИМ ГУЙЖЯДИ ЖЫН – римский гражданин

РИМ ЖЫНФУДИ ЙУАНЗЫ – преторий

РУХ – дух

СОНФУ – смоковница

СУАН ГУА – колдовать

СЎЧОН – всегда

СЫНХУЭ – жизнь

ТЕМО – якорь

ТУНЛЎЖЫН – спутник

ФАЖОН – развитие, подъём, рост, успех

ФАЛУ – закон

ФАНДУЙ – выступать против, бунтовать, противиться

ФАНЛУАН – беспорядок, смута

ФАНЛЯН – предавать, не признавать

ФАНПАН – мятежник, изменник

ФА ЦЭ – стать богатым

ФИЖУНБИН – водяная болезнь

ФЭЖЯЗЫ – оратор

ФУГУЙ – богатство, ценность, имущество

ФЫНФУ – распоряжение, поручение

ФЫНБЫРДИ ЖЫНМУ – представитель какого-либо социального класса

ХЭТУН – завет, договор

ХЭХУАР – лилия

ХЭЩҮЭ – сплетничать, хулить, порочить, жаловаться, ябедничать

ХУБЫЙ – потомок, потомки, сыновья

ХУОНЛЮР – обманщик, лжец

ХУЭЙЙИ – собрание, совет

ХУЭЙЖАДУДИ – занимающийся чародейством

ХЭ ТАНТАНЗЫ БИНДИ ЖЫН – расслабленный

ХЭВАН – пристань (на берегу моря)

ХЭДО – остров

ЦАНЖЯ – участвовать

ЦУНЖУОН – село, деревня

ЦЭБЫЙ – богатство, имущество

ЧЁМЁДИ – изящный; ловкий

ЧЁНДОЖЫН – разбойник, грабитель

ЧИНЙУАН – дать согласие

ЧУАНЛИ – власть, сила

ЧУАНЖЁ – проповедовать

ЧУБАН – издавать

ЧУАН – весь, все, полностью

ШОДИ ЩЁН – ладан, фимиам

ШОНВОННЯН – былой, древние дни; от древних времён

ШУЙИ – мастерство

ШУЧЫН – урожай, плоды

ШУФИДИЖЫН – сборщик налогов, мытарь

ЩЁЖУНГУАН – офицер

ЩЁМЕ – ликвидировать, уничтожать

ЩЁН-Ю – елей, благовонное масло

ЩИНВАН – милость

ЩИНВЫН – известие, весть

ЩИЙУАН – театр

ЩИННИ ДИНЛИ ДЯН – принять решение

ЩУНФАН – убийца

ЩЯН КЭРАМЭТИ – совершать чудо

ЯНЖЮЙУАН – научно-исследовательский институт

ЯПЫЙ – угнетать, гнёт, иго